



PIZZOFAT

NAZIONALE

B. Prov.

BIBLIOTECA

VIII

48

NAPOLI

VITT. EM. III

BIBLIOTECA PROVINCIALE

Armadio

X



Palchetto

Num.^o d'ordine

3

~~41E-39~~

109

4

4-5*

B 7m

VIII

48-19



649.300

HISTORIÆ AUGUSTÆ SCRIPTORES SEX

ÆLIUS SPARTIANUS, JULIUS CAPITOLINUS

ÆLIUS LAMPRIDIUS, VULCATIUS GALLICANUS

TREBELLIVS POLLIO, FLAVIVS VOPISCVS

AD OPTIMAS EDITIONES
COLLATI

PRÆMITTITUR NOTITIA LITERARIA

ACCEDIT INDEX

STVDIIIS SOCIETATIS BIPONTINÆ



HADRIANUS.



EDITIO ACCURATA

BIPONTI

EX TYPOGRAPHIA SOCIETATIS

CIDJCCLXXXVII



SCRIPTORES
HISTORIÆ AUGUSTÆ



SEX HISTORIÆ
AUGUSTÆ SCRIPTORUM
VITÆ ET SCRIPTA

EX

GERARDI JOANNIS VOSSII

LIBRO II

DE HISTORICIS LATINIS.

ÆLIUS SPARTIANUS.

ÆLIUS Spartianus Imperatoris Diocletiani temporibus floruit: atque ad eum vitam misit Hadriani, Ælii Veri, Didii Juliani, Severi, & Pescennii Nigri. Ab eodem quoque traditam habemus vitam Antonini Caracalli: sed cui ea missa fuerit, libri non exprimunt. Item exstat vita Antonini Getæ, quæ Constantino Augusto nuncupatur. Verum eorum etiam vitas scripsisse, qui ante Hadrianum imperarunt, liquet ex initio vitæ Ælii Veri, ubi ait: In animo mihi est, Diocletiane Auguste, tot Principum maxime, non solum eorum, qui principem locum in hac statione, quam temperas, retentarunt, ut usque ad Divum Hadria-

Scripti, H. A.

a 2

num feci; sed illorum etiam, qui vel Cæsarum nomine appellati sunt, nec Principes, aut Augusti fuerunt, vel quolibet alio genere aut in famam, aut in spem principatus venerunt, cognitioni numinis tui sternere. *Ex quibus verbis etiam, quid sibi proposuerit, cognoscimus. De quo & in fine illius Augusti scribit:* Mihi propositum fuit, omnes, qui post Cætarem dictatorem, hoc est divum Julium, vel Cæsares, vel Augusti, vel Principes appellati sunt, quique in adoptionem venerunt, vel Imperatorum filii, aut parentes, Cæsarum nomine consecrati sunt, singulis libris exponere. *Verum non perfecisse, quod in animo habebat, argumento illud erit, quod is, qui paulo junior est, Fl. Vopiscus, auctor est, Aureliani vitam scriptam esse a nemine. Ceterum summus vir, Claud. Salmasius, testatur, in optimæ notæ excerptis Spartiani, quæ e Palatina habuerat bibliotheca, etiam Spartiano tribui, tum vitam Antonini Pii, Antonini Philosophi, Veri Imper. Pertinacis, Clodii Albini, & Opilii Macrini: quæ vulgo Capitolini creduntur: tum vitam Avidii Cassii, quæ Vulcatio Gallicano adscribi solet: tum Commodi, Antonini Diadumeni, Heliogabali, & Alexandri Severi, quæ Lampridii creduntur. De illis, Vulcatio & Lampridio tributis, quid statutam, inferius exponam. De istis vero, quæ Capitolini putantur, ita censeo, propter sola illa excerpta, eum, qui hæcenus vitarum illarum auctor creditur, antiqua possessione turbari non debere. Nec movet, quod hic singuli Imperatores singulis exponantur libris; Capitolinus vero dicat, se hunc morem servaturum, ut scubi possit, duos pluresque Imperatores uno*

volumine comprehendat. Nam non semper similiter sensisse, sed, cum prius libros singulos singulis destinasset, postea consilium mutasse, liquet ex initio vitæ Gordianorum. Qua de re plura in Capitolino dicam.

JULIUS CAPITOLINUS.

JULIUS Capitolinus ad Diocletianum Augustum vitam scripsit Antonini Pii. Etiam vitam consignavit M. Antonini Philosophi: sed non exprimunt libri, cui eam nuncupavit. Item Veri Imperatoris, quæ eidem dicata Diocletiano. Nisi illa potius Spartiani est. Ad hæc vitam Pertinacis. Tum autem Clodii Albini, quæ consecrata Constantino Augusto: non Diocletiano, quod putabat Casaubonus initio notarum in Spartianum: Præterea vitam Opilii Macrini, quæ ad eundem missa est Constantinum. Uti & duorum Maximinorum, & Gordianorum trium. Ejusdem quoque habemus Maximum & Balbinum: sed, cui eos miserit, ignoratur. Reliqui, quos scripserat, Imperatores perierunt. Ceterum non eandem in vitis istis perscribendis institit viam. Primum enim singulis Imperatoribus librum suum destinarat. Postea consilium id displicuit. En verba ipsius Capitolini, initio vitæ Gordianorum: Fuera quidem consilium, venerabilis Auguste, ut singulos quosque Imperatores, exemplo multorum, libris singulis ad tuam Clementiam destinarem, (nam id multos fecisse, vel ipse videram, vel lectione conceperam) sed improbum visum est, vel Pietatem tuam multitudine distingere librorum, vel meum laborem plurimis voluminibus occupare. Ubi non

tantum se mutasse sententiam dicit; sed etiam & prioris, & posterioris consilii causam exponit: prioris quidem, quod multi sic facere soleant, quorum exemplo purgat factum prius, de quo tum omnibus satis constabat; posterioris autem, quia si posthac plures jungat Imperatores, & sibi, scribendo, & Augusto, legendo, minus creaturus sit molestiæ ac laboris. Hunc in modum præfari voluit, ut omnes cognoscerent, cur non eandem nunc viam iniret, quam antea institisset.

ÆLIUS LAMPRIDIUS.

ÆLIUS Lampridius inter eos est, quos in vitis Principum perscribendis imitari se dicit Vopiscus in Probo suo. Scriptas ab eo habemus vitas quatuor istorum, Commodi Antonini, Antonini Diadumeni, Antonini Heliogabali, & Alexandri Severi: quarum duæ posteriores dicatæ sunt Constantino Augusto. Dubitari tamen possit, utrum vita illa Alexandri Severi auctorem habeat Lampridium. Vulgo quidem ei, etiam in principe editione Mediolanensi adscribitur. Sed Spartiano assignat optimus Palatinæ quondam bibliothecæ codex: uti & Robertus a Porta Bononiensis. Quin excerpta Spartiani, quibus ex eapse bibliotheca Salmastius usus fuit, non ei hanc modo vitam tribuunt, sed etiam illas trium Antoninorum, quas ante referebam. Sed hoc si verum est, nihil amplius Lampridii supersit. Verum non ego plus ausim fidei tribuere unis illis excerptis, quam ipsis codicibus Spartiani, & MSS. & excusis. Aut si excerptis illis fidem derogari durius videtur: dixero, eundem mihi Ælium

Spartianum, atque Ælium Lampridium videri. Ausonii isthoc notum:

Tria nomina nobiliorum.

Porro, præter tres quatuorve istas, aliorum quoque vitas reliquerat Spartianus: easque inter Marci Antonini, cujus ipse meminit initio vitæ Commodi. Non tamen pertexuisse omnium vitas usque ad Constantinum, vel etiam Diocletianum, immo ne Aureliani quidem vitam edidisse, clare colligitur ex Augusti ejus vita a Vopisco scripta.

VULCATIUS GALLICANUS.

VULCATIUS Gallicanus V. Cl. (eos autem clarissimos dixere, qui dignitatis essent senatoriæ) quid scribere propositum habuerit, & qua atate vixerit, hæc ejus verba ostendunt: Proposui, Diocletiane Auguste, omnes, qui Imperatorum nomen, sive juste, sive injuste, habuerunt, in literas mittere, ut omnes purpuratos Augustos cognosceres. Sed hodie nihil ejus habemus, præter vitam Avidii Cassii, unde verba ista depromsi. Immo nec omnium tradidisse vitas, certum est: quandoquidem ante Vopiscum vitam Aureliani prodidit nemo, ut initio illius Augusti locuples ipse testis est. Vopiscum autem paulo post Vulcatium scripsisse, ex eo colligo, quod Trebellii Pollionis meminerit initio Aureliani; Julii autem Capitolini, & Ælii Lampridii, initio Probi. Atqui isti atate Vulcatii vixere. Sed nec illud memoratu indignum, in optimis & antiquissimis Spartiani excerptis, quæ sue-

re in bibliotheca Palatina, illam Avidii Cassii vitam tribui Spartiano, ut doctissimus Salmasius observavit. Qui & tandem eo inclinat, ut eum genuinum esse auctorem arbitretur: idque propter tam multa, quæ conveniunt, uti ætas, dictio, etiam propositum, quia, ut Lampridius ait, statuisse se omnes, qui post Julium Cæsarem vel Augusti, vel Cæsares, vocati essent, singulis explicare libris; ita & apud scriptorem vitæ Avidii Cassii legas, proposuisse eum, omnes, qui Imperatorum nomen, sive iuste, sive injuste habuerunt, in literas mittere, vii ante etiam audivimus. Adde, quod, ut Lampridium constat non præstitisse, quod proposuerat, ita nec scriptor vitæ Cassianæ id sibi exsecutus. Nam Vopiscus negat, quemquam ante se Aureliani vitam literis signasse. Atque item Vopiscus plane præterit Vulcatii nomen, etiam ubi occasio ejus memorandi optima erat: ut cum in tradendis Principum viis imitari se ait Gargilium Martialem, Julium Capitolinum, Ælium Lampridium, ceterosque, qui hæc, & talia, non tam diserte, quam vere, memoriæ prodiderunt. Verum sic dicere possumus, Vulcatium hic inter ceteros illos comprehendendi: nomen vero ejus non exprimi hoc loco, quod etsi proposuisset de omnibus Imperatoribus scribere, idque fortasse amulatione aliqua Spartiani compulsus, tamen paucorum admodum vitam, immo fortean non aliam, quam illam Avidii, in lucem edidisset. Et si ea Avidii a Vulcatio scripta non est, unde factum dicemus, ut non tam Spartiani, Lampridii, aut Capitolini nomen, (in quo proclivis fuisset error in miscella ista historia, ubi nunc hoc, nunc illud, nunc istud nomen inscribitur) quam no-

men legatur *Vulcatii Gallicani*, quod non alibi occurrit, nec tamen a librariis temere præscriptum videtur.

TREBELLIVS POLLIO.

PROXIMUS est *Trebellius Pollio*. Is in principe editione, quæ *Mediolani* prodit, *Trevellius* dicitur, sed perperam. Nam in antiquis inscriptionibus constanter legas, *Trebellius Pelidiamus*, *Trebellius Marinus* proe. *Trebellia Tyche*, alique id genus. Adde, quod *Trebellius* factum est e *Trebius*: quod in iisdem inscriptionibus crebrum: uti, *Trebius Germanus*, *C. Trebius Longus*, *Trebia C. F. Filumena*, ac similia. Immo in membranis hic ipse scriptor *Trebius Pollio* nominatur, ut *Salustio* monitum. *Pollio* hic, ut *Flavius Vopiscus* in *Aureliani* vita scripsit, a duobus *Philippis* usque ad *Divum Claudium* & ejus fratrem *Quintillum*, Imperatores, tam claros, quam obscuros memorie prodidit. Sed non habemus hodie vitam *Philipporum*, vel *Decii*, qui *Philippis* successit, vel *Galli*, & *Volusiani*, qui post *Decium* imperarunt. Quin e vita *Valeriani* patris, qui post *Gallum* & *Volusianum* imperium tenuit, extrema solum supersunt. Ac præterea habemus vitam *Valeriani filii*, item *Gallienorum* duorum, & *XXX* tyrannorum, qui *Gallieni* temporibus imperium occuparunt. Ad hæc *Divi Claudii*. Quod vero volumen suum de *XXX* tyrannis inscripsit, eo respexit, quod *Athenis* a *Lyfandro* captis, *XXX* tyranni imperarunt. Bellum videbatur, si totidem tyranni *Valeriani* ac *Gallieni* temporibus imperasse vi-

derentur. Verum non plures reperit, quam XXIX. Itaque, ut numerum rotundum impleret, adjecit Valentem superiorem, alieni temporis tyrannum, ut quem ipse Decii temporibus rebellasse fateatur. Hoc vere est, quod Græci dicunt, δουλεύειν τῇ ὑποδύσει, ac Lesbiorum more, in structura uti plumbea regula, qua fit, ut non paries normæ, sed norma parieti accommodetur. Sane si extra Valeriani & Gallieni tempora ire licuit, quot alios adjicere potuit tyrannos! Sed ut in eo Pollionem excusare non possumus, ita in illo culpam non meruit, quod duas addidisset feminas, Zenobiam & Victoriam. Viri quidem docti, qui in templo pacis convenire, deque literis tractare solent, illud in Pollione reprehendebant, quod, XXX tyrannos pollicitus, immiscuisset duas, ut sic dixerim, tyrannas, vel, ut Græci mallent, Τυραννίδας. Verum ea parte plane injurii fuerunt. Nam, quod feminas vulgo non vocamus tyrannos, haud magis mirandum, quam quod nec tyrannæ appellantur. Nempe id rei magis insolentia, quam vocabuli vitio fit. Cur enim non eam tyrannam æque, ac furem, aut homicidam dicere liceat? Atque ut non aliter, quam tyrannam vocitare liceret, sane sic quoque sub tyrannorum nomine, velut sub digniori genere, recte tyrannas complectamur; haud aliter, ac qui poetas laudet, etiam poetrias intelligat. Pollio nihilominus, monitus ab amico propterea se vapulare, quod, pollicitus XXX tyrannos, tyrannas immisceret, secunda editione XXX illis tyrannis duos adjecit, ut, si feminæ non viderentur tyrannorum nomen mereri, saltem, duobus illis additis, justus expleretur numerus. Atque hoc ostenditur.

dunt verba illa, quæ adjecit post editionem primam: Hæc sunt, quæ de triginta tyrannis dicenda videbantur: quos ego in unum volumen idcirco contuli, ne, si de singulis singula quæque narrarem, nascerentur indigna fastidia, & ea, quæ ferre lector non posset. Studiose in medio feminas posui ad ludibrium Gallieni, quo nihil prodigiosius passa est respublica Romana. Duos etiam nunc tyrannos, quasi extra numerum, quod alieni essent temporis, additurus: unum, qui fuit Maximini temporibus; alterum, qui Claudii, ut tyrannorum XXX viri hoc volumine tenerentur. Quæso, qui expletum jam librum acceperas, boni consulas, atque hos volumini tuo volens addas: quos ego, quemadmodum Valentem superiorem huic volumini, sic post Claudium & Aurelium, his, qui inter Tacitum & Diocletianum fuerunt, addere destinaveram. Sed errorem meum major historiæ diligentia tuæ eruditionis avertit. Habeo igitur gratiam, quod titulum meum prudentiæ tuæ benignitas implevit. Nemo in templo Pacis dicturus est, me feminas inter tyrannos, cum risu & joco, tyrannas videlicet, & tyrannides, ut ipsi de me solent jactare, posuisse. Habent integrum numerum ex arcanis historiæ in meas literas datum. Titus enim, & Cenforinus, quorum unus, ut dixi, sub Maximino, alter sub Claudio fuit, ambo ab iisdem militibus, a quibus purpura velati fuerant, interempti sunt. *Hactenus Pollio. Atque ita ille quidem explevit numerum triginta virorum, qui tyrannidem invassent: sed, si demas Zenobiam, & Victoriæ,*

solum *XXVIII* erunt, qui *Valeriani* & *Gallieni* temporibus fuerint. Quantopere vero, ut aiebam, tyrannorum numerus excrescere poterat, si alieni etiam temporis tyrannos addere licebat! Nec solum de triginta tyrannis, sed etiam de *Claudii* vita, iteratam dedit editionem. Ea pleraque de *Claudio* recoxit: & quia reprehendebatur, quasi in gratiam *Constantii* *Cæsaris*, virtutem *Claudii*, a cuius fraire *Constantinus* genus ducebat, nimis extulisset; subinde istiusmodi obtrusionibus occurrit. Ut, cum ait: Dicat nunc, qui nos adulationis accusat, *Claudium* minus esse amabilem. Item: Vera dici fides cogit: simul ut sciant hi, qui adulatores nos existimari cupiunt, id, quod historia dici postulat, nos non tacere. Addamus aliquid de vita *Valeriani* patris. In plerisque enim membranis, quas & *Robertus* a *Porta* secutus fuit, vita ea tribuitur *Julio* *Capitolino*. Qui error inde provenit, quia codex ille, unde omnes promanarunt, mutilus erat: ut in quo præter alia desideraretur, quomodo per annos *LXX* vita laudabili in eam gloriam conscendisset. Hoc fuisse *Pollio* tractarat, quod nunc verbulo tantum attingitur. Prior igitur, ut dicebamus, pars vitæ *Valeriani* deperiit, & una vitæ inscriptio. Unde factum, ut residua pars crederetur esse *Capitolini*, cuius liber de *Maximi* & *Balbini* vita proxime antecesserat. Credat aliquis, vitam *Valeriani* integram haberi, quæ a genere Imperatoris ejus incipit. Sed initium istoc in melioribus membranis desideratur, ut omnino, velut statuae cuidam, caput hoc appositum sit *Pollioni*. Quam inepte autem hoc fecerint, patebit considerationi, quomodo vita illa legatur in codd. MSSis,

quorum fidem optime in eruditissimis suis castigationibus ac notis Salmasius expressit. *Vita Claudii*, quod ætatem Pollionis clare docet, scripta ab eo est, non quidem ad Constantinum Cæsarem, ut est in vulgatis codd. sed, quod jam viris doctis observatum, ad patrem ejus Constantium, ut hæc verba docent: Quæ idcirco posui, ut sit omnibus clarum, Constantium, divini generis virum, sanctissimum Cæsarem, & Augustæ ipsum familiæ esse, & Augustos multos de se daturum, salvis Diocletiano & Maximiano Augustis, & ejus fratre Galerio. *Etiam initio ejus vitæ legas: Feliciter ventum est ad Principem Claudium*, qui nobis intuitu Constantii Cæsaris cum cura in literis digerendus est. *Et satis liquet, Constantii, non Constantini, legi debere in Gallienis: Contra Postunium igitur Gallienus cum Aureolo & Clodio duce, qui postea imperium obtinuit, principe generis Constantii Cæsaris nostri, bellum incepit. At aliquanto post: Is enim est Claudius, a quo Constantius, vigilantissimus Cæsar, originem ducit. Scriptoris hujus diligentiam Vopiscus commendat initio Firmi sui. Nec si ætatem cogitemus, qua vixit, laude caret dictio ejus. De qua non admodum refrager Gesnero, qui Tom. I Bibliothecæ, eam tersam esse ait, pauloque altius assurgere, qualis historico convenit.*

FLAVIUS VOPISCUS:

FLAVIUS Vopiscus Syracusius edidit vitam Aureliani Imp. item Taciti Imp. & fratris ejus Floria-

ni. ad hæc Probi, quam ad Celsum scripsit. Item quadrigam tyrannorum, Firmi, Saturnini, Proculi, & Bonosti. Præterea trigam Imperatorum, Cari puta, Numeriani, & Carini. Neque præter ista, quæ hodie existant, quidquam, vel ab ipso auctore, vel ab alio scriptore, citatur. Quæ vixerit ætate, non uno colligere est argumento. Avum enim suum interfuisse dicit concioni, cum Aper manu occideretur Diocletiani. In Carino autem quatuor hosce Principes laudat, Diocletianum, Maximianum, Galerium, & Constantium: atque horum singulis libris vitam esse proditam ait ab Claudio Eusthenio, qui Diocletiano ab epistolis erat: atque hoc idcirco a se dici, ne quis rem tantam a se petat, maxime cum vel virorum principum vita non sine reprehensione dicatur. Unde liquet, vixisse post obitum Constantii Chlorig, qui Constantini M. pater fuit. Et tamen in Aureliano ait: Et est quidem jam Constantius Imp. Sed puto, ab Aureliano scribendi initium fecit. Carinum vero in literas misit post obitum Constantii. Vel hoc verum est, vel scribi debet, jam Constantinus Imper. vel intelligendus Constantius, Constantini filius. At omnino verius est, quod primo loco dicebam. Nam Aurelianum multo ante alios editum fuisse, verba hæc ostendunt in Probo: Sed non patiar ego ille, a quo dudum tolus Aurelianus est expetitus, cujus vitam, quantum potui, persecutus, Tacito Florianoque jam scriptis, non me ad Probi facta conscendere; si vita suppetet, omnes, qui supersunt, usque ad Maximianum Diocletianumque dicturus. In Vopisco, præter eruditionem, illud etiam laudamus, quod omnia ordine

narrat meliori, quam factum fuit a Spartiano, Capitolino, atque aliis historiæ Augustæ scriptoribus, in quibus pleraque valde turbata. Ceterum decreverat quoque memoriæ tradere vitam Apollonii Tyanci, plani illius, cujus magicas fraudes veris Christi miraculis opponebant gentiles. Hunc impostorem Vopiscus in Aureliano appellat, celeberrimæ famæ auctoritatisque sapientem, veterem philosophum, amicum verum Deorum, ipsum etiam pro numinæ frequentandum. Et post aliqua de eodem ait: Quid enim illo viro sanctius, venerabilius, antiquius, diviniusque inter homines fuit? ille mortuis reddidit vitam: ille multa ultra homines & fecit, & dixit: quæ qui volet nosse, Græcos legat libros, qui de ejus vita conscripti sunt. Ex his cognoscere est, ut Vopiscus magnis fallibus propudiosa fuerit mendacia spiraturus, si scripsisset vitam Apollonii, quam continuo post promittit, his verbis: Ipse autem, si vita suppetat, atque ipsius viri favori usquequaque placuerit, breviter saltem tanti viri facta in literas mittam: non quo illius viri gesta munere mei sermonis indigeant, sed ut ea, quæ miranda sunt, omnium voce prædicentur.

NOTITIA LITERARIA
DE
ÆLIO SPARTIANO
JULIO CAPITOLINO &c.
EX

Jo. Alb. Fabricii Bibliotheca Latina a Jo. Aug.
Ernesti auctius edita T. III, lib. III, c. 6.

Scriptorum sex historiae Augustae aetas.

SEX ¹ Scriptores Historiae Augustae, sive vitae Im-

1. Forte quatuor tantum numerandi, si quidem Vita Avidii Cassii non a Vulcatio Gallicano scripta est, sed a Spartiano, cujus integrum nomen est *Ælius Lampridius Spartianus*. Igitur *Ælius Lampridius* falso diversus a Spartiano esse creditur: certe Flavius Vopiscus in Probo, ubi *Ælium Lampridium* nominat, Spartianum inter scriptores hujus argumenti prætermittit, & vitam Septimii Severi, quam Spartiano plures codices Msti tribuunt, Casaubonus testatur in codice regis

Galliae, *Ælio Lampridio* ascribi. Etiam aliorum vitas, quæ sub *Ælii Lampridii* nomine seruntur, in Excerptis antiquissimis Palatinis ad Spartianum referri, auctor est vir summus Claudius Salmasius. Harduinum vero, doctissimum & ipsum hominem, cui scriptores hi toti suppositi ac commentitii habentur, somniis suis tetricisque suspicionibus relinquamus. Pro *Ælio Ælianus Lampridium* vocat Grotius ad Apocalyps. X ult.

peratorum, quos non attingit Suetonius, ab ¹ Hadriano usque ad Carinum descriptæ ab *Ælio Spartiano*, *Julio Capitolino*, *Ælio Lampridio* ², *Vulcatio Gallicano*, *Trebellio Pollione* & *Flavio Vopisco*, qui omnes imperante Diocletiano aut Constantio, qui ei successit, vel certe filio ejus Constantino, vixerunt. Vide Voss. lib. 2 de Hist. Latinis cap. 5, 6, 7, & cl. Hankium de Romanarum rerum scriptoribus. *Vulcatius* ³ *Gallicanus* Senator Romanus fuit, & fortasse idem Consul a. C. 317. *Flavius Vopiscus* patria Syracusanus, qui Suetonii imitatione scripsisse se non diffitetur in Probo: & in Aureliano cap. 44, Constantio tenente imperium vixisse se innuit. Interciderunt *Claudius Eusthenius*, qui quatuor libris scripserat vitas Diocletiani, Herculei, Constantii & Galerii: *Acholius Septimius* & *Encolpius* ⁴, a quibus vitam Alexandri Severi scriptam novimus ex Spartiano c. 48, qui Dexippum quoque laudat cap. 49, atque Acholium itinera Alexandri Severi scripsisse testatur cap. 64: *Julius*

1. Mirum est, Nervæ & Trajani optimorum Principum vitas ex Spartiano vel aliò auctore non addidisse, qui hanc *συγγραφήν* vitarum primus confecit: neque enim hos Suetonius attigerat: nisi potius dicendum est, vitas istas ex hac collectione interciderisse. Ita Philipporum etiam Deciorumque vitæ cum initio Valeriani desiderantur.

2. Fuit & Lampridius

Scriptt. H. A.

rhetor Burdegalenfis, quem acrem Sidonius appellat: & Gallicanus presbyter, quem laudat Sedulius præf. ad Macedonium.

3. *Ælius* Rufinus *Vulcatius* ap. Ammian. XXI, 12.

4. Imago imperii sub Encolpii nomine a Thom. Elioto edita Anglice Lond. a. 1549 supposititia est, ut notavi in Bibl. Græca lib. 4, cap. 10, § 15.

b

Aterianus, quem citat Vopiscus in XXX Tyrannis cap. 6, ubi de Victorino: & qui Græce vitam Aureliani tradidere, *Callicratides Tyrius*, *Theocles*, laudati ab eodem Vopisco, ubi neminem ante se Latine idem fecisse testatur. *Asclepiodotum* etiam laudat Vopiscus in Aureliano cap. 44, ubi de Diocletiano agit, sive quod aliquid ab Asclepiodoto, qui sub Constantio Præfectus Prætorio fuit, coram acceperat; nam ita & patrem suum avumque ad testimonium Vopiscus citat: sive quod, ut Vossio visum, Diocletiani vitam Asclepiodotus scripsit. Cum Julio Capitolino, videndum, an commune aliquid sit *Cornelio Capitolino*, quem citat idem Vopiscus in XXX Tyrannis cap. 14, ubi de Odenato. De vitis Imperatorum, a *Spartiano*, *Julio Capitolino* &c. scriptis a fine Trajani¹, ad Diocletiani initium, hoc est, ab a. C. 157 ad 284, confer etiam, si placet, Tillemontii Historiam Imperatorum T. IV, p. 99 sq. edit. Bruxellensis, & 529 seq. Etsi autem valde dubium est, quæ vitæ, a quibus, scriptæ sint, quia scriptorum codicum mira hac in parte est varietas, singulas tamen ordine recensentes, quænam unicuique verisimiliter adscribendæ videantur, virorum doctissimorum secuti iudicium, paucis indicabimus.

1. Trajani vitam scripserant *Marius Maximus*, *Fabius Marcellinus*, *Aurelius Verus* & *Statilius Valens*, omnes pridem deperditi, quos citat Spartianus in Alex. Seve-

ro cap. 48. *Avidium Cassium* in vita Severi laudat Poggius lib. de infelicitate Principum p. 153, pro Dione Cassio, ni fallor.

Quæ vitæ a quibus scriptæ.

Ælius Spartianus V. C. in vita Ælii Veri ait ; sibi in animo esse , non solum Imperatorum post Julium Cæsarem , quemadmodum usque ad Hadrianum jam fecisset , sed illorum etiam , qui vel Cæsarem nomine appellati sint , nec Principes aut Augusti fuerint , vel quolibet alio genere aut in famam , aut in spem principatus venerint , vitas singulis libris exponere . Huic Spartiano ab omnibus tribuuntur *vita Hadriani & Ælii Veri* , quas misit ad Diocletianum Augustum , cuius se *ταύτης* ¹ vocat : unde illum Imperatoris familiarem vel libertum colligunt viri eruditi . Etiam vitam *Antonini Pii , M. Antonini* ² *Philosophi , & Veri* Spartiano adscribunt antiquissima excerpta Bibl. Palatinæ , quibus stilum mirifice suffragari notat Salmasius : sed vulgo hæ feruntur sub nomine *Julii Capitolini* . Eadem excerpta Spartiano vindicant *vitam Avidii Cassii* , quæ in editionibus & scriptis exemplis refertur ad *Vulcatium* ³ *Gallicanum* . Sed in hac quoque tanta

1. *Diocletiano Augusto Ælius Spartianus* , suis *solutem* . In vita Ælii Veri .

2. H. Casaubonus T. I , p. 307 , 308 testatur , hanc vitam in editis & scriptis Codicibus ita confusam ac diversimode interpolatam haberi , ut etiam iudicio suo retinendam putaverit , separatimque fuerit editurus , quod tamen haud fecit .

3. Hujus quoque vitæ auctor , *Proposui* , inquit , *Diocletiane Auguste* , omnes , qui *Imperatorum nomen sive jusse , sive injuste habuerunt* , in literas mittere , ut omnes *purpuratos Augustos cognosceres* . Flavius tamen Vopiscus negat , Aureliani Imperatoris vitam a quoquam ante se memorie proditam .

est cum dictione Spartiani similitudo, ut, si diversi sunt auctores censendi, uno veluti ore locuti videantur.

Vita Commodi Antonini sub nomine *Ælii Lampridii* legitur. Robertus a Porta *Julii Capitolini* eam esse dicit: in antiquis illis excerptis Palatinis eidem adscribitur *Spartiano*. *Publii* autem *Helvii Pertinacis*¹ vitam *Julio Capitolino*, qui circa an. C. 335 vitas Imperatorum scripsit in gratiam Constantini M. editi & scripti libri tribuunt, quam itidem Spartiani esse innuunt excerpta vetera Palatinæ Bibl. Vitæ *Didii Juliani*, *Septimii Severi* & *Pescennii Nigri*, *Spartiano* adscribuntur etiam in vulgatis & scriptis libris, nisi quod codex regis Galliæ vitam *Severi* tribuit *Julio Capitolino*: sed utique unus auctor vitas illas tres composuit, non minus quam vitam *Clodii Albini*, quæ in editis sequitur sub nomine *Julii Capitolini*: at in excerptis Palatinis rectius refertur ad *Spartianum*. Vita *Antonini Caracallæ* & *Antonini Getæ* dicata Constantino Imp. *Spartiani* nomen præfert tam in editis, quam in scriptis. Utramque ab uno auctore, illoque *Spartiano*, scriptam esse, ostendit *Salmasius* adversus *Isaacum Casaubonum*, qui de vita *Antonini Getæ* ambiguus fuerat, quod in illa quædam diversa, quam in superiore tradantur, quæ *Salmasius* in diversos auctores rejicit, quos *Spartianus*

1. *Pertinacis* & *Didii Juliani* ac *Sept. Severi* vitam *Lampridio* tribuere mavult *H. Dodwellus* in prælectt. histo.

ricis procæmialibus. Reliquas universas usque ad vitas *Gordianorum*, *Julio Capitolino*.

fuerit secutus. *Vita Opilii Macrini Julii Capitolino*, *Antonini Diadumeni & Heliogabali* ¹ in editt. & Mss. *Ælio* tribuuntur *Lampridio*. Sed & has omnes *Spartiano* adscribunt excerpta Palatina. *Vitam* autem *Alexandri Severi*, quæ Constantino Augusto dicata, sub ejusdem *Ælii Lampridii* nomine in editis legitur, non tantum excerpta illa, sed & alius codex antiquissimus Biblioth. Palatinæ, aliusque regis Galliæ, & Robertus de Porta Bononiensis, qui summam horum librorum composuit, *Spartiano* vindicant: atque adeo vitas omnes hætenus recensitas, Salmasius non dubitat esse illius unius *Spartiani*; idque liquido liquere sibi ait in limine notarum ad vitas duorum *Maximinorum*, quæ omnium consensu sunt *Julii Capitolini*, dicatæ Constantino Augusto. Ab eodem etiam *Capitolino* habemus vitas trium *Gordianorum*, *Maximi* item & *Balbini*. Sed *Trebellium Pollionem* ² auctorem agnoscunt, etsi *Julio Capitolino* in quibusdam Codicibus, & a Roberto Bononiense adscriptæ, *Valerianorum vitæ* & *utriusque Gallieni*, & *triginta Tyrannorum*, vita denique *Flavii Claudii* ³ & *Quintilli fratris*. Postremo a *Flavio Vopisco* Syracusio, admodum ju-

1. In *Heliogabali* vita p. 230 Constantinum alloquitur auctor, & p. 231 memorat Judæorum & Samaritanorum religiones, ac *Christianorum devotionem*.

2. Diligens & fidei cultor historicus dicitur Gaddio Tom. 1, pag. 200. Scripsit, si H. Dodwellum audimus,

sub Diocletiano post a. C. 303; sed ante Kal. Mai. a. 305.

3. In hac vita *Trebellius* sæpe testatur, omnem se adulationem procul habere, ejusque falso se ab aliis argui. Hinc viris eruditissimis secunda hodie videtur exstare editio vitæ *Claudii* a *Trebellio* recognita.

vene, iisdem ¹, quibus Trebellius Pollio scripsit, temporibus, jussu Junii Tiberiani, præfecti Urbis ², elaboratæ sunt *vita Aureliani*, quam itidem Julio Capitolino perperam inscribit Robertus Bononiensis, *Taciti & Floriani fratris, Probi, Firmi & Saturnini, Proculi & Bonosti, vita* derique *Cari, Numeriani & Carini*. Vitæ *Valerianorum* Iulio Capitolino tribuuntur etiam a Lilio Gyraldo dialog. 21. Vitam *Getae* ad Capitolinum refert Dodwellus in prælect. Cambdenianis, & *Guilelmus Mufgrave* V. C. qui vitam illam novis suis & variorum eruditorum hominum notis illustratam edidit *Iscæ Damnoniorum* 1714, 8, adjuncta dissertatione de *Geta Britannico* &c. Jo. Harduinus in operibus selectis p. 866: *Ridicule satis hunc sibi propositum finem in scribendo fuisse Trebellius Pollio profitetur, ut nempe eundem XXX Tyrannorum in Hist. Romana numerum exhiberet, quem olim fuisse Athenis, literæ similes prodidissent. Nam ut promissis sciret ille scilicet, necesse fuit & Tyrannos ab ipso appellari, qui non essent, & fingi Principes, qui ne quidem inter homines forte existerint. Fecit utrum-*

1. H. Dodwellus tamen observat, postea quædam inserta supplementa post a. C. 308; quin immo post a. 341 & 343.

2. Præfecturam urbis Junius Tiberianus, in cujus gratiam vitas quasdam Cæsarum scripsisse se Vopiscus innuit, gessit Diocletiano imperante a. C. 291. Nam licet fuerit etiam

Præfectus eodem nomine a. 303, tamen in ejus Præfecturam non inciderunt Hilaria, quo festo, 25 Martii celebrari solito, monitum se a Tiberiano de scribenda Imperatorum quorundam vita Vopiscus refert. Vide Tillmont. not. 22 ad vitam Diocletiani T. 4. Hist. Imp. p. 530.

que. Nam ex illis XXX non omnino XII in numis antiquis invenimus, & tantum abest, ut hi, quos habemus, Tyranni fuerint, ut eorum etiam plerique inter divos relati fuerint, provinciæ saltem illius decreto, cui præfæli fuerunt &c.

INDEX
 EDITIONUM
 HISTORIÆ AUGUSTÆ
 SCRIPTORUM
 AUCTIONE FABRICIANO
 ET IN III ÆTATES DIGESTUS.

ÆTAS I NATALIS

- a principe editione Mediolanensi an. 1475, per M. Phil. de Lavagnia impressa, cui præfuit Bonacursus Pisanus. Secutæ sunt eam Venetæ quatuor an. 1480, 1489, 1490 & 1499, quarum binæ priores ex Bernardini Ritzii Novariensis, binæ posteriores Jo. Rubei Vercellensis officinis prodire. Quinque vero his collectionibus scriptores hist. Aug. omnes, non solum VI dicti minores, sed & Suetonius cum Eutropio & Paulo Diacono exhibentur.
- (1465) scriptorum Historiæ Augustæ Sylloge primum prodiisse *Mediolani* credebatur, Salmasii fide aut testimonio, qui in prima nota ad Spartiani Hadrianum, se usum esse dicit editione, *quinque illa & viginti annis* priori ea, quam Casaubonus primam dixisset: eam fuisse Mediolanensem, commodatam sibi a Jureto, eamque per omnia ferine consentire cum Codice præstantissimo Palatino, quo ad emendandos hos scriptores usus sit. Hoc testimonio fretus Dan. Guil. Molærus in Diss. prima de Scriptt. H. A. quæ est de Spartiano Altorf. 1687, p. 15 primam editionem as-

signavit an. 1455, deceptus mendo editionis Hakianæ, quæ in nota Casauboni expressit 1480, pro 1490, qui numerus est in editione Casauboniana: secundum quem annus 1465 efficitur. Hunc igitur numerum fecuti sunt, qui post de editionibus Scriptorum H. A. tradiderunt. Saxius quidem in Prolegom. Hist. typograph. Mediol. cap. 3, pag. 88 valde pugnat pro eo anno, uno Salmasii testimonio nixus, cum fateatur, nemini aliæ tale exemplum visum, aut in Italicis biblioth. repertum esse. Utinam Salmasius diligentius illud exemplum Jureti descripsisset, ut liquidius judicare possemus. Ut nunc est, tamen multum dubitationis relinquitur, præsertim cum dicat, se hanc editionem omnium primam pronuntiare non audere: Quidni auderet, si anni quinæ & sexagesimi erat? cum ante eum annum in Italia nullum librum excusum typis fuisse, satis constet, in Germania autem horum scriptorum typis editorum nullum vestigiū repertum sit. Itaque assentimur Meermanno, qui in Orig. typogr. T. II, pag. 242 hanc editionem anni 1465 commentitiā pronuntiat; recteque conjicit, exemplum Salmasianum fuisse partem mediam Collectionis variorum Histor. Rom. Scriptorum, quæ Mediol. 1475 prodiit, habetque primum Suetonium cum subscriptione a. 1475; deinde Scriptores sex H. A. sine subscriptione a. l. & typogr. ad extremum Eutropium, cum eadem, quæ in prima parte est, subscriptione. Addit, se vidisse tale exemplum in bibliotheca Henr. Justice, Hagæ vendita a. 1763, idque plane consensisse cum exemplo suo a. 1475. Habemus & ipsi tale exemplum, sine præfatione & subscriptione anni & loci, ligatura Francica pulchra superioris sæculi, fortasse illud ipsum Salmasianum, certe id, quod a. 1763 Hagæ veaditum est: in quo scriptum est in capite chartæ ante initium libri: Historiæ Aug. Scriptores Mediolani 1465. quod exemplum si Salmasius habuit, hac nota decipi potuit. Est autem hoc exemplum hujusmodi: — Initium faciunt *Vita Nervæ & Trajani* recentioris scriptoris Christiani, quæ tria folia explent. Sequitur opus scriptorum ipsorum sic: *In hoc Codice continentur Vita diversorum Principum & Tyrannorum, a Divo Hadriano usque ad Numerianum, a diversis scriptoribus compo-*

sita. Hæc literis majoribus: inde *Catalogus Imperatorum* &c. deinde in altero folio *Spartiani Vita Hadriani.* Exemplum nostrum habet eas omnes lectiones, quas Salmasius e suo affert. — Hæc cl. Ernestius in *Bibliothecæ Fabricianæ* T. III, pag. 98 sq. Adde *Lairium* in *Spec. hist. de typogr. Rom.* cap. II, § 3. ubi clare demonstratur, ante a 1470 typographiam non exstitisse Mediolani. Itaque primam editionem, quæ Salmasius usus sit, teneamus eam esse, quæ Mediolani a. 1475 fol. primum separatim, deinde in ea, quam jam descriptum imus, Collectione, facta est. cf. Denis *Merkwürdigk. der Garell. Bibl.* p. 533 sq. & ex eo cl. Harlesius in *Notitia liter. Rom.* P. I, p. 77.

1475

Editio princeps, Mediolani, fol. III Vol. Titulus: *In hoc codice continentur Cajus Suetonius Tranquillus de XII Cæsaribus, Ælius Spartianus, Julius Capitolinus, Ælius Lampridius, Trevellius Pollio, Flavius Vopiseus, Eutropius & Paulus Diaconus, de regum ac imperatorum Romanorum vita.* Volumen primum habet Suetonium. Præmittitur *Bonaerussii* Pisani præfatio ad Cicchum Simonetam, quæ etiam legitur apud Sallium *Hist. med. lit.* tum Ausonii versus in libros Suetonii: denique Calderini & Siconis Poletoni vita Suetonii, cum brevi ejusdem Calderini Commentario in tria capita priora Julii Cæsaris. In fine Suetonii: *Mediolani impressum per Magistrum Philippum de Lavagnia cccccclxxv die xx Julii.* Sequuntur tandem capita quædam: De exordio Nervæ & bonis ejus moribus ac morte: De exordio imperii Trajani & de ortu & bonis moribus ac studiis in administrando imperio; de mira ejus clementia erga viduam & moderatione circa cultum Christianorum, & pestilentiis, quæ suo tempore contigerunt: Eutropius de morte ejusdem Trajani: Qualiter Trajani anima ab æterna pœna exempta est oratione Gregorii papæ. — In voluminis secundi titulo legitur: *In hoc codice continentur vitæ diversorum Principum & Tyrannorum a Divo Hadriano usque ad Numerianum a diversis scriptoribus compositæ.* Scilicet: *Ælii Spartiani* Hadrianus, Ælius Verus; *Julii Capitolini* Antoninus Pius, Antoninus Philosophus, & Verus; *Ælii Spartiani* Didius Julianus; *Ælii Lampridii* Commodus Antoninus; *Julii Capitolini* Ælius

Pertinax; *Vulcatii Gallieni* Avidius Cassius; *Ælii Spartiani* Severus, Pescennius Niger, Antoninus Caracallus & Antoninus Geta; *Ælii Lampridii* Antoninus Heliogabalus & Diadumenus Antoninus; *Julii Capitolini* Otilius Macrinus & Clodius Albinus; *Ælii Lampridii* Alexander Severus; *Julii Capitolini* duo Maximi, Gordiani tres, Pupienus & Balbinus, Valeriani duo, Galieni duo, Tyranni, Cyriades, Postumi duo, Lolianus, Victorini duo, Marius, Ingenius, Regilianus, Aureolus, Macrini duo, Quietus, Odenatus, Herodes, Mæonius, Balista, Valentes duo, Pifo, Æmilianus, Saturninus, Tetrici duo, Trebellianus, Herennianus, Timolaus, Celsus, Zenobia, Victoria, Titus, Censorinus; *Trevellii Pollionis* Divus Claudius, *Flavii Vopis* Divus Aurelianus, Tacitus, Florianus, Probus, Firmus, Saturninus, Proculus & Bonofus, Carus, Carinus & Numerianus. Finis est absque subscriptione. — Volumen tertium exhibet *Eutropii* & *Pauli Diaconi* historiam Romanam, cum hac subscriptione: *Informatum est hoc opus per magistrum Philippum de Lavagna anno a nativitate Christi cccccclxxv, undecimo Kalendas Januarias, Mediolani.* — Rarissimam hanc editionem, de cujus bonitate audivimus Salmasium, servat bibliotheca publica Ratisbonensis. Vid. Carl Theodor Gemeiners Nachrichten von den in der Regensburgischen Stadtbibliothek befindlichen merkwürdigen und seltenen Büchern aus dem funfzehnden Jahrhundert. Regensburg, 1785.

1480 *Veneta* I, fol. apud Bernardinum Novariensem. cujus exemplum est Lipsiæ in bibliotheca Paulina, teste Ernestio l. c. Præter historiæ Aug. scriptores sex, continet narrationem de Nerva, Trajano & Adriano, nec non de conflagratione montis Vesuvi, Eutropium & Paulum Diaconum. Ratio huius edit. colligi potest ex sequenti.

1482 *Veneta* II, fol. Alia Bernardini Novariensis, quam a Fabricio omissem clar. Harlesius in Analectis P. I Introduct. in Notit. liter. Rom. p. 398 sic describit: » In protocollo more antiquissimorum exemplorum deest titulus: in averſa pagina folii primi leguntur verſus Auſonii in libros Suetonii. Tum ſequitur: *Domitii Calenderini, viri clariffimi de vita Caji Suetonii Tranquilli.*

» Hac finita, subiecta sunt verba: *In Codice continen-*
tur Cajus Suetonius Tranquillus de XII Cæsaribus.
» Ælius Spartianus, Julius Capitolinus, Ælius Lam-
» prius, Trevelliuss Pollio, Flavius Vopiscus, Eutro-
» pius & Paulus Diaconus de regum ac Imperatorum Ro-
» manorum vita. In fine, postquam singulæ vitæ Im-
 » peratorum a Cæsare usque ad Numerianum, quæ in
 » hoc Codice continentur, enumeratæ sunt, leguntur
 » hæc: *Habes candide Lector Cæsarum vitas parvo ære,*
 » *quas olim anxius quærebas, maxima lucubratione a*
 » *» viris præstantissimis emendatas. Quæ omnia accuratissi-*
 » *» me Venetiis impressa sunt per Bernardinum Novarien-*
 » *sem anno a natali Christiano MCCCCLXXXVIII.*
 » *Kal. Octobr.»*

- 1490 *Veneta III, fol. Historiæ Augustæ Scriptores sex, sive*
vitæ Imperatorum Romanorum a Julio Cæsare usque
ad Numerianum a diversis auctoribus eleganter com-
positæ. In fine, uti in prioribus Venetis, quas sequi-
tur: Habes, candide lector, Cæsarum vitas parvo ære,
quas olim anxius quærebas, maxima lucubratione a vi-
ris præstantissimis emendatas. Quæ omnia emendatissime
Venetis impressa sunt per Joannem Rubeum de Vercellis
anno a nativitate Christiana cccccclxxxx die xv
Julii. Vid. Maittaire Ann. typ. T. I, p. 50. Fuit in
Bibl. Uffenbach. testante ejus Catalogo Tom. II App.
I inter Incunabula artis typogr. n. CXXII, p. 46 sq.
& inter libros in Bibliotheca regia Academica Göt-
tingensi in duplo extantes, & 1784 divenditos, num.
105. Casaubonus ea usus est; & adjunctos habet Sue-
tonium, Eutropium & Paulum Diaconum, uti prio-
res Venetæ.
- 1499 *Veneta IV, fol. apud eundem Jo. Rubeum. Memora-*
tur in Bibliotheca Fabriciana e Catalogo Bibl. Menar-
fianæ. Si non est error in numero, est tamen mera
repetitio superioris.

ÆTAS II EGNATIO — ERASMIANA
 s. ALDINO — FROBENIANA.

1516 — 1603.

Aldinam collectionem Scriptt. hist. Aug. omnium a Jo. Bapt.
Egnatio & castigatorum & illustratorum duobus voll.

quorum unum VI habet minores, comprehensam facinus duplicem, alteram 1517, quæ *Erasmi & Frobenii* curas, f. *Basiliensem* I ed. 1518 & Juntinam filiam Aldinæ 1519 præcessit, alteram, quæ iis est posterior an. 1519 sq. *Erasmiana* repetitio Coloniz Agr. 1527 facta, sed & est Basilienfis II, 1533, & III, 1546, quæ utraque Erasmi & Egnatii bona notasque coniuncta habent. Egnatii Aldinam alteram secuti sunt Rob. *Stephanus* in edendis Scriptt. H. A. minoribus cum Egnatii notis, 1544, & Seb. Gryphius 1551. Collectiones Lugdunenses 1552, 1559 & 1592, Henr. *Stephani* Corpus scriptt. hist. Rom. gr. & lat. 1568, ac Frid. *Sylburgii* Collectio eorundem Scriptt. 1588, etiam Scriptt. minores habent, illud cum notis Egnatii, hæc cum varr. lectt.

1516 — 1517 *Veneta*, Aldi I, 8. Quæ ex officina Aldi & Andreæ Soceri 1516 prodiit collectio scriptorum hist. Aug. cura Jo. Bapt. *Egnatii*, habet tantum Suetonium, S. Aur. Victorem, Eutropium & Paullum Diac. Ceteri vero, quos editiones princeps & Venetæ habent minores, serius demum, quod & ex Erasmi præf. edit. Basil. I colligi poterat, inque an. 1517 ex eadem officina editi sunt. Recusa est duplex hæc collectio apud Aldum an. 1519 & 1521; unde dissensio orta negantium vel affirmantium priorem ed. vel ejusdem ed. volumina varie ordinata disjungentium; cui modum facere liceat ea sic ordinando:

1516 In hoc volumine hæc continentur: C. Suetonii Tranquilli XII *Cæsares*, Sexii Aurelii Victoris a D. *Cæsare* Augusto usque ad Theodosium excerpta. Eutropii de gestis Romanorum libri X. Pauli Diaconi libri VIII ad Eutropii historiam additi. — In ultimâ pagina legitur: *Venetis in adibus Aldi & Andreæ Soceri mense Augusto MDXVI.* cf. Harlesium in Notis. liter. Rom. P. I, *Analecta*, p. 398, ubi se ipse correxit; & nostram notitiam liter. Suetonii p. XVI. Indicem librorum ex offic. Aldina, quos possidebat C. G. Schwarzius Prof. Altorf. in Fr. Jac. Beyschlagii Sylloge varr. Opp. T. I, fasc. III, n. X, p. 650. Existabat quoque in Bibl. J. Aug. *Ernestii*, teste ejus Catal. p. 187 n. 2802.

(1517) In hoc volumine hæc continentur: Joannis Baptistæ Egnatii Veneti de *Cæsaribus* libri III a dictatore Cæ-

*fare ad Constantinum Palæologum hinc a Carolo Magno ad Maximilianum Cæsarem. Eiusdem in Spartiani Lampri-
dique vitæ & reliquorum annotationes. Nerva &
Trajani atque Adriani principum vitæ ex Dione, Georgio
Merula interprete. Ælius Spartianus, Julius Capitolinus,
Lampri-
dus, Vulcatius Gallicanus ab eodem Egnatio castigati.*
Addita in calce Heliogabali principis ad meretrices elegantissima oratio non ante impressa. — Egnatius, qui etiam priori volumini præfuit, præfationi hujus subscripsit: *Venetis MDXVII d. X Junii.* Hinc Schwartz hoc vol. in Indice suo **L** c. p. 651 retulit ad an. 1517; visum certe & consultum, postquam Erasmus præf. suæ ed. Basil. **I** Nonjs Jun. 1517 scripsisset, & antequam ed. Basiliensis in publicum exiret 1518, Frobenio bibliopole docto. In Cat. bibl. Zechianæ 1780 Altenburgi dividendæ p. 50, n. 754 etiam ad an. 1516 refertur.

- 1518 *Basilæa* **I**, fol. Ex recognitione Des. Erasmi Roterdami C. Suetonius Tranquillus, Dio Cassius Nicæus, Ælius Spartianus, Julius Capitolinus, Ælius Lampri-
dus, Vulcatius Gallicanus, V. C. Trebellius Pollio, Flavius Vopiscus Syracusius. Quibus adjuncti sunt Sext. Aurelius Victor, Eutropius, Paulus Diaconus, Ammianus Marcellinus, Pomponius Lærus Ro. Jo. Bapt. Egnatius Venetus. — In fine legitur: *Basilæa apud Joannem Frobenium, mense Junio MDXVIII.* — Dedicatio & præfatio Erasmi scripta est Antverpiæ Nonis Juniis 1517, in qua ait, se in his auctoribus permulta correxisse & restituisse. Viderat autem nonnisi primum collectionis Aldinæ volumen; quod testantur hæc illius verba: *Cum hanc editionem jam adornassem, commodum allatus est Suetonius, Aldinis typis excusus, sed emendatus opera Baptistæ Egnatii, viri cum primis tum integri, tum eruditi. Atque utinam, ut Suetonium, Aurelium Victorem, & Eutropium dedit, ita & Ælium Spartianum, ceterosque huic adjunctos nobis dedisset, in quibus nos permulta restituimus.* Sed hac præfatione jam scripta & expressa typis, accepit Frobenius Codicem MS. e monasterio Morbacenti, & ed. Aldinæ alterum volumen, quod habet scriptores **H. A.** minores. Itaque iis usi sunt ad reliqua castigand-

da: in iis, quæ jam expressa erant typis, satis habuerunt lectiones varias utriusque libri excerpere, & in capite operis addere. Est igitur & hæc editio in principibus numeranda.

- 1519 *Florentia* s. *Iuntina*, 8. Scriptores historiæ Augustæ. In hoc volumine hæc continentur &c. In fine: *Florentia*, apud heredes *Phil. Junta*. MDXIX, mense *Januario*. — Habet textum a Jo. Bapt. Egnatio emendatum, cum ejusdem notis, sequiturque adeo Aldinam ed. Rarum est exemplum. vid. Denis Merkwurdigk. der Garell. Biblioth. p. 533 seq. Eodem anno prodit *Iuntina* II Suetonii, repetitio Aldinæ, ut adeo hæc cum illa Scriptorum minorum collectionem H. A. unam duobus voll. exhibeat.

- 1519 — 1521 *Veneta*, Aldi II, 8. Repetita est Aldina I Suetonii & scriptorum minorum 1516 — 1517; sed mutato scriptorum ordine (etiam notante Hambergero l. l.) ætiusque:

- 1519 In hoc volumine hæc continentur: *Nervæ & Trajani atque Adriani Caesarum vitæ ex Dione, Georg. Merula interprete, Æli. Spartianus, Julius Capitolinus, Lampridius, Flavius Vopiscus, Trebellius Pollio, Vulcatius Gallicanus, ab Jo. Bapt. Egnatio diligentissime castigati, Heliogabali principis ad meretrices elegantissima oratio; ejusdem J. Bapt. Egnatii de Caesaribus libri III a dictatore Cesare ad Constantinum Palæologum, hinc a Carolo M. ad Maximilianum Cæsarem continuati; ejusdem in Spartiani Lampridique vitæ & reliquorum annotationes; Aristidis Smyrnæi oratio de laudibus urbis Romæ a Scipione Carteromacho in Latinum versa; in extrema operis parte addita conflagratio Vesuvi montis ex Dione, Georg. Merula interprete. — Venetiis in aedibus Aldi & Andr. Soceri m. Aug. 1519, 8. Titulum hunc ab exempli Aldini possessore cl. Wolfig. Jägero Prof. Altorf. plenius notatum ex Harlesii Not. lit. Rom. P. II, add. & corr. p. 477 sq. mutuati sumus.*

- 1521 C. Suetonii de vita XII Caesarum: item de vita & moribus Imperatorum excerpta ex Sexto Aurelio; item Eutropii & Pauli Diaconi de gestis Romanorum lib. XVII curante Jo. Bapt. Egnatio. — Venetiis typis Aldinis. Sic titulum dedit Cat. Bibl. Ludewig. P. III, n. 7617. cf. Notitiam edd. Suetonii nostram cett.

- 1527 *Colonia*, fol. in ædibus Eucharîi *Cervicorni*. Repetitio editionis *Erasmiana* 1518, in qua vero & Erasmi deest præfatio, & varr. lectr. Sylloge, editionis Basiliensis indici inserta.
- 1533 *Basilea* II, fol. Omnia quam antehac emendatiora: Annotationes Des. Erasmi & Egnatii cognitu dignæ. C. Sætonius Tranquillus, Dion Cassius, Ælius Spartianus, Julius Capitolinus, Ælius Lampridius, Vulcatius Gallicanus, Trebellius Pollio, Flavius Vopiscus, Herodianus Politiano interp. Sex. Aurelius Victor, Pomponius Lætus, Jo. Baptista Egnatius, Ammianus Marcellinus quatuor libris auctus. Cum Indicibus copiosis. Basileæ in officina Frobeniana, anno MDXXXIII. — Repetita, quantum ad scriptores nostros, ex ed. 1518. Ejus exemplum est penes nos.
- 1544 *Parisis*, 8. ap. Rob. Stephanum. Dio. Cassii Nerva, Trajanus, Adrianus, conflagratio Vesevi, Latine, Georg. Merula interprete; Ælius Spartianus; Julius Capitolinus; Ælius Lampridius; Vulcatius Gallicanus; cum Egnatii annotationibus.
- *ibid. ap. eundem*, 8. Trebellius Pollio, Flavius Vopiscus, cum Egnatii annotationibus; Sext. Aur. Victor; Pomponii Læti compendium historiæ Romanæ; Egnatius de principibus Romanorum. — His separato volumine eodem anno accessit Ammianus Marcellinus.
- 1546 *Basilea* III, fol. apud Frobenium. Repetitio ed. 1533, cum notis Egnatii. In ea accessit *Villejus Paternulus* ex Beati Rhenani iterata recensione.
- 1551 *Lugduni*, 12. ap. Seb. Gryphum. 2 voll. Cæsarum vitæ post Suetonium Tranquillum conscriptæ. Quorum auctores sunt; hi, Dion Cassius Nicæus. Ælius Spartianus. Julius Capitolinus. Ælius Lampridius. Vulcatius Gallicanus. Joan. Bapt. Egnatii Veneti in eisdem Annotationes. — Vitarum Cæsarum Tomus II. Quorum auctores sunt hi, Trebellius Pollio. Flavius Vopiscus. Sextus Aurelius Victor. Pomponius Lætus. Joan. Bapt. Egnatii Veneti in eisdem Annotationes. — Des. Erasmi index quo obscuræ voces explicantur.
- 1552 *Lugduni*, 8. apud Franciscum le Preux. 7 voll.
- 1559 *Lugduni*, 8. In collectione auctorum præcipuorum, qui Romanorum Imperatorum vitas scripserunt, apud

Anton. Vincentium impressa voll. 3; cujus parti secundæ præter Dion. Cassium ex interpretatione Georg. Merulæ insunt Spartianus, Capitolinus, Lampridius & Vulc. Gallicanus, cum Jo. Bapt. Egnatii annotationibus. Vid. Pürtmannii Scriptorum Hist. Aug. minorum Laus & Reprehensio pag. XXVI.

1560 *Parisiis*. Vincentii Lupani annotationes in Ælium Spartianum, Jul. Capitolinum, Æl. Lampridium, Vulc. Gallicanum, Treb. Pollionem, Flav. Vopiscum. His additus est ab ipso auctore prætermisforum libellus. — Haud magni pretii.

1568 Variæ historiæ Romanæ scriptores, partim Græci, partim Latini, in unum velut corpus redacti, de rebus gestis ab Urbe condita usque ad imperii Constantinopolin translati tempora. 4 Voll. 8. exc. Henr. Stephanus. — Insunt Sigonii Fasti consulares, ejusd. in Fastos & Triumphos comment. & de nominibus Romanorum liber, Vellejus Paterculus, Dio Cassius, Herodianus, Suetonius, Scriptores sex historiæ Aug. Pompon. Lætus, Egnatius, Ammian. Marcellinus & Eutropius.

1588 *Francofurti*, fol. ap. Andr. Wecheli heredes, Claud. Marnium, & Joh. Aubrium. 2 Voll. Historiæ Romanæ Scriptores Latini minores &c. Addita variantis scripturæ notatio, ex optimis quibusque editionibus scriptorumque partim veterum, partim recentiorum monumentis collecta. Adjecta etiam Græcorum, quæ citantur, interpretatio. Opera Frid. Sylburgii. — In hac collectione continentur Suetonius, Ælius Spartianus & socii, Ammianus Marcellinus, Pompon. Lætus, Egnatius, Aufonii Epigrammata in Cæsares Rom. Imperatorum catalogus, libellus incerti auctoris de XIV regionibus urbis Romæ, qui Notitiæ dignitatum impetii occidentis præmittitur a Pancirolo, & diversus a Rufi Festi & P. Victorii ejusdem argumenti. Addidit etiam Sylburgius opusculum Julii sive Lucii Exsuperantii, scriptoris antiqui, sed non satis exploratæ ætatis, de Marii, Lepidi & Sertorii bellis civilibus. — Duobus his voluminibus tertium accessit a. 1590, continens historiæ Romanæ scriptores Græcos minores.

1592 *Lygduni*, 8. apud Franciscum le Preux. 7 voll.

— Eadem ibid. 8. apud Jac. Stder. 7 voll.

Scriptt. H. A.

c

ÆTAS III CASAUBONIO — GRUTERIANA

- scilicet *1f. Casauboni, J. Gruteri, &* qui se illi adjunxit comitem, *Cl. Salmasii*, curis perfectior, ab an. 1603 ad nostra usque tempora procurrit. Nova oborta lux Scriptt. H. A. minoribus a triumviris hisce, quorum *primus* an. 1603 & textum correctiorem & Comm. insignem edidit; *alter* 1611 lectionem in Scriptt. H. A. minores omnes a se collectos cum MSS. Codd. Pal. denuo contulit, emendavit, supplevit, & capp. distinxit; *tertius* denuo recensuit & Casauboni notas atque emendd. cum suis reddidit 1620, quæ ed. Londini recusa. Horum triumvirorum bona conjunxit editio Hackiana 1671. Mittimus enim Boxhornios & Schrevelios, quorum ille 1632, hic 1661, opellam suam contulerunt in hos scriptores. Laudatior vero est Ulr. *Obrechtii* cura in iis posita 1677, & Wilh. *Musgrave* 1714. Textus Hackianæ ed. repetitus tandem est in ed. Lipsiensi 1774, de qua, ejusque Indice fere in modum Glossarii aucto, quid existimandum sit, vide in Comm. rer. nov. Lipsi. germanice scriptis an. 1774 n. XXXI, p. 246 - 248.
- 1603 *Parisii*, 4. Scriptores historiæ Augustæ minores sex, curante Isaac. *Casaubono*, qui & librum adjecit emendationum & notarum. — In hac ed. textus longe correctior est quam in superioribus, & commentarius Casauboni præstantissimus habetur.
- 1609 in historiæ Romanæ Scriptt. Lat. Aureliæ Allobrogum per Petr. de la Roviere. fol. 2 voll.
- 1611 *Hanoviz*, fol. Historiæ Augustæ Scriptores Latini minores a Julio fere Cæsare ad Carolum Magnum: L. Ann. Florus, Vellejus Paternulus, C. Suetonius Tranquillus, Æl. Spartianus, Julius Capitolinus, Vulcatius Gallicanus, Æl. Lampridius, Trebellius Pollio, Flavius Vopiscus, Ammianus Marcellinus, Messala Corvinus, Julius Exsuperantius, Aurelius Victor, Paulus Diaconus, Landolphus Sagax, Jornandes, Paulus Warnefridus, Sextus Rufus. Priores quidem, ex optima cuiusque editione, comparati, confirmatique ad Codices MSS. bibliothecæ Palatinæ; posteriores vero nulle locis emendati & suppleti, opera Jani *Gruteri*,

- cujus etiam additæ notæ. Hanoviz, impensis Claudii Marnii heredum, Joan. & Andreæ Marnii & consort.
- 1620 *Parisiis*, fol. Historiæ Augustæ Scriptores sex, Ælius Spartianus, Julius Capitolinus, Ælius Lampridius, Vulcatius Gallicanus, Trebellius Pollio, Flavius Vopiscus. Claudius *Salmasius* ex veteribus libris recensuit, & librum adjecit notarum & emendationum, quibus adjunctæ sunt notæ ac emendationes Isaaci *Casauboni* jam antea editæ. Vid. Niceroni Nachrichten von berühmten Gelehrten &c. II, pag. 406.
- 1623 in collectione Scriptt. vet. hist. Rom. Genevensi repetita ex illa 1609.
- 1632 *Lugduni Bat.* 12. ex offic. Jo. Mairii. 5 voll. Historiæ Augustæ Scriptores Latini minores, ex recensione M. Zuerii *Boxhornii*. In fine additas habet inscriptiones, quæ Imperatorum, quorum vitæ hic describuntur, mentionem faciunt, illustriores, nec non *Boxhornii* in ipsos illos scriptores animadversiones. Editor haud semel dissentit cum *Salmasio*; nec ita *Salmasius* præceperat omnia, ut haud inveniret *Boxhornius*, in quo ipsius diligentia laudabiliter posset versari. Reperiuntur vero in hac collectione: C. Jul. Florus, P. Vellejus Paternulus, Sex. Aur. Victor, Sex. Rufus Festus, Messala Corvinus, Eutropius, Cassiodorus, C. Suetonius, Ælius Spartianus cum sociis, & Ammianus Marcellinus.
- 1652 *Londini*, fol. per Rich. Twiiden. Repetitio editionis *Salmasianæ* a. 1620.
- 1653 in collectione historiæ Romanæ Scriptorum Lat. veterum, qui exstant, omnium, Genevæ facta T. II. Sed neque nitore neque accurate collectione illa sese commendare videtur.
- 1661 *Lugduni Bat.* 8. curante Cornelio *Schrevelio*, cum annotationibus excerptis e Grutero, *Casaubono* & *Salmasio*.
- 1671 *Lugduni Bat.* 8. ex offic. Hackiana. 2 voll. Historiæ Augustæ Scriptores sex, cum integris notis If. *Casauboni*, Cl. *Salmasii*, & Jani Gruteri. Cum indicibus locupletissimis rerum & verborum. — Editio elegans. Sed nescio quare hoc peccatum est, ut præfationes horum triumvirorum omitterentur, in quibus plura sunt necessaria & utilia ei, qui hos scriptores curio-

- fius legere & tractare velit: item indices locorum ex aliis scriptoribus, quæ obiter vel emendata vel explicata sunt, quæ sunt bene multa.
- 1677 *Argentorati*, 8. impensis Jo. Frid. Spoor & Reinh. Wächter. Historiæ Augustæ Scriptores sex, Ælius Spartianus, Jul. Capitolinus, Æl. Lampridius, Vulc. Gallicanus, Trebellius Pollio, Flavius Vopiscus. Cum notis Ulrici Obrechtii.
- 1692 *Oxoniæ*, 8. Henr. Dodwelli prælectiones academicæ ad initium vitæ Hadriani a *Spartiano* scriptæ; acc. diurnorum urbis e tabb. marmoreis fragmenta, cum notis. Oxoniæ e theatro Sheldoniano.
- 1714 *Isca Damnoniorum* (Excester), 8. sumtibus Ph. Yeo. Julii Capitolini Antoninus Geta, cum notis integris If. Casauboni, Jani Gruteri, Cl. Salmasii, & editoris: cujus accedunt de eodem imperatore, & de icuncula quondam M. regis Alfredi dissertationes. — Editor est Wilh. Musgrave. Vid. Hamberger. T. II, pag. 635.
- 1743 *Heidelbergæ*, fol. inter Scriptores historiæ Romanæ Latinos veteres qui existant omnes, a Bennone Casparo Haurisio editos, T. II, pag. 275 - 427.
- 1774 *Lipsiæ*, 8. ap. Siegfr. Lebrecht Crusium. Historiæ Augustæ Scriptores sex, Æl. Spartianus, Jul. Capitolinus, Æl. Lampridius, Vulc. Gallicanus, Treb. Pollio, Flav. Vopiscus. — Præfatus est cl. Jos. Lud. Ern. Püttmannus, Prof. Lips. curam gessit Jo. Petr. Schmid, A. M. qui textum ex editione Hackiana reddidit, sed mendose, & adjecit Indicem Latinitatis.
-

ÆLIUS SPARTIANUS

102: 100A: 201

ÆLII SPARTIANI
H A D R I A N U S
I M P E R A T O R

A D

DIOCLETIANUM AUGUSTUM.



I. **O**RIGO Imperatoris Hadriani vetustiora Picentibus, posterior ab Hispaniensibus manat: siquidem Hadria ortos majores suos, apud Italicam, Scipionum temporibus, resedisse, in libris vitæ suæ Hadrianus ipse commemorat. Hadriano pater Ælius Hadrianus, cognomento Afer, fuit, consobrinus Trajani Imperatoris; mater, Domitia Paulina, Gadibus orta; soror, Paulina, nupta Serviano; uxor, Sabina; atavus, Maryllinus, qui primus in sua familia senator populi Romani fuit. Natus est Romæ; IX Kal. Febr. Vespasiano septies & Tito quinquies Consulibus. Ac decimo ætatis anno patre orbatus, Ulpium Trajanum, prætorium virum, consobrinum suum, qui postea imperium tenuit, & Celiū Attianum, equitem Romanum, tutores habuit: imbutusque impensius Græcis studiis, ingenio ejus sic ad ea declinante, ut a nonnullis *Græculus* diceretur.

II. Quintodecimo anno ad patriam rediit: ac statim.

Script. H. A.

A 2

tim militiam iniit; venandi usque ad reprehensionem studiosus. quare a Trajano abductus a patria, & pro filio habitus: nec multo post decemvir litibus judicandis datus; atque inde tribunus secundæ Adjutricis legionis creatus: post hæc in inferiorem Mœsiam translatus; extremis jam Domitiani temporibus, ibi a mathematico quodam, de futuro imperio id dicitur comperisse, quod a patruo magno, Ælio Hadriano, peritiam cœlestium callente, prædictum esse compererat. Trajano a Nerva adoptato, ad gratulationem exercitus missus, in Germaniam superiorem translatus est: ex qua festinans ad Trajanum, ut primus nuntiaret excessum Nervæ, a Serviano, sororis viro, (qui & sumtibus & ære alieno ejus prodito, Trajani odium in eum movit) diu detentus, fractoque consulte vehiculo tardatus, pedibus, iter faciens, ejusdem Serviani beneficiarium antevenit; fuitque in amore Trajani: nec tamen ei per pædagogos puerorum, quos Trajanus impensius diligebat, Gallo savente defuit. Quo quidem tempore, cum sollicitus de Imperatoris erga se judicio, Virgilianas sortes cōsuleret,

Quis procul ille autem ramis insignis olivæ

Sacra ferens? nosco crines incanaque menta

Regis Romani, primam qui legibus Urbem

Fundabit, Curibus parvis & paupere terra

Missus in imperium magnum, cui deinde subibit,
fors excidit: quam alii ex Sibyllinis versibus ei provenisse dixerunt. Habuit autem præsumtionem imperii mox futuri, ex fano quoque Nicephori Jovis manante responso, quod Apollonius Syrus Pla-

tonicus libris suis indidit. Denique statim, suffragante Sura, ad amicitiam Trajani pleniorē rediit; nepte per sororem Trajani uxore accepta; favente Plotina, Trajano leviter (ut Marius Maximus dixit) volente.

III. Quæsturam gessit Trajano quater & Articulo Consulibus: in qua cum, orationem Imperatoris in Senatu agrestius pronuntians, risus esset, usque ad summam peritiam & facundiam Latinis operam dedit. Post quæsturam acta Senatus curavit, atque ad bellum Dacicum Trajanum familiaris prosecutus est: quando quidem & *indulisse vino se* dicit, *Trajani moribus obsequentem*; atque *ob hoc se à Trajano locupletissime muneratum*. Tribunus plebis factus est Candido & Quadrato iterum Consulibus. in quo magistratu, ad perpetuam tribuniciam potestatem omen sibi factum asserit, quod penulas amiserit, quibus uti tribuni plebis pluviae tempore solebant, Imperatores autem nunquam. unde hodieque Imperatores sine penulis a togatis videntur. Secunda expeditione Dacica Trajanus eum primæ legioni Minervæ præposuit, secumque duxit: quando quidem multa egregia ejus facta claruerunt. quare adamante gemma, quam Trajanus a Nerva acceperat, donatus, ad spem successionis erectus est. Prætor factus est sub Surano bis, Serviano iterum Consulibus; cum festertium vicies ad ludos edendos a Trajano accepit. Legatus postea prætorius in Pannoniam inferiorem missus, Sarmatas comprefsit, disciplinam militarem tenuit, procuratores latius evagantes coercuit: ob hoc Consul est factus.

In quo magistratu, ut a Sura comperit, adoptandum se a Trajano esse, ab amicis Trajani contemni desit ac negligi. Et defuncto quidem Sura, Trajani ei familiaritas crevit, causa præcipue orationum, quas pro Imperatore dictaverat.

IV. Ufus Plotinæ quoque favore: ejus studio etiam legatus, expeditionis Parthicæ tempore, destinatus est. Qua quidem tempestate utebatur Hadrianus amicitia Sosii Pappi, & Plætorii Neporis, ex senatorio ordine: ex equestri autem, Artiani, tutoris quondam sui, & Liviani Turbonis. In adoptionis sponfionem venit, Palma & Celso, inimicis semper suis, & quos postea ipse insecutus est, in suspicionem affectatæ tyrannidis lapsis. Secundo Consul favore Plotinæ factus, totam præsumptionem adoptionis emeruit. Corrupisse eum Trajani libertos, curasse delicatos, eosdemque sepelisse, per ea tempora, quibus in aula familiarior fuit, opinio multa firmavit. Quinto Iduum Augusti die, legatus Syriæ, literas adoptionis accepit: quando & natalem adoptionis celebrari jussit. Tertio Iduum eandem, quando & natalem imperii statuit celebrandum, excessus ei Trajani nuntiatus est. Frequens sane opinio fuit, Trajano id animi fuisse, ut Neratium Priscum, non Hadrianum, successorem relinqueret, multis amicis in hoc consentientibus, usque eo, ut Prisco aliquando dixerit: *Commendo tibi provincias, si quid mihi fatale contigerit.* Et multi quidem dicunt, Trajanum in animo id habuisse, ut, exemplo Alexandri Macedonis, sine certo successore moreretur: multi, ad senatum eum oratio-

nem voluisse mittere, petiturum, ut, *si quid ei evenisset, principem Romanæ Reipublicæ senatus daret*; additis dumtaxat nominibus, ex quibus optimum idem senatus eligeret. Nec defunt, qui factione Plotinæ, mortuo jam Trajano, Hadrianum in adoptionem adscitum esse prodiderint; supposito, qui pro Trajano fessa voce loqueretur.

V. Adeptus imperium, ad priscum se statim morem instituit, & tenendæ per orbem terrarum paci operam intendit. nam deficientibus his nationibus, quas Trajanus subegerat, Mauri laceſcebant, Sarmatæ bellum inferebant, Britanni teneri sub Romana ditione non poterant, Ægyptus seditionibus urgebatur, Lycia denique ac Palæſtina rebelles animos efferebant. quare omnia trans Euphratem ac Tigrim reliquit, *exemplo (ut dicebat) Catonis, qui Macedonas liberos pronuntiavit, quia teneri non poterant.* Pſamatoffirim, quem Trajanus Parthis regem fecerat, quod eum non magni ponderis apud Parthos videret, proximis gentibus regem dedit. Tantum autem statim clementiæ studium habuit, ut, cum sub primis imperii diebus ab Attiano per epistolas eſſet admonitus, ut & Bæbius Macer præfectus Urbis, si reniteretur ejus imperio, necaretur; & Laberius Maximus, qui, suspectus imperio, in insula exſulabat, & Frugi Crassus, neminem læderet: quamvis Crassum postea procurator, egressum insula, quasi res novas moliretur, injussu ejus occiderit. Militibus ob auspicia imperii duplicem largitionem dedit. Lusium Quietum, sublatis gentibus Mauris, quos regebat, quia suspectus imperio fuerat,

exarmavit; Martio Turbone, Judæis compressis, ad deprimendum tumultum Mauritaniae destinato. Post hoc Antiochia digressus est ad inspiciendas reliquias Trajani, quas Attianus, Plotina & Matidia deferebant. Quibus exceptis & navi Romam dimissis, ipse Antiochiam regressus, præpositoque Syriæ Catilio Severo, per Illyricum Romam venit.

VI. Trajano divinos honores, datis ad senatum, & quidem accuratissimis, literis postulavit, & cunctis volentibus meruit, ita ut senatus multa, quæ Hadrianus non postulaverat, in honorem Trajani sponte decerneret. Cum ad senatum scriberet, veniam petiit, *quod de imperio suo judicium senatui non dedisset: salutatus scilicet præpropere a militibus imperator, quod esse respublica sine imperatore non posset.* Cum triumphum ei senatus, qui Trajano debitus erat, detulisset, recusavit ipse, atque imaginem Trajani curru triumphali vexit, ut optimus imperator ne post mortem quidem triumphi amitteret dignitatem. Patris patriæ nomen sibi delatum statim, & iterum postea, distulit: quod hoc nomen Augustus sero meruisset. Aurum coronarium Italiæ remisit, in provinciis minuit, & quidem difficultatibus æarii ambiciose ac diligenter expositis. Audito dein tumultu Sarmatarum & Roxolanorum, præmissis exercitibus Mœsiam petiit. Martium Turbonem, post Mauritaniae præfecturam insulis ornatum, Pannoniæ Daciæque ad tempus præfecit. Cum rege Roxolanorum, qui de imminutis stipendiis querebatur, cognito negotio pacem composuit.

VII. Nigrini infidias, quas ille sacrificanti Ha-

driano, conscio sibi Lasso & multis alijs, paraverat, cum eum etiam successorem sibi met Hadrianus destinasset, evasit. Quare Palma Terracinæ, Celsus Bais, Nigrinus Faventia, Lufius in itinere, senatu jubente, invito Hadriano (ut ipse in vita sua dicit) occisi sunt. Unde statim Hadrianus, ad refellendam tristissimam de se opinionem, quod occidi passus esset uno tempore quatuor consulares, Romam venit, Dacia Turboni credita, titulo Ægyptiæ præfecturæ, quo plus haberet auctoritatis, ornato: & ad comprimendam de se famam, congiarium duplex præsens populo dedit, ternis jam per singulos aureis se absente divisit. In senatu quoque, excusatis, quæ facta erant, juravit, *se nunquam senatorem, nisi ex senatus sententia, puniturum*. Statim cursum fiscalem instituit, ne magistratus hoc onere gravarentur. Ad colligendam autem gratiam nihil prætermittens, infinitam pecuniam, quæ fisco debebatur, privatis debitoribus in Urbe atque Italia, in provinciis vero etiam ex reliquis ingentes summas remisit; sygraphis in foro Divi Trajani, quo magis securitas omnibus roboraretur, incensis. Damnatorum bona in fiscum privatum redigi vetuit, omni summa in ærario publico recepta. Pueris ac puellis, quibus etiam Trajanus alimenta detulerat, incrementum liberalitatis adjecit. Senatoribus, qui non vitio suo deciderant, patrimonium, pro liberorum modo, senatoriæ professionis explevit; ita ut plerisque in diem vitæ suæ dimensum sine dilatione restituerit. Ad honores explendos, non solum amicis, sed etiam passim ali-

quantis, multa largitus est. Feminas nonnullas, ad sustentandam vitam, sumtibus juvit. Gladiatorium munus per sex dies continuos exhibuit; & mille feras natali suo edidit.

VIII. Optimos quosque de senatu in contubernium Imperatoriæ majestatis adscivit. Ludos circenses, præter natalitios, decretos sibi sprevit: & in concione, & in senatu sæpe dixit, *ita se rempublicam gesturum, ut sciret populi rem esse, non propriam.* Tertio consules, cum ipse ter fuisset, plures fecit: infinitos autem secundi consulatus honore cumulavit. Ipsum autem tertium consulatum, & quatuor mensibus tantum egit, & in eo sæpe jus dixit. Senatui legitimo, cum in Urbe vel juxta Urbem esset, semper interfuit. Senatus fastigium in tantum extulit, difficile faciens senatores, ut cum Attianum ex præfecto prætorii, ornamentis consularibus præditum, faceret senatorem, nihil se amplius habere, quod in eum conferri posset, ostenderit. Equites Romanos nec sine se de senatoribus, nec secum judicare permisit. Erat enim tunc mos, ut, cum Princeps causas cognosceret, & senatores & equites Romanos in consilium vocaret, sententiam ex omnium deliberatione proferret. Exsecratus est denique Principes, qui minus senatoribus detulissent. Serviano, sororis viro, cui tantum detulit, ut ei venienti de cubiculo semper occurreret, tertium consulatum, nec secum tamen, cum ille bis ante Hadrianum fuisset, ne esset secundæ sententiæ, non petenti, ac sine precatione concessit.

IX. Inter hæc tamen & multas provincias a Tra-

jano acquisitas reliquit: & theatrum, quod ille in campo Martio posuerat, contra omnium vota destruxit. Et hæc quidem eo tristiora videbantur, quod omnia, quæ displicere vidisset Hadrianus, mandata sibi, ut faceret, decreto Trajani esse simulabat. Cum Attiani, præfecti sui & quondam tutoris, potentiam ferre non posset, nisus est eum obtruncare: sed revocatus est, quia jam quatuor consularium occisorum (quorum quidem necem in Attiani consilia refundebat) premebatur invidia. Cui cum successorem dare non posset, quia non petebat; id egit, ut peteret: atque ubi primum petiit, in Turbonem transtulit potestatem: cum quidem etiam Simili, alteri præfecto, Septitium Clarum successorem dedit. Summotis his a præfectura, quibus debebat imperium, Campaniam petit: ejusque omnia oppida beneficiis & largitionibus sublevavit, optimum quemque amicitiiis suis jungens. Romæ vero prætorum & consulum officia frequentavit: conviviiis amicorum interfuit: ægros bis ac ter die, & nonnullos equites Romanos ac libertinos, visitavit, solatiis refovit, consiliis sublevavit, conviviiis suis semper adhibuit. omnia denique ad privati hominis modum fecit. Socrui suæ honores præcipuos impendit, ludis gladiatoriiis, ceterisque officiis.

X. Post hæc profectus in Gallias, omnes causariis liberalitatibus sublevavit. Inde in Germaniam transit: pacisque magis quam belli cupidus, militem, quasi bellum immineret, exercuit, tolerantia documentis eum imbuens; ipse quoque inter manipulares vitam militarem magistrans, cibus etiam

castris in propatulo libenter utens, hoc est, larido, caseo, & posca, exemplo Scipionis Æmiliani & Metelli, & auctoris sui, Trajani; multos præmiis, nonnullos honoribus donans, ut ferre possent ea, quæ asperius jubebat: siquidem ipse post Cæsarem Octavianum labantem disciplinam incuria superiorum Principum, retinuit, ordinatis & officiis & impendiis; nunquam passus aliquem a castris injuste abesse; cum tribunos non favor militum, sed justitia, commendaret; exemplo etiam virtutis suæ ceteros adhortatus, cum etiam vicena millia pedibus armatus ambularet; triclinia de castris, & porticus, & cryptas, & topia dirueret; vestem humillimam frequenter acciperet, sine auro balteum fumeret, sine gemmis fibulas stringeret, capulo vix eburneo spatham clauderet; ægros milites in hospitibus suis videret; locum castris caperet; nulli vitem, nisi robusto & bonæ famæ daret; nec tribunum nisi plena barba faceret, aut ejus ætatis, quæ prudentia & annis tribunatus robur impleret; nec pateretur quidquam tribunum a milite accipere; delicata omnia undique summoveret; arma postremo eorum, suppellectilemque corrigeret. De militum etiam ætatibus judicabat, ne quis aut minor, quam virtus posceret, aut major, quam pateretur humanitas, in castris, contra morem veterem, versaretur: agebatque, ut sibi semper noti essent, & eorum numerus sciretur.

XI. Laborabat præterea, ut condita militaria diligenter agnosceret: redditus quoque provinciales sollerter explorans, ut, si alicubi quippiam deesset,

expleret. Ante omnes tamen enitebatur, ne quid otiosum vel emeret aliquando, vel pasceret. Ergo conversis regio more militibus, Britanniam petiit: in qua multa correxit, murumque per octoginta millia passuum primus duxit, qui Barbaros Romanosque divideret. Septicio Claro, præfecto prætorii, & Suetonio Tranquillo, epistolarum magistro, multisque aliis, qui apud Sabinam uxorem, injussu ejus, familiarius se tunc egerant, quam reverentia domus aulicæ postulabat, successores dedit: *uxorem etiam, ut morosam & asperam, dimissurus*, (ut ipse dicebat) *si privatus fuisset*. Et erat curiosus non solum domus suæ, sed etiam amicorum: ita, ut per frumentarios occulta omnia exploraret; nec adverterent amici, sciri ab Imperatore suam vitam, priusquam ipse hoc Imperator ostenderet. Unde non injucundum est rem inferere, ex quo constet, eum de amicis multa didicisse. nam cum ad quendam scripisset uxor sua, *quod, voluptatibus detentus & lavacris, ad se redire nollit*, atque hoc Hadrianus per frumentarios cognovisset; petente illo commeatum, Hadrianus ei lavacra & voluptates exprobravit. cui ille: *num & tibi uxor mea, quod & mihi, scripsit?* Et hoc quidam vitiosissimum putant: atque huic adjungunt, quæ de adulterum amore ac nuptarum adulteriis, quibus Hadrianus laborasse dicitur, asserunt; jungentes, quod ne amicis quidem servaverit fidem.

XII. Compositis in Britannia rebus, transgressus in Galliam; Alexandrina seditione turbatus, quæ nata est ob Apin, qui cum repertus esset post multos annos, turbas inter populos creavit, apud quem

deberet locari, omnibus studiose certantibus. Per idem tempus, in honorem Plotinæ basilicam, apud Nemausum, opere mirabili exstruxit, post hæc Hispanias petiit, & Tarracone hiemavit: ubi sumtu suo ædem Augusti restituit, omnibus Hispanis Tarraconem in conventum vocatis; delectumque joculariter, ut verba ipsa ponit Marius Maximus, detrectantibus; Italicis vehementissime, ceteris prudenter & caute consuluit. Quo quidem tempore non sine gloria gravissimum periculum adiit, apud Tarraconem spatians per hospitiva viridaria, servo in se hospitis cum gladio furiosus irruente: quem retentum ille ministris accurrentibus tradidit; & ubi furiosum esse constitit, medicis curandum dedit, in nullo omnino commotus. Per ea tempora, & alias frequenter in plurimis locis, in quibus barbari non fluminibus, sed limitibus dividuntur, stipitibus magnis, in modum muralis sepi, funditus jactis atque connexis, barbaros separavit. Germanis regem constituit: motus Maurorum compressit: & a senatu supplicationes emeruit. Bellum Parthorum per idem tempus in motu tantum fuit; idque Hadriani colloquio repressum est.

XIII. Post hoc per Asiam & insulas ad Achajam navigavit, & Eleusinia sacra, exemplo Herculis Philippique, suscepit: multa in Athenienses contulit, & pro agonothea refedit. & in Achaja quidem etiam illud observatum ferunt, quod, cum in sacris multi cultros haberent, cum Hadriano nullus armatus ingressus est. Post in Siciliam navigavit: in qua Ætnam montem conscendit, ut solis ortum

videret, arcus specie, ut dicitur, varium. Inde Romam venit, atque ex ea in Africam transiit, ac multum beneficiorum provinciis Africanis attribuit. Nec quisquam fere Principum tantum terrarum tam celeriter peragravit. Denique cum post Africam Romam redisset, statim ad Orientem profectus, per Athenas iter fecit, atque opera, quæ apud Athenienses cœperat, dedicavit: ut Jovis Olympii ædem, & aram sibi: eodemque modo per Asiam iter faciens, templa sui nominis consecravit. Deinde a Cappadocibus servitia castris profutura suscepit. Toparchas & reges ad amicitiam invitavit; invitato etiam Cosdroe rege Parthorum, remissaque illi filia, quam Trajanus ceperat, ac promissa sella, quæ itidem capta fuerat. cumque ad eum quidam reges venissent, ita cum his egit, ut eos pœniteret, qui venire noluerunt, causa speciatim Pharasmanis, qui ejus invitationem superbe neglexerit. Et circumiens quidem provincias, procuratores & præsidēs pro factis supplicio affecit; ita severe, ut accusatores per se crederetur immittere.

XIV. Antiochenſes inter hæc ita odio habuit, ut Syriam a Phœnice ſeparare voluerit, ne tot civitatum metropolis Antiochia diceretur. Moverunt ea tempeſtate & Judæi bellum, quod vetabantur mutilare genitalia. Sed in monte Caſſio, cum videndi ſolis ortus gratia nocte aſcendiſſet, imbre orto, fulmen decidens hoſtiam & victimarium ſacriſcanti afflavit. Perag rata Arabia, Peluſium venit, & Pompeji tumulum magnificentius exſtruxit. Antinoum ſuum, dum per Nilum navigat, perdidit;

quem muliebriter flevit, de quo varia fama est; aliis eum devotum pro Hadriano afferentibus; aliis, quod & forma ejus ostentat, & nimia voluptas Hadriani, & Græci quidem, volente Hadriano, eum consecraverunt, oracula per eum dari afferentes: quæ Hadrianus ipse composuisse jactatur. Fuit enim poematum & literarum omnium studiosissimus; arithmetica, geometriæ, picturæ, peritissimus. Jam psallendi, & cantandi scientiam præ se ferebat, in voluptatibus nimius: nam & de suis dilectis multa versibus composuit: amatoria carmina scripsit. Idem armorum peritissimus, & rei militaris scientissimus: gladiatoria quoque arma tractavit. Idem severus, lætus, comis, gravis, lascivus, cunctator, tenax, liberalis, simulator, sævus, clemens, & semper in omnibus varius.

XV. Amicos ditavit; & quidem non petentes, cum petentibus nihil non negaret. Idem tamen facile de amicis, quidquid insurrebatur, audivit: atque ideo prope cunctos vel amicissimos, vel eos, quos summis honoribus evexit, postea ut hostium loco habuit; ut Attianum, & Nepotem, & Septicium Clarum. nam Eudæmonem; prius conscium imperii, ad egestatem perduxit; Polyænum & Marcellum ad mortem voluntariam coegit; Heliodorum famosissimis literis laceffivit; Titianum, ut conscium tyrannidis, & argui passus est, & proscribi; Numidium Quadratum, & Catilium Severum, & Turbonem, graviter infecutus est; Servianum, sororis virum, nonagesimum jam annum agentem, ne sibi superviveret, mori coegit; libertos denique

& nonnullos milites infecutus est. Et quamvis esset oratione & versu promptissimus, & in omnibus artibus peritissimus, tamen professores omnium artium semper, ut doctior, risit, contempsit, obtrivit. Cum his ipsis professoribus & philosophis, libris vel carminibus invicem editis, sæpe certavit. Et Favorinus quidem, cum verbum ejus quoddam ab Hadriano reprehensum esset, atque ille cessisset; arguentibus amicis, quod male cederet Hadriano de verbo, quod idonei auctores usurpassent, risum jucundissimum movit. ait enim: *Non recte suadetis, familiares, qui non patimini me illum doctiorem omnibus credere, qui habet triginta legiones.*

XVI. Famæ celebris Hadrianus tam cupidus fuit, ut libros vitæ suæ, scriptos a se, libertis suis literatis dederit, jubens, ut eos suis nominibus publicarent: nam Phlegontis libri, Hadriani esse dicuntur. Catacrianos libros obscurissimos, Antimachum imitando, scripsit. Floro poetæ scribenti ad se,

*Ego nolo Cæsar esse,
Ambulare per Britannos,
Scythicas pati pruinas,*

rescripsit:

*Ego nolo Florus esse,
Ambulare per tabernas,
Latitare per popinas,
Culices pati rotundos.*

Amavit præterea genus dicendi vetustum. controversas declamavit. Ciceroni Catonem, Virgilio Ennium, Sallustio Coelium prætulit. eademque jactatione de Homero ac Platone judicavit. Mathesim sic

Script. H. A.

B

scire sibi visus est, ut sero Kalendis Januariis scripserit, quod ei toto anno posset evenire: ita, ut eo anno, quo periit, usque ad illam horam, qua est mortuus, scripserit, quid acturus esset. Sed quamvis esset in reprehendis musicis, tragicis, comicis, grammaticis, rhetoribus, facilis; tamen omnes professores & honoravit, & divites fecit, licet eos quæstionibus semper agitavit. Et cum ipse auctor esset, ut multi ab eo tristes recederent; dicebat, *se graviter ferre, si quem tristem videret*. In summa familiaritate Epictetum & Heliodorum philosophos, & (ne nominatim de omnibus dicam) grammaticos, rhetores, musicos, geometras, pictores, astrologos habuit; præ ceteris (ut multi asserunt) eminente Favorino. Doctores, qui professioni suæ inhabiles videbantur, ditatos honoratosque a professione dimisit.

XVII. Quos in privata vita inimicos habuit, imperator tantum neglexit, ita ut uni, quem capitalem habuerat, factus imperator diceret, *Evassifi*. lis, quos ad militiam ipse per se vocavit, equos, mulos, vestes, sumtus, & omnem ornatum semper exhibuit. Saturnalia & sigillaria frequenter amicis inopinantibus misit, & ipse ab his libenter accepit, & alia invicem dedit. Ad deprehendas obsonatorum fraudes, cum plurimis fumentibus pasceret, fercula de aliis mensis etiam ultimis quibusque iussit apponi. Omnes reges muneribus suis vicit. Publice, & frequenter, & cum omnibus lavit: ex quo ille jocus balnearis innotuit. nam cum quodam tempore veteranum quendam notum sibi in militia, dorsum

& ceteram partem corporis vidisset atterere, percontatus, cur se marmoribus destringendum daret, ubi audiuit, hoc idcirco fieri, quod servum non haberet; & servis eum donavit, & sumtibus. verum alia die cum plures senes ad provocandam liberalitatem Principis, parieti se attererent, evocari eos iussit, & alium ab alio invicem defricari. Fuit & plebis jactantissimus amator. Peregrinationis ita cupidus, ut omnia, quæ legerat de locis orbis terrarum, præsens vellet addiscere. Frigora & tempestates ita patienter tulit, ut nunquam caput tegeret. Regibus multis plurimum detulit: a plerisque vero etiam pacem redemit; a nonnullis contemptus est. multis ingentia dedit munera; sed nulli majora, quam Hiberorum, cui & elephantum, & quinquagenariam cohortem, post magnifica dedit dona. Cum a Pharasmane ipse quoque ingentia dona accepisset, atque inter hæc auratas quoque chlamydes; trecentos noxios cum auratis chlamydibus in arenam misit, ad ejus munera deridenda.

XVIII. Cum judicaret, in consilio habuit non amicos suos aut comites solum, sed jurisconsultos, & præcipue Julium Celsum, Salvium Julianum, Neratium Priscum, aliosque; quos tamen senatus omnis probasset. Constituit inter cetera, ut in nulla civitate, domus aliquæ transferendæ ad aliam urbem, ullius materiæ causa diruerentur. Liberis proscriptorum duodecimas bonorum concessit. Majestatis crimina non admisit. Ignotorum hereditates repudiavit: nec notorum accepit, si filios haberent. De thesauris ita cavit, ut, si quis in suo reperisset, ipse

potiretur: si quis in alieno, domino daret: si quis in publico, cum fisco æqualiter partiretur. Servos a dominis occidi vetuit, eosque iussit damnari per iudices, si digni essent. Lenoni & lanistæ servum vel ancillam vendi vetuit, causâ non præstita. Decoctores bonorum suorum, si suæ auctoritatis essent, catamidiari in Amphitheatro & dimitti iussit. Ergastula servorum & libertorum tulit. Lavacra pro sexibus separavit. Si dominus in domo interemtus esset, non de omnibus servis quæstionem haberi; sed de his, qui per vicinitatem poterant sentire, præcepit.

XIX. In Etruria præturam Imperator egit. Per Latinâ oppida dictator, & ædilis, & duumvir fuit. apud Neapolim demarchus; in patria sua quinquennalis: & item Hadriæ quinquennalis, quasi in alia patria; & Athenis archon fuit. In omnibus pæne urbibus & aliquid ædificavit, & ludos edidit. Athenis mille ferarum venationem in stadio exhibuit. Ab Urbe nunquam ullum venatorem aut scenicum avocavit. Romæ post ceteras immensissimas voluptates, in honorem focrus suæ, aromatica populo donavit. in honorem Trajani balsama & crocum per gradus theatri fluere iussit: fabulas omnis generis more antiquo in theatro dedit: histriones aulicos publicavit. In circo multas feras, & sæpe centum leones, interfecit. Militares pyrrichas populo frequenter exhibuit: gladiatores frequenter spectavit. Cum opera ubique infinita fecisset, nunquam ipse, nisi in Trajani patris templo, nomen suum scripsit. Romæ instauravit Pantheum, septa, basilicam Neptuni, sacras ædes pluri-

mas, forum Augusti, lavacrum Agrippæ: eaque omnia propriis & veteribus nominibus consecravit. Fecit & sui nominis pontem, & sepulcrum juxta Tiberim; & ædem Bonæ Deæ transtulit: & colossum, statuem atque suspensum per Decrianum architectum; de eo loco, in quo nunc templum Urbis est, ingenti molimine, ita ut operi etiam elephantes viginti quatuor exhiberet. & cum hoc simulacrum, post Neronis vultum, cui antea dicatum fuerat, Soli consecrasset; aliud tale, Apollodoro architecto auctore; facere Lunæ molitus est.

XX. In colloquiis etiam humillimorum civilissimus fuit; detestans eos, qui sibi hanc voluptatem humanitatis, quasi servantes fastigium Principis, inviderent. Apud Alexandriam in Musio, multas quæstiones professoribus proposuit; & propositas ipse dissolvit. Marius Maximus dicit, eum natura crudelem fuisse, & idcirco multa pie fecisse, quod timeret, ne sibi idem, quod Domitiano accidit, eveniret. Et cum titulos in operibus non amaret, multas civitates *Hadrianopoles* appellavit; ut ipsam Carthaginem, & Athenarum partem. Aquarum etiam ductus infinitos hoc nomine nuncupavit. Fiscus advocatum primus instituit. Fuit memoriæ ingentis, facultatis immensæ. nam & ipse orationes dictavit; & ad omnia respondit. Joca ejus plurima exstant: nam fuit etiam dicaculus. Unde illud quoque innotuit, quod, cum cuidam canescenti quiddam negasset, eidem iterum petenti, sed infecto capite, respondit, *Jam hoc patri tuo negavi*. Nomina plurimis sine nomenclatore reddidit, quæ semel & congesta

simul audiverat, ut nomenclatores sæpius errantes emendaverit. Dixit & veteranorum nomina, quos aliquando dimiserat. Libros statim lectos, & ignotos quidem, plurimis memoriter reddidit. Uno tempore scripsit, dictavit, audivit, & cum amicis fabulatus est. Omnes publicas rationes ita complexus est, ut domum privatam quivis paterfamilias diligens non satis novit. Equos & canes sic amavit, ut eis sepulcra constitueret. Oppidum *Hadriaſothe-
ras* in quodam loco, quod illic & feliciter eſſet venatus, & urſam occidiſſet aliquando, conſtituit.

XXI. De judicibus omnibus ſemper cuncta ſcrutando, tamdiu requiſivit, quamdiu verum inveniret. Libertos ſuos nec ſciri voluit in publico, nec aliquid apud ſe poſſe, dicto ſuo omnibus ſuperioribus Principibus vitia imputans libertorum; damnatis omnibus libertis ſuis, quicumque ſe de eo jaſtaverant. Unde exſtat etiam illud ſevere quidem, ſed prope joculari, de ſervis. nam cum quodam tempore ſervum ſuum inter duos ſenatores e conſpectu ambulare vidiffet, miſit qui ei colaphum daret, & diceret: *Noli inter eos ambulare, quorum eſſe adhuc potes ſervus.* Inter cibos unice amabat tetrapharmacum, quod erat de faſiano, ſumine, perna & cruſtulo. Fuerunt ejus temporibus fames, peſtilentia, & terræ motus: quæ omnia, quantum potuit, procuravit, multisque civitatibus, vaſtatis per iſta, ſubvenit. Fuit etiam Tiberis inundatio. Latium multis civitatibus dedit: tributa multis remiſit. Expeditiones ſub eo graves nullæ fuerunt: bella etiam ſilentio pæne tranſacta. A militibus, propter cu-

ram exercitus nimiam, multum amatus est, simul quod in eos liberalissimus fuit. Parthos in amicitia semper habuit; quod inde regem retraxit, quem Trajanus imposuerat. Armeniis regem habere permisit, cum sub Trajano legatum habuissent. A Mesopotamiis non exegit tributum, quod Trajanus imposuit. Albanos & Hiberos amicissimos habuit, quod reges eorum largitionibus profecutus est, cum ad illum venire contempsissent. Reges Bactrianorum, legatos ad eum, amicitiae petendae causa, supplices miserunt.

XXII. Tutores sapissime dedit. Disciplinam civilem non aliter tenuit, quam militarem. Senatores & equites Romanos semper in publico togatos esse iussit, nisi si a coena reverterentur. Ipse, cum in Italia esset, semper togatus processit. Ad convivium venientes senatores stans excepit: semperque aut pallio tectus discubuit, aut toga submissa. Judicium sumtus constituit, & ad antiquum modum redegit. Vehicula cum ingentibus sarcinis Urbem ingredi prohibuit. Sederi equos in civitatibus non sivit. Ante octavam horam in publico neminem, nisi ægrum, lavari passus est. Ab epistolis & a libellis primus equites Romanos habuit. Eos, quos pauperes & innocentes vidit, sponte ditavit: quos vero calliditate ditatos, etiam odio habuit. Sacra Romana diligentissime curavit: peregrina contempsit. Pontificis maximi officium peregit. Causas Romae atque in provinciis frequenter audivit, adhibitis consilio suo Consulibus atque Prætoribus, & optimis Senatoribus. Fucinum lacum emisit. Quatuor consula-

res per omnem Italiam iudices constituit. Quando in Africam venit, ad adventum ejus, post quinquennium pluit: atque ideo ab Africanis dilectus est.

XXIII. Peragris fane omnibus orbis partibus capite nudo, & in summis plerumque imbribus atque frigoribus, in morbum incidit letalem: factusque de successore sollicitus, primum de Serviano cogitavit, quem postea, ut diximus, mori coegit: Fuscum, quod imperium, præfagiis & ostentis agitatus, speraret, in summa detestatione habuit: Plætorium Nepotem, quem tantopere ante dilexit, ut veniens ad eum ægrotantem Hadrianus, impune non admitteretur, suspicionibus adductus, eodem modo: & Terentium Gentianum: & hunc vehementius, quod a senatu diligere tunc videbat. omnes postremo, de quorum imperio cogitavit, quasi futuros Imperatores, detestatus est. Et omnem quidem vim crudelitatis ingentis usque eo repressit, donec in villa Tiburtina profluvio sanguinis pæne ad exitum venit. tunc libere Servianum, quasi affectatorem imperii, quod servis regiis cœnam misisset, quod in sedili regio juxta lectum posito sedisset, quod erectus ad stationes militum senex nonagenarius processisset, mori coegit: multis aliis interfectis, vel aperte, vel per insidias: quandoquidem etiam Sabina uxor, non sine fabula veneni dati ab Hadriano, defuncta est. Tunc Cejonium Commodum, Nigrini generum, insidiatoris quondam sui, forma commendatum, adoptare constituit. Adoptavit ergo Cejonium Commodum Verum, in vitis omnibus: eumque *Ælium Verum Cæ-*

sarem appellavit. Ob cuius adoptionem ludos Circenses dedit, & donativum populo ac militibus expendit. quem Prætura honoravit, ac statim Pannoniis imposuit; decreto consulatu cum sumtibus eundem Commodum secundum Consulem designavit. Quem cum minus sanum videret, sæpissime distitavit: *In caducum parietem nos inclinavimus, & perdidimus quater millies sestertium, quod populo & militibus pro adoptione Commodi dedimus.* Commodus autem præ valetudine, nec gratias quidem in senatu agere potuit Hadriano de adoptione. denique, accepto largius antidoto, ingravescente valetudine, per somnum periit, ipsis Kalendis Januariis. quare ab Hadriano votorum causa lugeri est vetitus.

XXIV. Sed mortuo Ælio Vero Cæsare, Hadrianus, ingruente tristissima valetudine, adoptavit Arrium Antoninum, qui postea Pius dictus est: sed ea demum lege, ut ille sibi duos adoptaret, Annium Verum & Marcum Antoninum. Hi sunt; qui postea duo pariter Augusti primi rempublicam gubernaverunt. Antoninus quidem *Pius* idcirco appellatus dicitur, quod socerum fessum ætate manu sublevarit: quamvis alii cognomentum hoc ei dicant inditum, quod multos senatores Hadriano jam sævienti eripuisse; alii, quod ipsi Hadriano magnos honores post mortem detulisset. Antonini adoptionem plurimi tunc factam esse doluerunt; speciatim Catilius Severus, præfectus Urbis, qui sibi præparabat imperium. qua re prodita, successore accepto, dignitate privatus est. Hadrianus autem, ultimo vitæ tædio jam affectus, gladio se transfigi a servo

jussit. quod cum proditum esset, & in Antoninū usque notitiam venisset, ingressis ad se præfectis & filio, rogantibus, *ut æquo animo necessitatem morbi ferret*; iratus illis, auctorem proditiōis jussit occidi: qui tamen ab Antonino servatus est, dicente Antonino, *parricidam se futurum, si Hadrianum, adoptatus ipse, pateretur occidi*. Statimque testamentum scripsit: nec tamen actus reipublicæ prætermisit. Et post testamentum quidem iterum se conatus occidere, subtrahendo pugione, sævior factus est. petiit & venenum a medico: qui se ipse, ne daret, occidit.

XXV. Ea tempestate supervenit quædam mulier, quæ diceret, *somnio se monitam, ut insinuares Hadriano, ne se occideret, quod esset bene valiturus: quod cum non fecisset, esse cæcatam*. Jussam tamen iterum, Hadriano eadem diceret, atque genua ejus oscularetur, *receptura visum, si id fecisset*. Quod cum infomnium impleisset, oculos recepit; cum aqua, quæ in fano erat, ex quo venerat, oculos abluisset. Venit & de Pannonia quidam natus cæcus ad febrientem Hadrianum, eumque contigit: quo facto & ipse oculos recepit, & Hadrianum febris reliquit: quamvis Marius Maximus, hæc per simulationem facta, commemoret. Post hoc Hadrianus Bajæ petiit, Antonino Romæ ad imperandum relicto. Ubi cum nihil proficeret, arcessito Antonino, in conspectu ejus apud ipsas Bajæ periit, die sexto Iduum Juliarum. Invisusque omnibus, sepultus est in villa Ciceroniana Puteolis. Sub ipso mortis tempore & Servianum, nonaginta annos agentem, ut supra dictum est, ne sibi superviveret, atque (ut putabat)

imperaret, mori coegit; & ob leves offensas plurimos jussit occidi, quos Antoninus reservavit. Et moriens quidem, hos versus fecisse dicitur:

Animula vagula, blandula,

Hospes comesque corporis,

Quæ nunc abibis in loca,

Pallidula, rigida, nudula;

Nec, ut soles, dabis jocos.

Tales autem, nec multo meliores, fecit & Græcos. Vixit annis septuaginta duobus, mensibus quinque, diebus septemdecim. Imperavit annis viginti uno, mensibus undecim.

XXVI. Statura fuit procerus, forma comtus, flexo ad pectinem capillo, promissa barba, ut vulnere, quæ in facie naturalia erant, tegeret, habitudine robusta. Equitavit ambulavitque plurimum, armisque & pilo se semper exercuit. Venatu frequentissime leonem manu sua occidit. Venando autem jugulum & coxam fregit. venationem semper cum amicis participavit. In convivio tragœdias, comœdias, Atellenas, sambucas, lectores, poetas, pro re semper exhibuit. Tiburtinam villam mire exædificavit, ita ut in ea & provinciarum & locorum celeberrima nomina inscriberet: velut Lyceum, Academiam, Prytaneum, Canopum, Pœcilen, Tempe, vocaret. &, ut nihil prætermitteret, etiam inferos finxit. Signa mortis hæc habuit. Natali suo ultimo, cum Antoninum commendaret, prætexta sponte delapsa caput ei aperuit. Anulus, in quo imago ipsius sculpta erat, sponte de digito delapsus est. Ante diem natalis ejus, nescio quis ad

senatum ululans venit : contra quem Hadrianus ita motus est , quasi de sua morte loqueretur ; cum ejus verba nullus agnosceret. Idem cum vellet in senatu dicere , *Post filii mei mortem ; Post mortem meam* dixit. Somniavit præterea , se a patre porionem soporiferam impetrasse. item somniavit , a leone se oppressum esse.

XXVII. In mortuum eum a multis multa sunt dicta. Acta ejus irrita fieri senatus volebat. nec appellatus esset *Divus* , nisi Antoninus rogasset. Templum denique ei , pro sepulcro , apud Puteolos constituit , & quinquennale certamen , & flamines , & sodales , & multa alia , quæ ad honorem quasi numinis pertinerent. qua re , ut supra dictum est , multi putant , Antoninum Pium dictum.

Æ L I I S P A R T I A N I
Æ L I U S V E R U S

A D

DIOCLETIANUM AUG.

DIOCLETIANO AUG. ÆLIUS SPARTIANUS
SUUS SALUTEM.

I. **I**N animo mihi est, Diocletiane Auguste, tot Principum maxime, non solum eos, qui Principum locum in hac statione, quam temperas, retentarunt, ut usque ad Divum Hadrianum feci, sed illos etiam, qui vel Cæsarum nomine appellati sunt, nec Principes aut Augusti fuerunt, vel quolibet alio genere aut in famam, aut in spem principatus venerunt, cognitioni numinis tui sternere: quorum præcipue de Ælio Vero dicendum est, qui primus tantum *Cæsaris* nomen accepit, adoptione Hadriani familiæ Principum adscriptus. Et quoniam nimis pauca dicenda sunt, nec debet prologus enormior esse, quam fabula, de ipso jam loquar.

II. Cejonius Commodus, qui & Ælius Verus ap-

pellatus est, quem sibi Hadrianus, ævo ingravescente morbis tristioribus pressus, peragrato jam orbe terrarum, adoptavit, nihil habet in sua vita memorabile, nisi quod primus tantum *Cæsar* est appellatus: non testamento, ut antea solebat, neque eo modo, quo Trajanus est adoptatus, sed eo prope genere, quo nostris temporibus a vestra Clementia Maximianus atque Constantius Cæsares dicti sunt, quasi quidam Principum filii viri, designati augustæ majestatis heredes. Et quoniam de Cæsarum nomine in hujus præcipue vita est aliquid disputandum, qui hoc solum nomen indeptus est; Cæsarem vel ab elephanto (qui lingua Maurorum *casar* dicitur) in prælio cæso, eum, qui primus sic appellatus est, doctissimi & eruditissimi viri putant dictum; vel quia mortua matre, ventre cæso sit natus; vel quod cum magnis crinibus sit utero parentis effusus; vel quod oculis cæcis, & ultra humanum morem vigerit. Certe, quæcunque illa, felix necessitas fuit, unde tam clarum, & duraturum cum æternitate mundi, nomen effloruit. Hic ergo, de quo sermo est, primum Lucius Aurelius Verus est dictus, sed ab Hadriano adscitus, in Æliorum familiam, hoc est, in Hadriani transcriptus, & appellatus est Cæsar. Huic pater Cejonius Commodus fuit, quem alii Verum, alii Lucium Aurelium, multi Annium prodiderunt: majores omnes nobilissimi: quorum origo pleraque ex Etruria fuit, vel ex Faventia. Et de hujus quidem familia plenius in vita Lucii Aurelii Cejonii Commodi Veri Antonini, filii hujusce, quem sibi adoptare Antoninus jussus est, differemus. is enim

liber debet omnia, quæ ad stemma generis pertinent, continere, qui habet Principem, de quo plura dicenda sunt.

III. Adoptatus autem Ælius Verus ab Hadriano; eo tempore, quo jam, ut superius diximus, parum vigeat, & de successore necessario cogitabat: statimque prætor factus, & Pannonius dux ac rector impositus, mox consul creatus, &, quia erat deputatus imperio, iterum consul designatus est. Datum etiam populo congiarium causa ejus adoptionis, collatumque militibus HS. ter millies, circenses editi; neque quidquam prætermisum, quod posset lætitiæ publicam frequentare. Tantumque apud Hadrianum Principem valuit, ut, præter adoptionis affectum, quo ei videbatur adjunctus, solus omnia, quæ cuperet, etiam per literas impetraret. Nec provinciæ quidem, cui præpositus erat, defuit. nam bene gestis rebus, vel potius feliciter, etsi non summi, medii tamen obtinuit ducis famam. Hic tamen valetudinis adeo miseræ fuit, ut Hadrianum statim adoptionis pœnituerit; potueritque eum amovere a familia imperatoria, cum sæpe de aliis cogitaret, si forte vixisset. Fertur denique ab his, qui Hadriani vitam diligentius in literas retulerunt, Hadrianum Veri scisse genituram, & eum, quem non multum ad rempublicam gerendam probaret, ob hoc tantum adoptasse, ut suæ satisfaceret voluptati; &, ut quidam dicunt, jurijurando, quod intercessisse inter ipsum ac Verum secretis conditionibus ferebatur. Fuisse enim Hadrianum peritum matheseos, Marius Maximus usque adeo demonstrat, ut eum dicat cum:

sta de se scisse, sic, ut omnium dierum, usque ad horam mortis, futuros actus ante perscripserit.

IV. Satis præterea constat, eum de Vero sæpe dixisse,

*Ostendent terris hunc tantum fata, neque ultra
Esse sinent.*

Quos versus cum aliquando in hortulo spatians cantitaret, atque adesset unus ex literatis, quorum Hadrianus speciosa societate gaudebat, velletque addere,

— — *Nimum vobis Romana propago*

Visa potens, superi, propria hæc si dona fuissent:

Hadrianus dixisse fertur, *Hos versus vita non capie
Veri*; illud addens:

— — *Manibus date lilia plenis:*

Purpureos spargam flores, animamque nepotis

His saltem accumulem donis, & fungar inani

Munere.

Cum quidem etiam illud dicitur cum irrisione dixisse: *Ego mihi divum adoptavi, non filium.* Eum tamen cum consolaretur unus de literatis, qui aderant, ac diceret, *Quid si non recte constellatio ejus collecta est, quem credimus esse victurum?* Hadrianus dixisse fertur: *Facile ista dicis tu, qui patrimonii tui, non reipublicæ, quaris heredem.* Unde apparet, eum habuisse in animo alium deligere, atque hunc ultimo vitæ suæ tempore a republica submovere. sed ejus consilia juvit eventus. nam cum de provincia Ælius redisset, atque orationem pulcherrimam, quæ hodieque legitur, sive per se, sive per scriniorum aut dicendi magistros parasset, qua Kalendis Januariis Hadriano patri gratias ageret; accepta po-

tione, qua se existimaret juvari, Kalendis ipsis Januariis periit. iussusque ab Hadriano, quia vota interveniebant, non lugeri.

V. Fuit hic vitæ lætissimæ, eruditus in literis, Hadriano (ut malevoli loquuntur) acceptior forma, quam moribus. In aula diu non fuit: in vita privata, etsi minus probabilis, minus tamen reprehendus, ac memor familiæ suæ: comtus, decorus, pulchritudinis regiæ, oris venerandi, eloquentiæ celsioris, versu facilis, in republica etiam non inutilis. Hujus voluptates ab iis, qui vitam ejus scripserunt, multæ feruntur; equidem non infames, sed aliquatenus diffuentes. nam tetrapharmacum, seu potius pentapharmacum, quo postea semper Hadrianus est usus, ipse dicitur reperisse; hoc est, sumen, fasianum, pavonem, pernam crustulatam & aprugnam. de quo genere cibi aliter refert Marius Maximus, non pentapharmacum, sed tetrapharmacum appellans: ut & nos ipsi in ejus vita persecuti sumus. Fertur etiam aliud genus voluptatis, quod Verus invenerat. nam lectum eminentibus quatuor anacliteriis fecerat, minuto reticulo undique inclusum; eumque foliis rosæ, quibus demtum esset album, replebat; jacensque cum concubinis, velamine de liliis facto se tegebat, unctus odoribus Perficis. Jam illa frequentantur a nonnullis, quod & accubitationes ac mensas de rosis ac liliis fecerit, & quidem purgatis: quæ etsi non decora, non tamen ad perniciem publicam prompta sunt. Atque idem Ovidii libros amorum in lecto semper habuisse; idem Martialem, epigrammaticum poetam, Virgi-

Scriptt. H. A.

C

lium suum dixisse. Jam illa leviora, quod cursoribus suis exemplo Cupidinum alas frequenter apposuit, eosque ventorum nominibus sæpe vocitavit; *Boream* alium, alium *Notum*, & item *Aquilonem*, aut *Circium*, ceterisque nominibus appellans; & inde fesse atque inhumaniter faciens curfitare. Idem uxori, conquerenti de extraneis voluptatibus, dixisse fertur: *Patere me per alias exercere cupiditates meas: uxor enim dignitatis nomen est, non voluptatis.* Ejus filius est Antoninus Verus, qui adoptatus est a Marco, vel certe cum Marco, & cum eodem æquale gessit imperium. nam ipsi sunt, qui primi duo Augusti appellati sunt, & quorum fastis Consularibus sic nomina præscribuntur, ut dicantur non duo Antonini, sed duo Augusti: tantumque hujus rei & novitas & dignitas valuit, ut fasti Consulares nonnulli ab his fumerent ordinem Consulum.

VI. Pro ejus adoptione infinitam pecuniam populo & militibus Hadrianus dedit. sed cum eum videret, homo paulo argutior, miserrimæ valetudinis, ita ut scutum solidius jactare non posset, dixisse fertur: *Ter millies perdidimus, quod exercitui populoque dependimus: siquidem satis in caducum parietem incubuimus, & qui non ipsam rempublicam, sed nos ipsos sustentare vix possit.* Et hoc quidem Hadrianus cum præfecto suo locutus est. quæ cum prodidisset præfectus, ac per hoc Ælius Cæsar indices magis magisque sollicitudine, utpote desperati hominis, aggravaretur, præfecto suo Hadrianus, qui rem prodiderat, successorem dedit: volens videri, quod verba tristitia temperasset. sed nihil profuit:

nam, ut diximus, *Lucius Cejonius Commodus Verus Ælius Cæsar* (nam his omnibus nominibus appellatus est) periit: sepultusque est imperatorio funere; neque quidquam de regia, nisi mortis habuit dignitatem. Doluit ergo illius mortem ut bonus pater, non ut bonus Princeps. nam cum amici solliciti quærerent, qui adoptari posset, Hadrianus dixisse fertur his, *Etiam vivente adhuc Vero decreveram*: ex quo ostendit aut iudicium suum, aut scientiam futurorum. Post hunc denique Hadrianus, diu anceps quid faceret, Antoninum adoptavit, Pium cognomine appellatum. cui conditionem addidit, ut ipse sibi Marcum & Verum Antoninos adoptaret; filiamque suam Vero, non Marco, daret. Nec diutius vixit, gravatus languore ac diverso genere morborum; sæpe dicens, *sanum Principem mori debere, non debilem*.

VII. Statuas sane Ælio Vero per totum orbem colosseas poni iussit; templa etiam in nonnullis urbibus fieri. Denique illius merito, filium ejus Verum, nepotem utpote suum, qui pereunte Ælio in familia ipsius Hadriani remanserat, adoptandum Antonino Pio cum Marco, ut jam diximus, dedit; sæpe dicens, *Habeat respublica quodcumque de Vero*. quod quidem contrarium his, quæ de adoptionis poenitentia per auctores plurimos intimata sunt; cum Verus posterior nihil dignum præter clementiam in moribus habuerit, quod imperatoris familiarum afferret. Hæc sunt, quæ de Vero Cæsare mandanda literis fuerunt. de quo idcirco non tacui, quia mihi propositum fuit, omnes, qui post Cæsa-

rem dictatorem, hoc est, Divum Julium, vel Cæsares, vel Augusti, vel Principes appellati sunt, quique in adoptionem venerunt, vel imperatorum filii, aut parentes, Cæsarum nomine consecrati sunt, singulis libris exponere, meæ satisfaciens conscientiae; etiamsi multis nulla sit necessitas talia requirendi.

JULII CAPITOLINI ANTONINUS PIUS

A D

DIOCLETIANUM AUG.

I. **T**ITO Aurelio Fulvo Bojonio Antonino Pio, paternum genus e Gallia Transalpina, Nemaufense scilicet: avus, Titus Aurelius Fulvus, qui per honores diversos ad secundum consulatum & præfecturam Urbis pervenit: pater, Aurelius Fulvus, qui & ipse fuit consul, homo tristis, & integer: avia materna, Bojonia Procilla: mater, Arria Fadilla: avus maternus, Arrius Antoninus, bis consul, homo sanctus, & qui Nervam miseratus esset, quod imperare cœpisset: soror uterina, Julia Fadilla: vitricus, Julius Lupus consularis: socer, Annus Verus: uxor, Annia Faustina: filii, mares duo, duæ feminæ: gener, per majorem filiam, Lamia Syllanus; per minorem, Marcus Antoninus, fuere. Ipse Antoninus Pius natus est tertiodecimo Kalendas Octobres, Flavio Domitiano duodecimo & Cornelio Dolabella Consulibus, in villa Lanuvina.

C 3

educatus Lorii, in Aurelia : ubi postea palatium exstruxit, cujus hodieque reliquiæ manent. Pueritiam egit cum avo paterno, mox cum materno; omnes suos religiose colens. atque adeo & consobrinorum & vitrici & multorum affinium hereditate ditatus est.

II. Fuit vir forma conspicuus, ingenio clarus, moribus clemens, nobilis vultu, & placidus ingenio, singularis eloquentiæ, nitidæ literaturæ, præcipue sobrius, diligens agri cultor, mitis, largus, alieni abstinens; & omnia hæc cum mensura, & sine jactantia : in cunctis postremo laudabilis, & qui merito Numæ Pompilio, ex bonorum sententia, comparatur. *Pius* cognominatus est a Senatu, vel quod socerum fessa jam ætate, manu, præsentē Senatu, levaverit : (quod quidem non satis magnæ pietatis est argumentum; cum impius sit magis, qui ista non faciat, quam pius, qui debitum reddat) vel, quod eos, quos Hadrianus per malam valetudinem occidi jusserat, reservavit : vel, quod Hadriano, contra omnium studia, post mortem infinitos atque immensos honores decrevit : vel, quod, cum se Hadrianus interimere vellet, ingenti custodia & diligentia fecit, ne id posset admittere : vel, quod vere natura clementissimus, & nihil temporibus suis asperum fecit. Idem sœnus trientarium, hoc est, minimis usuris, exereuit, ut patrimonio suo plurimos adjuvaret. Fuit quæstor liberalis, prætor splendidus, consul cum Catilio Severo. Hic in omni vita privata in agris frequentissime vixit : sed clarus in locis omnibus fuit. Ab Hadriano in-

ter quatuor consulares, quibus Italia committebatur, electus est ad eam partem Italiæ regendam, in qua plurimum possidebat, ut Hadrianus viri talis & honori consuleret & quieti.

III. Huic, cum Italiam regeret, imperii omen factum est. nam cum tribunal ascendisset, inter alias acclamationes dictum est, *Auguste, Dii te servant.* Proconsulatum Asiæ sic egit, ut solus avum vinceret. In proconsulatu etiam sic imperii omen accepit: nam cum sacerdos femina Trallis ex more proconsules semper hoc nomine salutaret, non dixit, *Ave proconsul*, sed *Ave imperator*. Cyzici etiam de simulacro Dei ad statuam ejus corona translata est. Et post consulatum, in viridario taurus marmoreus, cornibus ramis arboris accrescentibus, appensus est: & fulgur cælo sereno, sine noxa, in ejus domum venit: & in Etruria dolia, quæ defossa fuerant, supra terram reperta sunt: & ejus statuas in omni Etruria examen apum replevit: & somnio sæpe monitus, se * penitus ejus Hadriani simulacrum inferere. Proficiscens ad proconsulatum, filiam majorem amisit. De hujus uxore multa dicta sunt ob nimiam libertatem & vivendi facilitatem, quæ iste cum animi dolore compressit. Post proconsulatum, in consiliis Hadriani Romæ frequens vixit; de omnibus, de quibus Hadrianus consulebat, mitiorem sententiam semper ostendens.

IV. Genus fane adoptionis tale fertur. Mortuo Ælio Vero, quem sibi Hadrianus adoptaverat, & Cæsarem nuncupaverat, dies Senatus habebatur: eo Arrius Antoninus, soceri vestigia levans, venit;

atque idcirco ab Hadriano dicitur adoptatus. quæ causa sola esse adoptionis nec potuit omnino, nec debuit: maxime, cum & semper rempublicam bene egisset Antoninus, & in proconsulatu se sanctum gravemque præbuisset. Ergo eum cum Hadrianus adoptare se velle publicasset, acceptum est spatium deliberandi, utrum arrogari ab Hadriano vellet. Adoptionis lex hujusmodi data est, ut, quemadmodum Antoninus ab Hadriano adoptabatur, ita sibi ille adoptaret Marcum Antoninum, fratris uxoris suæ filium, & Lucium Verum, Ælii Veri, qui ab Hadriano adoptatus fuerat, filium, qui postea Verus Antoninus est dictus. Adoptatus est quinto Kalendas Martias die, in Senatu gratias agens, quod de se ita sensisset Hadrianus: factusque est patri & in imperio proconsulari, & in tribunicia potestate collega. Hujus primum hoc fertur, quod, cum ab uxore argueretur, quasi parum nescio quid suis largiens, dixerit: *Stulta, posteaquam ad imperium transivimus, & illud, quod habuimus ante, perdidimus.* Congiarium militibus ac populo de proprio dedit, & ea, quæ pater promiserat. Et ad opera Hadriani plurimum contulit: & aurum coronarium, quod adoptionis suæ causa oblatum fuerat, Italicis totum, medium provincialibus reddidit.

V. Et patri, quoad vixit, religiosissime paruit. Sed Hadriano apud Bajas mortuo, reliquias ejus Romam pervexit sancte ac reverenter, atque in hortis Domitiæ collocavit: etiam repugnantibus cunctis, inter Divos eum retulit. Uxorem Faustinam, *Augustam* appellari a Senatu permisit: *Pii* appella-

tionem recepit. Patri & matri atque avis & fratribus jam mortuis statuas decretas, libenter accepit. Circenses natali suo dicatos non respuit; aliis honoribus refutatis. Clypeum Hadriano magnificentissimum posuit, & sacerdotes instituit. Factus Imperator, nullo eorum, quos Hadrianus provexerat, successorem dedit. fuitque ea constantia, ut septenis & novenis annis in provinciis bonos præfides detineret. Per legatos suos plurima bella gessit. nam & Britannos per Lollium Urbicum legatum vicit, alio muro cespicio, submotis Barbaris, ducto: & Mauros ad pacem postulandam coegit; & Germanos & Dacos & multas gentes, atque Judæos rebellantes contudit per præfides ac legatos. In Achaja etiam atque Ægypto rebelliones repressit. Alanos, molientes sæpe, refrenavit.

VI. Procuratores suos modeste suscipere tributa jussit: excedentes modum, rationem factorum suorum reddere præcepit: nec unquam lætatus est lucro, quo provincialis oppressus est. Contra procuratores suos conquerentes libenter audivit. His, quos Hadrianus damnaverat, in senatu indulgentias petiit, dicens, etiam ipsum Hadrianum hoc fuisse facturum. Imperatorium fastigium ad summam civilitatem deduxit: unde plus crevit; recusantibus aulicis ministris, qui, illo nihil per internuntios agente, nec terrere poterant homines aliquando; nec ea, quæ occulta non erant, vendere. Senatui tantum detulit Imperator, quantum, cum privatus esset, deferri sibi ab alio Principe optavit. Patris patriæ nomen delatum a senatu, quod primo distule-

rat, cum ingenti gratiarum actione suscepit. Tertio anno imperii sui Faustina uxorem perdidit: quæ a senatu consecrata est, delatis circensibus atque templo, & flaminicis, & statuis aureis atque argenteis: cum etiam ipse hoc concesserit, ut imago ejus cunctis circensibus poneretur. Statuam auream, delatam a senatu, positam suscepit. Marcum Antoninum quæstorem, Consulem petente senatu creavit. Annius Verum, qui postea dictus est Antoninus, ante tempus quæstorem designavit: neque de provinciis, neque de ullis actibus quidquam constituit, nisi quod prius ad amicos retulit: atque ex eorum sententia formas composuit. Visus est sane ab amicis, & cum privatis vestibus, & domestica quædam gerens.

VII. Tanta sane diligentia subiectos sibi populos rexit, ut omnia & omnes, quasi sua essent, curaret. Provinciæ sub eo cunctæ floruerunt. quadruplatores extincti sunt. Publicatio bonorum rarior quam unquam fuit, ita ut unus tantum proscriberetur affectatæ tyrannidis reus, hoc est, Attilius Tatianus, senatu puniente: a quo conscios requiri vetuit, filio ejus in omnibus semper adjuto. Periiit & Priscianus, reus affectatæ tyrannidis; sed morte voluntaria, de qua conjuratione quæri vetuit. Victus Antonini Pii talis fuit, ut esset opulentia sine reprehensione, parsimonia sine sordibus; & mensa ejus per proprios servos, proprios aucupes, piscatores & venatores instrueretur. Balneum, quo usus fuisset, sine mercede populo exhibuit: nec omnino quidquam de vitæ privatæ qualitate mutavit. Sala-

ria multis subtraxit, quos otiosos videbat accipere, dicens, *Nihil esse sordidius, immo crudelius, quam si rempublicam is arroderet, qui nihil in eam suo labore conferret.* unde etiam Mesomedi lyrico salarium imminuit. Rationes omnium provincialium apprimè scivit, & vectigalium. Patrimonium privatum in filiam contulit: sed fructus reipublicæ donavit. Species imperatorias superfluas & prædia vendidit: & in suis propriis fundis vixit varîe, ac pro temporibus: nec ullas expeditiones obiit, nisi quod ad agros suos profectus est ad Campaniam, dicens, *Gravem esse provincialibus comitatum Principis, etiam nimis parci.* Et tamen ingenti auctoritate apud omnes gentes fuit: cum in Urbe propterea federet, ut undique nuntios (medius utpote) citius posset accipere.

VIII. Congiarium populo dedit; militibus donativum addidit. Puellas alimentarias in honorem Faustinae, Faustinianas constituit. Opera ejus hæc exstant: Romæ, templum Hadriani, honori patris dicatum; Græcostadium post incendium restitutum; instauratum Amphitheatrum; sepulcrum Hadriani; templum Agrippæ; pons sublicius; phari restitutio; Cajetæ portus; Tarracinenfis portus restitutio; lavacrum Ostiense; Antiatum aquæ ductus; templa Lanuvina. Multas etiam civitates adjuvit pecunia, ut opera vel nova facerent, vel vetera restituerent: ita ut & magistratus adjuvaret, & Senatores urbis ad functiones suas. Hereditates eorum, qui filios habebant, repudiavit. Primus constituit, ne poenæ causa legatum relictum maneret. Successorem viventi bono judici nulli dedit, nisi Orphi-

to præfecto Urbi, sed petenti. nam Gavius Maximus, præfectus prætorii, usque ad vicesimum annum sub eo pervenit, vir severissimus: cui Tatius Maximus successit, in cujus demortui locum duos præfectos substituit, Fabium Repentinum, & Cornelium Victorinum. Sed Repentinus famosa voce percussus est, quod per concubinam Principis ad præfecturam venisset. Usque adeo sub eo nullus percussus est Senator, ut etiam parricida confessus in insula deserta poneretur, quia vivere illi naturæ legibus non licebat. Vini, olei, & tritici penuriam, per ærarii sui damna emendo, & gratis populo dando, sedavit.

IX. Adversa ejus temporibus hæc provenerunt: Fames, de qua diximus; Circi ruina; terræ motus, quo Rhodiorum & Asiæ oppida conciderunt: quæ omnia mirifice instauravit. & Romæ incendium, quod trecentas quadraginta insulas vel domos absumsit: & Narbonensis civitas, & Antiochense oppidum, & Carthaginiense forum arsit. Fuit & inundatio Tiberis: apparuit & stella crinita: natus est & biceps puer; & uno partu mulieris quinque pueri editi sunt. Visus est in Arabia jubatus anguis, major solitis, qui se a cauda medium comedit. Lues etiam in Arabia fuit. Hordeum in Mœsia in culminibus arborum natum est. Quatuor præterea leones mansueri, sponte se capiendos in Arabia præbuerunt. Pharasmanes rex ad eum Romam venit, plusque illi, quam Hadriano, detulit. Pacorum regem Lazis dedit. Parthorum regem ab Armeniorum expugnatione solis literis repulit. Abgarum regem ex

Orientis partibus sola auctoritate deduxit. Causas regales terminavit. Sellam regiam Parthorum regi repetenti, quam Trajanus ceperat, pernegavit. Rimethalcen in regnum Bosporanum, audito inter ipsum & curatorem negotio, remisit. Olbiopolitis contra Tauroscythas auxilia misit, & Tauroscythas usque ad dandos Olbiopolitis obfides vicit. Tantum sane auctoritatis apud exterarum gentes nemo habuit; cum semper amaverit pacem, eo usque, ut Scipionis sententiam frequentarit, quæ ille dicebat, *Malle se unum civem servare, quam mille hostes occidere.*

X. Menses Septembrem atque Octobrem, Antoninum atque Faustinum appellandos decrevit Senatus; sed id Antoninus respuit. Nuptias filiae suæ Faustinae, cum Marco Antonino eam cunjungeret, usque ad donativum militum, celeberrimas fecit. Verum Antoninum post quaesturam Consulem fecit. Cum Apollonium, quem Chalcide acciverat, ad Tiberianam domum, in qua habitabat, vocasset, ut ei Marcum Antoninum traderet, atque ille dixisset, *Non magister ad discipulum debet venire, sed discipulus ad magistrum;* risit eum, dicens, *Facilius fuit Apollonio a Chalcide Romam venire, quam a domo sua in palatium:* cujus avaritiam etiam mercedibus notavit. Inter argumenta pietatis ejus & hoc habetur, quod, cum Marcus mortuum educatorem suum fleret, vocareturque ab aulicis ministris ab ostentatione pietatis, ipse dixerit: *Permittite (inquit) illi, ut homo sit: neque enim vel philosophia vel imperium tollit affectus.* Praefectos suos & locuple-

tavit, & ornamentis Consularibus donavit. si quos repetundarum damnavit, eorum liberis bona paterna restituit: ea tamen lege, ut illi provincialibus redderent, quod parentes acceperant. Ad indulgentias prouissimus fuit. Edita munera, in quibus elephantos, & corocottas, & strepsicerotas, crocodillos etiam atque hippopotamos, & omnia ex toto orbe terrarum cum tigridibus exhibuit, centum etiam leones una missione edidit.

XI. Amicis suis in imperio suo non aliter usus est quam privatus: quia & ipsi nunquam de eo cum libertis suis per fumum aliquid vendiderunt: siquidem libertis suis severissime usus est. Amavit histrionum artes. piscando se & venando multum oblectavit, & deambulatione cum amicis atque sermone. Vindemias privati modo cum amicis agebat. Rhetoribus & philosophis per omnes provincias & honores & salaria detulit. Orationes plerique alienas dixerunt, quæ sub ejus nomine feruntur: Marius Maximus ejus proprias fuisse dicit. Convivia cum amicis & privata communicavit & publica: nec ullum sacrificium per vicarium fecit, nisi cum æger fuit. Cum sibi & filiis honores peteret, omnia quasi privatus fecit. Frequentavit & ipse amicorum suorum convivia. Inter alia etiam hoc civilitatis ejus præcipuum argumentum est, quod, cum, domum Omuli visens, miransque columnas porphyreticas, requisisset, unde eas haberet, atque Omulus ei dixisset, *Cum in domum alienam veneris, & mutus & surdus esto*; patienter tulit. cujus Omuli multa joca semper patienter accepit.

XII. Multa de jure sanxit : usque est juris peritis, Umidio Vero, Salvio Valente, Volusio Maritiano, Ulpio Marcello, & Jaboleno. Seditiones, ubicunque factas, non crudelitate, sed modestia & gravitate compressit. Intra urbes sepeliri mortuos vetuit. Sumtum muneribus gladiatorii instituit. Vehicularium cursum summa diligentia sublevavit. Omnium, quæ gessit, & in Senatu & per edicta rationem reddidit. Perit anno septuagesimo: sed quasi adolescens desideratus est. Mors autem ejus talis fuisse narratur. Cum Alpinum caseum in coena edisset avidius, nocte rejectavit; atque alia die febre commotus est: tertia die, cum se gravari videret, Marco Antonino rempublicam & filiam, presentibus praefectis, commendavit; Fortunamque auream, quæ in cubiculo Principum poni solebat, transferri ad eum jussit: signum tribuno æquanimittatis dedit: atque ita conversus quasi dormiret, spiritum reddidit, apud Lorium. alienatus in febre, nihil aliud, quam de republica, & de his regibus, quibus irascebatur, locutus est. Privatum patrimonium filiae reliquit. testamento autem omnes suos legatis idoneis prosecutus est.

XIII. Fuit statura elevata decorus. sed cum esset longus & senex, incurvareturque, tiliaceis tabulis in pectore positus fasciatur, ut rectus incederet. Senex etiam, antequam salutatores venirent, panem siccum comedit, ad sustentandas vires. Fuit voce rauca & sonora, cum jucunditate. A Senatu *Divus* est appellatus, cunctis certatim annitentibus; cum omnes ejus pietatem, clementiam, inge-

nium, sanctimoniam, laudarent. decreti etiam sunt omnes honores, qui optimis Principibus ante delati sunt. Meruit & flaminem, & circenses, & templum, & sodales Antoninianos: solusque omnium prope Principum prorsus sine civili sanguine & hostili, quantum ad se ipsum pertinet, vixit: & qui rite comparatur Numæ, cujus felicitatem, pietatemque, & securitatem, cærimoniasque semper obtinuit.

JULII CAPITOLINI
 MARCUS ANTONINUS
 PHILOSOPHUS.

I. MARCO Antonino, in omni vita philosophanti viro, & qui sanctitate vitæ omnibus Principibus antecellit, pater Annius Verus, qui in prætura decessit; avus, Annius Verus, iterum Consul & Præfectus Urbi, adscitus in patricios a Principibus Vespasiano & Tito Censoribus; patruus, Annius Libo Consul; amita, Galeria Faustina Augusta; mater, Domitia Calvilla, Calvisii Tulli, bis Consulis, filia; proavus paternus, Annius Verus prætorius, ex Succubitano municipio ex Hispania factus senator; proavus maternus, Catilius Severus, bis Consul & Præfectus Urbi; avia paterna, Rupilia Faustina, Rupili Boni consularis filia, fuere. Natus est Marcus Romæ, sexto Kalendas Majas, in monte Coelio in hortis, avo suo iterum & Augure Consulibus, cujus familia, in originem recurrens, a Numa probatur sanguinem trahere, ut Marius. Maximus docet: item a rege Salentino, Malennio, Datummi

Scriptt. H. A.

D

filio, qui Lopias condidit. Educatus est in eo loco, in quo natus est, & in domo avi sui Veri, juxta ædes Laterani. Habuit & sororem natu minorem, Anniam Cornificiam; uxorem, Anniam Faustina, consobrinam suam. Marcus Antoninus principio avi sui nomen habuit, & Catilii Severi, materni proavi. Post excessum vero patris, ab Hadriano *Annius Verissimus* vocatus est: post virilem autem togam, *Annius Verus*. patre mortuo, ab avo paterno adoptatus est, & educatus.

II. Fuit a prima infantia gravis. at ubi egressus est annos, qui nutricum fovetur auxilio, magnis præceptoribus traditus, ad philosophiæ scita pervenit. Usus est magistris ad prima elementa Euphronione literatore, & Gemino comædo, musico Androne, eodemque geometra: quibus omnibus, ut disciplinarum auctoribus, plurimum detulit. Usus præterea grammaticis, Græco, Alexandro: quotidianis Latinis, Trosio Apro, & Pollione, & Eutychio Proculo Siccensi. Oratoribus usus est, Græcis, Aninio Macro, Caninio Celere, & Herode Attico; Latino, Frontone Cornelio. Sed multum ex his Frontoni detulit: cui & statuam in Senatu petiit. Proculum vero usque ad proconsulatum provexit, oneribus in se receptis. Philosophiæ operam vehementer dedit, & quidem adhuc puer. nam duodecimum annum ingressus, habitum philosophi assumpsit, & deinceps tolerantiam, cum studeret in pallio, & humi cubaret; vix autem, matre agente, instrato pellibus lectulo accubaret. Usus est etiam Commodo magistro, cujus ei affinitas fuerat

destinata. Ufus est & Apollonio Chalcedonio, Stoico philosopho.

III. Tantum autem studium in eo philosophiæ fuit, ut, adscitus jam in imperatoriam dignitatem, tamen ad domum Apollonii discendi causa veniret. Audivit & Sextum Chæronensem, Plutarchi nepotem; Junium Rusticum, Claudium Maximum, & Cinnam Catullum, Stoicos. Peripateticæ vero studiosus, audivit Claudium Severum, & præcipue Junium Rusticum, (quem & reveritus est, & sectatus; qui domi militiæque pollebat) Stoicæ disciplinæ peritissimum: cum quo omnia communicavit publica privataque consilia; cui etiam ante præfectos prætorio semper osculum dedit; quem & Consulem iterum designavit; cui post obitum a Senatu statuas postulavit. Tantum autem honoris magistris suis detulit, ut imagines eorum aureas in larrario haberet, ac sepulcra eorum aditu, hostiis, floribus, semper honoraret. Studuit & juri, audiens Lucium Volusium Mæcianum. tantumque operis & laboris studiis impendit, ut corpus afficeret, atque in hoc solo pueritia ejus reprehenderetur. Frequentavit & declamatorum scholas publicas, amavitque ex condiscipulis præcipuos Senatorii ordinis, Sejum Fuscianum, & Aufidium Victorinum; ex Equestri, Bæbium Longum, & Calenum: in quos maxime liberalis fuit, & ita quidem, ut, quos non posset ob qualitatem vitæ reipublicæ præponere, locupletatos teneret.

IV. Educatus est in Hadriani gremio, qui illum, ut supra diximus, Verissimum nominabat; & qui ei

honorem, etiam publice, sexenni detulit; octavo ætatis anno in Saliorum collegium retulit. In Salia-
tu omen accepit imperii, coronas omnibus in pul-
vinar ex more jacentibus: aliæ aliis locis hæse-
runt; hujus, velut manu, capiti Martis aptata est.
Fuit in eo sacerdotio & præful, & vates, & magi-
ster; & multos inauguravit atque exauguravit, nemi-
ne præeunte, quod ipse carmina cuncta didicisset.
Virilem togam sumsit quintodecimo ætatis anno;
statimque ei Lucii Cejonii Commodi filia despon-
sata est, ex Hadriani voluntate. Nec multo post
præfectus feriarum Latinarum fuit. in quo honore
præclarissime se pro magistratibus agentem, & in
conviviis Hadriani Principis ostendit. Post hoc, pa-
trimonium paternum sorori totum concessit. cum
eum ad divisionem mater vocaret, respondit, *avi
bonis se esse contentum: addens, ut & mater, si vel-
let, in sororem suam patrimonium conferret, ne in-
ferior esset soror marito.* Fuit autem ea vitæ indul-
gentia, ut cogeretur nonnunquam vel in venatio-
nes pergere, vel in theatrum descendere, vel spe-
taculis interesse. Operam præterea pingendo sub
magistro Diogneto dedit. Amavit pugilatum, lu-
ctamina, & cursum, & aucupatus, & pila lusit ap-
prime, & venatus est. Sed ab omnibus his inten-
tionibus studium eum philosophiæ abduxit, serium-
que & gravem reddidit, non tamen prorsus abolita
in eo comitate: quam præcipue suis mox amicis
atque etiam minus notis exhibebat, cum frugi esset
sine contumacia, verecundus sine ignavia, sine tri-
stitia gravis.

V. His ita se habentibus, cum post obitum Lucii Cæsaris Hadrianus successorem imperii quæret, nec idoneus, utpote decem & octo annos agens, Marcus haberetur; amitæ Marci virum; Antoninum Pium, Hadrianus ea lege in adoptionem legit, ut sibi Marcum Pius adoptaret: ita tamen, ut & Marcus sibi Lucium Commodum adoptaret. Sane ea die, qua adoptatus est, Verus in somnis se humeros eburneos habere vidit: sciscitatusque, an apti essent oneri ferundo, solito reperit fortiores. Ubi autem comperit, se ab Hadriano adoptatum, magis est deterritus, quam lætatus: iussusque in Hadriani privatam domum migrare, invitus de maternis hortis recessit. Cumque ab eo domestici quærerent, *cur tristis in adoptionem regiam transfret?* disputavit, *quæ mala in se contineret imperium.* Tunc primum pro Annio Aurelius cœpit vocari, quod in Aureliam, hoc est Antonini, adoptionis jure transisset. Octavodecimo ergo ætatis anno adoptatus, in secundo Consulatu Antonini, jam patris sui, Hadriano ferente, gratia ætatis facta, Quæstor est designatus. adoptatusque in aulicam domum, omnibus parentibus suis tantam reverentiam, quantam privatus, exhibuit. eratque haud secus rei suæ, quam in privata domo, parcus ac diligens; pro instituto patris volens agere, dicere, cogitare.

VI. Hadriano Bajis absumto, cum Pius ad advehendas ejus reliquias esset profectus, relictus Romæ, avo iusta implevit: & gladiatorum, quasi privatus, Quæstor edidit munus. Post excessum Hadria-

ni statim Pius per uxorem suam Marcum sciscitatus est: & cum dissolutis sponfalibus, quæ cum Lucii Cejonii Commodi filia desponderi voluerat, impar adhuc ætati esset; habita deliberatione, *cogitare velle se* dixit. His ita gestis, adhuc Quæstorem & Consulem secum Pius Marcum designavit, & Cæsaris appellatione donavit: & Sevirum turmis Equitum Romanorum, jam Consulem designatum creavit: & edenti cum collegis ludos Seviraes affedit, & in Tiberianam domum transgredi iussit, & aulico fastigio renitentem ornavit, & in collegia sacerdotum, jubente senatu, recepit, secundum etiam Consulem designavit, cum ipse quartum pariter iniret. Per eadem tempora, cum tantis honoribus occuparetur, & cum formandus ad regendum statum reipublicæ patris actibus interesset, studia cupidissime frequentavit. Post hæc Faustina duxit uxorem: & suscepta filia, tribunicia potestate donatus est, atque imperio extra Urbem proconsulari, addito jure quintæ relationis. tantumque apud Pium valuit, ut nunquam quemquam sine eo facile promoverit. Erat autem in summis obsequiis patris Marcus: quamvis non deessent, qui aliqua adversum eum insurrarent; & præ ceteris Valerius Omulus. qui, cum Lucillam, matrem Marci, in viridario venerantem simulacrum Apollinis vidisset, insurravit, *Illa nunc rogat, ut diem tuum claudas, & filius imperet.* quod omnino apud Pium nihil valuit: tanta erat Marci probitas, & tanta in imperatorio principatu modestia.

VII. Existimationis autem tantam curam habuit,

ut & procuratores suos puer semper moneret, ne quid arrogantius facerent, & hereditates delatas, reddens proximis, aliquando respuerit. Denique per viginti & tres annos in domo patris ita versatus, ut ejus quotidie amor cresceret: nec præter duas noctes per tot annos ab eo mansit, diversis vicibus. Ob hoc Antoninus Pius, cum sibi adesse finem vitæ videret, vocatis amicis & præfectis, ut successorem eum imperii omnibus commendavit atque firmavit: statimque signo *Æquanimittatis* tribuno dato, Fortunam auream, quæ in cubiculo solebat esse, ad Marci cubiculum transire jussit. Bonorum maternorum partem Mummio Quadrato, sororis filio, (quia illa jam mortua erat) tradidit. Post excessum Divi Pii, a senatu coactus regimen publicum capere, fratrem sibi participem in imperio designavit: quem *Lucium Aurelium Verum Commodum* appellavit, Cæsaremque atque Augustum dixit. atque ex eo pariter coeperunt rempublicam regere. tuncque primum Romanum imperium duos Augustos habere coepit, * lectum cum alio participasset. Antonini mox ipse nomen recepit. & quasi pater Lucii Commodi esset, & Verum eum appellavit, addito Antonini nomine, filiamque suam Lucillam fratri despondit. Ob hanc conjunctionem; pueros & puellas novorum hominum frumentariæ perceptioni adscribi præceperunt. Actis igitur, quæ agenda fuerant, in Senatu, pariter castra prætoria petiverunt, & vicena millia nummum singulis ob participatum imperium militibus promiserunt, & ceteris pro rata. Hadriani autem sepulcro corpus

patris intulerunt, magnifico exsequiarum officio: mox iustitio secuto, publice quoque funeris expeditus est ordo. Et laudavere uterque pro rostris patrem: flaminemque ei ex affinibus & sodales ex amicissimis Aurelianos creavere.

VIII. Adepti imperium, ita civiliter se ambo egerunt, ut lenitatem Pii nemo desideraret; cum eos Marullus, sui temporis mimographus, cavillando impune perstringeret. Funebre munus patri dederunt. Dabat se Marcus totum & philosophiæ, amorem civium affectans, sed interpellavit istam felicitatem securitatemque Imperatoris prima Tiberis inundatio, quæ sub illis gravissima fuit. quæ res & multa Urbis ædificia vexavit, & plurimum animalium interemit, & famem gravissimam peperit. Quæ omnia mala Marcus & Verus sua cura & præsentia temperarunt. Fuit eo tempore etiam Parthicum bellum, quod Vologesus, paratum sub Pio, Marci & Veri tempore indixit, fugato Atidio Corneliano, qui Syriam tunc administrabat. Imminebat etiam Britannicum bellum: & Catti in Germaniam ac Rhætiæ irruerant. Et adversus Britannos quidem Calpurnius Agricola missus est; contra Catos Aufidius Victorinus. Ad Parthicum vero bellum, senatu consentiente, Verus, frater ejus, missus est: ipse Romæ remansit, quod res urbanæ Imperatoris præsentiam postularent. Et Verum quidem Marcus, Capuam usque profecutus, amicis comitantibus e senatu, ornavit, additis officiorum omnium principibus. Sed cum Romam redisset Marcus, cognovissetque, Verum apud Canusium ægro-

tare; ad eum videndum contendit, susceptis in Senatu votis: quæ, posteaquam Romam rediit, audita Veri transmissione, statim reddidit. Et Verus quidem, posteaquam in Syriam venit, in deliciis apud Antiochiam & Daphnen vixit, armisque se gladiatoriiis & venatibus exercuit, cum, per legatos bellum Parthicum gerens, Imperator appellatus esset: cum Marcus horis omnibus reipublicæ actibus incubaret, patienterque delicias fratris & prope invitus ac volens ferret. denique omnia, quæ ad bellum erant necessaria, Romæ positus & disposuit Marcus, & ordinavit.

IX. Gestæ sunt res in Armenia prospere per Statium Priscum, Artaxatis captis, delatumque *Armeniacum* nomen utrique Principum: quod Marcus per verecundiam primo recusavit, postea tamen recepit. Profligato autem bello, uterque *Parthicus* appellatus est. sed hoc quoque Marcus delatum nomen repudiavit, quod postea recepit. *Patris patriæ* autem nomen, delatum fratre absente, in ejusdem præsentiam distulit. Medio belli tempore & Civicam, patrum Veri, & filiam suam nupturam, commissam sororis suæ curæ, eandemque locupletatam, Brundisium usque deduxit, & ad eum misit. Romam vero statim rediit, revocatus eorum sermonibus, qui dicebant, Marcum velle finiti belli gloriam sibi vindicare, atque idcirco in Syriam proficisci. Ad Proconsules scribit; *ne quis filiæ suæ iter facienti occurreret.* Inter hæc liberales causas ita munivit, ut primus juberet apud præfectos ærarii Saturni unumquemque civium natos liberos

profiteri, intra tricesimum diem, nomine imposto. Per provincias tabulariorum publicorum usum instituit, apud quos idem de originibus fieret, quod Romæ apud præfectos ærarii: ut, si forte aliquis in provincia natus causam liberalem diceret, testationes inde ferret. atque hanc totam legem de asserctionibus firmavit: aliasque de mensariis & auctio-
nibus tulit.

X. Senatum multis cognitionibus, & maxime ad se pertinentibus, judicem dedit. De statu etiam defunctorum intra quinquennium quæri jussit, neque quisquam Principum amplius senatui detulit. In Senatus autem honorificentiam, multis & prætoriis & consularibus privatis decidenda negotia delegavit, quo magis eorum cum exercitio juris auctoritas cresceret. Multos ex amicis in senatum allegit cum ædiliciis aut prætoriis dignitatibus. multis senatoribus pauperibus sine crimine, dignitates tribunicias ædiliciasque concessit. nec quemquam in ordinem legit, nisi quem ipse bene scisset. Hoc quoque Senatoribus detulit, ut, quoties de eorum capite esset judicandum, secreto pertractaret, atque ita in publicum prodiret; nec pateretur, equites Romanos talibus interesse causis. Semper autem, cum potuit, interfuit senatui, etiamsi nihil esset referendum, si Romæ fuit: si vero aliquid referre voluit, etiam de Campania ipse venit. Comitibus præterea etiam usque ad noctem frequenter interfuit: neque unquam recessit de curia, nisi Consul dixisset, *Nihil vos moramur, Patres conscripti*. Senatum appellationibus a Consule factis judicem dedit. Ju-

diciariæ rei singularem diligentiam adhibuit: fastis dies judiciosos addidit, ita ut ducentos triginta dies annuos rebus agendis litibusque disceptandis constitueret. Prætozem tutelarem primus fecit, cum ante tutores a Consulibus poscerentur: ut diligentius de tutoribus tractaretur. De curatoribus vero, cum ante non nisi ex lege Lætoria, vel propter lasciviam, vel propter dementiam darentur, ita statuit, ut omnes adulti curatores acciperent, non redditis causis.

XI. Cavit & sumtibus publicis, & calumniis quadruplatorum intercessit, apposita falsis delatoriis nota. Delationes, quibus fiscus augetur, contempsit. De alimentis publicis multa prudenter invenit. Curatores multis civitatibus, quo latius senatorias tenderet dignitates, e Senatu dedit. Italicis civitatibus famis tempore frumentum ex Urbe donavit: omnique frumentariæ rei consuluit. Gladiatoria spectacula omnifariam temperavit. Temperavit etiam scenicas donationes, jubens, ut quinos aureos scenici acciperent, ita tamen, ut nullus editor decem aureos egrederetur. Vias etiam Urbis atque itinerum diligentissime curavit. Rei frumentariæ graviter providit. Datis juridicis, Italiæ consuluit, ad id exemplum, quo Hadrianus consulares viros reddere jura præceperat. Hispaniis exhaustis, Italica allectione, contra Trajani præcepta, verecunde consuluit. Leges etiam addidit de vicefima hereditatum, de tutelis libertorum, de bonis maternis, & item de filiorum successionibus pro parte materna; utque senatores peregrini quartam

partem in Italia possiderent. Dedit præterea curatoribus regionum ac viarum potestatem, ut vel punirent, vel ad præfectum Urbi puniendos remitterent eos, qui ultra vestigalia quidquam ab aliquo exegissent. Jus autem magis vetus restituit, quam novum fecit. Habuit secum præfectos, quorum ex auctoritate & periculo semper jura dictavit. Usus autem est Scævola præcipue, jurisperito.

XII. Cum populo autem non aliter egit, quam est actum sub civitate libera. Fuitque per omnia moderatissimus in hominibus deterrendis a malo, invitandis ad bona, remunerandis copia, indulgentia liberandis: fecitque ex malis bonos, ex bonis optimos: moderate etiam cavillationes nonnullorum ferens. nam cum quendam Vetrasinum, famæ detestandæ, honorem petentem moneret, *ut se ab opinionibus populi vindicaret*, & ille contra respondisset, *multos, qui secum in arena pugnassent, se Prætores videre*; patienter tulit. Ac ne in quemquam facile vindicaret, Prætorem, qui quædam pessime egerat, non abdicare se Prætura jussit, sed collegæ jurisdictionem mandavit. Fisco in causis compendii nunquam judicans favit. Sane, quamvis esset constans, erat etiam verecundus. Posteaquam autem a Syria victor frater rediit, Patris patriæ nomen ambobus decretum est: cum se Marcus, absente Vero, erga omnes senatores atque homines moderatissime gessisset. Corona præterea civica oblata est ambobus: petiitque Lucius, ut secum Marcus triumpharet. Petiit præterea Lucius, ut filii Marci Cæsares appellarentur. Sed Marcus tanta fuit moderatione,

ut, cum simul triumphasset, tamen post mortem Lucii tantum *Germanicum* se vocaret; quod sibi bello proprio pepererat. In triumpho autem liberos Marci utriusque sexus secum vexerunt; ita tamen, ut & puellas virgines veherent. Ludos etiam, ob triumphum decretos, spectaverunt habitu triumphali. Inter cetera pietatis ejus hæc quoque moderatio prædicanda est: Funambulis post puerum lapsum culcitrâ subjici jussit: unde hodieque rete prætenditur. Dum Parthicum bellum geritur, natum est Marcomannicum, quod diu eorum, qui aderant, arte suspensum est, ut, finito jam Orientali bello, Marcomannicum agi posset. Et cum famis tempore populo insinuasset de bello; fratre post quinquennium reverso, in Senatu egit, ambos necessarios dicens bello Germanico Imperatores.

XIII. Tantus autem terror belli Marcomannici fuit, ut undique sacerdotes Antoninus acciverit, peregrinos ritus impleverit, Romam omni genere lustraverit, retardatusque a bellica profectioe sit. celebravit & Romano ritu lætisternia per septem dies. Tanta autem pestilentia fuit, ut vehiculis cadavera sint exportata sarracisque. Tunc autem Antonini leges sepeliendi sepulcrorumque asperrimas sanxerunt: quandoquidem caverunt, ne, uti quis vellet, fabricaret sepulcrum: quod hodieque servatur. Et multa quidem millia pestilentia consumpsit, multosque ex proceribus: quorum amplissimis Antoninus statuas collocavit. Tantaque clementia fuit, ut & sumtu publico vulgaria funera juberet efferri, & vâno cuidam, qui diripiendæ Urbis oc-

caſionem cum quibuſdam conſciis requirens, de caprifici arbore in campo Martio concionabundus, *ignem de cælo lapſurum, finemque mundi affore*, dicebat, *ſi ipſe lapſus ex arbore in ciconiam verteretur*; cum ſtatuto tempore decidiffet, atque ex ſinu ciconiam emiſiffet, perducto ad ſe atque conſeſſo veniam daret.

XIV. Profeſti itaque ſunt paludati ambo Imperatores, Viſtovalis & Marcomannis cuncta turbantibus; aliis etiam gentibus, quæ pulſæ a ſuperioribus barbaris fugerant, niſi reciperentur, bellum inferentibus. Nec parum profuit iſta profeſtio, cum Aquilejam uſque veniſſent. nam plerique reges & cum populis ſuis ſe retraxerunt, & tumultus auctores interemerunt. Quadi autem, amiſſo rege ſuo, non prius ſe confirmaturos eum, qui erat creatus, dicebant, quam id noſtris placuiſſet Imperatoribus. Lucius tamen invitus profeſtus eſt, cum plerique ad legatos Imperatorum mitterent, defeſtionis veniam poſtulantes. Et Lucius quidem, quod amiſſus eſſet præfeſtus prætorio Furius Viſtorinus, atque pars exercitus interiſſet, redeundum eſſe cenſebat: Marcus autem, fingere barbaros exiſtimans & fugam & cetera, quæ ſecuritatem bellicam offenderent, ob hoc, ne tanti apparatus mole premerentur, inſtandum eſſe ducebat. Denique tranſceniſ Alpibus, longius proceſſerunt; compoſueruntque omnia, quæ ad munimen Italiæ atque Illyrici pertinebant. Placuit autem, urgente Lucio, ut, præmiſſis ad Senatum literis, Lucius Romam rediret * * via quoque, poſteaquam iter ingreſſi ſunt: ſedens

cum fratre in vehiculo Lucius, apoplexia correptus, periit.

XV. Fuit autem consuetudo Marco, ut in Circensium spectaculo legeret, audiretque ac subscriberet: ex quo quidem sæpe jocos popularibus dicitur laceffit. Multum sane potuerunt liberti sub Marco & Vero, Geminas & Agaclytus. Tantæ autem sanctitatis fuit Marcus, ut Veri vitia & celaverit, & defenderit, cum ei vehementissime displicerent, mortuumque eum *Divum* appellaverit: amicitiasque ejus & sorores honoribus & salariis decretis sublevaverit atque provexerit: sacrisque eum plurimis honoraverit. Flaminem & Antoninianos sodales, & omnes honores, qui Divis habentur, eidem dedicavit. Nemo est Principum, quem non gravis fama perstringat; usque adeo, ut etiam Marcus in sermonem venerit, quod Verum vel veneno ita tulerit, ut parte cultri veneno lita vulvam inciderit, venenatam partem fratri edendam propinans, & sibi innoxiam reservans: vel certe per medicum Possippum, qui ei sanguinem intempestive dicitur emisisse. Cassius post mortem Veri a Marco descivit.

XVI. Jam in suos tanta fuit benignitate Marcus, ut, cum in omnes propinquos cuncta honoris ornamenta contulerit, tum in filium Commodum, & quidem scelestum atque impurum, cito nomen Cæsaris, & mox sacerdotium, statimque nomen Imperatoris ac triumphii participationem & Consulatum. quo quidem tempore sine Imperatoris filio ad triumphalem curram in Circo pedes cucurrit. Post Veri obitum, Marcus Antoninus solus rempubli-

cam tenuit; multo melior & feracior ad virtutes, quippe qui nullis Veri jam impediretur aut simulacris callidæ severitatis (quo ille ingenito vitio laborabat) erroribus, aut his, quibus præcipue displicebat Marco Antonino jam inde a primo ætatis suæ tempore, vel institutis mentis pravæ, vel moribus. Erat enim ipse tantæ tranquillitatis, ut vultum nunquam mutaverit mœrore vel gaudio: philosophiæ deditus Stoicæ, quam & per optimos quosque magistros acceperat, & undique ipse collegerat. Et Hadrianus, ut dictum est, hunc eundem successorem paraverat, nisi ei ætas puerilis obstitisset. quod quidem apparet ex eo, quod generum Pio hunc eundem delegit, ut ad eum, dignum utpote virum, quandoque Romanum perveniret imperium.

XVII. Ergo provincias post hæc ingenti moderatione ac benignitate tractavit. Contra Germanos res feliciter gessit. specialiter ipse bellum Marcomannicum, sed quantum nulla unquam memoria fuit, tum virtute, tum etiam felicitate transegit; & eo quidem tempore, quo pestilentia gravis multa millia & popularium & militum interemerat. Pannonias ergo, & Marcomannis, Sarmatis, Wandalis, simul etiam Quadis exstinctis, servitio liberavit; & Romæ cum Commodò, quem jam Cæsarem fecerat, filio, ut diximus, suo, triumphavit. Cum autem ad hoc bellum omne ærarium exhausisset suum, neque in animum induceret, ut extra ordinem provincialibus aliquid imperaret; in foro Divi Trajani auctionem ornamentorum imperialium fecit,

vendiditque aurea pocula & eryſtallina & myrrhina, vaſa etiam regia, & veſtem uxoriæ ſericam & auratam; gemmas quin etiam, quas multas in repoſtorio ſanctiore Hadriani repererat. & per duos quidem meſes hæc venditio celebrata eſt, tantumque auri redactum, ut, reliquias belli Marcomännici ex ſententia perſecutus, poſtea dederit poteſtatem emtoribus, ut, ſi quis vellet emta reddere, atque aurum recipere, ſciret licere: nec moleſtus ulli fuit, qui vel non reddidit emta, vel reddidit. Tunc viris clarioribus permiſit, ut eodem cultu, quo & ipſe, vel miniſteriis ſimilibus convivia exhiberent. In munere autem publico tam magnanimus fuit, ut centum leones una miſſione ſimul exhiberet, ſagittis interfectos.

XVIII. Cum igitur in amore omnium imperaſſet, atque ab aliis modo *frater*, modo *pater*, modo *ſilius*, ut cujuſque ætas ſinebat, & diceretur, & amaretur; octavodecimo anno imperii ſui, ſexageſimo & primo vitæ, diem ultimum clauſit. tantuſque illius amor die regii funeris claruit, ut nemo illum plangendum cenſuerit, certis omnibus, quod a Diis commodatus ad Deos rediſſet. Denique, priuſquam funus conderetur, ut plerique dicunt, (quod nunquam antea factum fuerat, neque poſtea) Senatus populuſque, non diviſis locis, ſed in una ſede, *propitium Deum* dixit. Hic ſane vir tantus & talis, ac Diis vita & morte conjunctus, ſilium Commodum dereliquit: qui, ſi felix fuiſſet, ſilium non reliquiſſet. Et parum ſane fuit, quod illi honores divinos omnis ætas, omnis ſexuſ, omnis

Scriptu. H. A.

E

conditio ac dignitas dedit; nisi, quod etiam sacrilegus iudicatus est, qui ejus imaginem in sua domo non habuit, qui per fortunam vel potuit habere, vel debuit. Denique hodieque in multis domibus Marci Antonini statuæ consistunt inter Deos penates: nec defuerunt homines, qui, somniis eum multa prædixisse augurantes, futura & vera concinuerunt. Unde etiam templum ei constitutum, dati sacerdotes Antoniniani, & sodales, & flamines, & omnia, quæ de sacratibus decrevit antiquitas.

XIX. Ajunt quidam, (quod & verisimile videtur) Commodum Antoninum, successorem illius ac filium, non esse de eo natum, sed de adulterio; ac talem fabellam vulgari sermone contexunt, Faustina quondam, Pii filiam, Marci uxorem, cum gladiatores transire vidisset, unius ex his amore succensam, cum longa ægitudine laboraret, viro de amore confessam: quod cum ad Chaldaeos Marcus retulisset, illorum fuisse consilium, ut, occiso gladiatore, sanguine illius sese Faustina sublavaret, atque ita cum viro concumberet, quod cum esset factum, solum quidem amorem, natum vero Commodum gladiatorem esse, non Principem; qui mille prope pugnas publice, populo inspectante, gladiatorias Imperator exhibuit, ut in vita ejus docebitur. Quod quidem verisimile ex eo habetur, quod tam sancti Principis filius his moribus fuit, quibus nullus lanista, nullus scenicus, nullus arenarius, nullus postremo ex omnium dedecorum ac scelerum colluvione concretus. Multi autem ferunt, Commodum omnino ex adulterio natum: siquidem Fau-

finam satis constat apud Cajetam conditiones sibi & nauticas & gladiatorias elegisse. de qua cum diceretur Antonino Marco, ut repudiaret, si non occideret, dixisse fertur: *Si uxorem dimitimus, reddamus & dotem.* Dos autem quid erat, nisi imperium, quod ille ab socero, volente Hadriano adoptatus, acceperat? Tantum sane valet boni Principis vita, sanctitas, tranquillitas, pietas, ut ejus famam nullius proximi decoloret invidia. Denique Antonino, cum suos mores semper teneret, neque aliqujus insufurratione mutaretur, non obfuit gladiator filius, uxor infamis: Denique etiam nunc habetur, ut vobis ipsis, sacratissime imperator Diocletiane, & semper visum est, & videtur, qui eum inter numina vestra, non ut ceteros, sed specialiter veneramini, ac sæpe dicitis, *vos vita & clementia tales esse cupere, qualis fuit Marcus:* etiamsi philosophia nec Plato esse possit, si revertatur in vitam, & quidem hæc breviter & congeſte.

XX. Sub Marco Antonino hæc sunt gesta post fratrem. Primum corpus ejus Romam devectum est, & illatum majorum sepulcris: divini honores decreti. deinde cum gratias ageret Senatus, quod fratrem consecraſſet, occulte ostendit, omnia bellica consilia sua fuisse, quibus superati sunt Parthi. Adidit præterea quædam, quibus ostendit, nunc demum se quasi a principio acturum esse rempublicam, amoto eo, qui remissior videbatur. Nec aliter Senatus accepit, quam Marcus dixerat; ut videretur gratias agere, quod Verus excessisset vita. Omnibus deinde fororibus, & affinibus, & liberis,

juris & honoris & pecuniæ plurimum detulit. erat enim famæ suæ curiosissimus, & requirens ad verum, quid quisque de se diceret; emendans, quæ bene reprehensa viderentur. Proficiscens ad bellum Germanicum, filiam suam, non decurso luctus tempore, grandævo equitis Romani filio Claudio Pompejano dedit, genere Antiochenſi, nec satis nobili: quem postea bis Consulem fecit, cum filia ejus Augusta esset, & Augustæ filia. Sed has nuptias & Faustina, & ipsa, quæ dabatur, invitæ habuerunt.

XXI. Cum Mauri Hispanias prope omnes vastarent, res per legatos bene gestæ sunt. & cum per Ægyptum Bucolici milites gravia multa fecissent, per Avidium Cassium retusi sunt, qui postea tyrannidem arripuit. Sub ipsis profectiois diebus in secessu Prænestino agens, filium nomine Verum Cæsarem, exsecto sub aure tubere, septennem amisit: quem non plus quinque diebus luxit; consolatusque etiam medicos, actibus publicis se reddidit: & quia ludi Jovis Optimi Maximi erant, interpellari eos publico luctu noluit, jussitque, ut statuz tantummodo filio mortuo decernerentur, & imago aurea Circensibus per pompam ferenda, & ut Saliari carmini nomen ejus infereretur. Instante sane adhuc pestilentia, & Deorum cultum diligentissime restituit, & servos, quemadmodum bello Punico factum fuerat, ad militiam paravit; quos Voluntarios, exemplo Volonum, appellavit. Armavit etiam gladiatores; quos Obsequentes appellavit. Latrones etiam Dalmatiæ atque Dardaniæ, milites fecit. Armavit & Diocmitas. emit & Germa-

norum auxilia contra Germanos. Omni præterea diligentia paravit legiones ad Germanicum & Marcomannicum bellum: &, ne provincialibus esset molestus, auctorem rerum aulicarum, ut diximus, fecit in foro Divi Trajani, in qua præter vestes & pocula & vasa aurea, etiam signa cum tabulis magnorum artificum vendidit. Marcomannos autem in ipso transitu Danubii delevit, & prædam provincialibus reddidit.

XXII. Gentes omnes ab Illyrici limite usque in Galliam conspiraverant, ut Marcomanni, Narisci, Hermunduri, & Quadi, Suevi, Sarmatæ, Latringes, & Buri: hi, alique, cum Victoivalis Sosibes, Sicobotes, Rhoxolani, Bastarnæ, Alani, Peucini, Costoboci. Imminebat & Parthicum bellum & Britannicum. Magno igitur labore etiam suo gentes hærrimas vicit, militibus sese invitantibus, ducentibus etiam exercitum legatis & præfectis prætorio: accepitque in deditionem Marcomannos, plurimis in Italiam traductis. Semper sane cum optimatibus non solum bellicas res, sed etiam civiles; priusquam faceret aliquid, contulit. Denique sententia illius præcipua semper hæc fuit: *Æquius est, ut ego tot & talium amicorum consilium sequar, quam ut tot & tales amici meam unius voluntatem sequantur.* Sane quia durus videbatur, ex philosophiæ institutione, Marcus ad militiæ labores atque ad omnem vitam, graviter carpebatur: sed male loquentium dictis, vel literis, vel sermone respondebat. Et multi nobiles bello Germanico sive Marcomannico, immo plurimarum gentium, interie-

runt: quibus omnibus statuas in foro Ulpio collocavit. Quare amici frequenter suaferunt, ut a bellis discederet, & Romam veniret: sed ille contempsit, ac perstitit; nec prius recessit, quam omnia bella finiret. Provincias ex proconsularibus consulares, aut ex consularibus proconsulares, aut prætorias, pro belli necessitate, fecit. Res etiam in Sequanis turbatas, censura & auctoritate repressit. Compositæ res in Hispania, quæ per Lusitaniam turbatæ erant. Filio Commodo, arcesso ad limitem, togam virilem dedit, quare congiarium populo divisit, & eum ante tempus Consulem designavit.

XXIII. Si quis unquam proscriptus esset a præfecto Urbi, non libenter accepit. Ipse in largitionibus pecuniæ publicæ parcissimus fuit: quod laudi potius datur, quam reprehensioni: sed tamen & bonis viris pecunias dedit, & oppidis labentibus auxilium tulit, & tributa, vel vestigalia, ubi necessitas cogebat, remisit. Absens populi Romani voluptates curari vehementer præcepit per ditissimos editores. fuit enim populo hic sermo, cum sustulisset ad bellum gladiatores, quod populum, sublati voluptatibus, vellet cogere ad philosophiam: jusserat enim, ne mercimonia impedirentur, tardius pantomimos exhiberi non votis diebus. De amatis pantomimis ab uxore fuit sermo, ut superius diximus. Sed hæc omnia per epistolas suas purgavit. Idem Marcus federi in civitatibus vetuit in equis, sive vehiculis: lavacra mixta submovit: mores matronarum composuit diffluentes, & juvenum nobilium. Sacra Serapidis a vulgaritate Pelusiæ sub-

movit. Fama fuit sane, quod sub philosophorum specie quidam rempublicam vexarent & privatos. quod ille purgavit.

XXIV. Erat mos iste Antonino, ut omnia crimina minore supplicio, quam legibus plecti solent, puniret: quamvis nonnunquam contra manifestos & gravium criminum reos inexorabilis permaneret. Capitales causas hominum honestorum ipse cognovit; & quidem summa æquitate, ita ut Prætozem reprehenderet, qui cito reorum causas audierat, juberetque illum iterum cognoscere, dignitatis eorum interesse dicens, ut ab eo audirentur, qui pro populo judicaret. Æquitatem etiam circa captos hostes custodivit. Infinitos ex gentibus in Romano solo collocavit. Fulmen de cœlo precibus suis contra hostium machinamentum extorsit, suis pluvia impetrata, cum siti laborarent. Voluit Marcomanniam provinciam, voluit etiam Sarmatiam facere. & fecisset, nisi Avidius Cassius rebellasset sub eodem in Oriente: qui Imperatorem se appellavit (ut quidam dicunt) Faustina volente, quæ de mariti valetudine desperaret. Alii dicunt, ementita morte Antonini, Cassium Imperatorem se appellasse, cum *Divum* Marcum appellasset. Et Antoninus quidem non est satis motus defectione Cassii; nec in ejus affectus sæviit: sed per Senatum hostis est judicatus, bonaque ejus proscripta per ærarium publicum.

XXV. Relicto ergo Sarmatico Marcommannicoque bello, contra Cassium profectus est. Romæ turbæ etiam fuerunt, quasi Cassius absente Anto-

nino adventaret. sed Cassius statim interfectus est. caput ejus allatum est ad Antoninum. Marcus tamen non exultavit interfectione Cassii, caputque ejus humari jussit. Mæcianum etiam, filium Cassii, cui Alexandria erat commissa, exercitus occidit: nam & præfectum prætorio sibi fecerat. qui & ipse occisus est. In conscios defectionis vetuit Senatum graviter vindicare. simul petiit, *ne quis Senator tempore principatus sui occideretur*, ne ejus pollueretur imperium. eos etiam, qui deportati fuerant, revocari jussit; cum paucissimi centuriones capite essent puniti. Ignovit & civitatibus, quæ Cassio consenserant: ignovit Antiochenis, qui multa in Marcum pro Cassio dixerant. quibus & spectacula & conventus publicos tulerat, & omnium concionum genus; contra quos edictum gravissimum misit. Seditiosos autem eos & oratio Marci indicat, indita a Mario Maximo, qua ille usus est apud amicos. Denique noluit Antiochiam videre, cum Syriam peteret. nam nec Cyprum voluit videre, ex qua erat Cassius. Fuit Alexandriæ, clementer cum iis agens. postea tamen Antiochiam vidit.

XXVI. Multa egit cum regibus, & pacem confirmavit sibi occurrentibus cunctis regibus & legatis Persarum. omnibus Orientalibus provinciis carissimus fuit. apud multas etiam philosophiæ vestigia reliquit. Apud Ægyptios civem se egit & philosophum in omnibus studiis, templis, locis. Et cum multa Alexandrini in Cassium dixissent fausta, tamen omnibus ignovit, & filiam suam apud eos reliquit. Fauslinam suam in radicibus montis Tau-

ri; in vico Halale exanimatam, subito morbo amissit. Petiit a Senatu, ut honores Faustinae ædemque decernerent, laudata eadem, cum tamen impudicitiae fama graviter laborasset. quæ Antoninus vel nescivit, vel dissimulavit. Novas puellas Faustianas instituit in honorem uxoris mortuæ. Divam etiam Faustina a Senatu appellatam, gratulatus est: quam secum & in æstivis habuerat, ut *matrem caesorum* appellaret. Fecit & coloniam vicum, in quo obiit Faustina: & ædem illi exstruxit. sed hæc postea ædes Heliogabalo dedicata est. Ipsum Cassium pro clementia occidi passus est, non occidi iussit. Deportatus est Heliodorus, filius Cassii; & alii liberum exilium acceperunt, cum bonorum parte. Filii autem Cassii & amplius media parte acceperunt paterni patrimonii, & auro atque argento adjuti; mulieres autem etiam ornamentis: ita ut Alexandra, filia Cassii, & Druncianus gener, liberam vagandi potestatem haberent, commendati amicitiae marito. Doluit denique Cassium extinctum, dicens, *voluisse se sine senatorio sanguine imperium transigere.*

XXVII. Orientalibus rebus ordinatis, Athenis fuit; & inter alia Cereris templum adiit, ut se innocentem probaret, & sacrarium solus ingressus est. Revertens ad Italiam navigio, tempestatem gravissimam passus est. Per Brundisium veniens in Italiam, togam & ipse sumit, & milites togatos esse iussit: nec unquam sagati fuerunt sub eo milites. Romam ut venit, triumphavit. Exinde Lavinium profectus est. Commodum sibi deinde collegam in

tribuniciam potestatem junxit: congiarium populo dedit, & spectacula mirifica: dein civilia multa correxuit. Gladiatorii muneris sumtus modum fecit. Sententia Platonis semper in ore illius fuit: *Florere civitates, si aut Philosophi imperarent, aut Imperatores philosopharentur*. Filio suo Brutii Præsentis filiam junxit, nuptiis celebratis exemplo privatorum: quare etiam congiarium populo dedit. Deinde ad conficiendum bellum conversus, in administratione ejus belli obiit, labentibus jam filii moribus ab instituto suo. Triennio bellum postea cum Marcomannis, Hermunduris, Sarmatis, Quadis, etiam egit, & si anno uno superfuisset, provincias ex his fecisset. Ante biduum, quam exspiraret, admittis amicis, dicitur ostendisse sententiam de filio eandem, quam Philippus de Alexandro; cum de hoc male sentiret, addens, *minime se agre mortem ferre, se filium superstitem reliquens*. nam jam Commodus turpem se & cruentum ostentabat.

XXVIII. Mors autem talis fuit. Cum ægrotare cœpisset, filium advocavit, atque ab eo primum petiit, *ut belli reliquias non contemneret*, ne videretur rempublicam prodere. & cum filius ei respondisset, *cupere se primum sanitatem*; ut vellet, permisit: petens tamen, ut exspectaret paucos dies, aut simul proficisceretur. deinde abstinuit cibo potuque, mori cupiens, auxitque morbum. Sexta die vocatis amicis, & ridens res humanas, mortem autem contemnens, ad amicos dixit: *Quid me fletis, & non magis de pestilentia & communi morte cogitatis?* & cum illi vellent recedere, ingemiscens ait:

Si jam me dimittitis, vale vobis dico, vos præcedens, & cum ab eo quæreretur, cui filium commendaret, ille respondit: Vobis, si dignus fuerit, & Diis immortalibus. Exercitus, cognita mala valetudine, vehementissime dolebant, quia illum unice amabant. Septimo die gravatus est, & solum filium admisit. quem statim dimisit, ne in eum morbus transfiret. Dimisso filio, caput operuit, quasi volens dormire; sed nocte animam efflavit. Fertur filium mori voluisse, cum eum talem videret futurum, qualis exstitit post ejus mortem; ne, ut ipse dicebat, similis Neroni, Caligulæ & Domitiano esset.

XXIX. Crimini ei datum est, quod adulteros uxoris promoverit, Tertullum, & Utillum, & Orphitum, & Moderatum, ad varios honores; cum Tertullum etiam prandentem cum uxore deprehenderit. de quo mimus in scena, præsentem Antonino, dixit, cum stupidus nomen adulteri uxoris a servo quæreret, & ille diceret *ter Tullus*, & adhuc stupidus quæreret, respondit ille, *Jam dixi ter, Tullus dicitur.* Et de hoc quidem multa populus, multa etiam alii dixerunt, patientiam Antonini incusantes. Ante tempus sane mortis, priusquam ad bellum Marcomannicum rediret, in Capitolio juravit, *nulum Senatorem se sciente occisum; cum etiam rebelliones dixerit se servaturum fuisse, si scisset.* Nihil enim magis & timuit, & deprecatus est, quam avaritiæ famam: de qua se multis epistolis purgat. Dederunt ei vitio, quod & fictus fuisset, nec tam simplex, quam videretur, aut quam vel Pius vel Verus fuisset. Dederunt etiam crimini, quod aulicam arro-

gantiam confirmaverit, submovendo amicos a societate communi & a conviviis. Parentibus consecrationem decrevit. Amicos parentum, etiam mortuos statuis ornavit. Suffragatoribus non cito credidit, sed semper diu quæsit, quod erat verum. Enisa est Fabia, ut, Faustina mortua, in ejus matrimonium coiret, sed ille concubinam sibi adscivit procuratoris uxoris suæ filiam, ne tot liberis superduceret novercam.

JULII CAPITOLINI VERUS IMPERATOR

A D

DIOCLETIANUM AUG.

I. SCIO, plerosque ita vitam Marci ac Veri literis atque historiæ dedicasse, ut priorem Verum intimandum legentibus darent, non imperandi secutos ordinem, sed vivendi: ego vero, quod prior Marcus imperare cœpit, deinde Verus, qui superflite periit Marco, priorem Marcum, dehinc Verum credidi celebrandum. Igitur *Lælius Cejonius Ælius Commodus Verus Antoninus*, qui ex Hadriani voluntate *Ælius* appellatus est, ex Antonini conjunctione *Verus & Antoninus*, neque inter bonos, neque inter malos Principes ponitur: quem constat non inhorruisse vitiis, non abundasse virtutibus; vixisse deinde non in libero principatu, sed sub Marco in simili ac pari majestatis imperio, a cujus secta, lascivia morum, & vitæ licentioris nimietate, dissensit. erat enim morum simplicium, & qui adumbrare nihil posset. Huic naturalis pater fuit

Lucius Ælius Verus, qui ab Hadriano adoptatus, primus *Cæsar* est dictus, & in eadem statione constitutus periit. Avi ac proavi, & item majores plurimi, Consulares. Natus est Lucius Romæ, in prætura patris sui, decimo octavo Kalendas Januarias, die, quo & Nero, qui rerum potitus est. Origo ejus paterna pleraque ex Etruria fuit, materna ex Faventia.

II. Hac prosapia genitus, patre ab Hadriano adoptato, in familiam Æliam devenit, mortuoque patre Cæsare, in Hadriani familia remansit. a quo Aurelio datus est adoptandus, cum sibi ille Pium filium, Marcum nepotem, esse voluisset, posteritati satis providens: & ea quidem lege, ut filiam Pii Verus acciperet, quæ data est Marco idcirco, quia hic ad hoc impar videbatur ætate, ut in Marci vita exposuimus. Duxit autem uxorem, Marci filiam Lucillam. Educatus est in domo Tiberiana. Audivit Scaurum, grammaticum Latinum, Scauri filium, qui Grammaticus Hadriani fuit: Græcos, Telephum, Hephæstionem, Harpocracionem: rhetores, Apollonium, Celerem Caninium, Herodem Atticum: Latinum, Cornelium Frontonem: philosophos, Apollonium & Sextum. hos omnes amavit unice, atque ab his invicem dilectus est; nec tamen ingeniosus ad literas. Amavit autem in pueritia versus facere: post, orationes. & melior quidem orator fuisse dicitur, quam poeta: immo (ut verius dicam) pejor poeta, quam rhetor. nec desunt, qui dicant, eum fuisse adjutum ingenio amicorum, atque ab aliis ei illa, qualiacunque sunt,

scripta. siquidem multos disertos & eruditos semper secum habuisse dicitur. Educatores habuit Nicomedem. Fuit voluptuarius & nimis lætus, & omnibus deliciis, ludis, jocis decenter aptissimus. Post septimum annum in familiam Aureliam traductus, Marci moribus & auctoritate formatus est. Amavit venatus, palæstras, & omnia exercitia juventutis. Fuitque privatus in domo imperatoria viginti & tribus annis.

III. Qua die togam virilem Verus accepit, Antoninus Pius ea occasione, qua patris templum dedicabat, populo liberalis fuit: mediusque inter Pium & Marcum idem resedit, cum Quæstor populo munus daret. Post quæsturam statim Consul est factus cum Sextilio Laterano. interjectis annis, cum Marco fratre iterum factus est Consul. Diu autem & privatus fuit, & ea honorificentia caruit, qua Marcus ornabatur. Namque in Senatu ante quæsturam non sedit; neque in itinere cum patre, sed cum præfecto prætorii vectus est: nec aliud ei honorificentia ad nomen adjunctum est, quam quod *Augustus filius* est appellatus. Fuit studiosus etiam Circensium, haud aliter quam gladiatorii muneris. Hic cum tantis deliciarum & luxuriæ quateretur erroribus, ab Antonino videtur ob hoc retentus, quod cum pater ita in adoptionem Pii transire jussisset, ut nepotem appellaret: cui, quantum videtur, fidem exhibuit, non amorem. Amavit tamen Antoninus Pius simplicitatem ingenii puritatemque vivendi, hortatusque est, ut imitaretur, & fratrem. De functo Pio, Marcus in eum omnia contulit, par-

icipatu etiam Imperatoriæ potestatis indulto: sibi que consortem fecit, cum illi soli Senatus detulisset imperium.

IV. Dato igitur imperio, & indulta tribunicia potestate, proconsulatus etiam honore delato, Verum vocari præcepit, suum in eum transferens nomen, cum ante *Commodus* vocaretur. Lucius quidem, Marco vicem reddens, suscepit, obsecutus ut legatus proconsuli, vel præses imperatori. jam primum enim Marcus pro ambobus ad milites est locutus, & pro consensu imperio graviter se, & ad Marci mores egit. Ubi vero in Syriam profectus est, non solum licentia vitæ liberioris, sed etiam adulteriis & juventutis amoribus infamatus est. Siquidem tantæ luxuriæ fuisse dicitur, ut etiam, posteaquam de Syria rediit, popinam domi instituerit, ad quam post convivium Marci divertebat, ministrantibus sibi omni genere turpium personarum. Fertur & nocte perpeti alea lusisse, cum in Syria concepisset id vitium: atque in tantum vitiorum Cajanorum & Neronianorum ac Vitellianorum fuisse æmulum, ut vagaretur nocte per tabernacula ac lupanaria, obtesto capite cucullione vulgari viatorio, & commisceretur cum triconibus, & committeret rixas, & dissimulans quis esset: sæpeque afflictum livida facie redisse, & in tabernis agnitum, cum sese absconderet. jaciebat & nummos in popinas maximos, quibus calices frangeret. Amavit & aurigas, Prasino favens. Gladiatorum etiam frequentius pugnas in convivio habuit, trahens cœnam in noctem, & in toro convivali condor-

miens, ita ut levatus cum stromatibus in cubiculum perferretur. Somni fuit permodici, digestionis facillimæ. Sed Marcus, hæc omnia quasi nesciens, dissimulabat rem, pudore illo, ne reprehenderet fratrem.

V. Et notissimum ejus quidem fertur tale convivium, in quo primum duodecim accubuisse dicitur: cum sit notissimum dictum de numero convivarum: *Septem convivium; novem vero, convivium.* donatos autem pueros decoros, qui ministrabant singulis: donatos etiam structores & lances singulis quibusque: donata & viva animalia, vel cicurum vel ferarum avium, vel quadrupedum, quorum cibi appositi erant: donatos etiam calices singulis per singulas potiones, murrhinos & crystallinos Alexandrinos, quoties bibitum est: data etiam aurea atque argentea pocula & gemmata: coronas quin etiam datas, lemniscis aureis interpositis, & alieni temporis floribus: data & vasa aurea cum unguentis, ad speciem alabastrorum: data & vehicula cum mulabus ac mulionibus cum juncturis argenteis, ut ita de convivio redirent. Omne autem convivium æstimatum dicitur sexagies centenis millibus sestertium. Hoc convivium posteaquam Marcus audivit, ingemuisse dicitur, & doluisse publicum fatum. Post convivium, lusum est tessenis usque ad lucem. Et hæc quidem post Parthicum bellum: ad quod eum misisse dicitur Marcus, ne vel in Urbe ante omnium oculos peccaret, vel ut parsimoniam peregrinatione addisceret, vel ut timore bellico emendatior rediret, vel ut se Im-

Scriptu. H. A.

F

peratorem esse cognosceret. Sed quantum profecerit, cum alia vita, tum hæc, quam narravimus, cœna monstravit.

VI. Circensium tantam curam habuit, ut frequenter provincialibus literas causa Circensium & miserit & acceperit. Denique etiam præsens & cum Marco sedens, multas a Venetianis est passus injurias, quod turpissime contra eos faveret. Nam & Volucris equo Prasino aureum simulacrum fecerat, quod secum portabat. Cui quidem passas uvas & nucleos, in vicem hordei, in præsepe ponebat; quem sagis fucis tinctis coopertum, in Tiberianam ad se adduci jubebat; cui mortuo sepulcrum in Vaticano fecit. in hujus equi gratiam primum cœperunt equi aurei vel bravia postulari. In tanto autem equus ille honore fuit, ut ei a populo Prasinianorum sæpe modius aureorum postularetur. Profectum eum ad Parthicum bellum Marcus Ca-puam profecutus est: cumque inde per omnium villas se ingurgitaret, morbo implicitus, apud Canusium ægrotavit: quo ad eum visendum frater contendit. Multa in ejus vita ignava & sordida, etiam belli tempore, deteguntur. Nam cum, interfecto legato, cæsis legionibus, Syriis defectionem cogitantibus, Oriens vastaretur, ille in Apulia venabatur, & apud Corinthum & Athenas inter symphonias & cantica navigabat, & per singulas maritimas civitates Asiæ, Pamphyliæ, Ciliciæque clariores, voluptatibus immorabatur.

VII. Antiochiam posteaquam venit, ipse quidem se luxuriæ dedit, duces autem confecerunt Parthi-

cum bellum, Staius Priscus, & Avidius Cassius, & Martius Verus per quadriennium: ita ut Babylonem & Mediam pervenirent, & Armeniam vindicarent; partumque est ipsi nomen *Armenici*, *Parthici*, *Medici*: quod etiam Marco, Romæ agenti delatum est. Egit autem per quadriennium Verus hiemem Laodiceæ, æstatem apud Daphnen, reliquam partem Antiochiæ. Risui fuit omnibus Syris: quorum multa joca, in theatro in eum dicta, exstant. Vernas in triclinium Saturnalibus & diebus festis semper admisit. Ad Euphratem tamen impulsu comitum suorum secundo profectus est. Ephesum etiam rediit, ut Lucillam uxorem, missam a patre Marco, susciperet; & idcirco maxime, ne Marcus cum ea in Syriam veniret, ac flagitia ejus agnosceret. nam Senatui Marcus dixerat, se filiam in Syriam deducturum. Confecto sane bello, regna regibus, provincias vero comitibus suis regendas dedit. Romam inde ad triumphum invitus, quod Syriam quasi regnum suum relinqueret, rediit, & pariter cum fratre triumphavit, susceptis a Senatu nominibus, quæ in exercitu acceperat. Fertur præterea ad amicæ vulgaris arbitrium in Syria posuisse barbam. unde in eum a Syris multa sunt dicta.

VIII. Fuit ejus fati, ut in eas provincias, per quas rediit, Romam usque, luem secum deferre videretur. Et nata fertur pestilentia in Babylonia, ubi de templo Apollinis ex arcula aurea, quam miles forte inciderat, spiritus pestilens evasit, atque inde Parthos orbemque complexisse. Et hoc non Lu-

cii Veri vitio, sed Cassii, a quo contra fidem Seleucia, quæ ut amicos milites nostros receperat, expugnata est. quod quidem inter ceteros etiam Quadratus, belli Parthici scriptor, incusatis Seleucenis, qui fidem primi ruperant, purgat. Habuit hanc reverentiam Marci Verus, ut nomina, quæ sibi delata fuerant, cum fratre communicaret die triumphi, quem pariter celebrarunt. Reversus e Parthico bello, minore circa fratrem cultu fuit Verus: nam & libertis inhonestius indulgit, & multa sine fratre disposuit. His accessit, quod, quasi reges aliquos ad triumphum adduceret, sic histriones eduxit e Syria: quorum præcipuus fuit Maximinus, quem Paridis nomine nuncupavit. Villam præterea exstruxit in via Clodia famosissimam, in qua permultos dies & ipse ingenti luxuria debacchatus est cum libertis suis & amicis paribus, quorum præsentia nulla inerat reverentia; & Marcum rogavit, qui venit, ut fratri venerabilem morum suorum & imitandam ostenderet sanctitudinem, & quinque diebus in eadem villa residens, cognitionibus continuis operam dedit, aut convivante fratre, aut convivia comparante. Habuit & Agrippam histrionem, cui cognomen erat Memphi, quem & ipsum e Syria veluti trophæum Parthicum adduxerat; quem Apolaustum nominavit. Adduxerat secum & fidicinas, & tibicines, & histriones, scurrasque mimarios & præstigiatores, & omnia mancipiorum genera, quorum Syria & Alexandria pascitur voluptate; prorsus ut videretur bellum, non Parthicum, sed histrionicum confecisse.

IX. Et hæc vitæ diversitas, atque alia multa, inter Marcum & Verum similitudines fecisse, non aperta veritas indicabat, sed occultus rumor insusurrabat. Verum illud præcipuum, quod, cum Libonem quendam patruelem suum Marcus legatum in Syriam misisset, atque ille se insolentius, quam verecundus Senator, efferret, dicens, *ad fratres suos scripturum esse, si quid forte dubitaret*; nec Verus præsens pati posset, subitoque morbo, notis prope veneni existentibus, interisset; visum est nonnullis, (non tamen Marco) quod ejus fraude putaretur occisus. quæ res simultatem auxit rumorem. Liberti multum potuerunt apud Verum, ut in vita Marci diximus, Geminas & Agaclytus, cui dedit, invito Marco, Libonis uxorem. denique nuptiis ab Vero celebratis, Marcus convivio non interfuit. Habuit & alios liberos Verus improbos, Codem & Eclectum, ceterosque: quos omnes Marcus post mortem Veri, specie honoris abjecit, Eclecto retento, qui postea Commodum filium ejus occidit. Ad bellum Germanicum, quod Marcus nollet Lucium sine se vel ad bellum mittere, vel in Urbe dimittere, causa luxuriæ, simul profecti sunt, atque Aquilejam venerunt: invitoque Lucio Alpes transgressi, cum Verus apud Aquilejam tantum vectatus convivatusque esset, Marcus autem omnia prospexisset. De quo bello quid per legatos Barbarorum pacem petentium, quid per duces nostros gestum est, in Marci vita plenissime disputatum est. Composito autem bello in Pannonia, urgente Lucio, Aquilejam rediret, quod urbanas desiderabat Lucius volupta-

res, in Urbem destinatus est: sed non longe ab Alitino subito in vehiculo morbo, quem apoplexin vocant, correptus Lucius, depositus e vehiculo, detracto sanguine Alitino perductus, cum triduo mutus vixisset, apud Alitino periit.

X. Fuit sermo, quod & socrum Faustina inces-
tasset. & dicitur Faustinae socrus dolo, aspersis
ostreis veneno extinctus esse: idcirco, quod con-
suetudinem, quam cum matre habuerat, filiae pro-
didisset: quamvis & illa fabula, quae in Marci vita
posita est, abhorrens a talis viri vita sit exorta:
cum multi etiam uxori ejus flagitium mortis as-
signent, idcirco quod Fabiae nimium indulserat Ve-
rus, cujus potentiam uxor Lucii vel Marci ferre
non posset. Tanta sane familiaritas inter Lucium
& Fabiam sororem fuit, ut hoc quoque usurpave-
rit rumor, quod inierint consilium ad Marcum e
vita tollendum. idque cum esset per Agaclytum li-
bertum proditum Marco, ante adventum Lucium
Faustina nece prævenerat. Fuit decorus corpore,
vultu gemmatus, barba prope barbarice demissa,
procerus, & fronte in supercilia adductiore vene-
rabilis. Dicitur sane tantam habuisse curam flaven-
tium capillorum, ut capiti auri ramenta resperge-
ret, quo magis coma illuminata flavesceret. Lingua
impeditior fuit. aleae cupidissimus: vitae semper lu-
xuriosae, atque in pluribus Nero, præter crudeli-
tatem & ludibria. Habuit inter alium luxuriae ap-
paratum calicem crystallinum nomine Volucrem,
ex ejus equi nomine, quem dilexit, humanae po-
tionis modum supergressum.

XI. Vixit annis quadraginta duobus. Imperavit cum fratre annis undecim. Illatumque ejus corpus est Hadriani sepulcro, in quo & Cæsar pater ejus naturalis sepultus est. Nota est fabula, quam Marci non capit vita, quod partem vulvæ veneno illitam, cum eam exsecuisset cultro una parte venenato, Marcus Vero prorrexerit: sed hoc nefas est de Marco putari: quamvis Veri & cogitata & facta mereantur, quod nos non in medio relinquimus. sed totam purgatam confutatamque respuimus; cum adhuc post Marcum, præter vestram Clementiam, Diocletiane Auguste, Imperatorem talem, nec adulatio videatur potuisse confingere.

VULCATII GALLICANI

V. C.

AVIDIUS CASSIUS.

I. **A**VIDIUS Cassius, ut quidam volunt, ex familia Cassiorum fuisse dicitur, per matrem tamen avo genitus Avidio Severo, qui ordines duxerat, & post ad summas dignitates pervenerat. Cujus Quadratus in historiis meminit, & quidem graviter, cum illum summum virum & necessarium reipublicæ afferit, & apud ipsum Marcum Antoninum prævalidum. nam jam eo imperante perisse fatali sorte perhibetur. Hic ergo Cassius ex familia, ut diximus, Cassiorum, qui in curia in Julium conspirarunt, oderat tacite principatum, nec ferre poterat imperatorium nomen: dicebatque, *nihil esse gravius nomine imperii, quod non posset e republica tolli, nisi per alterum imperatorem.* denique tentasse in pueritia dicitur extorquere etiam Pio principatum: sed per patrem, virum sanctum & gravem, affectionem tyrannidis latuisse; habitum tamen semper a ducibus suspectum. Vero autem illum pa-

rasse infidias, ipsius Veri epistola indicat, quam inserui. Ex epistola Veri: *Avidius Cassius avidus est imperii, quantum & mihi videtur, & jam inde sub avo meo, patre tuo, innotuit: quem velim observari jubeas. Omnia ei nostra displicent, opes non mediocres parat, literas nostras ridet. te philosopham aniculam, me luxuriosum morionem vocat. Vide, quid agendum sit, ego hominem non odi: sed vide, ne tibi & liberis tuis non bene consulat, cum tales inter præcinctos habeas, quales milites libenter audiunt, libenter vident.*

II. Rescriptum Marci de Avidio Cassio: *Epistolam tuam legi, & sollicitam potius, quam imperatoriam, & non nostri temporis. nam si ei divinitus debetur imperium, non poterimus interficere, etiamsi velimus. scis enim proavi tui dictum: Successorem suum nullus occidit. sin minus, ipse sponte sine nostra crudelitate fatales laqueos inciderit. Adde, quod non possumus reum facere, quem & nullus accusat & (ut ipse dicis) milites amant. Deinde in causis majestatis hæc natura est, ut videantur vim pati, etiam quibus probatur. Scis enim ipse, quid avus tuus Hadrianus dixerit: Misera conditio imperatorum, quibus de affectata tyrannide nisi occisis non potest credi. Ejus autem exemplum ponere, quam Domitiani, qui hoc primus dixisse fertur, malui. Tyrannorum enim etiam bona dicta non habent tantum auctoritatis, quantum debent. Sibi ergo habeat suos mores; maxime, cum bonus dux sit & severus, & fortis, & Reipublicæ necessarius. Nam quod dicis, liberis meis cavendum esse morte illius: plane liberi mei pereant, si magis amari merebitur Avidius, quam illi, & si Reipublicæ expediet, Cassium*

vivere, quam liberos Marci. Hæc de Cassio Verus; hæc Marcus.

III. Sed nos hominis naturam & mores breviter explicabimus. neque enim plura de his sciri possunt, quorum vitam illustrare nullus audet, eorum causa, a quibus oppressi fuerint. Addemus autem, quemadmodum ad imperium venerit, & quemadmodum sit occisus, & ubi victus. Proposui enim, Diocletiane Auguste, omnes, qui Imperatorum nomen sive iuste sive iniuste habuerunt, in literas mittere, ut omnes purpuratos Augustos cognosceres. Fuit his moribus, ut nonnunquam trux & asper videretur, aliquando mitis & lenis; sæpe religiosus, alias contemtor sacrorum; avidus vini, interim abstinens; cibi appetens, & inedia patiens; Veneris cupidus, & castitatis amator. nec defuere, qui illum *Catilinam* vocarent: cum & ipse se ita gauderet appellari, addens, *futurum se Sergium, si dialogistam occidisset*; Antoninum hoc nomine significans, qui tantum enituit in philosophia, ut, iturus ad bellum Marcomannicum, timentibus cunctis, ne quid fatale proveniret, rogatus sit, non adulatione, sed serio, ut præcepta philosophiæ ederet: nec ille timuit, sed per ordinem paræneseon, hoc est, præceptionum, per triduum disputavit. Fuit præterea disciplinæ militaris Avidius Cassius tenax, & qui se *Marium* dici vellet.

IV. Quoniam de severitate illius dicere cœpi-mus, multa existant crudelitatis potius, quam severitatis ejus, indicia. nam primum milites, qui provincialibus aliquid tulissent per vim, in illis ipsis lo-

cis, in quibus peccaverant, in crucem sustulit. Primus etiam id supplicii genus invenit, ut stipitem grandem poneret pedum octoginta & centum, id est, materiam, & a summo usque ad imum damnatos ligaret, & ab imo focum apponeret, incensisque aliis, alios fumi cruciatu, timore etiam alios necaret. Idem denos catenatos in profluentem mergi jubebat, vel in mare. Idem multis desertoribus manus excidit, aliis crura incidit ac poplites, dicens, *majus exemplum esse viventis miserabiliter criminosi, quam occisi*. Cum exercitum duceret, & inficio ipso manus auxiliaria, centurionibus suis auctoribus, tria millia Sarmatarum, negligentius agentium in Danubii ripis, occidissent, & cum præda ingenti ad eum redissent; sperantibus centurionibus præmium, quod perparva manu tantum hostium, segnius agentibus tribunis & ignorantibus, occidissent: rapi eos jussit, & in crucem tolli, servilique supplicio affici, quod exemplum non exstaret, dicens, *evenire potuisse, ut essent insidiæ, ac periret Romani imperii reverentia*. & cum ingens seditio in exercitu exorta esset, processit nudus, campestri solo reclus, &, *Percutite, inquit, me, si audetis, & corruptæ disciplinæ facinus addite*. Tunc, conquiescentibus cunctis, meruit timeri, quia non timuit. Quæ res tantum disciplinæ Romanis addidit, tantum terroris Barbaris injecit, ut pacem annorum centum ab Antonino absente peterent: siquidem viderant, damnatos Romani ducis judicio etiam eos, qui contra fas vicerant.

V. De hoc multa gravia contra militum licen-

tiam facta inveniuntur apud Æmiliū Parthenianum, qui affectatores tyrannidis, jam inde a veteribus, historiæ tradidit. nam & virgis cæsos in foro & in mediis castris securi percussit, qui ita meruerunt, & manus multis amputavit. Et, præter larium ac bucellatum atque acetum, militem in expeditione portare prohibuit: & si aliud quippiam reperit, luxuriam non levi supplicio affecit. Exstat de hoc epistola Divi Marci ad præfectum suum talis: *Avidio Cassio legiones Syriacas dedi, diffuentes luxuria, & Daphnicis moribus agentes: quas totas excaldantes se reperisse Cæsonius Vellilianus scripsit. & puto me non errasse: siquidem & tu notum habeas Cassium, hominem Cassianæ severitatis & disciplinæ. neque enim milites regi possunt, nisi in veteri disciplina. Scis enim versum a bono poeta dictum, & omnibus frequentatum: Moribus antiquis res stat Romana virisque. Tu tantum fac adsint legionibus abunde comæatus. quos, si bene Avidium novi, scio non perituros.* Responsio præfecti ad Marcum: *Recte consulisti, mi domine, quod Cassium præfecisti Syriacis legionibus. nihil enim tam expedit, quam homo severior Græcanicis militibus. Ille sane omnes excaldationes, omnes flores de capite, collo & sinu militi excutiet. Annona militaris omnis parata est, neque quidquid deest sub bono duce: non enim multum aut quæritur, aut impenditur.*

VI. Nec fefellit de se iudicium habitum. nam statim ad signa edici iussit, & programma in parietibus fixit, ut, si quis cinctus inveniretur apud Daphnem, discinctus rediret. Arma militum septima die semper

respexit, vestimenta etiam, & calceamenta, & ocreas: delicias omnes de castris submovit: iussitque eos hiemem sub pellibus agere, nisi corrigerent suos mores: & egissent, nisi honestius vixissent. Exercitium septimi diei fuit omnium militum, ita ut sagittas mitterent, & armis luderent. Dicebat enim, *miserum esse, cum exerceantur athletæ, venatores, & gladiatores, non exerceri milites: quibus minor esset futurus labor, si consuetus esset.* Ergo correctâ disciplina, & in Armenia, & in Arabia, & in Ægypto res optime gessit: amatusque est ab omnibus Orientalibus, & speciatim ab Antiochenis, qui etiam imperio ejus consenserunt, ut docet Marius Maximus in vita Divi Marci. Nam cum Bucolici milites per Ægyptum gravia multa facerent, ab hoc reclusi sunt, ut idem Marius Maximus refert in eo libro, quem secundum de vita Marci Antonini edidit.

VII. Hic Imperatorem se in Oriente appellavit, ut quidam dicunt, Faustina volente, quæ valetudini Marci jam diffidebat, & timebat, ne infantes filios tueri sola non posset, atque aliquis existeret, qui, capta statione regia, infantes de medio tolleret. Alii autem dicunt, hanc artem adhibuisse militibus & provincialibus Cassium contra Marci amorem, ut sibi posset consentiri, quod diceret, Marcum diem suum obiisse. Nam & *Divum* eum appellasse dicitur, ut desiderium illius leniret. Imperatorio nomine cum processisset, eum, qui sibi aptaverat ornamenta regia, statim præfectum prætorii fecit; qui & ipse occisus est, Antonino invito, ab exercitu: qui & Mæcianum, cui erat com-

missa Alexandria, quique consenserat spe participatus Cassio, invito atque ignorante Antonino, interemit. Nec tamen Antoninus graviter est iratus, rebellione cognita, nec in ejus liberos aut affectus sæviit. Senatus illum hostem appellavit, bonaque ejus proscripsit: quæ Antoninus in privatum ærarium congeri noluit; quare, Senatu præcipiente, in ærarium publicum sunt relata. Nec Romæ terror defuit, cum quidam Avidium Cassium dicerent, absente Antonino, qui nisi a voluptariis unice amabatur, Romam esse venturum, atque Urbem tyrannice direpturum, maxime senatorum causa, qui eum hostem judicaverant, bonis proscriptis. Et amor Antonini hoc maxime enituit, quod consensu omnium, præter Antiocheneses, Avidius interemtus est: quem quidem occidi non jussit, sed passus est; cum apud cunctos clarum esset, si potestatis suæ fuisset, parsurum illi fuisse.

VIII. Caput ejus ad Antoninum cum delatum esset, ille non exsultavit, non elatus est, sed etiam doluit, ereptam sibi esse occasionem misericordiæ; cum diceret, *se vivum illum voluisse capere, ut illi exprobraret beneficia sua, eumque servaret.* Denique cum quidam diceret, *reprehendendum Antoninum, quod tam mitis esset in hostem suum, ejusque liberos & affectus, atque omnes, quos conscios tyrannidis reperisset,* addente illo, qui reprehendebat, *Quid si ille vicisset?* dixisse dicitur: *Non sic Deos coluimus, nec sic vivimus, ut ille nos vinceret.* Enumeravit deinde, *omnes Principes, qui occisi essent, habuisse causas, quibus mererentur occidi; nec quemquam facile*

bonum vel viduum a tyranno, vel occisum: dicens, meruisse Neronem, debuisse Caligulam, Othonem & Vitellium nec imperare voluisse. Nam de Pertinace & Galba paria sentiebat, cum diceret, In Imperatore avaritiam esse acerbissimum malum. denique, non Augustum, non Trajanum, non Hadrianum, non parentem suum Pium a rebellibus potuisse superari; cum & multi fuerint, & ipsis vel invitis vel insciis exstincti. Ipse autem Antoninus a senatu petiit, ne graviter in conscios defectionis animadverteretur, eo ipso tempore, quo rogavit, ne quis senator temporibus suis capitali supplicio afficeretur: quod illi maximum amorem conciliavit. Denique, paucissimis centurionibus punitis, deportatos revocari jussit.

IX. Antiochensibus, qui Avidio Cassio consenserant, sed & aliis civitatibus, quæ illum juverant, agnovit: cum primo Antiochensibus graviter iratus esset, hisque spectacula sustulisset, & multa alia civitatis ornamenta, quæ postea reddidit. Filios vero Avidii Cassii, Antoninus Marcus parte media paterni patrimonii donavit; ita ut filias ejus auro, argento, & gemmis honestaret. nam & Alexandræ, filiæ Cassii, & genero Druentiano, liberam evagandi, ubi vellent, potestatem dedit: vixeruntque non quasi tyranni pignora, sed quasi senatorii ordinis, in summa securitate; cum illis etiam in lite objici fortunam propriæ vetuisset domus, damnatæ aliquibus injuriarum, quod in eos petulantes fuissent: quos quidem amitæ suæ marito commendavit. Si quis autem omnem hanc historiam scire desiderat, legat Marii Maximi secundum librum de

vita Marci, in quo ille ea dicit, quæ solum Marcus; mortuo jam Vero, egit. tunc enim Cassius rebellavit, ut probat epistola missa ad Faustina; cujus hoc exemplum est: *Verus mihi de Avidio verum scripserat, quod cuperet imperare. Audisse enim te arbitror, quod arustatores de eo nuntiarent. Veni igitur in Albanum, ut tractemus omnia Diis volentibus, nihil timens.* Hic autem apparet, Faustina; ista nescisse, cum dicat Marius, infamari eam cupiens, quod ea conscia Cassius imperium sumisset. nam & ipsius epistola existat ad Verum, qua urget Marcum, ut in eum graviter vindicet. Exemplum epistolæ Faustina; ad Marcum: *Ipsa in Albanum cras, ut jubes, mox veniam: tamen jam hortor, ut, si amas liberos tuos, istos rebelliones acerrime persequaris. Male enim assueverunt & duces & milites: qui nisi opprimantur, opprimunt.*

X. Item alia epistola ejusdem Faustina; ad Marcum: *Mater mea Faustina patrem tuum Pium ejusdem in defectione Celsi sic hortata est, ut pietatem primum circa suos servaret, sic circa alienos. non enim pius est Imperator, qui non cogitat uxorem & filios. Commodus noster vides in qua aetate sit: Pompejanus gener, & senior est, & peregrinus. Vide, quid agas de Avidio Cassio & de ejus consociis. noli parcere hominibus, qui tibi non pepercerunt; & nec mihi, nec filiis nostris parcerent, si vicissent.* Ipsa iter tuum mox consequor: quia Fadilla nostra agrotabat, in Formianum venire non potui. Sed si te Formiis invenire non potero, assequar Capuam: quæ civitas & meam, & filiorum nostrorum aegritudinem poterit adjuvare. Soteridam

medicum in Formianum ut dimittas, rogo: ego autem Pifitheo nihil credo, qui puellæ virgini curationem nescit adhibere. Signatas mihi literas Calpurnius dedit: ad quas rescribam, si tardavero, per Cæcilium senem spadonem, hominem, ut scis, fidelem: cui verbo mandabo, quid uxor Avidii Cassii, & filii, & gener, de te jactare dicantur.

XI. Ex his literis intelligitur, Cassio Faustina conficiam non fuisse, quin etiam supplicium ejus graviter exegisse: siquidem Antoninum, quiescentem & clementiora cogitantem, ad vindictæ necessitatem impulit. Cui Antoninus quid rescripserit, subdita epistola perdocebit: *Tu quidem, mea Faustina, religiose pro marito & pro nostris liberis agis. nam relegi epistolam tuam in Formiano, qua me hortaris, ut in Avidii confcios vindicem. Ego vero & ejus liberis parcam, & genero, & uxori; & ad Senatum scribam, ne aut proscriptio gravior sit, aut pœna crudelior. non enim quidquam est, quod Imperatorem Romanum melius commendet gentibus, quam clementia. Hæc Casarem Deum fecit, hæc Augustum consecravit, hæc patrem tuum specialiter Pii nomine ornavit, denique si ex mea sententia de bello judicatum esset, nec Avidius esset occisus. Esto igitur securus: Dii me tuentur; Diis pietas mea cordi est. Pompejanum nostrum in annum sequentem Consulem dixi. hæc Antoninus ad conjugem.*

XII. Ad Senatum autem qualem orationem miserit, interest scire. Ex oratione Marci Antonini: *Habeis igitur, Patres conscripti, pro gratulatione victoriæ generum meum Consulem: Pompejanum dico, cujus atas*
Scriptu. H. A. G

olim remuneranda fuerat Consulatu, nisi viri fortes intervenissent, quibus reddi debuit, quod a republica debebatur. Nunc quod ad defectionem Cassianam pertinet, vos oro atque obsecro, Patres conscripti, ut, censura vestra deposita, meam pietatem clementiamque servetis, immo vestram; neque quemquam ullum Senatus occidat. nemo senatorum puniatur, nullus fundatur viri nobilis sanguis: deportati redeant, proscripti bona recipiant. Utinam possem multos etiam ab inferis excitare! non enim unquam placet in Imperatore vindicta sui doloris: quæ etsi justior fuerit, acrior videtur. Quare filius Avidii Cassii, & genero, & uxori, veniam dabit. & quid dico veniam? cum illi nihil fecerint. Vivant igitur securi, scientes sub Marco se vivere. Vivant in patrimonio parentum, pro parte donato: auro, argento, vestibus fruantur: sint divites, sint securi, sint vagi & liberi, & per ora omnium ubique populorum circumferant mea, circumferant vestrae pietatis exemplum. Nec magna hæc est, Patres conscripti, clementia, veniam proscriptorum liberis & conjugibus dari. ego vero a vobis peto, ut conscios senatorii ordinis & equestris, a cæde, a proscriptione, a timore, ab infamia, ab invidia, & postremo ab omni vindictæ injuria: detisque hoc meis temporibus, ut in causa tyrannidis, qui in tumultu cecidit, probetur occisus.

XIII. Hanc ejus clementiam Senatus his acclamationibus profecutus est: *Antonine pie, Dii te servant! Antonine clemens, Dii te servant! Antonine clemens, Dii te servant!* tu noluisti, quod licebat; nos fecimus, quod decebat. *Commodo imperium justum rogamus: progeniem tuam roboras, fac securi sint liberi no-*

stri. Bonum imperium nulla vis ladii. Commodus Antonino tribuniciam potestatem rogamus, praesentiam tuam rogamus. Philosophia tua, patientia tua, doctrina tua, nobilitati tuae, innocentia tuae. Vincis inimicos, hostes exsuperas, Dii te tuentur, & reliqua. Vixerunt igitur posterius Avidii Cassii securi, & ad honores admissi sunt. Sed eos Commodus Antoninus, post excessum Divi patris sui, omnes vivos incendi iussit, quasi in factione deprehensos. Haec sunt, quae de Cassio Avidio comperimus: cujus ipsius mores (ut supra diximus) varii semper fuerunt; sed ad censuram crudelitatemque propensiores, qui, si obtinuisset imperium, fuisset non modo clemens, sed bonus, sed utilis & optimus Imperator.

XIV. Nam exstat epistola ejus, ad generum suum, jam Imperatoris, hujusmodi: *Misera respublica, quae istos divitiarum cupidos & divites patitur, misera. Marcus homo sane optimus, qui dum clemens dici cupit, eos patitur vivere, quorum ipse non probat vitam. Ubi Lucius Cassius, cujus nos frustra tenet nomen? ubi Marcus ille Cato Censorius? ubi omnis disciplina majorum? quae olim quidem intercidit, nunc vero nec quaeritur. Marcus Antoninus philosophatur, & quaerit de clementia, & de animis, & de honesto, & iusto; nec sentit pro republica. Vides multis opus esse gladiis, multis elogiis, ut in antiquum statum publica forma reddatur. Ego vero istis praesidibus provinciarum. an ego proconsules, an ego praesides putem, qui ob hoc sibi a Senatu & ab Antonino provincias datas credunt, ut luxurientur, ut divites fiant? Audiisti, praesidium praetorii nostri Philosophi ante triduum,*

quam fieret, mendicum & pauperem, sed subito divitem factum. Unde, quæso, nisi de visceribus reipublicæ provincialiumque fortunis? Sint sane divites, sint locupletes: ærarium publicum referciant, tantum Dii favcant bonis partibus. Reddant Cassiani reipublicæ principatum. Hæc epistola ejus indicat, quam severus, & quam tristis futurus fuerit Imperator.

ÆLII LAMPRIDII COMMODUS ANTONINUS

A D

DIOCLETIANUM AUG.

I. **D**E Commodi Antonini parentibus in vita Marci Antonini satis est disputatum. Ipse autem natus est apud Lanuvium cum fratre Antonino gemino, pridie Kalendas Septembres, patre patruoque Consulibus; ubi & avus maternus dicitur natus. Faustina cum esset Commodus cum fratre prægnans, visa est in somnis serpentes parere; sed ex his unum ferociorem. Cum autem peperisset Commodum atque Antoninum, Antoninus quadrimus est elatus: quem parem astrorum cursu Commodus mathematici promittebant. Mortuo igitur fratre, Commodum Marcus & suis præceptis, & etiam magnorum atque optimorum virorum erudire conatus est. Habuit literatorem Græcum, Onesicritum; Latinum, Capellam Antistium; orator ei Atejus Sanctus fuit. Sed tot disciplinarum magistri ei nihil profuerunt. tantum valet aut ingenii vis, aut eorum, qui in

aula institutores habentur. nam a prima statim pueritia, turpis, improbus, crudelis, libidinosus, ore quoque pollutus & constupratus fuit: jam in his artifex, quæ stationis imperatoris non erant, ut calices fingeret, saltaret, cantaret, sibilaret, scurram denique & gladiatorem se perfectum ostenderet. Auspicium crudelitatis apud Centumcellas dedit anno ætatis duodecimo. nam cum tepidius forte lotus esset, balneatorem in fornacem conjici iussit. quando a pædagogo, cui hoc iussum fuerat, vervecina pellis in fornace consumpta est, ut fidem pœnæ de foetore nidoris impleret. Appellatus est autem *Cæsar* puer cum fratre suo Severo. decimo-quarto ætatis anno in collegium Sacerdotum adscitus est. cooptatus inter tres solos *Principes iuventutis*, cum togam sumpsit. adhuc in prætexta puerili congiarium dedit, atque ipse in basilica Trajani præsedidit.

II. Indutus autem toga est Nonarum Juliarum die, quo in terris Romulus non apparuit, & eo tempore, quo Cassius a Marco descivit. Profectus est, commendatus militibus, cum patre in Syriam & Ægyptum, & cum eo Romam rediit. Post hæc, venia legis Annariæ impetrata, Consul est factus: & cum patre Imperator est appellatus quinto Kalendarum Decembrium die, Pollione & Apro Consulibus, & triumphavit cum patre; nam & hoc Patres decreverant. Profectus est cum patre & ad Germanicum bellum. Adhibitos custodes vitæ suæ honestiores ferre non potuit; pessimos quosque detinuit, & submotos, usque ad ægritudinem desidera-

vit: quibus per patris mollitiem restitutis, popinas & ganeas in Palatinis semper ædibus fecit, neque unquam pepercit vel pudori, vel sumtui. In domo aleam exercuit. Mulierculas formæ scitioris, ut prostibula mancipia lupanarium, ad ludibrium pudicitiae contraxit. Imitatus est propolas circumforaneos. Equos curules sibi comparavit. Aurigæ habitu currus rexit: gladiatoribus convixit: aquam gessit, ut lenonum minister, ut probris natum magis, quam ei loco, eum crederes, ad quem fortuna provexit.

III. Patris ministeria seniores submovit, amicos senes abjecit. Filium Salvii Juliani, qui exercitiis præerat, ad impudicitiam frustra tentavit, atque exinde Juliano tetendit insidias. Honestissimos quoque, aut per contumeliam, aut per honorem indignissimum, abjecit. Appellatus est a mimis quasi obstupratus: eosdemque ita, ut non apparerent, subito deportavit. Bellum etiam, quod pater pæne confecerat, legibus hostium addictus, remisit, ac Romam reversus est. Romam ut rediit, subactore suo Antero post se in curru locato, ita triumphavit, ut eum sæpius cervice reflexa publice oscularetur, etiam in orchestra hoc idem fecit. Et cum potaret in lucem, heluareturque viribus Romani imperii, vespera etiam per tabernas ac lupanaria volitavit. Misit homines ad provincias regendas, vel criminum socios, vel a criminosis commendatos. In senatus odium ita venit, ut & ipse crudeliter in tanti ordinis perniciem sæviret, fieretque contemptui.

IV. Crudelis vita Commodi Quadratum & Lucillam compulit ad ejus interfectionem consilia ini-
 re, non sine præfecti prætorio Tarruteni Paterni
 consilio. Datum autem est negotium peragenda necis
 Claudio Pompejano propinquo: qui ingressus
 ad Commodum districto gladio, cum faciendi pote-
 statem habuisset, in hæc verba prorumpens, *Hunc*
tibi pugionem Senatus mittit, detexit facinus fatuus,
 nec implevit, multis cum eo participantibus cau-
 sam. Post hæc interfecti sunt Pompejanus primo &
 Quadratus: dein Narbana, atque Norbanus, & Pa-
 ralius, & mater ejus, & Lucilla in exilium exacta.
 Cum præfecti prætorio vidissent, Commodum in
 tantum odium incidisse, obtentu Anteri, cujus po-
 tentiam populus Romanus ferre non poterat, ur-
 bane Anterum eductum a palatio sacrorum causa,
 & redeantem in hortos suos, per frumentarios oc-
 ciderunt. Id vero gravius, quam de se ipso, Com-
 modo fuit. Paternum autem, & hujus cædis aucto-
 rem, & (quantum videbatur) paratæ necis Com-
 modi conscium, & interventurum, ne conjuratio
 latius puniretur, instigante Tigidio, per laticlavi
 honorem a præfecturæ administratione submovit.
 post paucos dies insinulavit eum conjurationis,
 cum diceret, ob hoc promissam Juliani filio filiam
 Paterni, ut in Julianum transferretur imperium:
 quare & Paternum, & Julianum, & Vitruvium Se-
 cundum, Paterni familiarissimum, qui epistolas im-
 peratorias curabat, interfecit. Domus præerea
 Quintiliorum omnis extincta, quod Sextus Con-
 diani filius, specie mortis, ad defectionem dicere-

tur evasisse. Interfecta & Vitrassia Faustina, & Vellius Rufus, & Egnatius Capito, Consulares. In exilium autem acti sunt Æmilius Junctus & Atilius Severus, Consules. & in multos alios varie sævitum.

V. Post hæc Commodus nunquam facile in publicum processit, neque quidquam sibi nuntiari passus, nisi quod Perennis ante tractasset. Perennis autem, Commodi persciens, invenit; quemadmodum ipse potens esset. nam persuasit Commodō, ut ipse deliciis vacaret, idem vero Perennis curis incumberet: quod Commodus lætanter accepit. Hac igitur lege vivens ipse cum trecentis concubinis, quas ex matronarum meretricumque delectu ad formæ speciem conciliaverat, trecentisque aliis puberibus exoletis, quos æque ex plebe ac nobilitate, nuptiisque, forma disceptatrice collegat, in palatio per convivia & balneas bacchabatur. Inter hæc, habitu victimarii, victimas immolavit: in arena rudibus, inter cubicularios gladiatores pugnavit lucentibus aliquando mucronibus. Tunc tamen Perennis cuncta sibimet vindicavit: quos voluit, interemit; spoliavit plurimos; omnia jura subvertit; prædam omnem in sinum contulit. Ipse autem Commodus Lucillam sororem, cum eam compressisset, occidit: sororibus deinceps ceteris, ut dicitur, constupratis, consobrina patris complexibus suis conjuncta, uni etiam ex concubinis matris nomen imposuit & uxoris. quam deprehensam in adulterio exegit, exactam relegavit, & postea occidit. Ipsas concubinas suas sub oculis suis stuprari jubebat. Nec irruentem in se

juvenum carebat infamia, omni parte corporis, atque ore in sexum utrumque pollutus. Occisus est eo tempore etiam Claudius, quasi a latronibus: cujus filius cum pugione quondam ad Commodum ingressus est: multique alii Senatores sine judicio interemti, feminæ quoque divites. Et nonnulli per provincias, a Perenni ob divitias infimulati, spoliati sunt, vel etiam interemti. his autem, quibus deerat ficti criminis appositio, objiciebatur, quod scribere voluissent Commodum heredem.

VI. Eo tempore in Sarmatia res bene gestas per alios duces, in filium suum Perennis referebat. Hic tamen Perennis, qui tantum potuit, subito, quod bello Britannico militibus Equestris loci viros præfecerat, amoris Senatoribus, prodita re per legatos, exercitus hostis appellatus, lacerandusque militibus est deditus. in cujus potentia locum Cleandrum ex cubiculariis subrogavit. Multa sane post interfectum Perennem ejusque filium, quasi a se non gesta, rescidit, velut in integrum restituens. Et hanc quidem poenitentiam scelerum ultra triginta dies tenere non potuit, graviora per Cleandrum faciens, quam fecerat per supra dictum Perennem. Et in potentia quidem Cleander Perenni succefferat, in præfectura vero Niger: qui sex tantum horis præfectus Prætorii fuisse perhibetur. mutabantur enim præfecti prætorii per horas ac dies, Commodo pejora omnia, quam fecerat ante, faciente. Fuit item Marcius Quartus præfectus prætorio diebus quinque. Horum successores ad arbitrium Cleandri aut retenti sunt, aut occisi. ad cu-

ius nutum etiam libertini in Senatum atque in patricios lecti sunt: tuncque primum vigintiquinque Consules in unum annum: venditæque omnes provinciæ. Omnia Cleander pecunia venditabat. revocatos de exsilio dignitatibus ornabat; res judicatas rescindebat. qui tantum per stultitiam Commodi potuit, ut Byrrum, sororis Commodi virum, reprehendentem, nuntiantemque Commodo, quæ fiebant, in suspicionem regni affectati trahe-
ret, & occideret; multis aliis, qui Byrrum defendebant, pariter interemtis. Præfectus etiam Ebutianus inter hos est interemtus: in cujus locum ipse Cleander cum aliis duobus, quos ipse delegerat, præfectus est factus. Tuncque primum tres præfecti prætorio fuere: inter quos libertinus, qui a pugione appellatus est.

VII. Sed & Cleandro dignus tandem vitæ finis impositus. nam cum insidiis illius Arrius Antoninus, fictis criminibus in Attali gratiam, quem in proconsulatu Asiæ damnaverat, esset occisus, nec eam tum invidiam, populo sæviente, Commodus ferre potuisset, plebi ad pœnam donatus est: cum etiam Apolauſtus aliique liberti aulici pariter interemti sunt. Cleander inter cetera etiam concubinas ejus constupravit: de quibus filios suscepit, qui post ejus interitum cum matribus interemti sunt. In cujus locum Julianus & Regillus subrogati sunt: quos & ipsos postea pœnis affecit. His occisis, interemit Servilium & Dulium Silanos, cum suis: mox Anicium Lupum, & Petronios Mamertinum & Suram, filiumque Mamertini Anto-

ninum, ex sorore sua genitum. Et post eos sex simul ex Consularibus, Allium Fuscum, Coelium Felicem, Lucejum Torquatum, Lartium Euripianum, Valerium Bassianum, Paetulejum Magnum cum suis: atque in Asia Sulpitium Crassum proconsulem & Julium Proculum cum suis, Claudiumque Lucanum, consularem, & consobrinam patris sui Faustina Anniam in Achaja, & alios infinitos. Destinaverat & alios quatuordecim occidere, cum sumtus ejus vires Romani imperii sustinere non possent.

VIII. Inter hæc Commodus, senatu semet ridente, cum adulterum matris Consulem designasset, appellatus est *Pius*; cum occidisset Perennem, appellatus est *Felix*. Inter plurimas cædes multorum civium, quasi quidam novus Sulla, idem Commodus ille Pius, ille Felix, finxisse etiam quandam contra se conjurationem dicitur, ut multos occideret. Nec alia ulla fuit defectio præter Alexandri, qui postea se & suos interemit, & sororis Lucillæ. Appellatus est Commodus etiam *Britannicus* ab adulatoribus, cum Britanni etiam imperatorem contra eum deligere voluerint. Appellatus est etiam *Romanus Hercules*, quod feras Lanuvii in amphitheatro occidisset. erat enim hæc illi consuetudo, ut domi bestias interficeret. Fuit præterea ea dementia, ut urbem Romam, *coloniam Commodianam* vocari voluerit: qui furor dicitur ei inter delinimenta Marcæ injectus. Voluit etiam in circo quadrigas agitare. Dalmaticatus in publico processit, atque ita signum quadrigis emittendis dedit. Et eo

quidem tempore, quo ad senatum retulit de Commodiana facienda Roma, non solum Senatus hoc libenter accepit per irrisum (quantum intelligitur,) sed etiam se ipsum *Commodianum* vocavit, Commodum *Herculem* & *Deum* appellans.

IX. Simulavit, se & in Africam iturum, ut sumtum itinerarium exigeret: & exegit, eumque in convivia & aleam convertit. Motilenum, præfectum prætorio, per ficos veneno interemit. Accepit flatus in Herculis habitu; eique immolatum est ut Deo. Multos præterea paraverat interimere: quod per parvulum quendam proditum est, qui tabulam e cubiculo ejecit, in qua occidendorum erant nomina scripta. Sacra Ifidis coluit, ut & caput raderet, & Anubin portaret. Bellonæ servientes vere exsecrare brachium præcepit, studio crudelitatis. Isiacos vere pineis usque ad perniciem pectus tundere cogebar. Cum Anubin portaret, capita Isiacorum graviter obtundebar ore simulacri. Clava non solum leones in veste muliebri & pelle leonina, sed etiam multos homines afflixit. Debiles pedibus, & eos, qui ambulare non possent, in gigantum modum formavit, ita ut a genibus de pannis & linteis quasi dracones dirigerentur; eosdemque sagittis confecit. Sacra Mithriaca homicidio vero polluit, cum illic aliquid ad speciem timoris vel dici vel fingi solet.

X. Etiam puer & gulosus & impudicus fuit. Adolescens omne genus infamavit hominum, quod erat secum, & ab omnibus est infamatus. irridentes se feris objiciebat. eum etiam, qui Tranquilli librum,

vitam Caligulæ continentem, legerat, feris obijci iussit, quia eundem diem natalis habuerat, quem & Caligula. Si quis sane se mori velle prædixisset, hunc invitum præcipitari jubebat. In jocis quoque perniciosus. nam eum, quem vidisset albescentes inter nigros capillos quasi vermiculos habere, sturno appposito, qui se vermes sectari crederet, capite suppuratum reddebat. Obtunsi oneris pinguem hominem medio ventre diffecuit, ut ejus intestina subito funderentur. *Monopedios & Luscinius*, eos, quibus aut singulos tulisset oculos, aut singulos pedes fregisset, appellabat. Multos præterea passim exstinxit: alios, quia barbarico habitu occurrerant; alios, quia nobiles & speciosi erant. Habuit in deliciis homines appellatos nominibus verendorum utriusque sexus; quos libentius suis oculis applicabat. Habuit & hominem pene prominente ultra modum animalium, quem *Onon* appellabat, sibi carissimum: quem & ditavit, & sacerdotio Herculis rustici præposuit.

XL. Dicitur sæpe pretiosissimis cibis humana sterora miscuisse, nec abstinuisse gustu; aliis, ut putabat, irrisit. Duos gibbos retortos in lance argentea sibi sinapi perfusos exhibuit, eosdemque statim promovit ac ditavit. Præfectum prætorio suum Julianum, togatum, præsentem officio suo, in piscinam detrussit. quem saltare etiam nudum ante concubinas suas iussit, quatientem cymbala, deformato vultu. Genera leguminum coctorum ad convivium propter luxuriæ continuationem, raro vocavit. Lavabat per diem septies atque octies, & in

ipsis balneis edebat. Deorum templa polluit stupris & humano sanguine. Imitatus est & medicum, ut sanguinem hominibus emitteret scalpris feralibus. Menses quoque in honorem ejus pro Augusto *Commodum*, pro Septembri *Herculem*, pro Octobri *Invidum*, pro Novembri *Exsuperatorium*, pro Decembri *Amazonium*, ex signo ipsius adulatores vocabant. *Amazonius* autem vocatus est ex amore concubinæ suæ Marciae, quam pictam in Amazonene diligebat: propter quam & ipse Amazonico habitu in arenam Romanam procedere voluit. Gladiatorum etiam certamen subiit, & nomina gladiatorum recepit eo gaudio, quasi acciperet triumphalia. Ludum semper ingressus est: &, quoties ingrederetur, publicis monumentis indi jussit. Pugnasse autem dicitur septingenties tricies quinquies. Nominatus inter Cæsares quarto Iduum Octobrium, (quas Herculeas postea nominavit) Prudente & Pollione Consulibus. appellatus *Germanicus*, Idibus Herculeis, Maximo & Orphito Consulibus.

XII. Assumptus est in omnia collegia sacerdotalia sacerdos, decimotertio Kalendas Invidas, Pisone & Juliano Consulibus. profectus in Germaniam decimoquarto Kalendas Ælias, ut postea nominavit, iisdem Consulibus. togam virilem accepit, cum patre appellatus Imperator, quinto Kalendas Exsuperatorias, Pollione iterum & Apro Consulibus. triumphavit decimo Kalendas Amazonias, iisdem Consulibus. iterum profectus tertio Nonas Commodias, Orphito & Rufo Consulibus. datus in perpetuum ab exercitu & senatu in domo Palatina Com-

modiana conservandus, undécimo Kalendas Romanas, Præsente iterum Consule. tertio meditans de professione, a Senatu & populo suo retentus est. vota pro eo facta sunt Nonis Piis, Fusciano iterum Consule. Inter hæc refertur in literas, pugnasse illum sub patre trecenties sexagies quinquies. Item postea tantum palmarum gladiatoriarum confecisse, vel victis retiariis, vel occisis, ut mille contingeret. Ferarum autem diversarum manu sua occidit multa millia, ita ut elephantos occideret. Et hæc fecit sæpe, spectante populo Romano.

XIII. Fuit autem validus ad hæc, alias debilis & infirmus; vitio etiam inter inguina prominenti, ita ut ejus tumorem per sericas vestes populus Romanus agnosceret. Versus in eum multi scripti sunt, de quibus etiam in opere suo Marius Maximus gloriatur. Virium ad conficiendas feras tantarum fuit, ut elephantum conto transfigeret, & orygis cornu hasta transmiserit, & singulis ictibus multa millia ferarum ingentium conficeret. Impudentiæ tantæ fuit, ut cum muliebri veste in amphitheatro vel theatro sedens, publice sæpissime biberit. Victi sunt sub eo tamen, cum ille sic viveret, per legatos, Mauri; victi Daci; Pannoniæ quoque compositæ; in Britannia, in Germania & in Dacia imperium ejus recusantibus provincialibus. quæ omnia ista per duces sedata sunt. Ipse Commodus in subscribendo tardus & negligens, ita ut libellis una forma multis subscriberet: in epistolis autem plurimis *Vale* tantum scriberet. agebanturque omnia per alios, qui etiam condempnationes in sinum vertisse dicuntur.

XIV. Per hanc autem negligentiam, cum & annonam vastarent ii, qui tunc rempublicam gerebant, etiam inopia ingens Romæ exorta est, cum fruges non deessent: & eos quidem, qui omnia vastabant, postea Commodus occidit atque proscripsit. Ipse vero seculum aureum, Commodianum nomine assimulans, vilitatem proposuit; ex qua majorem penuriam fecit. Multi sub eo & alienam poenam, & suam salutem pecunia redemerunt. Vendidit etiam suppliciorum diversitates, & sepulturas, & imminutiones malorum, & alios pro aliis occidit. Vendidit etiam provincias & administrationes; cum hi, per quos venderet, partem acciperent, partem vero Commodus. Vendidit nonnullis & inimicorum suorum cædes. Vendiderunt sub eo etiam eventus litium liberti. Præfectos Paternum & Perennem non diu tulit; ita tamen, ut etiam de his præfectis, quos ipse fecerat, triennium nullus impleret: quorum plurimos interfecit vel veneno, vel gladio. Et præfectos Urbi eadem facilitate mutavit.

XV. Cubicularios suos libenter occidit, cum omnia ex nutu eorum semper fecisset. Electus cubicularius, cum videret, eum tam facile cubicularios occidere, prævenit eum, & factioni mortis ejus interfuit. Spectator gladiatoria sumit arma, panno purpureo nudos humeros advelans. Habuit præterea morem, ut omnia, quæ turpiter, quæ impure, quæ crudeliter, quæ gladiatorie, quæ leonice faceret, actis Urbis indi juberet, ut Marci Maximi scripta testantur. *Commodianum* etiam po-

Scriptt. H. A.

H

pulum Romanum dixit: quo sæpissime præfente gladiator pugnavit. Sane, cum illi sæpe pugnanti, ut Deo, populus favisset, irrisum se credens, populum Romanum a militibus classiariis, qui vela ducebant, in amphitheatro interimi præceperat. Urbem incendi jusserat, utpote coloniam suam. quod factum esset, nisi Lætus Præfectus prætorio Commodum deterruisset. Appellatus est fane, inter cetera triumphalia nomina etiam sexcenties vices Paulus primus secutorum.

XVI. Prodigia ejus imperio & publice & privatim hæc facta sunt. Crinita stella apparuit: vestigia Deorum in foro visa sunt exeuntia: & ante bellum desertorum, cælum arsit: & repentina caligo ac tenebra in Circo Kalendis Januariis oborta: & ante lucem fuerant etiam incendiariæ aves, ac diræ. De Palatio ipse ad Cælium montem in Vestilianas ædes migravit, negans, se in Palatio posse dormire. Janus geminus sua sponte apertus est, & Anubis simulacrum marmoreum moveri visum est. Herculis signum æneum sudavit in Minucia per plures dies. bubo etiam supra cubiculum ejus deprehensa est, tam Romæ, quam Lanuvii. Ipse autem prodigium non leve sibi fecit. nam cum in gladiatoris occisi vulnus manum misisset, ad caput sibi deterfit: & contra consuetudinem penulatos jussit spectatores, non togatos, ad munus convenire, quod funebribus solebat; ipse in pullis vestimentis præfident. Galea ejus bis per portam Libitinensem elata est. Congiarium dedit populo, singulis denarios septingenos vicanos quinos. Circa alios omnes par-

cissimus fuit, quod luxuriæ sumtibus ærarium minuerat. Circenses multos addidit ex libidine potius, quam religione, & ut dominos factionum ditaret.

XVII. His incitati, licet nimis fero, Quintus Æmilius Lætus præfectus, & Marcia, concubina ejus, inierunt conjurationem ad occidendum eum. Primum ei venenum dederunt: quod cum minus operaretur, per athletam, cum quo exerceri solebat, eum strangulaverunt. Fuit autem forma corporis iusta, vultu insubido, ut ebriosi solent, & sermone incondito, capillo semper fucato, & auri ramentis illuminato, adurens comam & barbam timore tonsoris. Corpus ejus ut unco traheretur, atque in Tiberim mitteretur, Senatus & populus postulavit: sed postea jussu Pertinacis in monumentum Hadriani translatum est. Opera ejus, præter lavacrum, quod Cleander nomine ipsius fecerat, nulla exstant. sed nomen ejus, alienis operibus incisum, Senatus erasit. nec patris autem sui opera perfecit. Classem Africanam instituit, quæ subsidio esset, si forte Alexandrina frumenta cessassent. Ridicule etiam Carthaginem, *Alexandrinam Commodianam togatam* appellavit: cum classem quoque Africanam, *Commodianam Herculeam* appellasset. Ornamenta sane quædam colosso addidit: quæ postea cuncta sublata sunt. Colossi autem caput demisit, quod Neronis esset, ac suum imposuit: & titulum more solito subscripsit, ita ut illum gladiatorium effeminatum non prætermittet. Hunc tamen Severus Imperator gravis, & vir nominis sui, odio, (ut videtur) Senatus, inter Deos retulit,

flamine addito, quem ipse vivus sibi paraverat, Herculeo Commodiano. Sorores tres superstites reliquit. Ut natalis ejus celebraretur, Severus instituit.

XVIII. Acclamationes Senatus post mortem Commodi graves fuerunt. Ut autem sciretur, quod judicium Senatus de Commodio fuerit, ipsas acclamationes de Mario Maximo indidi, & sententiam Senatusconsulti: *Hosti patriæ honores detrahantur: parricida honores detrahantur: parricida trahatur. hostis patriæ, parricida, gladiator, in spoliario tanietur. hostis Deorum, carnifex Senatus, hostis Deorum, parricida Senatus. hostis Deorum, hostis Senatus. gladiatorem in spoliario. qui Senatum occidit, in spoliario ponatur: qui Senatum occidit, unco trahatur: qui innocentes occidit, unco trahatur: hostis, parricida, vere severe. qui sanguini suo non pepercit, unco trahatur. qui te occisurus fuit, unco trahatur. Nobiscum timuisti, nobiscum periclitatus es. Ut salvi simus, Juppiter optime maxime, serva nobis Pertinacem. Fidei prætorianorum feliciter: prætoriis cohortibus feliciter: exercitibus Romanis feliciter: pietati Senatus feliciter. Parricida trahatur. Rogamus, Auguste, parricida trahatur. Hoc rogamus, parricida trahatur. Exaudi Cæsar. Delatores ad leonem, exaudi Cæsar. Delatores ad leonem, exaudi Cæsar. Speratum ad leonem. Victoriæ populi Romani feliciter: fidei militum feliciter: fidei prætorianorum feliciter: cohortibus prætoriis feliciter. Hostis statuas undique, parricida statuas undique, gladiatoris statuas undique, gladiatoris. & parricida statua detrahantur. necator civium trahatur: parricida*

civium trahatur. gladiatoris statua detrahantur. Te salvo, salvi & securi sumus, vere, vere: modo vere, modo digne, modo vere, modo libere. Nunc securi sumus: delatoribus metum. Ut securi simus, delatoribus metum: salvi simus, delatores de Senatu. delatoribus fustem, te salvo. delatores ad leonem, te imperante. delatoribus fustem.

XIX. *Parricidæ gladiatoris memoria aboleatur, parricidæ gladiatoris statua detrahantur. Impuri gladiatoris memoria aboleatur: gladiatorem in spoliario. Exaudi Cæsar. carnifex unco trahatur. carnifex Senatus more majorum unco trahatur. Sævior Domitiano, impurius Nerone, sicut fecit, sic patiatur. Memoria innocentium serventur. honores innocentium restituas, rogamus. Parricidæ cadaver unco trahatur: gladiatoris cadaver unco trahatur: gladiatoris cadaver in spoliario ponatur. Perroga, perroga: omnes censemus unco trahendum. Qui omnes occidit, unco trahatur. qui omnem ætatem occidit, unco trahatur. qui utrumque sexum occidit, unco trahatur. qui sanguini suo non pepercit, unco trahatur. qui templa spoliavit, unco trahatur. qui testamenta delevis, unco trahatur. qui vivos spoliavit, unco trahatur. Servis servivimus. Qui pretia vitæ excepit, unco trahatur. qui pretia vitæ exegit, & fidem non servavit, unco trahatur. qui Senatum vendidit, unco trahatur. qui filiis abstulit hereditatem, unco trahatur. Indices de Senatu, delatores de Senatu, servorum subornatores de Senatu. & tu nobiscum timuisti: omnia scis; bonos & malos nosti: omnia scis; omnia emenda: pro te timuimus. O nos felices, te viro imperante! De parricida refer, refer, perroga: præsen-*

tiam tuam rogamus. Innocentes sepulti non sunt. Parricida cadaver trahatur. Parricida sepultos eruit: parricida cadaver trahatur.

XX. Et cum jussu Pertinacis Livius Laurensis, procurator patrimonii, Fabio Chiloni consuli designato dedisset, per noctem Commodi cadaver sepultum est. Senatus acclamavit: *Quo auctore sepelierunt? Parricida sepultus eruatur, trahatur.* Cingius Severus dixit: *Injuste sepultus est. Quia Pontifex dico, hoc collegium Pontificum dicis. Quoniam lata percensui, nunc convertar ad necessaria, censeoque, quod is, qui non nisi ad perniciem civium, & ad dedecus suum vixit, ob honorem suum decerni coegit, abolendas statuas: quæ undique sunt abolendæ, nomenque ex omnibus privatis publicisque monumentis eradendum: mensesque his nominibus nuncupandos, quibus nuncupabantur, cum primum illud malum in rempublicam incubuit.*

JULII CAPITOLINI

PERTINAX IMPERATOR.

L. PUBLIO Helvio Pertinaci pater libertinus Helvius Successus fuit: qui filio nomen ex continuatione lignariæ negotiationis, quod *pertinaciter* eam rem gereret, imposuisse fertur. Natus est Pertinax in Apennino in villa Martis. Equus pullus ea hora, qua natus est, in tegulas ascendit, atque ibi breviter commoratus, decidens exspiravit. Hac re pater motus ad Chaldæum venit. qui cum illi futura ingentia prædixisset, *stipem se perdidisse* dixit. Puer literis elementariis & calculo imbutus, datus etiam Græco grammatico, atque inde Sulpicio Apollinari; post quem idem Pertinax grammaticen professus est. Sed cum in ea minus quæstus proficeret; per Lollianum Avitum, Consularem virum, patris patronum, ducendi ordinis dignitatem petiit. Dein præfectus cohortis in Syria profectus, Tito Aurelio imperatore, a præside Syriæ, quod sine

diplomatibus cursum usurpaverat, pedibus ab Antiochia ad legationem suam iter facere coactus est.

II. Bello Parthico industria sua promeritus, in Britanniam translatus est, ac retentus. Post in Mœsia rexit alam: deinde alimentis dividendis in via Æmilia procuravit. Inde classem Germanicam rexit. Mater eum usque in Germaniam profecuta est, ibique obiit: cujus etiam sepulcrum stare nunc dicitur. Inde ad ducenum sestertium stipendium translatus in Daciam, suspectusque Marco quorundam relatu, a partibus remotus est: & postea per Claudium Pompejanum, generum Marci, quasi adjutor ei futurus, vexillis regendis adscitus est. in quo munere approbatus, lectus est in Senatum. Postea iterum re bene gesta, prodita est factio, quæ illi concinnata fuerat: Marcusque Imperator, ut compensaret injuriam, prætorium eum fecit, & primæ legioni regendæ imposuit: statimque Rhætias & Noricum ab hostibus vindicavit. ex quo eminente industria, studio Marci Imperatoris Consul est designatus. Exstat oratio apud Marium Maximum, laudes ejus continens, & omnia, vel quæ fecit, vel quæ perpeffus est. & præter illam orationem, quam longum fuerit connectere, sæpissime Pertinax a Marco & in concione militari, & in Senatu laudatus est: doluitque palam Marcus, quod, cum Senator esset, præfectus prætorii fieri a se non posset. Cassiano motu composito, e Syria ad Danubii tutelam profectus est; atque inde Mœsiæ utriusque, mox Daciæ regimen accepit. Bene gestis his provinciis, Syriam meruit.

III. Integre se usque ad Syriæ regimen Pertinax tenuit: post excessum vero Marci, pecuniæ studebat: quare etiam dictis popularibus est laceffitus. Curiam Romanam post quatuor provincias consulares, quia consulatum absens gesserat, jam dives ingressus est; cum eam Senator antea non vidisset. Jussus est præterea statim a Perenne in Liguriam secedere in villam paternam: nam pater ejus tabernam coctiliciam in Liguria exercuerat. sed posteaquam in Liguriam venit, multis agris coemtis, tabernam paternam, manente forma priorē, infinitis ædificiis circumdedit: fuitque illic per triennium, & mercatus est per suos servos. Occiso sane Perenni, Commodus Pertinaci satisfecit, eumque petiit per literas, ut ad Britanniam proficisceretur. profectusque, milites ab omni seditione deterruit: cum illi quemcunque imperatorem vellent habere, & ipsum specialiter Pertinacem. Tunc Pertinax malevolentia notam subiit, quod dictus est insimulasse apud Commodum affectati imperii Antistium Burrum, & Arrium Antoninum. Et seditiones quidem contra ipse compescuit in Britannia: verum ingens periculum adiit, seditione legionis pæne occisus, certe inter occisos relictus. quam quidem rem idem Pertinax acerrime vindicavit. Denique postea veniam legationis petiit, dicens, sibi ob defensam disciplinam infestas esse legiones.

IV. Accepto successore, alimentorum ei cura mandata est: deinde Proconsul Africae factus est. In quo proconsulatu multas seditiones perpeffus dicitur, vaticinationibus earum, quæ de templo Cœ-

lestis emergunt. Post hoc præfectus Urbi factus: in qua præfectura post Fuscianum, hominem severum, Pertinax mitissimus & humanissimus fuit: & ipsi Commodi plurimum placuit, quia ille esset iterum, cum Pertinax factus est. Tunc Pertinax interficiendi Commodi conscientiam delatam sibi ab aliis non fugit. Commodus autem interemto, Lætus præfectus prætorii, & Electus cubicularius, ad eum venerunt, ut eum confirmarent; atque in castra duxerunt. Illic Pertinax milites allocutus est: donativum promisit: ingeri sibi imperium a Læto & Electo dixit. Fictum est autem, quod morbo esset Commodus extinctus, quia & milites, ne tentarentur, pertimescebant. Denique a paucis primum est Pertinax Imperator appellatus. Factus est autem sexagenario major Imperator, pridie Kalendas Januarias. De castris nocte cum ad Senatum venisset, & cellam curiæ jussisset aperiri, neque inveniretur ædituus; in templo Concordiæ refedit. Et cum ad eum Claudius Pompejanus, gener Marci, venisset, casumque Commodi lacrimasset, eum hortatus est Pertinax; ut imperium sumeret: sed ille recusavit, quia jam Imperatorem Pertinacem videbat. Statim ergo omnis magistratus cum Consule ad curiam venerunt, ingressumque Pertinacem, nocte Imperatorem appellaverunt.

V. Ipse autem Pertinax post laudes suas, a Consulibus dictas, & post vituperationem Commodi, acclamationibus Senatus offensam, egit gratias Senatui, & præcipue Læto, Præfecto prætorii, quo auctore & Commodus interemptus, & ipse Impera-

tor est factus. Sed cum Læto gratias egisset Pertinax, Falco Consul dixit: *Qualis Imperator es futurus, hinc intelligimus, quod Latum & Marciam, ministros scelerum Commodi, post te videmus. cui Pertinax respondit: Juvenis es Consul, nec parendi scis necessitatem. Paruerunt inviti Commodus: sed ubi habuerunt facultatem, quid semper voluerint, ostenderunt.* Eadem die, qua Augustus est appellatus, & Flavia Titiana, uxor ejus, Augusta est appellata, his horis, quibus ille in Capitolium vota solvebat. primus sane omnium ea die, qua Augustus est appellatus, etiam Patris patriæ nomen recepit: nec non simul etiam imperium proconsulare, nec non jus quartæ relationis: quod ominis loco fuit Pertinaci. Ad palatium ergo Pertinax profectus, (quod tunc vacuum erat, quia Commodus in Vestilianis occisus est) petenti signum prima die tribuno dedit, *Militemus*, exprobrans utique segnitiam temporum superiorum: quod quidem etiam ante in omnibus ducatibus dederat.

VI. Exprobrationem autem istam milites non tulerunt, statimque de Imperatore mutando cogitarunt. Ea die etiam ad convivium magistratus & proceres Senatus rogavit: quam consuetudinem Commodus prætermiserat. Sane, cum postero Kalendarum die statuæ Commodi dejicerentur, gemuerunt milites; simul, quia iterum signum idem dederat Imperator. Timebatur autem militia sub sene Imperatore. Denique tertium Nonarum diem votis ipsis milites Triarium Maternum Lascivium, senatorem nobilem, ducere in castra voluerunt, ut eum re-

bus Romanis imponerent. sed ille nudus fugit, atque ad Pertinacem in Palatium venit, & post ex Urbe discessit. Timore sane Pertinax coactus, omnia, quæ Commodus militibus & veteranis dederat, confirmavit. Suscipere se etiam imperium a Senatu dixit, quod jam sponte inierat. Quæstionem majestatis penitus tulit, cum jurejurando. Revocavit etiam eos, qui deportati fuerant crimine majestatis; eorum memoria restituta, qui occisi fuerant. Filium ejus Senatus Cæsarem appellavit. Sed Pertinax nec uxoris Augustæ appellationem recepit, & de filio dixit, *Cum meruerit*. Et cum Commodus allektionibus innumeris prætorios miscuisset, senatusconsultum Pertinax fecit, jussitque eos, qui *Præturas non gessissent, sed allektionem acceperissent, post eos esse, qui vere Prætores fuissent*. Sed hinc quoque grande odium sibi multorum commovit.

VII. Census retractari jussit. delatores vinctos graviter puniri jussit: & tamen mollius, quam priores Imperatores; unicuique dignitati, si delationis crimen incurreret, poenam statuens. legem sane tulit, ut testamenta priora non prius essent irrita, quam alia perfecta essent; neve ob hoc fiscus aliquando succederet. Ipseque professus est, nullius se adituum hereditatem, quæ aut adulatione alicujus delata esset, aut lite perplexa, ut legitimi heredes, & necessarii privarentur: addiditque senatusconsulto hæc verba, *Sanctius est, Patres Conscripti, inopem rempublicam obtinere, quam ad divitiarum cumulum per discrimina atque dedecoris vestigia pervenire*. Donativa & congiaria, quæ Commodus promise-

rat, solvit. Annonæ consultissime providit. Et cum tantam penuriam ærarii haberet, ut præter decies sestertium non se invenisse fateretur, coactus est ea exigere, quæ Commodus indixerat; contra, quam professus fuerat. Denique aggressus eum Lollianus Gentianus Consularis, quod contra promissum faceret, necessitatis rationem accepit. Auctionem rerum Commodi habuit, ita ut & pueros & concubinas vendi juberet; exceptis iis, qui per vim Palatio videbantur inserti. & de his, quos vendi jussit, multi postea reducti ad ministerium, oblectaverunt senem: qui per alios Principes usque ad senatoriam dignitatem pervenerunt. Scurras, turpissimorum nominum dedecora perferentes, proscripsit ac vendidit. cujus nundinationis pecuniam, quæ ingens fuit, militibus donativo dedit.

VIII. A libertis etiam ea exegit, quibus Commodus vendente ditati fuerant. Auctione sane rerum Commodi in his insignior fuit: vestis subtegmine serico aureis filiis insignior, per tunicas pænulasque lacernas & chirothotas Dalmatarum & cirratas militares, purpureasque chlamydes Græcanicas atque castrenses, & cuculli Bardaici, & toga armaque gladiatoria gemmis auroque composita, & machæras Herculaneas, & torques gladiatorias, vasaque eluto auro, ebore, argento, citroque composita, atque etiam phallovitroboli ex materie eadem, & vasa Samnitica, calfactandæ refinæ ac pici divellendis hominibus ac lævigandis: nec non vehicula arte fabricæ nova, perplexis diversisque rotarum orbibus & exquisitis sedilibus, nunc ad fo-

lem declinandum, nunc ad spiritus opportunitatem per vertiginem: & alia iter metientia, horasque monstrantia; & cetera vitiis ejus convenientia. Reddidit præterea dominis eos, qui se ex privatis domibus in aulam contulerant. Convivium imperatorium ex immenso ad certum revocavit modum. sumtus etiam omnes Commodi reddidit. Exemplo autem Imperatoris, cum ille parcius se ageret, ex omnium continentia vilitas nata est. nam imperatorium sumtum, pulsus non necessariis, ad soliti dimidium detraxit.

IX. Præmia militantibus posuit. *Æs* alienum, quod primo imperii tempore contraxerat, solvit: ærarium in suum statum restituit. Ad opera publica certum sumtum constituit. Reformandis suis pecuniam contulit: stipendia plurimis retro debita exsolvit. Obeundis postremo cunctis muneribus fiscum parem fecit. Alimentaria etiam compendia, quæ novem annorum ex instituto Trajani debebantur, obdurata verecundia sustulit. Avaritiæ suspicione privatus non caruit, cum apud vada Sabatia oppressis fœnore possessoribus, latius suos teneret fines. Denique ex versu Luciliano *agrarius mergus* est appellatus. Multi autem eum etiam in provinciis, quas Consularis gessit, sordide se egisse in literas retulere. nam vacationes & legationes militares dicitur vendidisse. Denique cum parentum minimum esset patrimonium, & nulla hereditas obvenisset, subito dives est factus. Omnibus sane possessiones suas reddidit, quibus Commodus ademerat; sed non sine pretio. Senatui legitimo

semper interfuit, ac semper aliquid retulit. Civilem se salutantibus & interpellantibus semper exhibuit. Eos, qui calumniis appetiti per servos fuerant, damnatis servis delatoribus, liberavit; in crucem sublati talibus servis: aliquos etiam mortuos vindicavit.

X. Infidias paravit ei Falco, volens imperare: de quo conquestus est in Senatu. quod quidem Senatus credidit. Dum sibi quidam servus, quasi Fabiæ esset filius, ex Cejonii Commodi familia, Palatinam domum ridicule vindicasset; cognitus, iussus est flagellis cæsus domino restitui. In cujus vindicta hi, qui oderant Pertinacem, occasionem seditionis invenisse dicuntur. Falconi tamen pepercit, & a Senatu impunitatem ejus petiit. Denique Falco in rebus suis securus vixit, & herede filio periit: quamvis multi Falconem nescisse dixerint, imperium sibi parari. alii etiam a servis, qui rationes interverterant, falsis testimoniis appetitum eum esse dixerunt. Sed Pertinaci factio præparata est per Lætum Præfectum prætorii, & eos, quos Pertinacis sanctimonia offenderat. Lætum enim poenituerat, quod Imperatorem fecerat Pertinacem, idcirco, quia eum velut stultum intimatorem nonnullarum rerum reprehendebat. Grave præterea militibus visum, quod in causa Falconis multos milites ad unius servi testimonium occidi præceperat.

XL. Trecenti igitur de castris armati ad imperatorias ædes cuneo facto milites venere. Eadem tamen die immolante Pertinace, negatur in hostia cor repertum: & cum id vellet procurare, caput

extorum non deprehendit. Et tunc quidem omnes milites in castris manebant. Qui cum de castris ad obsequium Principis convenissent, & Pertinax eo die processionem, quam ad Athenæum paraverat, ut audiret poetam, ob sacrificii præfagium distulisset; hi, qui ad obsequium venerant, redire in castra cœperunt. Sed subito globus ille in Palatium pervenit: neque aut arceri potuit, aut Imperatori nuntiari. Enimvero tantum odium in Pertinacem omnium aulicorum fuit, ut ad facinus milites hortarentur. Supervenerunt autem Pertinaci, cum ille aulicum famulitium ordinaret; ingressique porticus Palatii usque ad locum, qui appellatur *Sicilia*, & *Jovis cœnatio*. Hoc cognito, Pertinax Lætum, Præfectum prætorii, ad eos misit. Sed ille declinatis militibus per porticus egressus, adoperto capite, domum se contulit. Verum cum ad interiora prorumperent, Pertinax ad eos processit, eosque longa & gravi oratione placavit. Sed cum Tausius quidam, unus e Turgris, in iram & timorem milites loquendo adduxisset, hastam in pectus Pertinacis objecit. Tunc ille precatus Jovem Ultorem, toga caput operuit, atque a ceteris confossus est. & Electus quidem, confossis duobus, cum eodem periit: reliqui autem cubicularii palatini (nam suos statim, ut Imperator factus est, filiis emancipatos dederat) diffugerunt. Multū sane dicunt, etiam cubiculum milites irrupisse, atque illic circa lectum fugientem Pertinacem occidisse.

XII. Fuit autem senex venerabilis, immissa barba, reflexo capillo, habitudine corporis pinguiore,

ventre prominulo, statura imperatoria, eloquentia mediocri, & magis blandus quam benignus, nec unquam creditus simplex. Et cum verbis esset affabilis, re erat illiberalis ac prope sordidus, ut dimidiatas lactucas & carduos in privata vita convivis apponeret: & nisi quod missum esset edulium, quotquot essent amici, novem libras carnis per tres missus ponebat, si autem plus aliquid missum esset, etiam in alium diem differebat, cum semper ad convivium multos vocaret. Imperator etiam, si sine convivis esset, eadem consuetudine coenitabat. Amicis si quando de prandio suo mittere voluit, misit offulas binas, aut omasi partem, aliquando lumbos gallinaceos. Favianum nunquam privato convivio comedit, aut alicui misit. Cum sine amicis coenaret, adhibebat uxorem suam & Valerianum; ut cum eodem, qui docuerat, fabulas literatas haberet. Sane nullum ex iis, quos Commodus rebus agendis imposuerat, mutavit, expectans Urbis natalem, quod eum diem rerum principium volebat esse: atque ideo etiam in balneis ei Commodiani ministri necem parasse dicuntur.

XIII. Imperium & omnia imperialia sic horruit, ut sibi semper ostenderet displicere. denique non alium se, quam fuerat, videri volebat. Fuit in curia honorificentissimus, ita ut Senatum faventem adoraret, & quasi Præfectus Urbi cum omnibus sermonem participaret. Voluit etiam imperium deponere, atque ad privaram vitam redire. Filios suos in Palatio nutrire noluit. Tam parcus autem & tam lucri cupidus fuit, ut apud vada Sabatia mercatu-

Scriptt. H. A.

I

ras exercuerit Imperator per homines suos, non aliter, quam privatus solebat. nec multum tamen amatus est. Siquidem omnes, qui libere fabulas conferebant, male Pertinacem loquebantur, *chrestologum* eum appellantes, qui bene loqueretur, & male faceret. Nam & cives sui, qui ad eum confluerant jam Imperatorem, & nihil de eo meruerant, sic eum appellabant. Munera quoque lucri libidine libenter accepit. Reliquit filium & filiam superstites, & uxorem, Flavii Sulpiciani filiam, quem Præfectum Urbi loco suo fecerat. Circa uxoris pudicitiam minus curiosus fuit, cum palam citharœdum illa diligeret: ipse præterea Cornificiæ infamissime dicitur adhæsisse. Libertos aulicos vehementissime compressit: unde grande quoque odium contraxit.

XIV. Signa interitus hæc fuerunt. Ipse ante tri-
dum, quam occideretur, in piscina sibi visus est
videre hominem cum gladio infestantem. Et ea die,
qua occisus est, negabant in oculis ejus pupillas
cum imaginibus, quas reddunt spectantibus, visas.
Et cum apud Lares sacrificaret, carbones vivacis-
simi extincti sunt, cum inflammari soleant: &, ut
supra dictum est, cor & caput in hostiis non est
reperitum. Stellæ etiam juxta solem per diem vi-
sæ sunt clarissimæ, ante diem quam obiret. Et ipse
omen de Juliano successore dedisse dicitur. nam
cum ei Didius Julianus fratris filium obtulisset, cui
despondebat filiam suam, adhortatus juvenem ad
patrui observationem, adjecit, *Observa collegam: &*
successorem meum: nam ante Julianus ei & in Con-

fulatu collega fuerat, & in Proconsulatu successerat. Milites eum & aulici odio habuerunt: populus mortem ejus indignissime tulit, quia videbat, omnia per eum antiqua posse restitui. Caput ejus conto fixum milites, qui eum occiderant, per Urbem in castra pertulerunt. Reliquiæ ejus, recuperato capite, in sepulcro avi uxoris locatæ sunt. & Julianus, successor illius, corpus ejus quanto potuit honore funeratus est, cum id in Palatio reperisset: qui nunquam ejus ullam mentionem vel apud populum, vel apud senatum publice fecit: sed cum ipse quoque a militibus desertus jam esset, per senatum & populum Pertinax in Deos relatus est.

XV. Sub Severo autem Imperatore cum Senatus ingens testimonium habuisset Pertinax, funus imaginarium ei & censorium ductum est; & ab ipso Severo funebri laudatione ornatus est. Ipse autem Severus amore boni Principis, & a Senatu *Pertinacis* nomen accepit. Filius Pertinacis patris flamen est factus. Marciani sodales, qui Divi Marci sacra curabant, *Helviani* sunt dicti propter Helvium Pertinacem. Circenses, & imperii natalis additi, (qui a Severo postea sublati sunt) & Genitali, qui manent. Natus autem Kalendis Augustis, Vero & Bibulo Consulibus. Interfectus autem est quinto Kalendas Aprilis, Falcone & Claro Consulibus. Vixit annis sexaginta, mensibus septem, diebus viginti sex. Imperavit mensibus duobus, diebus viginti quinque. Congiarium dedit populo denarios cen-

tenos. Prætorianis promisit duodena millia nummum; sed dedit sena. Quod exercitibus promissum est, datum non est, quia mors eum prævenit. Horuisse autem illum imperium, epistola docet, quæ vitæ illius a Mario Maximo apposita est: quam ego inferi ob nimiam longitudinem nolui.

ÆLII SPARTIANI
DIDIUS JULIANUS

A D

DIOCLETIANUM AUG.

I. **D**IDIO Juliano, qui post Pertinacem imperium adeptus est, proavus fuit Salvius Julianus, bis Consul, Præfectus Urbi, & jurisconsultus: quod magis eum nobilem fecit. mater, Clara Æmilia: pater, Petronius Didius Severus: fratres, Didius Proculus & Nummius Albinus: avunculus, Salvius Julianus: avus paternus, Insuber Mediolanensis; maternus, ex Adrumentina colonia. Educatus est apud Domitiam Lucillam, matrem Marci Imperatoris. Inter viginti viros electus est, suffragio matris Marci. Quæstor ante annum, quam legitima ætas sinebat, designatus est. Ædilitatem suffragio Marci consecutus est. Prætor ejusdem suffragio fuit. Post præturam legioni præfuit in Germania vicesimæ secundæ Primigeniæ. Inde Belgicam sancte ac diu rexit. Ibi Cauchis, Germaniæ populis, qui Albim

fluvium accolebant, erumpentibus restitit, tumultuariis auxiliis provincialium. ob quæ Consulatum meruit, testimonio Imperatoris. Cattos etiam debellavit. Inde Dalmatiam regendam accepit, eamque a confinibus hostibus vindicavit. Post Germaniam inferiorem rexit.

II. Post hoc curam alimentorum in Italia meruit. Tunc factus est reus per quendam Severum Clarissimum, militem, conjurationis cum Salvio contra Commodum: sed a Commodò, quia multos jam Senatores occiderat, & quidem nobiles ac potentes, in causis majestatis, ne tristius gravaretur, Didius liberatus est, accusatore damnato. Absolutus, iterum ad regendam provinciam missus est. Bithyniam deinde rexit: sed non ea fama, qua ceteras. Fuit Consul cum Pertinace, & in Proconsulatu Africæ eidem successit, & semper ab eo collega est & successor appellatus: maxime eo die, cum, filiam suam Julianus despondens affini suo, ad Pertinacem venisset, idque intimasset: dixitque debita reverentia, *quia collega, & successor meus est.* statim enim mors Pertinacis secuta est. Quo interfecto, cum Sulpicianus Imperator in castris appellari vellet, & Julianus cum genero ad Senatum venisset, quem indictum acceperat, cumque clausas valvas invenisset, atque illic duos tribunos reperisset, Publium Florianum & Vectium Aprum, coeperunt eum hortari tribuni, ut locum arriperet. quibus cum diceret, jam alium Imperatorem appellatum, refinentes eum ad prætoria castra duxerunt. Sed posteaquam in castra ventum est, cum,

Sulpiciano, Præfecto Urbi, focero Pertinacis, concionante, sibi que imperium vindicante, Julianum, e muro ingentia pollicentem, nullus admitteret; primum Julianus monuit prætorianos, *ne eum facerent Imperatorem, qui Pertinacem vindicaret*: deinde scripsit in tabulis, *se Commodi memoriam restitutum*: atque ita & admissus est, & Imperator appellatus, rogantibus prætorianis; *ne Sulpiciano aliquid noceret, quod Imperator esse voluisset.*

III. Tunc Julianus Flavium Genialem & Tullium Crispinum suffragiis prætorianorum Præfectos prætorii fecit, stipatusque est caterva imperatoria per Maurentium, qui se antea Sulpiciano conjunxerat. Sane, cum vicena quina millia militibus promississet, tricena dedit. Inde habita concione militari, vespera in Senatum venit, totumque se Senatui permisit, factoque senatusconsulto, Imperator est appellatus, & tribuniciam potestatem, jus proconsulare, in patricias familias relatus, emeruit. Uxor etiam Mallia Scantilla, & filia ejus Didia Clara, *Augustæ* sunt appellatæ. Inde se ad Palatium recepit, uxore ac filia illuc vocatis, trepidis & invitis eo transeuntibus, quasi jam imminens exitium præfagirent. Præfectum Urbi Cornelium Repentinum, generum suum, fecit in locum Sulpiciani. Erat interea in odio populi Didius Julianus, ob hoc, quod creditum fuerat, emendationem temporum Commodi Pertinacis auctoritate reparandam: habebaturque ita, quasi Juliani consilio esset interemtus. Et jam hi primum, qui Julianum odisse cœperant, disseminarunt, prima statim die Pertinacis cœna

despecta, luxuriosum parasse convivium, ostreis & altilibus & piscibus adornatum. quod falsum fuisse constat. nam Julianus tantæ parsimoniz fuisse perhibetur, ut per triduum porcellum, per triduum leporem divideret, si quis ei forte misisset: sæpe autem, nulla existente religione, oleribus leguminibusque contentus, sine carne cœnaverit. Deinde neque cœnavit, priusquam sepultus esset Pertinax, & tristissimus cibum ob ejus necem sumit, & primam noctem vigiliis continuavit, de tanta necessitate sollicitus.

IV. Ubi vero primum illuxit, Senatum & equestrem ordinem in Palatium venientem admisit, atque unumquemque, ut erat ætas, vel *patrem*, vel *filium*, vel *parentem* affatus blandissime est. Sed populus in Rostris atque ante curiam, ingentibus eum conviciis læcessebat, sperans, deponi ab eo posse imperium, quod milites dederant. Lapidationem quoque fecere: descendentem cum militibus & Senatu in curiam diras imprecati sunt: rem divinam facienti, ne litaret, optarunt. Lapides etiam in eum jecerunt, cum Julianus manu eos semper placare cuperet. Ingressus autem curiam, placide & prudenter verba fecit. Egit gratias, quod esset adscitus, quod & ipse, & uxor, & filia ejus Augustorum nomen acceperunt. Patris patriæ quoque nomen recepit: argenteam statuam respuit. E Senatu in Capitolium pergenti populus obstitit: sed ferro, & vulneribus, & pollicitationibus aureorum, quos digitis ostendebat ipse Julianus, ut fidem faceret, submotus atque depulsus est, inde ad Circense

ſpectaculum itum eſt. Sed occupatis indifferenter omnium ſubſelliis, populus geminavit convicia in Julianum: Peſcennium Nigrum, qui jam imperare dicebatur, ad Urbis præſidium vocavit. Hæc omnia Julianus placide tulit, totoque imperii ſui tempore mitiſſimus fuit: populus autem in milites vehementiſſime invehebatur, qui ob pecuniam Pertinacem occidiſſent. Multa igitur, quæ Commodus ſtatu- rat, Pertinax tulerat, ad conciliandum favorem po- puli reſtituit. De ipſo Pertinace neque male, ne- que bene quidquam egit: quod graviffimum pluri- mis viſum eſt. conſtitit, propter metum militum, de honore Pertinacis tacitum eſſe.

V. Et Julianus quidem neque Britannicos exer- citus, neque Illyricos timebat: Nigrum vero miſſo primipilario occidi præceperat, timens præcipue Syriacos exercitus. Ergo Peſcennius Niger in Syria, Septimius Severus in Illyrico cum exercitibus, qui- bus præſidebant, a Juliano deſcivere. Sed cum ei nuntiatum eſſet, Severum deſciviſſe, quem ſuſpe- ctum non habuerat, perturbatus ad Senatum ve- nit, imperavitque, ut hoſtis Severus renunciaretur: militibus etiam, qui Severum ſecuti fuerant, dies præſtitutus, ultra quem ſi cum Severo fuiſſent, ho- norum numero haberentur. Miſſi ſunt præterea le- gati Conſulares a Senatu ad milites, qui ſuaderent, ut Severus repudiaretur, & is eſſet Imperator, quem Senatus elegerat. Inter ceteros legatus eſt Ve- ſpronius Candidus, vêtus Conſularis, olim militi- bus inviſus, ob durum & fordidum imperium. Miſ- ſus eſt ſucceſſor Severo Valerius Catulinus; quaſi

posset ei succedi, qui militem jam sibi tenebat. Missus præterea Aquilius centurio, notus cædibus senatoriis, qui Severum occideret. Ipse autem Julianus prætorianos in campum deduci jubet, muniri turres: sed milites desides, & urbana luxuria dissolutos, invitissimos ad exercitium militare produxit, ita ut vicarios operis, quod unicuique præscribebatur, mercede conducerent.

VI. Et Severus quidem ad Urbem infesto agmine veniebat: sed Didius Julianus nihil cum exercitu prætoriano proficiebat, quem quotidie populus & magis oderat, & ridebat. Sed Julianus, sperans Lætum fautorem Severi, cum per eum Commodi manus evasisset, ingratus tanto beneficio, jussit eum occidi. jussit etiam Marciam interfici. Sed dum hæc agit Julianus, Severus classem Ravennatem occupat: legati Senatus, qui Juliano promiserant operam suam, ad Severum transierunt. Tullius Crispinus, Præfectus prætorio, contra Severum missus, ut classem produceret, repulsus Romam rediit. Hæc cum Julianus videret, Senatum rogavit, ut virgines Vestales & ceteri sacerdotes cum Senatu obviam exercitui Severi prodirent, & prætentis infulis rogarent; inane contra barbaros milites præsidium parans. Hæc tamen agenti Juliano Faustus Quintillius Consularis augur contradixit, asserens, non debere imperare eum, qui armis adversario non posset resistere. cui multi Senatores consenserunt. Quare iratus Didius, milites e castris petiit, qui Senatum ad obsequium cogerent, aut obtruncarent. Sed id consilium displicuit. neque

enim decebat, ut, cum Senatus hostem Severum Juliani causa judicasset, eundem Julianum pateret-
tur infestum. Quare meliore consilio ad Senatum
venit, petiitque, ut fieret senatusconsultum de par-
ticipatione imperii. quod statim factum est.

VII. Tunc omen, quod sibi Julianus, cum im-
perium acciperet, fecerat, omnibus venit in men-
tem. nam cum Consul designatus de eo sententiam
dicens, ita pronuntiasset, *Didium Julianum Impe-
ratorem appellandum esse censeo*; Julianus suggestit,
Adde & Severum, quod cognomentum avi & pro-
avi sibi Julianus adsciverat. Sunt tamen, qui di-
cant, nullum fuisse Juliani consilium de obtruncan-
do Senatu, cum tanta in eum Senatus contulisset.
Post senatusconsultum statim Didius Julianus unum
ex præfectis, Tullium Crispinum, misit. ipse au-
tem tertium fecit præfectum, Veturium Macrinum;
ad quem Severus literas miserat, ut esset præfe-
ctus. Sed pacem simulatam, tentatamque cædem Se-
veri Tullio Crispino, Præfecto prætorii, & popu-
lus locutus est, & Severus suspicatus. Denique ho-
stem se Juliano Severus esse maluit, quam partici-
pem, consensu militum. Severus autem statim & ad
plurimos Romam scripsit, & occulto misit edicta,
quæ proposita sunt. Fuit præterea in Juliano hæc
amentia, ut per magos pleraque faceret, quibus
putaret vel odium populi deliniri, vel militum ar-
ma compesci. nam & quasdam non convenientes
Romanis sacris hostias immolaverunt, & carmina
profana incantaverunt, & ea, quæ ad speculum
dicunt fieri, in quo pueri præligatis oculis incan-

tato vertice respicere dicuntur, Julianus fecit. tuncque puer vidisse dicitur & adventum Severi, & Juliani decessionem.

VIII. Et Crispinus quidem, cum occurrisset præcursoribus Severi, Julio Læto auctore, a Severo interemtus est. Dejecta sunt etiam ea consulta e Senatu. Julianus, convocato Senatu, quæsitisque sententiis, quid facto opus esset, certi nihil comperit, a Senatu: sed postea sponte sua gladiatores Capuæ jussit armari per Lollianum Titianum, & Claudium Pompejanum e Tarracinenſi ad participatum evocavit, quod & gener Imperatoris fuiſſet, & diu militibus præfuiſſet. Sed hoc ille recusavit, *senem se & debilem luminibus*, respondens. Transierant & ex Umbria milites ad Severum: & præmiserat quidem literas Severus, quibus jubebat interfectores Pertinacis servari. Brevi autem desertus est ab omnibus Julianus, & remansit in Palatio cum uno de præfectis suis Geniali & genero Repentino. Actum est denique, ut Juliano Senatus auctoritate abrogaretur imperium: & abrogatum est, appellatusque statim Severus Imperator, cum fingeretur, quod veneno se absumiſſet Julianus. missi tamen a Senatu, quorum cura per militem gregarium in Palatio idem Julianus occisus est, fidem Cæsaris implorans, hoc est Severi. Filiam suam, potitus imperio, dato patrimonio emancipaverat: quod ei cum Augustæ nomine statim sublatum est. Corpus ejus a Severo uxori Manliæ Scantillæ ac filiæ ad sepulturam est redditum, & in præavi monumento translatum, milliario quinto via Lavicana.

IX. Objecta fane sunt Juliano hæc: quod gulosus fuisset, quod aleator, quod armis gladiatorii exercitus esset, eaque omnia senex fecerit, cum antea nunquam adolescens his esset vitiis infamatus. objecta est etiam superbia; cum ille etiam in imperio fuisset humillimus. Fuit autem contra humanissimus ad convivia, benignissimus ad subscriptiones, moderatissimus ad libertatem. Vixit annis quinquaginta sex, mensibus quatuor: imperavit mensibus duobus, diebus quinque. Reprehensum in eo præcipue, quod eos, quos regere auctoritate sua debuerat, regendæ reipublicæ sibi præsules ipse fecisset.

ÆLII SPARTIANI S E V E R U S

A D

DIOCLETIANUM AUG.

I. INTERFECTO Didio Juliano, Severus, Africa oriundus, imperium obtinuit. cui civitas, Leptis: pater, Geta: majores, equites Romani, ante civitatem omnibus datam: mater, Fulvia Pia: patruus, Marcus Agrippa & Severus, Consulares: avus maternus, Macer; paternus, Fulvius Pius, fuere. Ipse natus est Erucio Claro bis & Severo Consulibus, sexto Idus Apriles. In prima pueritia, priusquam Latinis Græcisque literis imbueretur, quibus eruditissimus fuit, nullum alium inter pueros ludum, nisi *ad judices* exercuit; cum ipse, prælatis fascibus ac securibus, ordine puerorum circumstante, federet ac judicaret. Octavodecimo anno publice declamavit. Postea studiorum causa Romam venit, latum clavum a divo Marco petiit, & accepit, favente sibi Septimio Severo, affine suo, bis jam Con-

fulari. Cum Romam venisset, hospitem nactus, qui Hadriani vitam imperatoriam eadem hora legeret, quod sibi omen futuræ felicitatis arripuit. Habuit etiam aliud omen imperii. Cum rogatus ad cœnam imperatoriam, palliatus venisset, qui togatus venire debuerat, togam præfidiariam ipsius Imperatoris accepit. Eadem nocte somniavit, lupæ se uberibus, ut Remum inhærere, vel Romulum. Sedit & in sella imperatoria, temere a ministro posita, ignarus, quod non liceret. Dormienti etiam in stabulo serpens caput cinxit, & sine noxa, expergefactis & acclamantibus familiaribus, abiit.

II. Juventam plenam furorum, nonnunquam & criminum, habuit. Adulterii causam dixit, absolutusque est a Juliano Proconsule: cui & in Proconsulatu successit, & in Consulatu collega fuit, & in imperio item successit. Quæsturam diligenter egit. Omnibus fortibus natus, militari post Quæsturam sorte Bæticam accepit: atque inde Africam petiit, ut mortuo patre rem domesticam componeret. Sed dum in Africa est, pro Bætica Sardinia ei attributa est, quod Bæticam Mauri populabantur. Acta igitur Quæstura Sardinienfi, legationem Proconsulis Africæ accepit. In qua legatione cum eum quidam municipum suorum Leptitanus, præcedentibus fascibus, ut antiquum contubernalem ipse plebejus amplexus esset, fustibus eum sub elogio ejusdem præconis cecidit, *Legatum populi Romani homo plebejus temere amplecti noli.* ex quo factum est, ut in vehiculo etiam legati sederent, qui ante pedibus ambulabant. Tunc in quadam civitate Africana,

cum sollicitus mathematicum consulisset, positaque hora, ingentia vidisset astrologus, dixit ei: *Tuam, non alienam, pone genituram.* cumque Severus jurasset, suam esse, omnia ei dixit, quæ postea facta sunt.

III. Tribunatum plebis, Marco Imperatore decernente, promeruit, eumque severissime exertissimeque egit. Uxorem tunc Marciam duxit, de qua tacuit in historia vitæ privatae: cui postea in imperio statuas collocavit. Prætor designatus a Marco est, non in candida, sed in competitorum grege, anno ætatis tricesimo secundo. Tunc ad Hispaniam missus, somniavit primo, sibi dici, *ut templum Tarraconense Augusti, quod jam labebatur, restitueret.* deinde ex altissimi montis vertice orbem terrarum Romamque despexit, concinentibus provinciis lyra, voce, vel tibia. Ludos-absens edidit. Legioni quartæ Scythicæ deinde præpositus est, circa Massiliam. Post hoc Athenas petiit studiorum sacrorumque causa, & operum ac vetustatum. ubi cum injurias quasdam ab Atheniensibus pertulisset, inimicus his factus, minuendo eorum privilegia jam Imperator se ultus est. Deinde Lugdunensem provinciam legatus accepit. Cum, amissa uxore, aliam vellet ducere, genituras sponfarum requirebat, ipse quoque matheleos peritissimus: & cum audisset, esse in Syria quandam, quæ id genituræ haberet, ut regi jungeretur, eandem uxorem petiit, Juliam scilicet, & accepit, interventu amicorum: ex qua statim pater factus est.

IV. A Gallis ob severitatem & honorificentiam

& abstinentiam, tantum, quantum nemo, dilectus est. Deinde Pannonias proconsulari imperio rexit. Post hoc Siciliam proconsularem sorte meruit: suscepitque Romæ alterum nîlium. In Sicilia, quasi de imperio vel vates, vel Chaldæos consulisset, reus factus, apud Præfectos prætorio, quibus audiendus datus fuerat, jam Commodus in odium veniente, absolutus est, calumniatore in crucem actus. Consulatum cum Appulejo Rufino primum egit, Commodus se inter plurimos designante. Post Consulatum, anno ferme fuit Romæ otiosus: deinde, Læto suffragante, exercitui Germanico præponitur. Proficiscens ad Germanicos exercitus, hortos spatiosos comparavit, cum antea ædes brevissimas Romæ habuisset, & unum fundum. In his hortis cum humi jacens epularetur cum filiis parca cœna, pomæque apposita major filius, qui tunc quinquennis erat, cum collusoribus puerulis manu largiore divideret, paterque illum reprehendens dixisset, *Parcius divide; non enim regias opes possides*: quinquennis puer respondit, *Sed possidebo*. In Germaniam profectus, ita se in ea legatione egit, ut famam, nobilitatam jam ante, cumularet.

V. Et hætenus rem militarem privatus egit. Dehinc a Germanicis legionibus, ubi auditum est, Commodum occisum, Julianum autem cum odio cunctorum imperare, multis hortantibus, repugnans Imperator est appellatus apud Carnutum, Idibus Augustis. quingenta sesteria, quod nemo unquam Principum, militibus dedit. Deinde, firmaris, quas post tergum relinquebat, provinciis, Romam iter

Scriptt. H. A.

K

contendit, cedentibus sibi cunctis, quacunq̃ue iter fecit: cum jam Illyricani exercitus & Gallicani, cogentibus ducibus, in ejus verba jurassent. excipiebatur enim ab omnibus, quasi ultor Pertinacis. Per idem tempus, auctore Juliano, Septimius Severus a Senatu hostis est appellatus, legatis ad exercitum Senatus verbis missis, qui juberent, ut ab eo milites Senatu præcipiente discederent. Et Severus quidem, cum audisset Senatus consentientis auctoritate missos legatos, primo pertimuit: postea id egit corruptis legatis, ut apud exercitum pro se loquerentur, transirentque in ejus partes. His compertis, Julianus senatusconsultum fecit fieri de participando imperio cum Severo: incertum, vere id, an dolo fecerit; cum jam ante misisset notos ducum interfectores quosdam, qui Severum occiderent, ita ut ad Pescennium Nigrum interficiendum miserat: qui & ipse imperium contra eum susceperat, auctoribus Syriacis exercitibus. Verum Severus, evitatis eorum manibus, quos ad se interficiendum Julianus miserat, missis ad prætorianos literis, signum vel deferendi vel occidendi Juliani dedit, statimque auditus est. nam & Julianus occisus est in Palatio, & Severus Romam invitatus. Ita, quod nulli unquam contigit, nutu tantum Severus victor est factus, armatusque Romam contendit.

VI. Occiso Juliano, cum Severus in castris & tentoriis, quasi per hosticum veniens, adhuc maneret, centum Senatores legatos ad eum Senatus milit ad gratulandum rogandumque: qui ei occurrerunt Interamnæ, armatumque, circumstantibus

armatis, salutarunt, excussi, ne quid ferri haberent. Et postera die occurrente omni famulatio aulico, septuagenos videnos aureos legatis dedit. eosdem præmisit, facta potestate, si qui vellent remanere, ac secum Romam redire. Fecit etiam statim Præfectum prætorio Flavium Juvenalem, quem etiam Julianus tertium Præfectum prætorii sibi assumserat. Interim Romæ ingens trepidatio militum civiumque, quod armatus contra eos Severus veniret, qui se hostem judicassent. His accessit, quod comperit, Pescennium Nigrum a Syriacis legionibus Imperatorem appellatum. cujus edicta & literas ad populum vel Senatum intercepti per eos, qui missi fuerant; ne vel proponerentur populo, vel legerentur in curia. Eodem tempore etiam de Clodio Albino sibi substituendo cogitavit, cui Cæsarianum decretum aut Commodianum videbatur imperium. Sed eos ipsos pertimescens, de quibus recte judicabat, Heraclitum ad obtinendas Britannias, Plautianum ad occupandos Nigri liberos misit. Cum Romam Severus venisset, prætorianos cum subarmalibus inermes sibi jussit occurrere: eosdem sic ad tribunal vocavit, armatis undique circumdatis.

VII. Ingressus deinde Romam, armatus cum armatis militibus Capitolium ascendit. inde in Palatium eodem habitu perrexit, prælatis signis, quæ prætorianis ademerat, supinis, non erectis. Tota deinde Urbe milites in templis, in porticibus, in ædibus Palatinis, quasi in stabulis manserunt: fuitque ingressus Severi odiosus atque terribilis, cum milites inemta diriperent, vastationem Urbi mi-

nantes. Alia die, armatis stipatus non solum militibus, sed etiam amicis, in Senatum venit. In curia reddidit rationem suscepti imperii, causatusque est, quod ad se occidendum Julianus notos ducum cædibus misisset. Fieri etiam Senatusconsultum coegit, *ne liceret Imperatori, inconsulto Senatu, occidere Senatorem*. Sed cum in Senatu esset, milites per seditionem dena millia poposcerunt a Senatu, exemplo eorum, qui Augustum Octavium Romam deduxerant, tantumque acceperant. Et cum eos voluisset comprimere Severus, nec potuisset; tamen mitigatos, addita liberalitate, dimisit. Funus deinde censorium Pertinacis imagini duxit, eumque inter Divos sacrauit, addito flamine, & sodalibus Helvianis, qui Marciani fuerant. se quoque *Pertinacem* vocari iussit: quamvis postea id nomen aboleri voluerit, querimonia amicorum. Dehinc æs alienum dissolvit.

VIII. Filias suas dotatas, maritis Probo & Aetio dedit. Et cum Probo genero suo præfecturam Urbis obtulisset, ille recusavit, dixitque, *minus sibi videri Præfectum esse, quam Principis generum*. Utrumque autem generum suum statim Consulem fecit, utrumque ditavit. Alia die ad Senatum venit, & amicos Juliani, incusatos, proscriptioni ac neci dedit. Causas plurimas audivit. Accusatos a provincialibus iudices, probatis rebus, graviter punivit. Rei frumentariæ, quam minimam repererat, ita consuluit, ut, excedens ipse vita, septem annorum canonem populo Romano relinqueret. Ad Orientis statum confirmandum profectus est, nihil adhuc

de Nigro palam dicens. Ad Africam tamen legiones misit, ne per Lybiam & Ægyptum Niger Africam occuparet, ac populum Romanum penuria rei frumentariæ perurgeret. Domitium Dextrum in locum Bassi Præfecti Urbi reliquit; atque intra triginta dies, quam Romam venerat, est profectus. Egressus ab Urbe ad Saxa rubra, seditionem ingentem ob locum castrorum metandorum ab exercitu passus est. Occurrit ei & statim Geta frater suus: quem provinciam sibi creditam regere præcepit, aliud sperantem. Nigri liberos, ad se adductos, in eo habuit honore, quo suos. Miserat sane legionem, quæ Græciam Thraciamque præriperet, ne eas Pescennius occuparet: sed jam Byzantium Niger tenebat. Perinthum etiam Niger volens occupare, plurimos de exercitu interfecit: atque ideo hostis cum Æmiliano est appellatus. Cumque Severum ad participatum vocaret, contemptus est. Promisit sane Nigro tutum exsilium, si vellet: Æmiliano autem non ignovit. Æmilianus dehinc victus in Helleponto a Severi ducibus, Cyzicum primum confugit, atque inde in aliam civitatem: in qua eorum jussu occisus est. Fusæ sunt item copiæ ab iisdem ducibus etiam Nigri.

- IX. His auditis, ad Senatum Severus Pertinax, quasi confectis rebus, literas misit. deinde conflavit cum Nigro, eumque apud Cyzicum interemit, caputque ejus pilo circumtulit. Filios Nigri post hoc, quos suorum liberorum cultu habuerat, in exsilium cum matre misit. Literas ad Senatum de victoria dedit. Neque quemquam Senatorum, qui

Nigri partium fuerant, præter unum, supplicio affecit. Antiochenfibus iratior fuit, quod & administrantem se in Oriente riferant, & Nigrum etiam victu juverant. denique multa his ademit. Neapolitanis etiam Palæstinensibus jus civitatis tulit, quod pro Nigro diu in armis fuerant. In multos animadvertit, præter ordinem Senatorium, qui Nigrum fuerant secuti. Multas etiam civitates ejusdem partis injuriis affecit & damnis. Eos Senatores occidit, qui cum Nigro militaverant ducum vel tribunorum nomine. deinde circa Arabiam plura gessit: Parthis etiam in ditionem redactis, nec non etiam Adiabenis; qui quidem omnes cum Pescennio fefellerant. Atque ob hoc reversus, triumpho delato, appellatus est *Arabicus*, *Adiabenicus*, *Parthicus*. Sed triumphum respuit, ne videretur de civili triumphare victoria. recusavit & Parthicum nomen, ne Parthos lacefferet.

X. Redeunti sane Romam post bellum civile Nigri, aliud bellum civile Clodii Albini nuntiatum est, qui rebellavit in Gallia. quare postea occisi sunt filii Nigri cum matre. Albinum igitur statim hostem judicavit, & eos, qui ad illum mollius vel scripserunt, vel rescripserunt. Et cum iret contra Albinum, in itinere apud Viminatium, filium suum majorem *Bassianum*, apposito *Aurelii Antonini* nomine, *Cæsarem* appellavit, ut fratrem suum Getam ab spe imperii, quam ille conceperat, submoveret. Et nomen quidem *Antonini* idcirco filio apposuit, quod somniaverat, Antoninum sibi successurum. Unde Getam etiam quidam *Antoninum* putant dictum, ut

& ipse succederet in imperio. Aliqui putant idcirco illum Antoninum appellatum, quod Severus ipse in Marci familiam transire voluerit. Et primo quidem ab Albinianis Severi duces victi sunt. Tunc sollicitus cum consuleret a Pannoniacis auguribus, comperit se victorem futurum, adversarium vero nec in potestatem venturum, nec evasurum, sed juxta aquam esse periturum. Multi statim amici Albinum desertentes venerunt, multi duces capti sunt; in quos Severus animadvertit.

XI. Multis interim varie gestis in Gallia, primo apud Trinurtium contra Albinum felicissime pugnavit Severus: cum quidem ingens periculum equi casu adiit, ita ut mortuus istu plumbeæ crederetur, ita ut alius jam pæne Imperator ab exercitu deligeretur. Eo tempore lectis actis, quæ de Clodio Celso laudando, qui Adrumetinus, & affinis Albinus erat, facta sunt, iratus Senatui Severus, quasi hoc Albino Senatus præstitisset, Commodum inter Divos referendum esse censuit, quasi hoc genere se de Senatu posset ulcisci: primusque inter milites *Divum* Commodum pronuntiavit, idque ad Senatum scripsit, addita oratione victoriæ. Senatorum deinde, qui in bello erant interempti, cadavera diffusi jussit. Deinde Albinus corpore allato, pæne seminecis caput abscindi jussit, Romamque deferri; idque literis prosecutus est. Victus est Albinus die undecima Kalendas Martii. Reliquum autem cadaver ejus ante domum propriam exponi ac dividi jussit. Equum præterea, ipse residens, supra cadaver Albinus egit; expavescentemque admonuit, ut

effrenatus audacter protereret. Addunt alii, quod idem cadaver in Rhodanum abjici præcepit, simul etiam uxoris liberorumque ejus.

XII. Interfectis innumeris Albini partium viris, inter quos multi Principes civitatis, multæ feminae illustres fuerunt, omnium bona publicata sunt, ærariumque auxerunt: tum Hispanorum & Gallorum proceres multi occisi sunt. Denique militibus tantum stipendiorum, quantum nemo Principum, dedit. Filiis etiam suis ex hac proscriptione tantum reliquit, quantum nullus Imperatorum, cum magnam partem auri per Gallias, per Hispanias, per Italiam, Imperator jam fecisset. tuncque primum privatarum rerum procuratio constituta est. Multi sane post Albinum, fidem ei servantes, bello a Severo superati sunt. Eodem tempore etiam legio Arabica defecisse ad Albinum nuntiata est. Ultus igitur graviter Albinianam defectionem, interfectis plurimis, genere quoque extincto, iratus populo & senatoribus Romam venit. Commodum in Senatu & concione laudavit, *Deum* appellavit, infamibus displicuisse dixit; ut appareret, eum apertissime furere. Post hæc de sua clementia differuit; cum crudelissimus fuerit, & Senatores infra scriptos occiderit.

XIII. Occidit autem sine causæ distinctione hos nobiles: Mummius Secundinus, Asellius Claudianus, Claudius Rufus, Vitalius Victor, Papius Faustus, Ælius Celsus, Julius Rufus, Lollius Profectus, Arunculejus Cornelianus, Antoninus Balbus, Postumius Severus, Sergium

Lustralem, Fabium Paulinum, Nonium Gracchum, Mustium Fabianum, Casperium Agrippinum, Cesonium Albinum, Claudium Sulpicianum, Memmium Rufinum, Casperium Æmilianum, Coccejum Verum, Erucium Clarum, Lucium Stilonem, Clodium Rufum, Egnatulejum Honoratum, Petronium Juniolem; Pescennios, Festum, & Neratianum, & Aurelianum, & Materianum, & Julianum, & Albinum; Cerellios, Macrinum, & Faustinianum, & Julianum; Herennium Nepotem, Sulpitium Canum, Valerium Catulinum, Novium Rufum, Claudium Arabianum, Marcum Afellionem. Horum igitur tantorum ac tam illustrium virorum (nam multi in his consulares, multi prætorii, omnes certe summi viri fuere) interfector, ab Afris ut Deus haberetur. Cincium Severum calumniatus est, quod se veneno appetisset, atque ita interfecit.

XIV. Narcissum deinde, Commodi strangulatorem, leonibus objecit. Multos præterea obscuro loci homines interemit, præter eos, quos jus prælii absumsit. Post hæc, cum se vellet commendare hominibus, vehicularium munus a privatis ad fiscum traduxit. Cæsarem deinde Bassianum filium suum Antoninum a Senatu appellari iussit, decretis Imperatoriis insignibus. Rumore deinde belli Parthici extincto, patri, matri, avo, & uxori priori per se statuas collocavit. Plautianum ex amicissimo, cognita ejus vita, ita odio habuit, ut & hostem publicum appellaret, & depositis statuis ejus, per orbem terræ gravi eum insigniret injuria; iratus præcipue, quod inter proquinquorum & affi-

nium Severi simulacra suam statuam ille posuisset. Palæstinis poenam remisit, quam ob causam Nigri meruerant. Postea iterum cum Plautiano in gratiam rediit, & veluti ovans Urbem ingressus Capitolium petiit: quamvis & ipsum procedenti tempore occiderit. Getæ minori filio togam virilem dedit; majori Plautiani filiam uxorem junxit. Hi, qui hostem publicum Plautianum dixerant, deportati sunt. ita omnium rerum semper quasi naturali lege mutatio est. Filios deinde Consules designavit. Getam fratrem extulit. Profectus deinde ad bellum Parthicum est, edito gladiatorio munere, & congiario populo dato. Multos inter hæc causis, vel veris, vel simulatis, occidit. Damnabantur autem plerique, cur jocati essent; alii, cur tacuissent; alii, cur pleraque figurata dixissent: ut esset Imperator vere nominis sui, vere Pertinax, vere Severus.

XV. Erat sane in sermone vulgari, Parthicum bellum affectare Septimium Severum, gloriæ cupiditate, non aliqua necessitate, deductum. Trajecto denique exercitu a Brundisio, continuato itinere venit in Syriam, Parthosque submovit. Sed postea in Syriam rediit, ita ut se pararet, ac bellum Parthis inferret. Inter hæc Pescennianas reliquias Plautiano auctore persequabatur, ita ut nonnullos etiam ex amicis suis, quasi vitæ suæ infidiatores, appeteret. Multos etiam, quasi Chaldæos aut vates de sua salute consuluisse, interemit: præcipue suspectos unumquemque idoneum imperio, cum ipse parvulos adhuc filios haberet, idque dici ab his vel crederet, vel audiret, qui sibi augurabantur imp-

perium. Denique cum occisi essent nonnulli, Severus se excusabat: & post eorum mortem negabat fieri se jussisse, quod factum est: quod de Læto præcipue Marius Maximus dicit. Cum soror sua Leptitana ad eum venisset, vix Latine loquens, ac de illa multum Imperator erubesceret, dato filio ejus lato clavo, atque ipsi multis muneribus, redire mulierem in patriam præcepit: & quidem cum filio, qui brevi vita defunctus est.

XVI. Æstate igitur jam exeunte, Parthiam ingressus, Ctesiphontem, pulso rege, pervenit: & cepit, hiemali prope tempore, (quod in illis regionibus melius per hiemem bella tractantur) cum herbarum radicibus milites viverent, atque inde morbos ægritudinesque contraherent: quare cum, obsistentibus Parthis, fluente quoque per insuetudinem cibi alvo militum, longius ire non posset, tamen perstitit, & oppidum cepit, & regem fugavit, ac plurimos intermit, & *Parthicum* nomen meruit. Ob hoc etiam filium ejus Bassianum Antoninum, qui *Cæsar* appellatus jam fuerat, annum decimumtertium agentem, participem imperii dixerunt milites. Getam quoque, minorem filium, *Cæsarem* dixerunt, eundem *Antoninum*, ut plerique in literas tradunt, appellantes. Harum appellationum causa donativum militibus largissimum dedit, concessa omni præda oppidi Parthici, quod milites quærebant. Inde in Syriam rediit victor, & *Parthicum* deferentibus sibi Patribus triumphum, idcirco recusavit, quod consistere in curru affectus articulari morbo non posset. filio sane con-

cessit, ut triumpharet: cui Senatus Judaicum triumphum decreverat, idcirco, quod & in Syria res bene gestæ fuerant a Severo. Deinde cum Antiochiam transisset, data virili toga filio majori, secum eum Consulem designavit: & statim in Syria Consulatum inierunt. Post hoc, dato stipendio cumulatiore militibus, Alexandriam petiit.

XVII. In itinere Palæstinis plurima jura fundavit. Judæos fieri sub gravi pœna vetuit. Idem etiam de Christianis sanxit. Deinde Alexandrinis jus buleutarum dedit, qui sine publico consilio, ita ut sub regibus, ante vivebant, uno iudice contenti, quem Cæsar dedisset. Multa præterea his jura mutavit. Jucundam sibi peregrinationem hanc propter religionem Dei Serapidis, & propter novitatem animalium vel locorum fuisse, Severus ipse postea semper ostendit. nam & Memphin, & Memnonem, & pyramides, & labyrinthum, diligenter inspexit. Et quoniam longum est minora persequi, hujus magnifica illa: Quod viſto & occiso Juliano, prætorianas cohortes exauſtoravit, Pertinacem contra militum voluntatem in Deos retulit, Salvii Juliani decreta jussit aboleri; quod non obtinuit. Denique cognomentum Pertinacis non tam ex sua voluntate, quam ex morum parsimonia videtur habuisse. nam & infinita multorum cæde crudelior habitus, & cum quidam ex hostibus eidem se suppliciter obtulisset, dixissetque ille, *Quid tu facturus es?* non mollitus tam prudente dicto, interfici eum jussit. Fuit præterea delendarum cupidus factionum: prope a nullo congressu nisi victor.

XVIII. Persarum regem Abgarum subegit. Arabas in deditionem accepit. Adiabenos in tributarios coegit. Britanniam (quod maximum ejus imperii decus est) muro per transversam insulam ducto, utrimque ad finem Oceani munivit: unde etiam Britannici nomen accepit. Tripolin, unde oriundus erat, contusis bellicosissimis gentibus, securissimam reddidit: ac populo Romano diurnum oleum gratuitum, & sæcundissimum agrum donavit. Idem cum implacabilis delictis fuit, tum ad eligendos industrios quosque judicii singularis. Philosophiæ ac dicendi studiis satis deditus, doctrinæ quoque nimis cupidus: latronum ubique hostis: vitam suam privatam publicamque ipse composuit ad fidem, solum tamen vitium crudelitatis excusans. De hoc Senatus ita judicavit, illum aut nasci non debuisse, aut non mori; quod & nimis crudelis, & nimis utilis reipublicæ videretur. Domi tamen minus cautus, qui uxorem Juliam famosam adulteriis tenuit, etiam conjurationis consciam. Idem, cum pedibus æger, bellum moraretur, idque milites anxie ferrent, ejusque filium Bassianum, qui una erat, Augustum fecissent; tolli se, atque in tribunal ferri jussit, adesse deinde omnes tribunos, centuriones, duces, & cohortes, quibus auctoribus id acciderat, sisti deinde filium, qui Augusti nomen acceperat: cumque animadverti in omnes auctores facti, præter filium, juberet, rogareturque omnibus ante tribunal prostratis, caput manu contingens ait, *Tandem sentitis caput imperare, non pedes.* Hujus dictum est, cum eum ex humili per li-

terarum & militiæ officia ad imperium plurimis gradibus fortuna duxisset, *Omnia (inquit) fui, & nihil expedit.*

XIX. Periit Eboraci in Britannia, subactis gentibus, quæ Britannia videbantur infestæ, anno imperii decimo octavo, morbo gravissimo extinctus jam senex. Reliquit filios duos, Antoninum Bassianum & Getam, cui & ipsi, in honorem Marci, Antonini nomen imposuit. Illatus sepulcro Marci Antonini, quem ex omnibus Imperatoribus tantum coluit, ut & Commodum in Divos referret, & Antonini nomen omnibus deinceps quasi Augusti adscribendum putaret. Ipsi a Senatu, a gentilibus liberisque ejus funus amplissimum exhibitum fuit, atque inter Divos est relatus. Opera publica ejus, præcipue Romæ, exstant, Septizonium & thermæ Severianæ, ejus denique etiam Jani in Transtiberina regione ad portam nominis sui, quorum forma intercidens statim usum publicum invidit. Judicium de eo post mortem magnum omnium fuit: maxime quod diu nec a filiis ejus boni aliquid reipublicæ venit, & postea invadentibus multis rempublicam res Romana prædonibus direptui fuit. Hic tam exiguis vestibus usus est, ut vix tunica ejus aliquid purpuræ haberet, & cum hirta chlamyde humeros velaret: cibi parcissimus, leguminis patrii avidus, vini aliquando cupidus, carnis frequenter ignarus. Ipse decorus, ipse ingens, promissa barba, cano capite & crispo, vultu reverendus, canorus voce, sed Afrum quiddam usque ad senectutem sonans: ac post mortem multum amatus, vel invidia deposita, vel crudelitatis metu.

XX. Legisse me apud Ælium Maurum Phlegontis Tralliani libertum memini, Septimium Severum immoderatissime, cum moreretur, lætatum, quod duos Antoninos pari imperio reipublicæ relinqueret, exemplo Pii, qui Verum & Marcum Antoninos per adoptionem filios reipublicæ reliquit: hoc melius, quod ille filios per adoptionem, hic per se genitos, rectores Romanæ reipublicæ daret, Antoninum scilicet Bassianum, quem ex priore matrimonio susceperat, & Getam, quem de Julia genuerat. Sed illum multum spes fefellit. nam unum parricidium, alterum sui mores reipublicæ inviderunt: sanctumque illud nomen in nullo diu bene mansit. Et reputanti mihi, Diocletiane Auguste, neminem prope magnorum virorum optimum & utilem filium reliquisse satis claret. Denique aut sine liberis viri interierunt, aut tales habuerunt plerique, ut melius fuerit de rebus humanis sine posteritate discedere.

XXI. Et ut ordiamur a Romulo: hic nihil liberorum reliquit, nihil Numa Pompilius, quod utile posset esse reipublicæ. Quid Camillus? num sui similes liberos habuit? Quid Scipio? Quid Catones, qui magni fuerunt? Jam vero quid de Homero, Demosthene, Virgilio, Crispo, & Terentio, Plauto, ceterisque aliis loquar? Quid de Cæsare? Quid de Tullio, cui soli melius fuerat liberos non habere? Quid de Augusto, qui nec adoptivum bonum filium habuit, cum illi eligendi potestas fuisset ex omnibus. Falsus est etiam ipse Trajanus in suo municepe ac nepote deligendo. Sed ut omittamus adoptivos,

ne nobis Antonini, Pius & Marcus, numina Reipublicæ, occurrant, veniamus ad genitos. Quid Marco felicius fuisset, si Commodum non reliquisset heredem? Quid Severo Septimio, si Bassianum non genuisset? qui statim infimulatum fratrem insidiarum contra se cogitatarum, parricidiali etiam figmento interemit: qui novercam, matrem quin immo, in cujus sinu Getam filium ejus occiderat, uxorem duxit: qui Papinianum juris asylum, & doctrinæ legalis thesaurum, quod parricidium excusare noluisse, occidit, & præfectum quidem suum, ne homini per se & per scientiam suam magno deesset & dignitas. Denique, ut alia omittam, ex hujus moribus factum puto, ut Severus tristior vir ad omnia, immo etiam crudelior, pius & dignus Deorum altaribus duceretur. qui quidem divinam Sallustii orationem, qua Micipsa filios ad pacem hortatur, ingravatus morbo misisse filio dicitur majori. idque frustra. * & hominem tantum valetudine. Vixit denique in odio populi diu Antoninus, nomenque illud sanctum ac venerabile diu, minus amatum est: quamvis & vestimenta populo dederit, (unde *Caracallus* est dictus) & thermas magnificentissimas fecerit. Exstat sane Romæ Severi porticus, gesta ejus exprimens, a filio, quamplurimo decore, structa.

XXII. Signa mortis ejus hæc fuerunt. Ipse somniavit, quatuor aquilis & gemmato curru, prævolante, nescio qua, ingenti humana specie, ad cælum se raptum, cumque raperetur, octoginta & novem numeros explicuisse, (ultra quot annos ne unum

quidem annum vixit: nam ad imperium senex venit) cumque positus esset in circulo ingenti æreo, diu solus & destitutus stetit: cum vereretur autem, ne præceps rueret, a Jove se vocatum vidit, atque inter Antoninos locatum. Die Circensium cum tres Victoriæ more solito essent locatæ gypseæ cum palmis, media, quæ ipsius nomine adscriptum orbem palmis tenebat, vento icta, de podio stans decidit, & humi constitit: eaque, quæ Getæ nomine inscripta erat, corruit, & omnis comminuta est: illa vero, quæ Bassiani titulum præferebat, amissa palma venti turbine vix constitit. Post murum apud vallum missum in Britannia, cum ad proximam mansionem rediret, non solum victor, sed etiam in æternum pace fundata, volvens animo, quid ominis sibi occurreret, Æthiops quidam e numero militari, claræ inter scurras famæ, & celebratorum semper jocorum, cum corona e cupressu facta eidem occurrit: quem cum ille iratus removeri ab oculis præcepisset, & coloris ejus tacitus omine, & coronæ, dixisse ille dicitur joci causa, *Totum fuisti: totum vicisti: jam Deus esto victor.* Et in civitatem veniens, cum rem divinam vellet facere, primum ad Bellonæ templum ductus est, errore haruspici rustici, deinde hostiæ furvæ sunt applicitæ. quod cum esset aspernatus, atque ad Palatium se reciperet, negligentia ministrorum nigræ hostiæ usque ad limen domus Palatinæ Imperatorem secutæ sunt.

XXIII. Sunt per plurimas civitates opera ejus insignia. magnum vero illud in civitate, ejus, quod

Scriptu. H. A.

L

Romæ omnes ædes publicas, quæ vitio temporum labebantur, instauravit, nusquam prope suo nomine adscripto, servatis tamen ubique titulis conditorum. Moriens septem annorum canonem, ita ut quotidiana septuagena quinque millia modiorum expendi possent, reliquit: olei vero tantum, ut per quinquennium non solum Urbis usibus, sed & totius Italiæ, quæ oleo egeret, sufficeret. Ultima verba ejus dicuntur hæc fuisse: *Turbatam rempublicam ubique accepi, pacatam etiam Britannis relinquo: senex & pedibus ager: firmum imperium Antoninis meis relinquens, si boni erunt; imbecillum, si mali.* Jussit deinde signum tribuno dari, *Laboremus*: quia Pertinax, quando in imperium adscitus est, signum dederat, *Militemus*. Fortunam deinde regiam, quæ comitari Principes & in cubiculis poni solebat, geminare statuerat, ut sacratissimum simulacrum utrique relinqueret filiorum: sed cum videret, se perurgeri sub horam mortis, jussisse fertur, ut alternis diebus apud filios Imperatores in cubiculis Fortuna poneretur. Quod Bassianus prius contempsit, quam faceret patricidium.

XXIV. Corpus ejus a Britannia Romam usque cum magna provincialium reverentia susceptum est: quamvis aliqui urnulam auream tantum fuisse dicant, Severi reliquias continentem, eandemque Antoninorum sepulcro illatam, cum Septimius Pertinax Severus illic, ubi vita functus est, esset incensus. Cum Septizonium faceret, nihil aliud cogitavit, quam ut ex Africa venientibus suum opus occurreret: & nisi absente eo per Præfectum Urbis me-

dium simulacrum ejus esset locatum, aditum Palatinis ædibus, id est, regium atrium, ab ea parte facere voluisse perhibetur: quod etiam post Alexander cum vellet facere, ab haruspicibus dicitur esse prohibitus, cum hoc sciscitatus non litasset.

ÆLII SPARTIANI PESCENNIUS NIGER

A D

DIOCLETIANUM AUG.

I. **R**ARUM atque difficile est, ut, quos tyrannos aliorum victoria fecerit, bene mittantur in literas: atque ideo vix omnia de his plene in monumentis atque annalibus habentur. Primum enim, quæ magna sunt in eorum honorem, ab scriptoribus depravantur, deinde alia supprimuntur, postremo non magna diligentia in eorum genere ac vita requiritur: cum satis sit, audaciam eorum, & bellum, in quo victi fuerint, ac poenam, proferre. Pescennius ergo Niger, ut alii tradunt, modicis parentibus, ut alii, nobilibus fuisse dicitur: patre Annio Fusco, matre Lampridia, avo curatore Aquini, ex qua familia originem ducebat: quod quidem dubium etiam nunc habetur. Hic eruditus mediocribus literis, moribus ferox, divitiis etiam modicus, vita parcus, libidinis effrenatæ ad omne genus cu-

piditatum, ordines diu duxit, multisque ducatus pervenit, ut exercitus Syriacos jussu Commodi regeret, suffragio maxime athletæ, qui Commodum strangulavit: ut omnia tunc fiebant.

II. Is posteaquam comperit occisum Commodum, Julianum Imperatorem appellatum, eundemque jussu Severi & Senatus occisum, Albinum etiam in Gallia summisse nomen Imperatoris, ab exercitibus Syriacis, quos regebat, appellatus est Imperator; ut quidam dicunt, magis in Juliani odium, quam in æmulationem Severi. Huic ob detestationem Juliani primis imperii diebus ita Romæ factum est a Senatoribus dumtaxat, qui & Severum oderant, ut inter lapidationes execrationesque omnium illi *feliciter* optarent, illum *Principem* insuper, & illum *Augustum* populus acclamaret. Julianum autem oderant populares, quod Pertinacem milites occidissent, & illum Imperatorem adversa populi voluntate appellassent. Denique ingentes ob hoc seditiones fuerunt. Ad occidendum autem Nigrum, primipilarem Julianus miserat, stulte ad eum, qui haberet exercitus, & se tueri posset: perinde quasi quilibet Imperator a primipilario posset occidi. Eadem autem dementia etiam Severo jam principi Julianus successorem miserat. Denique etiam Aquilium centurionem, notum cædibus ducum, miserat, quasi Imperator tantus a centurione posset occidi. Par denique infania fuit, quod cum Severo ex interdicto de imperio egisse fertur, ut jure videretur ad principatum pervenisse.

III. Et de Pescennio Nigrò judicium populi ex

eo apparuit, quod cum ludos Circenses Julianus Romæ daret, & indiscrete subsellia Circi maximi repleta essent, ingentique injuria populus affectus esset, per omnes uno consensu Pescennius Niger ad tutelam Urbis est expetitus, odio, ut diximus, Juliani, & amore occisi Pertinacis: cum quidem Julianus dixisse fertur, *Nec sibi, neque Pescennio longum imperium deberi, sed Severo, qui magis esset odio habendus a Senatoribus, militibus, provincialibus, popularibus.* quod probavit rei eventus. Et Pescennius quidem Severo eo tempore, quo Lugdunensem provinciam regebat, amicissimus fuit: nam ipse missus erat ad comprehendendos desertores, qui innumeri Gallias tunc vexabant. In quo officio quod se honeste gessit, jucundissimum fuit Severo, ita ut de eo ad Commodum Septimius referret, asserens necessarium reipublicæ virum. Et revera in re militari vehemens fuit. Nunquam sub eo miles provinciali lignum, oleum, operam extorsit, ipse a milite nihil accepit, cum tribunatus ageret, nihil accipi passus est. Nam & Imperator tribunos duos, quos constitit stellaturas accepisse, lapidibus obrui ab auxiliariis jussit. Exstat epistola Severi, quam scribit ad Ragonium Celsum Gallias regentem: *Miserum est, ut imitari ejus disciplinam militarem non possimus, quem bello vicimus. Milites tui vagantur, tribuni medio die lavant, pro tricliniis popinas habent, pro cubiculis, meritoria: saltant, bibunt, cantant, & mensuris conviviorum vacant, cum sine mensura poterit. Hæc, si ulla vena paternæ disciplinæ in nobis viveret, fierent? Emenda igitur primum tribunos, deinde mi-*

litem: quem quamdiu timueris, tamdiu non timeberis. Sed scias id de Nigro, militem timere non posse, nisi integri fuerint tribuni & duces militum.

IV. Hæc de Pescennio Severus Augustus, adhuc milite. Marcus etiam Antoninus ad Cornelium Balbum: *Pescennium mihi laudas, agnosco: nam & decessor tuus eum manu strenuum, vita gravem, & jam tum plusquam militem dixit. Itaque nisi literas recitandas ad signa, quibus eum trecentis Armenicis, & centum Sarmatis, & mille nostris præesse iussit. Tuum est ostendere, hominem non ambitione, (quod nostris non convenit moribus) sed virtute venisse ad eum locum, quem avus meus Hadrianus, quem Trajanus proavus, non nisi exploratissimis dabat. De hoc eodem Commodus: Pescennium fortem virum novi, & ei tribunatus jam duos dedi: ducatum mox dabo, ubi per senectutem Ælius Corduenus rempublicam recusaverit.* Hæc de eo judicia omnium fuerunt. Sed & Severus ipse sæpe dixit, *ignoturum se Pescennio, nisi perseveraret.* A Commodio denique Pescennius Consul declaratus, Severo præpositus est: & quidem iraro, quod primipilaribus commendantibus, Consulatum Niger mereretur. In vita sua Severus dicit, se, priusquam filii sui id ætatis haberent, ut imperare possent, ægrotañtem id in animo habuisse, ut, si quid forte sibi accidisset, Niger Pescennius eadem & Clodius Albinus succederent, qui ambo Severo gravissimi hostes exstiterunt. Unde apparet, quod etiam Severi de Pescennio iudicium fuerit.

V. Si Severo credimus, fuit gloriæ cupidus Niger, vita fictus, moribus turpis, ætatis provectæ,

cum imperium invasit: ex quo cupiditates ejus in-
 cusat, perinde quasi Severus minor ad imperium
 venerit, qui annos suos contrahit, cum decem &
 octo annis imperarit, & octogesimo nono perierit.
 Sane Severus Heraclium ad obtinendam Bithyniam
 misit: Fulvium autem ad occupandos adultos Ni-
 gri filios: nec tamen in Senatu quidquam de Nigro
 Severus dixit, cum jam audisset de ejus imperio,
 ipse autem proficisceretur ad componendum Orientis
 statum. Tantum sane illud fecit proficiscens, ut
 legiones ad Africam mitteret, ne eam Pescennius
 occuparet, & fame populum Romanum perurgeret.
 Et videbatur id facere posse per Lybiam Ægyptumque,
 vicinas Africæ, difficili licet itinere ac navigatione.
 Et Pescennius quidem, veniente ad Orientem Severo,
 Græciam, Thracias, & Macedoniam, interfectis multis illustribus viris, tenebat,
 ad participatum imperii Severum vocans: a quo,
 causa eorum, quos occiderat, cum Æmiliano hostis est
 appellatus: deinde a ducibus Severi per Æmilianum
 pugnans victus est. Et cum illi tutum exilium
 promitteret, si ab armis recederet, persistens
 iterum pugnavit, & victus est, atque apud Cyzicum
 circa paludem fugiens, fauciat, & sic ad Severum
 deductus, atque statim mortuus.

VI. Hujus caput circumlatum pilo Romam missum,
 filii occisi, necata uxor, patrimonium publicatum,
 familia omnis extincta. Sed hæc omnia, posteaquam
 de Albini rebellionem cognitum est, facta sunt:
 nam prius & filios Nigri & matrem in exilium
 miserat. Sed exarsit secundo civili bello,

immo etiam tertio, & factus est durior. Tunc enim innumeros Senatores interemit Severus, & ab aliis *Sulle Punici*, ab aliis *Marii* nomen accepit. Fuit statura Pescennius proluxa, forma decorus, capillo in verticem ad gratiam reflexo, vocis canoræ; ita ut in campo loquens per mille passus audiretur, nisi ventus adversaretur: oris verecundi & semper rubidi: cervice adeo nigra, ut, quemadmodum multi dicunt, ab ea *Nigri* nomen acceperit. Cetera corporis parte candidus, & magis pinguis: vini avidus, cibi parvus, rei venereæ, nisi ad procreandos liberos, prorsus ignarus. Denique etiam sacra quædam in Gallia, quæ castissimis decernuntur, consensu publico celebranda suscepit. Hunc in Commodianis hortis, in porticu curva, pictum de musivo inter Commodi amicissimos videmus, sacra Iſidis ferentem: quibus Commodus adeo deditus fuit, ut & caput raderet, & Anubim portaret, & omnes pausas expleret. Fuit ergo Niger miles optimus, tribunus singularis, dux præcipuus, legatus severissimus, Consul insignis, vir domi forisque conspicuus, Imperator infelix: usui denique reipublicæ sub Severo, homine tetrico, esse potuisset, si cum eo esse voluisset.

VII. Sed deceptus est consiliis Severi Aureliani, qui filias suas ejus filiis despondens, persistere eum fecit in imperio. Hic tantæ fuit auctoritatis, ut ad Marcum Antoninum primum, deinde ad Commodum scriberet, cum videret provincias facili administrationum mutatione subverti, primum ut nulli ante quinquennium succederetur provinciæ

præfidi, vel legato, vel proconsuli, quod prius deponerent potestatem, quam scirent administrare: deinde ne novi ad regendam rempublicam accederent. Præter militares administrationes, intimavit etiam, ut assessores, in quibus provinciis assedissent, in his administrarent: quod postea Severus, & deinceps multi tenuerunt, ut probant Pauli & Ulpiani præfecturæ, qui Papiniano in consilio fuerunt: ac postea cum unus ad memoriam, alter ad libellos paruisset, statim Præfeti facti sunt. Hujus etiam illud fuit, Ut nemo assideret in sua provincia, ut nemo administraret Romæ, nisi Romanus, hoc est, oriundus Urbe. Addidit præterea consiliariis salaria, ne eos gravarent, quibus assidebant, dicens, *Judicem nec debere dare, nec accipere.* Hic erga milites tanta fuit censura, ut, cum apud Ægyptum ab eo limitanei milites vinum peterent, responderit, *Nilum habetis, & vinum queritis?* siquidem tanta illius fluminis dulcedo, ut accolæ vina non querant. Idem tumultuantibus iis, qui a Sarracenis victi fuerant, & dicentibus, *Vinum non accepimus, pugnare non possumus; Erubescite,* inquit, *illi, qui vos vincunt, aquam bibunt.* Idem Palæstinis rogantibus, ut eorum censio levaretur idcirco, quod esset gravata, respondit: *Vos terras vestras levare censitione vultis: ego vero etiam aerem vestrum censere vellem.*

VIII. Denique Delphici Apollinis vates in motu reipublicæ maximo, cum nuntiaretur tres esse Imperatores, Severum Septimium, Pescennium Nigrum, Clodium Albinum, consultus quem expedi-

ret reipublicæ imperare, versum Græcum hujusmodi fuisse dicitur:

Optimus est Fuscus, bonus Afer, pessimus Albus.

Ex quo intellectum, *Fuscum*, Nigrum appellatum vaticinatione: *Severum*, *Afrum*; *Album* vero, *Albinum* dictum. Nec defuit alia curiositas. Requisitum est, qui esset obtenturus rempublicam. ad quod ille respondit alium versum talem:

Fundetur sanguis Albi, Nigrique minantis,

Imperium mundi Pœna reget urbe profectus.

Idem, cum quæsitum esset, quis illi successurus esset, respondisse itidem Græco versu dicitur:

Cui dederint superi, nomen habere Pii.

quod omnino intellectum non est, nisi cum Bassianus Antonini, quod verum signum *Pii* fuit, nomen accepit. Item cum quæreretur, quamdiu imperaturus esset, respondisse Græce dicitur:

Bis denis Italum conscendet navibus æquor:

Si tamen una ratis transiliet pelagus.

Ex quo intellectum, *Severum* viginti annos expleturum.

IX. Hæc sunt, Diocletiane, maxime Augustorum, quæ de Pescennio didicimus ex pluribus libris. Non enim facile (ut in principio libri diximus) quisquam vitas eorum mittit in libros, qui aut Principes in re publica non fuerunt, aut a Senatu appellati non sunt Imperatores, aut occisi citius, ad famam venire nequiverunt. Inde, quod latet Vindex, quod Piso nescitur, quod omnes illi, qui aut tantum adoptati sunt, aut a militibus Imperatores appellati, ut sub Domitiano Antonius, aut cito interemti, vitam

cum imperii usurpatione posuerunt. Ac ne quid ex iis, quæ ad Pescennium pertinent, præterisse videamur, (licet aliis libris cognosci possint) de hoc Pescennio vates dixerunt, quod neque vivus neque mortuus in potestatem Severi venturus esset, sed juxta aquas illi pereundum esset: quod quidam dicunt ipsum Severum de mathesi, quam callebat, dixisse. Nec absuit responsis veritas, cum ille inventus sit juxta paludem semivivus.

X. Hic tantæ fuit severitatis, ut, cum milites quosdam in caveo argenteo expeditionis tempore bibere vidisset, jussit omne argentum submoveri de usu expeditionali, addito eo, ut ligneis vasis uterentur: quod quidem illi odium militare concitavit. Dicebat enim, posse fieri, ut sarcinæ militares in potestatem hostium venirent; ne se barbaræ nationes argento nostro gloriosiores facerent, cum alia minus apta hosticam viderentur ad gloriam. Idem jussit vinum in expeditione neminem bibere, sed aceto universos esse contentos. Idem pistores sequi expeditionem prohibuit, buccellato jubens milites & omnes contentos esse. Idem ob unius gallinacei direptionem, decem commanipulones, quæ raptum ab uno commederant, securi percuti jussit; & fecisset, nisi ab omni exercitu prope usque ad metum seditionis esset rogatus: & cum pepercisset, jussit, ut denorum gallinaceorum pretia provinciali redderent decem, qui simul furto convixerant, addito eo, ut tota in expeditione in commanipulatione nemo focum faceret, ne unquam recens coctum cibum sumerent, sed pane ac frigidis

vescerentur, appositis speculatoribus, qui id curarent. Idem iussit, ne in zonis milites ad bellum aureos vel argenteos nummos portarent, sed publice commendarent, recepturi post prœlia, quod dederant: addens, liberis eorum & uxoribus & heredibus certe reddendum, qui venissent, ne ad hostes aliquid prædæ perveniret, si quid forte adversi fortuna fecisset. Sed hæc omnia, ut se habuerat Commodi temporum dissolutio, adversa eidem fuisse. Denique etsi nemo fuit, qui suis temporibus dux severior videretur, ad perniciem illi magis ista fuisse, quam mortuo, ubi & invidia & odium deposita erant, talia exempla valuerunt.

XI. Idem in omni expeditione ante omnes militarem cibum sumit ante papilionem: nec sibi unquam vel contra solem, vel contra imbres quaesivit tecti suffragium, si miles non habuit. Tantum denique belli tempore, ratione militibus demonstrata, sibi & servis suis vel contubernalibus portavit, quantum a militibus ferebatur: cum servos suos oneraret annona, ne illi securi ambularent, & onusti milites, idque ab exercitu cum suspirio videretur. Idem in concione juravit, se, quamdiu in expeditionibus fuisset, essetque adhuc futurus, non aliter esse acturum se, quam militem, Marium ante oculos habentem, & duces tales. nec alias fabulas unquam habuit, nisi de Hannibale, ceterisque talibus. Denique cum Imperatori facto quidam pænegyricum recitare vellet, dixit ei, *Scribe laudes Marii, vel Hannibalis, vel alicujus ducis optimi vita functi, & dic, quid ille fecerit, ut eum nos imitemur.*

nam viventes laudare irriso est, maxime Imperatores, a quibus speratur, qui timentur, qui præsare publice possunt, qui possunt necare, qui proscribere: se autem vivum placere velle, mortuum etiam laudari.

XII. Amavit de Principibus Augustum, Vespasianum, Titum, Trajanum, Pium, Marcum, reliquos *sanctos*, vel *venenatos* vocans: maxime tamen in historiis Marium & Camillum & Quintum Coriolanum dilexit. Interrogatus autem, quid de Scipionibus sentiret, dixisse fertur, felices illos fuisse magis, quam fortes: idque probare domesticam vitam & juventutem, quæ in utroque nimis speciosa domi fuisse apud omnes constat. Quod si rerum potius fuisset, omnia correcturus fuerat, quæ Severus vel non potuit emendare, vel noluit: & quidem sine crudelitate, immo etiam cum lenitate, sed militari, non remissa, & inepta, atque ridicula. Domus ejus hodie Romæ visitur in campo Jovis, quæ appellatur *Pescenniana*; in qua simulacrum ejus in trichoro constituit, statim post annum ex Thebaico marmore, quod ille ad similitudinem sui factum a rege Thebæorum acceperat. Exstat etiam epigramma Græcum, quod Latine hanc habet sententiam:

Terror Ægyptiaci Niger adflat militis ingens,

Thebaidos socius, aurea secla volens.

Hunc reges, hunc gentes amant, hunc aurea Roma:

Hic Antoninis carus & imperio.

Nigrum nomen habet, nigrum formavimus ipsi,

Ut consentiret forma, metalle, tibi.

Quos quidem versus Severus eradi noluit, cum

hoc ei & Præfecti suggererent, & officiorum magistri, addens: *Si talis fuit, sciant omnes, qualem vicerimus: si talis non fuit, putent omnes non talem vicisse: immo sic sit, quia fuit talis.* Sequitur nunc, ut de Clodio Albino dicam, qui quasi socius hujus habetur, quod & pariter contra Severum rebellaverunt, & ab eodem victi atque occisi sunt. De quo ipso neque satis clara exstant: quia eadem fortuna illius fuit, quæ Pescennii, etiamsi vita satis dispar.

JULII CAPITOLINI CLODIUS ALBINUS

A D

DIOCLETIANUM AUG.

I. **U**NO eodemque tempore post Pertinacem, qui, auctore Albino, interemtus est, Julianus a Senatu Romæ, Septimius Severus ab exercitu in Illyrico, Pescennius Niger in Oriente, Clodius Albinus in Gallia, Imperatores appellati sunt. Et Clodium quidem Herodianus dicit Severi Cæsarem fuisse. sed cum alter alterum indignaretur imperare, nec Galli ferre possent aut Germaniani exercitus, quod & ipsi suum specialem Principem haberent, undique cuncta turbata sunt. Fuit autem Clodius Albinus familia nobili, Adrumetinus tamen ex Africa. quare sortem illam, qua Severum laudatum in Pescennii vita diximus, ad se trahebat, nolens intelligi *Pessimus Albus*; quod eodem versu continebatur, quo & Severi laus, & approbatio Nigri Pescennii. Sed priusquam vel de vita ejus, vel de morte differam, etiam hoc dicendum est, quod eum nobilem fecit.

II. Nam ad hunc eundem quondam Commodus, cum successorem Albino daret, literas dederat, quibus jusserat, ut Cæsar esset. Exemplum indidi. *Imperator Commodus Clodio Albino. Alias ad te publice de successore atque honore tuo misi: sed hanc familiarem & domesticam, omnem, ut vides, manu mea scriptam epistolam dirigo, qua tibi do facultatem, ut, si necessitas fuerit, ad milites prœdeas, & tibi Cæsareum nomen assumas. Audio enim, & Septimium Severum & Nonium Murcum male de me apud milites loqui, ut sibi parent stationis Augustæ procurationem. Habebis præterea, cum id feceris, dandi stipendii usque ad tres aureos liberam potestatem: quin & super hoc ad Procuratores meos literas misi, quas ipse signatas excipies signo Amazoniæ: & cum opus fuerit, rationalibus dabis, ne te non audiant, cum de ærario volueris imperare. Sane ut tibi insigne aliquod imperialis majestatis accedat, habebis utendi coccinei pallii facultatem me præsentem, & ad me, & cum mecum fueris, habiturus & purpuram, sed sine auro; quia ita & proavus meus Verus, qui puer vita fundus est, ab Hadriano, qui eum adoptavit, accepit.*

III. His literis acceptis, omnino id, quod jubebat, facere noluit, timens odiosum Commodum propter mores suos, quibus rempublicam perdiderat, & se dedecoraverat, quandocunque feriendum, ne ipse pariter occideretur. Exstat denique illius concio, quæ, cum accepit imperium, & quidem Severi (ut quidam) voluntate firmatum, hujus rei memoriam facit. cujus hoc exemplum est: *Invitum me, commilitones, ductum ad imperium etiam illud probat,*

Scriptu. H. A.

M

quod Commodum, donantem me Casariano nomine, contemsi: sed & vestrae voluntati, & Severi Augusti parendum est; quia credo, sub homine optimo & viro forti posse bene rempublicam regi. Nec negari potest, quod etiam Marius Maximus dicit, hunc animum Severo primum fuisse, ut, si quid ei contingeret, Pescennium Nigrum, & Clodium Albinum sibi substitueret: sed postea & filiis jam majusculis studentem, & Albini amoris invidentem, sententiam mutasse, atque illos utrosque bello oppressisse, maxime precibus uxoris adductum. Denique Severus eum Consulem designavit, quod utique nisi de optimo viro non fecisset, homo in legendis magistratibus diligens.

IV. Sed ut ad eum redeam, fuit, ut dixi, Albinus Adrumonto oriundus, sed nobilis apud suos, & originem a Romanis familiis trahens, Postumiorum scilicet & Albinorum Cejoniorum. quæ familia hodie quoque, Constantine maxime, nobilissima est, & per te aucta & augenda, quæ per Gallienum & Gordianos plurimum crevit. Hic tamen natus lare modico, patrimonio pertenui, parentibus sanctis, patre Cejonio Postumio, matre Aurelia Messalina, primus suis parentibus fuit; cum exceptus utero, quod contra consuetudinem puerorum, qui nascuntur, & solent rubere, esset candidissimus, *Albinus* est dictus. Quod verum esse, patris epistola ad Ælium Bassianum tunc Proconsulem Africæ data designat, affinem (quantum videtur) eorum ipsorum. Epistola Cejonii Postumii ad Ælium Bassianum: *Filius mihi natus est septimo*

Kalendas Decembres, ita candidus statim toto corpore, ut linteamen, quo exceptus est, vinceret. Quare susceptum cum, Albinorum familiæ, quæ mihi tecum communis est, dedi, Albini nomine impositio. Fac, ut rempublicam, & te, & nos, ut facis, diligas.

V. Hic ergo omnem pueritiam in Africa transegit, eruditus literis Græcis ac Latinis mediocriter, quod esset animi jam militaris & superbi. Fertur in scholis sæpissime cantasse inter puerulos,

Arma amens capio, nec sat rationis in armis, repetens, Arma amens capio.

Huic multa imperii signa, cum esset natus, facta dicuntur. nam & bos albus purpureis ad plenum colorem cornibus natus est, quod mirandum fuit: quæ tamen cornua, in templo Apollinis Cumani ab eodem posita jam Tribuno, diu fuisse dicuntur: quod, cum ille sortem de fato suo tolleret, his versibus eidem dicitur esse responsum:

Hic rem Romanam magno turbante tumultu

Sistet eques: sternet Pænos, Gallumque rebellem.

Et in Gallia quidem cum multas gentes domuisse constat. Ipse autem suspicabatur de Severo sibi prædictum, *Sternet Pænos*, quod Septimius Afer esset. Fuit & aliud signum futuri imperii. Nam cum Cæsariana familia hoc speciale habuerit, ut parvuli domus ejus in testudineis alveis lavarentur; nato infantulo testudo ingens patri ejus, munere piscatoris, allata est: quod ille homo literatus omen accipiens, & testudinem libenter accepit, & eam curari jussit, atque infantulo ad exaltationes pueriles dicari, nobilitandum etiam hinc sperans. Cum

rarum esset, aquilas in his locis videri, in quibus natus est Albinus; septima ejus diei hora convivii, quod celebritati pueri deputabatur, cum ei fierent nomina, septem aquilæ parvulæ de nido allatæ sunt, & quasi ad jocum circa cunas pueri constitutæ: nec hoc omen pater abnuvit, qui jussit aquilas ali, & diligenter curari. Accessit omen, quod cum pueri ejus familiæ rufculis fasciis illigarentur, quod forte lotæ atque udæ essent rufculæ fasciæ, quas mater prægnans paraverat, purpurea matris illigatus est fascia: unde illi joco nutricis etiam *Porphyrii* nomen inditum est. Hæc atque alia signa imperii futuri fuere: quæ qui volet nosse, *Ælium Cordum* legat, qui frivola super hujusmodi ominibus cuncta persequitur.

VI. Adolescens igitur statim se ad militiam contulit, atque Antoninis per Lollium Serenum, & Bæbium Mæcianum, & Cejonium Postumianum suos affines innotuit. Egit Tribunus equites Dalmatas: egit & legionem Quartanorum & Primanorum: Bithynicos exercitus eo tempore, quo Avidius rebellabat, fideliter tenuit. Deinde per Commodum ad Gallias translatus, in qua, fufis Frisiis Transrhënanis, celebre nomen suum & apud Romanos, & apud Barbaros fecit. Quibus rebus accensus Commodus, Cæsarianum ei nomen obtulit, & dandi stipendii facultatem, & pallii coccini utendi. Quibus omnibus ille prudenter abstinuit, dicens, *Commodum quærere, qui aut cum eo perirent, aut quos cum causa ipse posset occidere*. Quæsturæ gratia illi facta est: quæ concessa, *Ædilis* non amplius quam decem

diebus fuit, quod ad exercitum festinanter mitteretur. Deinde Præturam egit sub Commodio famosissimam. Nam ejusdem ludis Commodus & in foro, & in theatro pugnas exhibuisse perhibetur. Consul a Severo declaratus est eo tempore, quo Albinum sibi cum Pescennio paraverat subrogare.

VII. Ad imperium venit natu jam grandior, & major Pescennio Nigro, ut Severus ipse in vita sua testatur. Sed victo Pescennio, cum & filiis suis imperium servare cuperet, & voluntatem Senatus majorem circa Clodium Albinum videret, quod esset vir antiquæ familiæ, literas ad eum per quosdam summi honoris ac summæ affectionis misit, quibus hortabatur, ut, quoniam occisus esset Pescennius Niger, ipse cum eo fideliter rempublicam regeret. Quarum exemplum hoc esse Cordus ostendit: *Imperator Severus Augustus Clodio Albino Cæsari, fratri amantissimo & desideratissimo, salutem. Victo Pescennio, literas Romam dedimus, quas Senatus tui amantissimus libenter accepit. Te quaeso, ut eo animo rempublicam regas, quo dilectus es frater animi mei, frater imperii. Bassianus & Geta te salutant. Julia nostra & te, & sororem salutat. Infantulo tuo Pescennio Princeo munera digna suo loco tuoque mittemus. Tu velim exercitus reipublicæ ac nobis retines, mi unanime, mi carissime, mi amantissime.*

VIII. Et has quidem literas missis stipatoribus fidelissimis dedit, quibus præcepit, ut epistolam publice darent, postea vero dicerent, se velle pleraque occulte suggerere, quæ ad res bellicas pertinerent, & ad secreta castrorum atque aulicam fi-

dem: ubi vero in secretum venissent, quasi mandata dicturi, quinque validissimi eum interimerent gladiolis intra vestem latentibus. Nec illorum quidem fides defuit. Nam cum ad Albinum venissent, & epistolam dedissent, qua lecta, cum dicerent quædam secretius suggerenda, & locum semotum ab omnibus arbitris postularent, & cum omnino neminem paterentur ad porticum longissimam cum Albino progredi, ea specie, ne mandata proderentur, Albinus intellexit insidias. Denique indulgens suspicionibus, eos tormentis dedit. qui diu primo pernegarunt, sed postea victi necessitate, confessi sunt ea, quæ Severus iisdem præceperat. Tunc jam proditis rebus, & apertis insidiis, ea, quæ suspicabatur, Albinus clara esse intelligens, exercitu ingenti collecto, contra Severum atque ejus duces venit.

IX. Et primo quidem conflictu habito contra duces Severi, potior fuit: post autem Severus ipse, cum id egisset apud Senatum, ut hostis judicaretur Albinus, contra eum profectus, acerrime fortissimeque pugnavit in Gallia, non sine varietate fortunæ. Denique cum sollicitus augures consuleret, responsum illi est, ut dicit Marius Maximus, venturum quidem in potestatem ejus Albinum, sed non vivum nec mortuum: quod & factum est. Nam cum ultimum proelium commissum esset, innumeris suorum cæsis, plurimis fugatis, multis etiam deditis, Albinus fugit: & ut multi dicunt, se ipse percussit; ut alii, a servo suo percussus, semivivus ad Severum deductus est. Unde confirmatum est augurium, quod fuerat ante prædictum. Multi præ-

terea dicunt, a militibus, cujus nece a Severo gratiam requirebant. Fuit Albino unus, ut aliqui dicunt, filius: Maximus dicit duos. quibus primum veniam dedit, postea vero eos cum matre percussit, & in profluentem abjici jussit. Caput ejus excisum pilo circumtulit, Romamque misit, literis ad Senatum datis, quibus insultabat, quod Albinum tantopere dilexissent, ut ejus affines & fratrem præcipue ingenti honore cumularent. Jacuisse ante prætorium Severi Albini corpus per dies plurimos dicitur usque ad foetorem, laniatumque a canibus in profluentem abjectum esse.

X. De moribus ejus varia dicuntur. Et Severus quidem ipse hæc de eodem loquitur, ut eum dicat turpem, malitiosum, improbum, inhonestum, cupidum, luxuriosum. sed hæc belli tempore, vel post bellum, quando ei jam velut de hoste credi non poterat: cum & ipse ad eum quasi ad amicissimum frequentes miserit literas, & multi de Albino bene fenserint, & Severus ipse *Casarem* suum eundem appellari voluerit, & cum de successore cogitaret, hunc primum habuerit ante oculos. Exstant præterea Marci epistolæ de hoc eodem, quæ testimonium & virtutum ejus ferant & morum: quarum unam inferere ad Præfectos datam super ejus nomine, absurdum non fuit. *Marcus Aurelius Antoninus Præfectis suis salutem. Albino ex familia Cesoniorum, Afro quidem homini, sed non multa ex Afris habenti, Plauilli genero, duas cohortes alares regendas dedi. Est homo exercitatus, vita tristis, gravis moribus. puto eum rebus castrensibus profuturum: certe*

obfuturum non esse, satis novi. Huic salarium duplex decrevi, vestem militarem simplicem, sed loci sui stipendium quadruplum. Hunc vos adhortamini, ut se reipublicæ ostendet, habiturus præmium, quod merebitur. Est & alia epistola, qua idem Marcus Avidii Cassii temporibus de hoc eodem scripsit, cujus exemplum hoc est: Laudanda est Albini constantia, qui graviter deficientes exercitus tenuit, cum ad Avidium Cassum confugerent. & nisi hic fuisset, omnes defecissent. Habemus igitur virum dignum consulatu, quem sufficiam in locum Cassii Papirii, qui mihi exanimis prope jam nuntiatus est. quod interim a te publicari nolo, ne aut ad ipsum Papirium, aut ad ejus affectus perveniat, nosque videamur in locum viventis Consulis subrogasse.

XL. Istæ igitur epistolæ testantur, Albinum virum utilem fuisse. Indicat & illud præcipue, quod ad eas civitates instaurandas, quas Niger attriverat, pecuniam misit, quo facilius sibi earum accolae conciliaret. Gulosum eum Cordus, qui talia persequitur in suis voluminibus, fuisse dicit; & ita quidem, ut pomorum tantum hauserit, quantum ratio humana non patitur. nam & quingentas ficus passarias, quas Græci *callistruthias* vocant, jejunum comedisse dicit, & centum persica Campana, & melones Ostienses decem, & uvarum Lavicanarum pondo viginti, & ficedulas centum, & ostrea quadringenta. Vini sane parcum fuisse dicit: quod Severus negat, qui eum asserit ebrium etiam in bello fuisse. Cum suis etiam nunquam cœnavit, vel propter vinolentiam, ut dicit Severus, vel propter morum acrimoniam. Uxori odiosissimus fuit, servis

injustus, atrox circa militem. Nam sæpe & ordinarios Centuriones, ubi causæ qualitas non postulabat, in crucem sustulit. Verberavit certe virgis sæpissime: neque unquam delictis pepercit. In vestitu nitidissimus fuit, in convivio sordidissimus, & solitudens copię; mulierarius inter primos amatores, averſæ Veneris semper ignarus, & talium persecutor; agricolandi peritissimus, ita ut etiam Georgica scripserit. Milesias nonnulli ejusdem esse dicunt, quarum fama non ignobilis habetur, quamvis mediocriter scriptæ sint.

XII. A Senatu tantum amatus est, quantum nemo Principum, in odium speciatim Severi, quem vehementer ob crudelitatem oderant Senatores. Denique victo eo plurimi Senatores a Severo interfecti sunt, qui ejus partium vel vere fuerant, vel esse videbantur. Denique cum apud Lugdunum eundem interfecisset, statim literas inquiri jussit, ita ut inveniret, vel ad quos ipse scripſisset, vel qui ad eum rescripſissent: omnesque illos, quorum epistolas reperit, hostes judicari a Senatu fecit: nec his pepercit, sed & ipsos interemit, & bona eorum proscripsit, atque in ærarium publicum retulit. Exstat epistola Severi, quæ ostendit animum suum, missa ad Senatum, cujus hoc exemplum est: *Nihil mihi gravius potest evenire, Patres Conscripti, quam ut vestrum judicium Albinus haberet potius, quam Severus. Ego frumenta reipublicæ detuli, ego multa bella pro republica gessi, ego populo Romano tantum olei detuli, quantum rerum natura vix habuit. Ego, interfecto Pescennio Nigro, vos a malis tyrannicis li-*

beravi. Magnam sane mihi reddidistis vicem. magnam gratiam. Unum ex Afris, & quidem Adrumetinis, fingentem, quod de Cejoniorum stemmate sanguinem duceret, usque adeo extulistis, ut eum Principem habere velitis, me Principe, salvis liberis meis. Desuitne quæso tanto Senatui, quem amare deberetis, qui vos amaret? Hujus fratrem honoribus extulistis, ab hoc Consulatus, ab hoc Præturas, ab hoc speratis cujusvis magistratus insignia. Non eam gratiam mihi redditis, quam majores vestri contra Pisonianam factionem, quam item pro Trajano, quam nuper contra Avidium Cassium præstiterunt: fictum illum, & ad omnia mendaciorum genera paratum, qui nobilitatem quoque mentitus est, mihi præposuistis. Quin etiam audiendus in Senatu fuit Statilius Corfulenus, qui honores Albino & ejus fratri decernendos ducebat: cui hoc superfuit, ut de me ille decerneret homo nobilis ad triumphum. Major, fuit dolor, quod illum pro literato laudandum plerique duxistis, cum ille naniis quibusdam anilibus occupatus inter Milesias Punicas Apuleji sui, & ludicra literaria consenesceret. Hinc apparet, quanta severitate factionem vel Pescennianam, vel Clodianam vindicaverit, quæ quidem omnia in vita ejus posita sunt: quæ qui diligentius scire velit, legat Marium Maximum, de Latinis scriptoribus; de Græcis, Herodianum, qui ad fidem pleraque dixerunt.

XIII. Fuit statura procerus, capillo renodi & crispo, fronte lata, & candore mirabili: &, ut plerique putant, ex eo nomen accepit: voce muliebri, & prope ad eunuchorum sonum, motu facili, iracundia gravi, furore tristissimo: in luxuria va-

rius; nam sæpe appetens vini, frequenter abstinens. Armorum strenuus, prorsus ut non male sui temporis Catilina diceretur. Non ab re esse credimus, causas ostendere, quibus amorem Senatus Clodius Albinus meruit. Cum Britannicos exercitus regeret jussu Commodi, atque illum interemtum adhuc falso comperisset, cum sibi ab ipso Commodo Cæsarianum nomen esset delatum, processit ad milites, & hac concione usus est: *Si Senatus populi Romani suum illud vetus haberet imperium, nec in unius potestate res tanta consisteret, non ad Vitellios, neque ad Neronas, neque ad Domitianos publica fata venissent: in imperio consulari nostræ illæ gentes Cætoniorum, Albinorum, Postumiorum: de quibus patres vestri, qui & ipsi ab avis suis audierant, multa didicerunt. Et certe Africam Romano imperio Senatus adjunxit: Galliam Senatus subegit, & Hispanias: Orientalibus populis Senatus dedit leges: Parthos tentavit Senatus, & subegisset, nisi tam avarum Principem Romano exercitui fortuna reipublicæ tunc dedisset. Britannias Cæsar subegit, certe Senator, nondum tamen Dictator. Hic ipse Commodus quāto melior fuisset, si timuisset Senatum? Et usque ad Neronem quidem Senatus auctoritas valuit, qui sordidum & impurum Principem damnare non timuit, cum sententiæ in eum dictæ sunt, qui vitæ necisque potestatem atque imperium tunc tenebat. Quare, commilitones, ego Cæsareum nomen, quod mihi Commodus detulit, nolo. Dii faxint, ut ne alii quidem velint. Senatus impetret, provincias dividat: Senatus nos Consules faciat. & quid dico Senatus? vos ipsi, & patres vestri: eritis enim ipsi Senatores.*

XIV. Hæc concio , vivo adhuc Commodo , Romam delata est. quæ Commodum in Albinum exasperavit : statimque successorem misit Junium Severum , unum ex contubernalibus suis. Senatui autem tantum placuit , ut miris acclamationibus absentem eum ornaret , & vivo Commodo , & deinceps interemto ; ita ut nonnulli etiam Pertinacis auctores fuerint , ut eum sibi socium adscisceret ; apud Julianum , de occidendo Pertinace , ipsius plurimum auctoritas valuerit. Ut autem hoc verum intelligatur , epistolam Commodi ad Præfectos prætorii suos datam inferui , qua de occidendo Albino significavit suam mentem. *Aurelius Commodus Severus Præfectis salutem. Audisse vos credo , primum scitum esse , quod ego meorum consilio interfectus essem : deinde concionem Clodii Albini apud milites meos habitam , qui se multum Senatui commendat , idque , quantum videmus , non frustra. Nam qui Principem unum in republica negat esse debere , quique asserit a Senatu oportere totam rempublicam regi , is per Senatum sibi petitis imperium. Cavete igitur diligentissime : jam enim hominem scitis , vobis , militibus , populoque vitandum. Has literas cum Pertinax invenisset , in Albini odium publicavit. quare Albinus occidendi Pertinacis Juliano auctor fuit.*

ÆLII SPARTIANI
 A N T O N I N U S
 CARACALLUS.

I. **E**x duobus liberis, quos Septimius Severus reliquit, Getam & Bassianum, quorum unum exercitus, alterum pater dixit, Geta hostis est iudicatus; Bassianum autem obtinuisse imperium constat: de cuius majoribus frustra putamus iterandum, cum omnia in Severi vita satis dicta sint. Hujus igitur pueritia blanda, ingeniosa, parentibus affabilis, amicis parentum jucunda, populo accepta, grata Senatui, ipsi etiam ad amorem conciliandum salutaris fuit. Non ille in literis tardus, non in benevolentis seignis, non tenax in largitate, non lentus in clementia, sed sub parentibus, visus. Denique, si quando feris objectos damnatos vidit, flevit, aut oculos avertit: quod populo plusquam amabile fuit. Septennis puer, cum collusorem suum puerum, ob Judaicam religionem gravius verbera-

tum audisset, neque patrem suum, neque patrem pueri, vel auctores verberum, diu respexit. Antiochensibus & Byzantiis interventu suo jura vextusta restituit: quibus iratus fuit Severus, quod Nigrum juverant, Plautiani odium, crudelitatis causa concepit. Quæ a parentibus gratia sigillariorum acceperat, ea vel clientibus, vel magistris sponte donavit. Sed hæc puer.

II. Egredus vero pueritiam, seu patris monitis, seu calliditate ingenii, sive quod se Alexandro Magno Macedoni æquandum putabat, restrictior, gravior, vultu etiam truculentior factus est, prorsus ut eum, quem puerum scierant, multi esse non crederent. Alexandrum Magnum ejusque gesta in ore semper habuit. Tiberium & Sullam in conventu plerumque laudavit. Patre superbior fuit: fratrem magna ejus humilitate despexit. Post patris mortem in castra prætoria pergens, apud milites conquestus est, circumveniri se fratris insidiis: atque ita fratrem in Palatio fecit occidi. ejus corpus statim cremari præcepit. Dixit præterea in castris, fratrem sibi venenum parasse, matri eum irreverentem fuisse: egitque publice iis gratias, qui eum occiderunt. Addidit denique iis, qui fideiiores erga se fuerant, stipendium. Pars militum apud Albam, Getam occisum ægerrime accepit, dicentibus cunctis, duobus se fidem promississe liberis Severi, duobus fervare debere. clausisque portis diu Imperator non admissus, nisi delinitis animis, non solum querelis de Geta & criminationibus editis, sed enormitate stipendii militibus (ut solet) placatis: atque

inde Romam rediit. Tunc sub veste Senatoria lorica habens, cum armatis militibus curiam ingressus est. Hos in medio inter subsellia duplici ordine collocavit, & sic verba fecit. Questus est de fratris insidiis involute & incondite, ad illius accusationem, sui vero excusationem: quod quidem nec Senatus libenter accepit, cum ille dixisset, fratri se omnia permisisse, fratrem ab insidiis liberasse, & illum tamen sibi gravissimas insidias fecisse, nec vicem amoris reddidisse fraterno.

III. Post hoc relegatis deportatisque reditum in patriam restituit: inde ad prætorianos processit, & in castris mansit. Altera die Capitolium petiit, & eos, quos occidere parabat, affabiliter est allocutus, innitensque Papiniano & Ciloni, ad Palatium rediit. Cum flentem matrem Getæ vidisset, aliasque mulieres, post necem fratris, mulieres occidere conatus est: sed ob hoc retentus, ne augeretur fratris occisi crudelitas. Lætum ad mortem coegit, misso a se veneno: ipse enim inter suasores Getæ mortis primus fuerat, qui & primus interemptus est. Ipse mortem ejus sæpissime fleuit. Multos, qui cædis ejus conscii fuerant, interemit, eumque & imaginem ejus honoravit. Post hoc fratrem patruelem Afrum, cui pridie partes de cœna miserat, jussit occidi. qui cum se præcipitasset percussorum timore, & ad uxorem crure fracto ereptisset, tamen per ludibrium a percussoribus deprehensus est, & occisus. Occidit etiam Pompejanum, Marci nepotem, ex filia natum & ex Pompejano, cui nupta fuerat Lucilla post mortem Veri Impe-

ratoris; quem & Consulem his fecerat, & omnibus bellis præposuerat, quæ gravissima tunc fuerunt; & ita quidem, ut videretur a latronibus interemptus.

IV. Deinde in conspectu ejus Papinianus securi percussus est, & a militibus occisus: quo facto percussori dixit, *Gladio te exsequi oportuit meum jussu*. Occisus est etiam ejus jussu Petronius ante templum Divi Pii, tractaque sunt eorum per plateam cadavera, sine aliqua humanitatis reverentia. Filium autem Papiniani, qui ante triduum Quæstor opulentum munus ediderat, interemit. Iisdem diebus occisi sunt innumeri, qui fratris ejus partibus faverant. Occisi etiam liberti, qui Getæ administraverant. Cædes deinde in omnibus locis & in balneis factæ. Occisique nonnulli etiam coenantes: inter quos etiam Sammonicus Serenus, cujus libri plurimi ad doctrinam exstant. In summum discrimen etiam Cilo iterum Præfectus & Consul venit, ob hoc, quod concordiam inter fratres suaserat. Et cum idem Cilo sublata veste senatoria, nudis pedibus, ab urbanicianis raptus esset, Antoninus seditionem compressit. Multas præterea postea cædes in Urbe fecit, passim raptis a militibus nonnullis hominibus, & occisis, quasi seditionem vindicans. Helvium Pertinacem, suffectum Consulem, ob hoc solum, quod filius esset Imperatoris, occidit. Neque cessavit unquam sub diversis occasionibus eos interficere, qui fratris amici fuissent. Sæpe in Senatum, sæpe in populum superbe inductus est, aut edictis propositis, aut orationibus editis, Sullam se etiam ostendens futurum.

V. His gestis Galliam petiit: atque ut primum in eam venit, Narbonensem Proconsulem occidit. Cunctis deinde turbatis, qui in Gallia res gerebant, odium tyrannicum meruit, quamvis aliquando fingeret se benignum, cum esset natura truculentus. Et cum multa contra homines & contra jura civitatum fecisset, morbo implicitus graviter laboravit. Circa eos, qui eum curabant, crudelissimus fuit. Deinde ad Orientem profectionem parans, omisso itinere in Dacia resedit. Circa Rhætiam non paucos Barbaros interemit, militesque suos quasi Sulla milites & cohortatus est, & donavit. Deorum sane se nominibus appellari vetuit, quod Commodus fecerat; cum illi eum, quod leonem aliasque feras occidisset, Herculem dicerent. Et cum Germanos subegisset, *Germanicum* se appellavit, vel joco, vel serio, ut erat stultus & demens; asserens, si Lucanos vicisset, *Lucanicum* se appellandum. Damnati sunt eo tempore, qui urinam in eò loco fecerunt, in quo statuæ, aut imagines erant Principis: & qui coronas imaginibus ejus detraxerant, ut alias ponerent. Damnati sunt & qui remedia quartanis tertianisque collo annexa gestarent. Per Thracias cum Præfecto prætorii iter fecit. Inde cum in Asiam trajiceret, naufragii periculum adiit, antenna fracta, ita ut in scapham cum protectoribus descenderet. unde in triremem a Præfecto classis receptus, evasit. Excepit apros frequenter, contra leonem etiam stetit: quo etiam missis ad amicos literis gloriatus est, seque ad Herculis virtutem accessisse jactavit.

Script. H. A.

N

VI. Post hoc ad bellum Armeniacum Parthicumque conversus, ducem bellicum, qui suis compete-
bat moribus, fecit. Inde Alexandriam petiit: in gym-
nasium populum convocavit, eumque objurga-
vit: legi etiam validos ad militiam præcepit. Eos
autem, quos legerat, occidit, exemplo Ptolemæi
Evergetis, qui octavus hoc nomine appellatus est.
Dato præterea signo militibus, ut hospites suos oc-
ciderent, magnam cædem Alexandriæ fecit. Dehinc
per Cadusios & Babylonios ingressus, tumultuarie
cum Parthorum satrapis manum contulit, feris
etiam bestiis in hostes immisis. Datis ad Senatum,
quasi post victoriam, literis, Parthicus appellatus
est: nam Germanici nomen patre vivo fuerat con-
secutus. Deinde cum iterum vellet Parthis bellum
inferre, atque hibernare Edeßæ, atque inde Carras
Luni Dei gratia venisset, die natalis sui, octavo Idus
Aprilis, ipsis Megalensibus, cum ad requisita naturæ
discessisset, insidiis a Macrino Præfecto pratorii
positis, qui post eum invasit imperium, interemptus
est. Conscii cædis fuerunt Nemesianus, & frater
ejus Apollinaris, Retianusque, qui Præfectus legio-
nis secundæ Parthicæ militabat, & qui equitibus
extraordinariis præerat, non ignorantibus Marcio
Agrippa, qui classi præerat, & præterea plerisque
officialium, impulsu Martialis.

VII. Occisus est autem in medio itinere inter
Carras & Edeßam, cum levandæ vesicæ gratia ex
equo descendisset, atque inter protectores suos,
conjuratos cædis, ageret. Denique cum illum in
equum strator ejus levaret, pugione latus ejus con-

fodit : conclamatumque ab omnibus est, id Martialem fecisse. Et quoniam Dei Luni fecimus mentionem, sciendum, doctissimis quibusque id memoriæ traditum, atque ita nunc quoque a Carrenis præcipue haberi, ut, qui Lunam femineo nomine ac sexu putaverit nuncupandam, is addictus mulieribus semper interserviat : at vero qui marem Deum esse crediderit, is dominetur uxori, neque ulla muliebres patiatur infidias. Unde, quamvis Græci vel Ægyptii eo genere, quo feminam hominem, etiam Lunam Deam dicant, mystice tamen Deum dicunt.

VIII. Scio de Papiniani nece multos ita in literas retulisse, ut cædis non sciverint causam, aliis alia referentibus : sed ego malui veritatem opinionum edere, quam de tanti viri cæde reticere. Papinianum amicissimum fuisse Imperatori Severo, &, ut aliqui loquuntur, affinem etiam per secundam uxorem, memoriæ traditur : & huic præcipue utrumque filium a Severo commendatum, eumque cum Severo professum sub Scævola, & Severo in advocacy fisci successisse, atque ad hoc concordiam fratrum Antoninorum fovisse : egisse quin etiam, ne occideretur, cum jam de infidiis ejus Bassianus quereretur : atque ideo una cum iis, qui fautores fuerant Getæ, a militibus, non solum permittente, verum etiam suadente Antonino, occisum. Multi dicunt, Bassianum, occiso fratre, illi mandasse, ut & in Senatu per se & apud populum facinus dilueret : illum autem respondisse, *Non tam facile parricidium excusari posse, quam fieri.* Est etiam hæc fabella, quod dictare noluerit orationem, qua invehendum

erat in fratrem, ut causa ejus melior fieret, qui occiderat: illum autem negantem respondisse, *Aliud est parricidium, accusare innocentem occisum*. Sed hoc omnino non convenit: nam neque Præfectus poterat dictare orationem: & constat, eum quasi fautorem Getæ occisum. Et fertur quidem, Papinianum, cum raptus a militibus ad Palatium traheretur occidendus, prædivinasse, dicentem; *Stultissimum fore, qui in suum subrogaretur locum, nisi appetitam crudeliter Præfecturam vindicaret*. Quod factum est: nam Macrinus Antoninum occidit, ut supra exposuimus: qui cum filio factus in castris Imperator, filium suum, qui *Diadumenus* vocabatur, *Antoninum* vocavit, idcirco quod a prætorianis multum Antoninus desideratus est.

IX. Vixit autem Bassianus annis quadraginta tribus. Imperavit annis sex. Publico funere elatus est. Filium reliquit, qui postea & ipse *Marcus Antoninus Heliogabalus* est dictus: ita enim nomen Antoninorum inoleverat, ut velli ex animis hominum non posset, quod omnium pectora, velut Augusti nomen, obfederat. Fuit male moratus, & patre duro crudelior. Avidus cibi, vini etiam appetens, suis odiosus, &, præter milites prætorianos, omnibus castris exosus: prorsus nihil inter fratres simile. Opera Romæ reliquit, thermas nominis sui eximias: quarum cellam solearem architecti negant posse ulla imitatione, qua facta est, fieri. nam & ex ære vel cupro cancelli superpositi esse dicuntur, quibus cameratio tota concredita est: & tantum est spatium, ut id ipsum fieri negent potuisse docti

mechanici. Reliquit & porticum patris nomine, quæ gesta illius contineret, & triumphos, & bella. Ipse *Caracalli* nomen accepit à vestimento, quod populo dederat, demisso usque ad talos, quod ante non fuerat: unde hodieque Antoninianæ dicuntur caracallæ hujusmodi, in usu maxime Romanæ plebis frequentatæ. Idem viam novam munivit, quæ est sub ejus thermis, Antoninianis scilicet, qua pulchrius inter Romanas plateas non facile quidquam invenias. Sacra Iſidis Romam deportavit, & templa ubique magnifica eidem Deæ fecit. Sacra etiam majore reverentia celebravit, quam ante celebrabantur. In quo quidem mihi mirum videtur, quemadmodum sacra Iſidis primum per hunc Romam venisse dicantur; cum Antoninus Commodus ita ea celebraverit, ut & Anubin portaret, & pausas ederet: nisi si forte iste addidit celebritati, non eam primus invexit. Corpus ejus Antoninorum sepulcro illatum est, ut ea sedes reliquias ejus acciperet, quæ nomen addiderat.

X. Interest scire, quemadmodum novercam suam Juliam uxorem duxisse dicatur. Quæ cum esset pulcherrima, & quasi per negligentiam se maxima corporis parte nudasset, dixissetque Antoninus, *Vellem, si liceret*: respondisse fertur, *Si libet, licet. An nescis, te Imperatorem esse, & leges dare, non accipere?* Quo audito, furor inconditus ad effectum criminis roboratus est, nuptiasque eas celebravit, quas, si sciret se leges dare, vere solus prohibere debuisset. Matrem enim (non alio dicenda erat nomine) *Juniam* uxorem, ad parricidium junxit incestum: liqui-

dem eam matrimonio sociavit; cuius filium nuper occiderat. Non ab re est, diasyrpticum quiddam in eum dictum addere. nam cum *Germanici*, & *Parthici*, & *Arabioi*, & *Alemannici* nomen adscriberet, (nam Alemannorum gentem devicerat) Helvius Pertinax, filius Pertinacis, dicitur joco dixisse, *Adde, si placet, etiam Geticus Maximus*, quod Getam occiderat fratrem, & Gothi *Getæ* dicerentur; quos ille, dum ad Orientem transit, tumultuariis proeliis devicerat.

XI. Occidendi Getæ multa prodigia exstiterunt, ut in vita ejus exponemus. Nam quamvis prior ille e vita excefferit, nos tamen ordinem secuti sumus, ut, qui & prior natus est, & prior imperare coeperat, prior scriberetur. Eo sane tempore, quo ab exercitu appellatus est Augustus vivo patre, quod ille pedibus æger gubernare non posse videretur imperium, contulis animis militum & Tribunorum, Severus dicitur animo voluisse, ut & hunc occideret, nisi repugnassent Præfecti ejus, graves viri. Aliqui contra dicunt, Præfectos voluisse id fieri, sed Septimium noluisse, ne & severitas illius crudelitatis nomine inquinaretur; & cum auctores criminis milites fuerint, adolescens stultæ temeritatis pœnas lueret tam gravis supplicii titulo, ut a patre videretur occisus. Hic tamen omnium durissimus, & ut uno complectamur verbo, parricida, & incestus, patris & matris & fratris inimicus, a Marcino, qui eum occiderat, timore militum, ac maxime prætorianorum, inter Deos relatus est. habet templum, habet Salios, habet sodales Antoninia-

nos, qui Faustinae templum & divale nomen eripuit: certe templum, quod ei sub Tauri radicibus fundaverat olim maritus Antoninus, in quo postea filius hujus Bassiani Heliogabalus Antoninus sibi, vel Jovi Syrio, vel Soli (incertum enim id est) templum fecit.

ÆLII SPARTIANI ANTONINUS GETA

A D

CONSTANTINUM AUG.

I. SCIO, Constantine Auguste, & multos, & clementiam tuam quæstionem movere posse, cur etiam Geta Antoninus a me tradatur. de cujus priusquam vel vita, vel nece dicam, differam, cur & ipsi *Antonini* a Severo patre sit nomen appositum. Neque enim multa in ejus vita dici possunt, qui prius rebus humanis exemptus est, quam cum fratre teneret imperium. Septimius Severus quodam tempore cum consulisset ac petiisset, ut sibi indicaretur, quo esset successore moriturus, in somnis vidit Antoninum sibi successurum: quare statim ad milites processit, & Bassianum, filium majorem natu, *Marcum Aurelium Antoninum* appellavit. Quod cum fecisset, paterna cogitatione, vel, ut quidam dicunt, a Julia uxore commonitus, quæ gnara erat somnii, quod minori filio hoc facto ipse interclusisset adi-

tum imperandi, etiam Getam minorem filium, *Antoninum* vocari iussit. Itaque semper ab eo in epistolis familiaribus dictus est Antoninus; cum, si forte abesset, scriberet, *Salutate Antoninos filios & successores meos*. Sed nihil valuit patris matrisve cautio: nam solus ille successit, qui primus Antonini nomen accepit. Et hæc de Antonini nomine.

II. *Geta* autem dictus est, vel a patris nomine, vel avi paterni: de cuius vita & moribus in vita Severi Marius Maximus primo septenario satis copiose retulit. Fuit autem Antoninus Geta etiam ob hoc ita dictus, quod in animo habuit Severus, ut omnes deinceps Principes, quemadmodum *Augusti*, ita etiam *Antonini* dicerentur: atque amore Marci, quem fuisse vel fratrem suum dicebat, & cuius philosophiam literarumque institutionem semper imitatus est. Dicunt aliqui, non in Marci honorem tantum Antonini nomini delatum, cum id Marcus adoptivum habuerit, sed in ejus, qui Pius cognominatus est, Hadriani scilicet successoris: & quidem ob hoc, quod Severum ille ad fisci advocacy delegerat ex formulario forensi, cum ad tantos processus ei patuisset dati ab Antonino primi gradus vel honoris auspiciis: simul quod nemo ei videretur felicius Imperator ad commodandum nomen, eo Principe, cuius proprium nomen jam per quatuor Principes cucurrisset. De hoc eodem Severus, gnarus genituræ illius, cuius, ut plerique Afrorum, peritissimus fuit, dixisse fertur, *Mihi mihi videtur, Juvenalis amantiſſime, Geta noster Divus futurus, cuius nihil imperiale in genitura vi-*

deo. erat enim Juvenalis Præfectus ejus prætorio. Nec eum fefellit, nam Bassianus, cum eum occidisset, ac vereretur tyrannicam ex parricidio notam, audiretque, posse mitigari facinus, si Divum fratrem appellaret, dixisse fertur, *Sit Divus, dum non sit vivus.* Denique eum inter Divos retulit, atque ideo utcunque rediit cum fama in gratiam parricida.

III. Natus est Geta, Severo & Vitellio Consulibus, Mediolani, etsi aliter alii prodiderunt, sexto Kalendas Junias, ex Julia, quam idcirco Severus uxorem duxerat, quod eam in genitura habere compererat, ut regis uxor esset, isque privatus, sed jam optimi in republica loci. Statim ut natus est, nuntiatum est, ovum gallinam in aula peperisse purpureum. Quod cum allatum Bassianus frater ejus accepisset, & quasi parvulus applosum ad terram fregisset, Julia dixisse fertur joco, *Maledicte parricida, fratrem tuum occidisti.* Idque joco dictum, Severus altius quam quisquam præsentium accepit: a circumstantibus autem postea, velut divinitus effusum, approbatum est. Fuit etiam aliud omen. nam cum in villa cujusdam Antonini, plebei hominis, agnus natus esset, qui vellus in fronte purpureum haberet, eadem die atque hora, qua Geta natus est, audissetque ille ab haruspice, post Severum, Antoninum imperaturum, ac de se ille auguraretur, sed tamen tale fati timeret indicium, ferro eum adegit: quod & ipsum signo fuit, Getam ab Antonino interimendum, ut postea satis claruit. Fuit etiam aliud omen ingens postea, ut exitus docuit hujus facinoris, quod evenit. Nam cum infan-

tis Getæ natalem Severus commendare vellet, hostiam popa nomine Antoninus percussit: quod tunc nec quæsitum, nec animadversum, post vero intellectum est.

IV. Fuit adolescens moribus asperis, sed non impiis, a natura decorus, tractator, gulosus, cupidus ciborum & vini varie conditi. Hujus illud pueri fertur insigne, quod cum vellet partium diversarum viros Severus occidere, & inter suos diceret, *Hostes vobis eripio*; consentiretque adeo usque Bassianus, ut eorum etiam liberos, si sibi consuleret, diceret occidendos: Geta interrogasse fertur, quantus esset interficiendorum numerus: cumque dixisset pater, ille interrogavit, *Isti habent parentes, habent propinquos?* cum responsum esset, habere complures: *Ergo in civitate*, ait, *plures erunt tristes, quam lati, quod vicimus.* Et obtinuisset ejus sententia, nisi Plautianus Præfectus vel Juvnalis institissent spe proscriptionum, ex quibus ditati sunt. His accedebat Bassiani fratris nimia crudelitas: qui cum contenderet, & diceret quasi joco, quasi serio, omnes cum liberis occidendos partium diversarum, Geta ei dixisse dicitur, *Tu, qui nulli parcis, potes etiam fratrem occidere.* quod dictum ejus tunc nihil, post vero præfagium fuit.

V. Fuit in literis assequendis & tenax veterum scriptorum, & paternarum etiam sententiarum memor, fratri semper invisus, matri amabilius, quam frater, subbalbe, tamen canorus. Vestitus nitidi cupidissimus, ita ut patri doleret: si quid acciperet a præsentibus, id ad suum contulit cultum, neque

quidquam cuiquam dedit. Post Parthicum bellum pater cum ingenti gloria floreret, Bassiano particeps imperii appellato, Geta quoque Cæsaris & Antonini, ut quidam dicunt, nomen accepit. Familiare illi fuit has quæstiones Grammaticis proponere, ut dicerent, singula animalia quomodo vocem emitterent, velut, *Agni balant, porcelli grunniunt, palumbes minurriunt, ursi sieviunt, leones rugiunt, leopardi rickant, elephanti barriunt, ranæ coaxant, equi hinnunt, asini rudunt, tauri mugiunt*, easque de veteribus approbare. Sereni Sammonici libros familiarissimos habuit, quos ille ad Antoninum scripsit. Habebat etiam istam consuetudinem, ut convivium, & maxime prandia, per singulas literas haberet, scientibus servis: velut in quo erat anser, aprugna, anas; item pullus, perdix, pavus, porcellus, piscis, perna, & quæ in eam literam genera edulium caderent; & item *fasianus, farta, ficus, & talia*. Quare comis etiam habebatur in adolescentia.

VI. Occiso eo, pars militum, quæ incorrupta erat, parricidium ægerrime accepit, dicentibus cunctis, duobus se liberis fidem promississe, duobus servare debere: clausisque portis diu non est Imperator admissus. Denique nisi querelis de Geta editis, & animis militum delinitis, enormibus etiam stipendiis datis, Romam Bassianus redire non potuit. Post hæc denique & Papinianus, & multi alii interemti sunt, qui vel concordie faverant, vel qui partium Getæ fuerant, ita ut utriusque ordinis viri & in balneo cœnantes, & in publico percuterentur; Papinianus ipse securi percussus sit, im-

probante Bassiano, quod non gladio res peracta sit. Ventum denique est usque ad seditionem urbanianorum militum, quos quidem non levi auctoritate Bassianus compressit, tribuno eorum, ut alii dicunt, interfecto; ut alii, relegato. Ipse autem tantum timuit, ut loricam sub lato habens clavo, etiam curiam sit ingressus, atque ita rationem facti sui & necis Geticæ reddiderit. Quo quidem tempore Helvius Pertinax, qui postea est ab eodem Bassiano interemptus, recitanti Faustino prætori & dicenti, *Sarmaticus maximus & Parthicus maximus*, dixisse dicitur, *Adde & Geticus maximus*, quasi Gothicus: quod dictum altius in pectus Bassiani descendit, ut postea nece Pertinacis est approbatum: nec solum Pertinacis, sed & aliorum, ut supra dictum est, passim & inique. Helvium autem etiam suspectum habuit affectatæ tyrannidis, quod esset in amore omnium, & filius Pertinacis Imperatoris: quæ res nulli facile privato satis tuta est.

VII. Funus Getæ accuratius fuisse dicitur, quam ejus, qui a fratre videretur occisus. Illatusque est majorum sepulcro, hoc est Severi, quod est in Appia via euntibus ad portam dextrum, specie Septizonii exstructum, quod sibi ille vivus ornaverat. Occidere voluit & matrem Getæ, novercam suam, quod fratrem lugeret, & mulieres, quas post reditum de curia flentes reperit. Fuit præterea ejus immanitatis Antoninus, ut iis præcipue blandiretur, quos ad necem destinabat, ut ejus magis blandimentum timeretur, quam iracundia. Mirum sane omnibus videbatur, quod mortem Getæ toties ipse

etiam fleret, quoties nominis ejus mentio fieret, quoties imago videretur aut statua. Varietas autem tanta fuit Antonini Bassiani, immo tanta sitis cædis, ut modo fautores Getæ, modo inimicos occideret, quos fors obtulisset: quo factò magis Getæ desiderabatur.

JULII CAPITOLINI OPILIUS MACRINUS

A D

DIOCLETIANUM AUG.

I. **V**ITÆ illorum Principum, seu Tyrannorum, five Cæsarum, qui non diu imperaverunt, in obscuro latent, idcirco quod neque de privata eorum vita digna sunt quæ dicantur, cum omnino ne scientur quidem, nisi aspirassent ad imperium; & de imperio, quod non diu tenuerunt, non multa dici possunt: nos tamen ex diversis historiis eruta in lucem proferemus, & ea quidem, quæ memoratu digna erunt. non enim est quisquam in vita, qui non ad diem quodcunque fecerit. Sed ejus, qui vitas aliorum scribere orditur, officium est, digna cognitione perscribere. Et Junio quidem Cordo studium fuit eorum Imperatorum vitas edere, quos obscuriores videbat: qui non multum profecit. nam & pauca reperit, & indigna memoratu, asserens, se minima quæque persecuturum: quasi vel de Tra-

jano, aut Pio, aut Marco sciendum sit, quoties processerit, quando cibos variaverit, & quando vestem mutaverit, & quos quando promoverit: quæ ille omnia exsequendo, libros mythistoriis replevit talia scribendo: cum omnino rerum vilium aut nulla scribenda sint, aut nimis pauca, si tamen ex his mores possint animadverti, qui revera sciendi sunt; sed ex parte, ut ex ea cetera colligantur.

II. Occiso ergo Antonino Bassiano, Opilius Macrinus, Præfectus prætorio ejus, qui antea privatas curarat, imperium arripuit, humili natus loco, & animi atque oris inverecundi: seque nunc Severum, nunc Antoninum, cum in odio esset omnium & hominum, & militum, nuncupavit. Statimque ad bellum Parthicum profectus, & judicandi de se militibus, & rumoribus, quibus premebatur, adolescendi potestatem demisit: quamvis Senatus eum Imperatorem odio Antonini Bassiani libenter acceperit, cum in Senatu omnibus una vox esset, *quemvis magis quam parricidam, quemvis magis quam incestum, quemvis magis quam impurum, quemvis magis quam interfectorem & Senatus & populi*. Et mirum omnibus fortasse videatur, cur Diadumenus, filius Macrini, *Antoninus* voluerit nuncupari, cum auctor necis Antoninianæ fuisse dicatur.

III. De ipso quæ in annales relata sunt, profetam. Vates cœlestis apud Carthaginem, quæ Deo repleta solet vera canere, sub Antonino Pio, cum, sciscitante Proconsule de statu, ut solebat, publico, & de suo imperio, futura prædiceret, ubi ad Principes ventum est, clara voce numerari

jussit, quoties diceret *Antoninum*; tuncque attentis omnibus, *Antonini* nomen *Augusti* octavo edidit. Sed credentibus cunctis, quod octo annis Antoninus Pius imperaturus esset, & ille transcendit hunc annorum numerum, & constitit apud credentes, vel tunc, vel postea, per vatem aliud designatum. Denique annumeratis omnibus, qui Antonini appellati sunt, is Antoninorum numerus invenitur. Enimvero Pius primus, Marcus secundus, Verus tertius, Commodus quartus, quintus Caracallus, sextus Geta, septimus Diadumenus, octavus Heliogabalus, Antonini fuere. Nec inter Antoninos referendi sunt duo Gordiani, qui aut prænomen tantum Antoninorum habuerunt, aut etiam Antonii dicti sunt, non Antonini. Inde est, quod se & Severus *Antoninum* vocavit, & plurimi fuerunt, & Pertinax, & Julianus, & idem Macrinus. Et ab ipsis Antoninis, qui veri successores Antonini fuerunt, hoc nomen magis, quam proprium, retentum est. Hæc alii. Sed alii idcirco *Antoninum* Diadumenum a Macrino patre appellatum ferunt, ut suspicio a Macrino intercepti Antonini Bassiani militibus tolleretur. Alii vero tantum desiderium nominis hujus fuisse dicunt, ut, nisi populus & milites Antonini nomen audirent, imperium non putarent.

IV. Et de Macrino quidem in Senatu a multis; quando nuntiatum est Varium Heliogabalum Imperatorem, cum jam Cæsarem Alexandrum Senatus dixisset, ea dicta sunt, ut appareat, ignobilem, fœdum, spurcum fuisse. Verba denique Aurelii Victoris, cui Pinio cognomen erat, hæc fuerunt:

Scriptu. H. A.

O

Macrinum libertinum hominem prostibulum, servilibus officiis occupatum in domo imperatoria, venali fide, vita sordida sub Commodò, a Severo remotum etiam a miserrimis officiis, relegatumque in Africam, ubi, ut infamiam damnationis tegetet, lectioni operam dedisse, egisse causulas, declamasse, jus postremo dixisse. Donatum autem anulis aureis, patrocinate sibi libertò suo Festo; advocatum fisci factum sub Vero Antonino. Sed & hæc dubia ponuntur, & alia dicuntur ab aliis, quæ ipsa quoque non tacebimus. Nam ple-rique gladiatoriam pugnam eum exhibuisse dixerunt, &, accepta rudi, ad Africam isse: venatorem primo, post etiam tabellionem fuisse, deinceps advocatum fuisse fisci: ex quo officio ad amplissima quæque pervenit. Deinde cum esset Præfectus prætorio, collega ablegato, Antoninum Caracallum Imperatorem suum interemit, tanta fisione, ut ab eo non videretur occisus. nam stratore ejus redempto, & spe ingenti proposita, id egit, ut quasi militari- bus insidiis, quod vel ob parricidium vel incestum displiceret, interemptus diceretur.

V. Statim denique arripuit imperium, filio Diadumeno in participatum adscito, quem continuo, ut diximus, *Antoninum* appellari a militibus jussit. Deinde corpus Antonini Romam remisit, sepulcris majorum inferendum. Mandavit collegæ dudum suo Præfecto prætorii, ut munus suum curaret, ac præcipue Antoninum honorabiliter sepeliret, ducto funere regio: quod sciebat, ob vestimenta populo & congiaria data, multum Antoninum a plebe dilectum. Accedebat etiam illud, quod militarem mo-

tum timebat, ne, eo interveniente, suum impediretur imperium: quod raptum ierat, sed quasi invitatus acceperat; ut sunt homines, qui ad ea se cogi dicunt, quæ vel sceleribus comparant. Timuit autem etiam collegam, ne & ipse imperare cuperet, sperantibus cunctis, quod si unius numeri consensus accederet, neque ille recusaret, & omnes cupidissime id facerent odio Macrini, vel propter vitam improbam, vel propter ignobilitatem, cum omnes superiores nobiles fuissent Imperatores. Infulsit præterea nomen Severi, cum illius nulla cognatione tangeretur: unde locus exstitit, *Sic Macrinus est Severus, quomodo Diadumenus Antoninus*. Statim tamen ad delendum militum motum, stipendium & legionariis & prætorianis dedit solito uberius, utpote qui extenuare cuperet Imperatoris occisi crimen: profuitque pecunia, ut solet, cui innocentia prodesse non poterat. Retentus est enim aliquanto tempore in imperio homo vitiorum omnium. Ad Senatum deinde literas misit de morte Antonini, *Divum* illum appellans, excusansque se, & iurans, quod de cæde illius nescierit. Ita sceleri suo, more hominum perditorum, junxit perjurium, a quo incipere decuit hominem improbum.

VI. Cum ad Senatum scriberet, interest scire, cujusmodi oratio fuerit, qua se excusavit, ut & impudentia hominis noscatur, & sacrilegium, a quo initium sumfit improbus Imperator. Capita ex oratione Macrini & Diadumeni Imperatorum: *Vellimus, Patres conscripti, & incolumi Antonino nostro, & revelto cum triumpho, vestram clementiam videre.*

tunc demum enim florente republica & omnes felices
 essemus, & sub eo Principe viveremus, quem nobis An-
 toninorum loco Dii dederant. Verum quia id evenire
 per tumultum militarem non potuit, nuntiamus pri-
 mum, quid de nobis exercitus fecerit: deinde honores
 divinos (quod primum faciendum est) decernimus ei
 viro, in cujus verba juravimus; cum exercitus ultorem
 cadis Bassiani neminem digniorem Præfecto ejus puta-
 vit, cui & ipse utique vindicandam factionem manda-
 set, si vivus deprendere potuisset. Et infra: Detulerunt ad
 me imperium, cujus ego, Patres conscripti, interim tu-
 telam recepi; tenebo regimen, si & vobis placuerit, quod
 militibus placuit, quibus & stipendium dedi, & omnia
 imperatorio more jussi. Item infra: Diadumenum fi-
 lium meum vobis notum, & imperio miles donavit &
 nomine, Antoninum videlicet appellans, ut cohonestat-
 retur prius nomine, sic etiam regni honore: quod vos,
 Patres conscripti, bono faustoque omine approbetis
 petimus, ne vobis desit Antoninorum nomen, quod
 maxime diligitis. Item infra: Antonino autem divi-
 nos honores & miles decrevit, & nos decrevimus: &
 vos, Patres conscripti, ut decernatis, cum possinus
 imperatorio jure præcipere, tamen rogamus; dicantes
 & duas statuas equestres, pedestres duas habitu milita-
 ri, sedentes civili habitu duas; item divo Severo duas
 triumphales. Quæ omnia, Patres conscripti, vos
 impleri jubebitis, nobis religiose pro prioribus ambi-
 entibus.

VII. Lectis igitur in Senatu literis, contra opi-
 nionem omnium & mortem Antonini Senatus gra-
 tanter accepit, & Opilium Macrinum, libertatem

publicam curaturum sperans, primum in patricios allegit, novum hominem, & qui paulo ante procurator privatæ rei fuisset. Eundem, cum scriba Pontificum esset, (quos hodie Pontifices minores vocant) Pontificem maximum appellavit, *Pii* nomine decreto. Diu tamen, lectis literis, cum omnino nemo crederet de Antonini morte, silentium fuit. Sed posteaquam constitit occisum, Senatus in eum, velut in tyrannum, investus est. Denique statim Macrino & proconsulare imperium, & potestatem tribuniciam detulerunt. Filium sane suum, cum ipse *Felicitis* nomen recepisset, ut suspicionem occisi a se Antonini Bassiani removeret, *Antoninum* vocavit, *Diadumenum* antea dictum. quod quidem etiam Varius Heliogabalus, qui se Bassiani filium diceret, homo sordidissimus, & ex meretrice conceptus, idem postea nomen accepit. Denique versus exstant cujusdam poetæ, quibus ostenditur, Antonini nomen coepisse a Pio, & paulatim per Antoninos usque ad sordes ultimas pervenisse: siquidem solus Marcus nomen illud sanctum vitæ genere auxisse videtur, Verus autem degenerasse, Commodus vero etiam polluisse sacri nominis reverentiam. jam quid de Caracallo Antonino, quidve de hoc potest dici? postremo etiam quid de Heliogabalo, qui Antoninorum ultimus in summa impuritate vixisse memoratur?

VIII. Appellatus igitur Imperator, suscepto bello contra Parthos, profectus est magno apparatu; studens sordes generis & prioris vitæ infamiam virtutis magnitudine abolere. Sed conflictu habito

contra Parthos, defeſſu legionum, quæ ad Varium Heliogabalum confugerant, interemtus eſt. Sed anno amplius imperavit. Sane cum eſſet inferior in eo bello, quod Antoninus geſſerat, Artabane graviter necem ſuorum civium vindicante, primo Macrinus repugnavit: poſtea vero miſſis legatis petiit pacem, quam libenti animo interfeſſo Antonio Parthus conceſſit. Inde cum ſe Antiochiam recepiſſet, ac luxuriæ operam daret, juſtam cauſam interficiendi ſui præbuit exercitui, ac Baſſiani, ut putabatur, filium ſequendi, id eſt, *Heliogabalum Baſſianum Varium*, qui poſtea & *Baſſianus* & *Antoninus* appellatus eſt.

IX. Fuit quædam mulier Mæſa, ſive Varia, ex Emiſſena urbe, ſoror Juliæ uxoris Severi Pertinacis Afri, quæ poſt mortem Antonini Baſſiani ex aulica domo fuerat expulſa per Macrini ſuperbiam; cui quidem omnia conceſſit Macrinus, quæ diu illa collegerat. Huic erant duæ filiæ, Semiamira & Mammæa, quarum majori filius erat Heliogabalus, qui & Baſſiani & Antonini nomen accepit. nam Heliogabalus Phœnices vocant ſolem. Sed Heliogabalus pulchritudine, ac ſtatura, & ſacerdotio conſpicuus erat, ac notus omnibus hominibus, qui ad templum veniebant, militibus præcipue. His Mæſa, ſive Varia, dixit, Baſſianum filium eſſe Antonini, quod paulatim omnibus militibus innotuit. Erat præterea Mæſa ipſa ditiffima, ex quo etiam Heliogabalus luxurioſiſſimus: qua promittente militibus, legiones abductæ ſunt a Macrino. Suſcepta enim illa noctu in oppidum cum ſuis, nepos

ejus *Antoninus* est appellatus, imperii delatis insignibus.

X. Hæc ubi sunt Macrino apud Antiochiam posito nuntiata, miratus audaciam muliebrem, simul etiam contemnens, Julianum Præfectum ad obsidendos eos cum legionibus misit. Quibus cum Antoninus ostenderetur, miro amore in eum omnibus inclinatis, occiso Juliano Præfecto, ad eum omnes transierunt. Deinde parte exercitus conjuncta, venit contra Macrinum Antoninus, contra se festinantem: commissoque prælio, Macrinus est victus proditione militum ejus, & amore Antonini. fugiens sane Macrinus cum paucis & filio, in vi-co quodam Bithyniæ occisus est cum Diadumeno: ablatumque ejus caput est, & ad Antoninum perlatum. Sciendum præterea, quod Cæsar fuisse dicatur, non Augustus, Diadumenus puer, quem plerique pari fuisse cum patre imperio tradiderunt. Occisus est etiam filius, cui hoc solum attulit imperium, ut interficeretur a milite. non enim aliquid dignum in ejus vita erat, quod dicatur, præter hoc, quod Antoninorum nomini est velut nothus appositus.

XI. Fuit Macrinus tamen in vita imperatoria paulo rigidior & austerior, sperans, se antea facta omnia posse oblivioni dare, cum ipsa severitas illius occasionem reprehendendi & lacerandi ejus aperiret. Nam & *Severum* se & *Pertinacem* voluerat nuncupari: quæ duo illi asperitatis nomina videbantur. & cum illum Senatus *Pium* ac *Felicem* nuncupasset, Felicis nomen recepit, Pii habere noluit. Unde in

eum epigramma illatum Græci cujusdam poetæ videtur exstare, quod Latine hac sententia continetur:

*Histrion jam senior turpis, gravis, asper, iniquus,
Impius, & felix sic simul esse cupit.*

Ut nolit pius esse, velit tamen esse beatus:

Quod natura negat, nec recipit ratio.

Nam pius & felix poterat dici atque videri,

Cui imperium infelix est, erit ille sibi.

Hos versus nescio quis de Latinis, juxta eos, qui Græci erant propositi, in foro posuit: quibus acceptis, Macrinus his versibus respondisse fertur:

Si talem Grajum tetulissent fata poetam,

Qualis Latinus Gabalus iste fuit,

Nil populus nosset, nil nosset curia, magno

Nullus scripsisset carmina tetra mihi.

His versibus Macrinus, longe pejoribus, quam illi Latini sunt, respondisse se credidit; sed non minus est risui habitus, quam poeta ille, qui de Græco Latine coactus est scribere.

XII. Fuit igitur superbus & sanguinarius, & volens militariter imperare: incusans quin etiam superiorum temporum disciplinam, ac solum Severum præ ceteris laudans. Nam & in crucem milites tulit, & servilibus suppliciis semper affecit: & cum seditiones militares pateretur, milites sæpius decumavit, aliquando etiam centesimavit; quod verbum proprium ipsius est, cum se clementem diceret, quando eos centesimaret, qui digni essent decumatione atque vicesimatione. Longum est ejus crudelitates omnes aperire: attamen unam ostendam non magnam, ut ipse credebat, sed omnibus

tyrannicis immanitatibus tristiore. Cum quidam milites ancillæ hospitis pudorem depravasse suspecti essent, atque per quendam frumentarium ille didicisset, adduci eos iussit, interrogavitque, utrum esset factum: quod cum constitisset, duos boves miræ magnitudinis vivos subito aperiri iussit, atque his singulos milites inferi, capitibus, ut secum colloqui possent, exsertis; itaque poena hos affecit, cum ne adulteris quidem talia apud majores vel sui temporis essent constituta supplicia. Pugnavit tamen & contra Parthos, & contra Armenios, & contra Arabas, quos Eudæmonas vocant, non minus fortiter, quam feliciter. Tribunum, qui excubias deferi passus est, carpento rotali subterannexum per totum iter vivum atque exanimum traxit. Reddidit etiam Mezentii supplicium, quo ille vivos mortuis illigabat, & ad mortem cogebat, longa tabe confectos. Unde etiam in Circo, cum favor publicus in Liadumenum se proseruisset, acclamatum,

*Egregius forma juvenis, cui pater haud Mezentius
esset.*

Vivos etiam homines parietibus inclusit, & struxit. Adulterii reos semper vivos simul incendit, junctis corporibus. Servos, qui a dominis fugissent, repertos ad gladium ludi deputabat. Delatores, si non probarent, capite affecit: si probarent, delator pecuniæ præmio infames dimisit.

XIII. Fuit in jure non incallidus, adeo ut statuisset omnia rescripta veterum Principum tollere, ut jure, non rescriptis, ageretur; nefas esse dicens, le-

ges videri Commodi, & Caracalli, & hominum imperitorum voluntates, cum Trajanus nunquam libellis responderit, ne ad alias causas facta præferrentur, quæ ad gratiam composita viderentur. In annonis tribuendis largissimus fuit: in auro parcissimus. In vernaculis vel aulicis tam impius, tam pertinax, tam asper, ut servi illum sui non Macrinum dicerent, sed *macellinum*, quod macelli speciei domus ejus cruentaretur sanguine vernularum. Vini cibique avidissimus, nonnunquam usque ad ebrietatem: sed vespertinis horis. nam si prandisset vel privatim parcissimus, in cœna effusissimus. Adhibuit convivio literatos, ut loquens de studiis liberalibus necessario abstineret.

XIV. Sed cum ejus vilitatem homines antiquam cogitarent, crudelitatem nimiam viderent, hominem putidulum in imperio ferre non possent, & maxime milites, qui multa ejus meminerant funestissima, & aliquando turpissima, inita factione illum occiderunt cum puero suo Diadumeno, scilicet Antonino cognomine, de quo dictum est, quod in somnis Antoninus fuisset. Unde etiam versus exstant hujusmodi:

Vidimus in somnis cives (nisi fallor) & istud:

Antoninorum nomen puer ille gerebat,

Qui patrè venali genitus, sed matre pudica:

Centum nam mæchos passa est centumque rogavit.

Ipse etiam calvus mæchus fuit, inde maritus:

En Pius, en Marcuse Verus nam non fuit ille.

Et isti versus ex Græco translati sunt in Latinum: nam Græce sunt disertissimi. videntur autem mihi

ab aliquo poeta vulgari translati esse. Quod cum Macrinus audisset, fecit jambos, qui non exstant: jucundissimi autem fuisse dicuntur, qui quidem perierunt in eo tumultu, in quo ipse occisus est, quando & omnia ejus a militibus pervastata sunt.

XV. Genus mortis, ut diximus, tale fuit. Cum in Antoninum Heliogabalum exercitus inclinasset, ille fugit, belloque victus est, & occisus in suburbano Bithyniæ, suis partim deditis, partim occisus, partim fugatis. Ita Heliogabalus clarus redditus est, quod videretur patris vindicasse mortem: atque inde in imperium venit, quod dedecoravit vitiis ingentibus, luxuria, turpitudine, abliguritione, superbia, immanitate: qui & ipse similem exitum vitæ suæ sortitus est. Hæc de Macrino nobis sunt cognita, multis aliqua variantibus, ut se habet omnis historia: quæ de plurimis collecta, Serenitati tuæ, Diocletiane Auguste, detulimus, quia te cupidum veterum Imperatorum esse perspeximus.

ÆLII LAMPRIDII
 A N T O N I N U S
 DIADUMENUS.

I. **A**NTONINI Diadumeni pueri, quem cum patre Opilio Macrino Imperatorem dixit exercitus, occiso Bassiano factione Macriniana, nihil habet vita memorabile, nisi quod Antoninus est dictus; & quod ei stupenda omnia sunt facta imperii non diuturni; ut evenit. Nam cum primum innotuit per legiones, occisum esse Bassianum, ingens mœror obsedit omnium pectora, quod Antoninum in republica non haberent, existimantium, quod cum eo Romanum esset imperium perituum. Id ubi Macrino jam Imperatori nuntiatum est, veritus, ne in aliquem Antoninorum, qui multi ex affinibus Antonini Pii erant inter duces, exercitus inclinaret, statim concionem parari iussit, filiumque suum hunc puerum Antoninum appellavit. Concionis verba ejusdem: *Videtis, commilitones, & me ætatis provectæ,*

& Diadumenum puerum : quem diu Principem , si Dii faveant , habebitis. Intelligo præterea , desiderium ingens Antonini nominis apud vos manere. quare , quoniam mihi per conditionem fragilitatis humane non multum superesse videtur ad vitam , hunc puerum Antoninum vobis auctoribus nuncupo , diu vobis Antoninum repræsentaturum. Acclamatum : Macrine Imperator , Dii te servant. Antonine Diadumene , Dii te servant. Antoninum Divum omnes rogamus : Juppiter optime maxime , Macrino & Antonino vitam. Tu scis , Juppiter , Macrinus vinci non potest : tu scis , Juppiter , Macrinus vinci non potest. Antoninum habemus : omnia habemus. Antoninum nobis Dii dederunt patrem. Antoninus dignus imperio.

II. Macrinus Imperator dixit : Habete igitur , commilitones , pro imperio aureos ternos , pro Antonini nomine aureos quinos , & solitas promotiones , sed genitatas. Dii faciant , ut hæc sapius fiant. Dabimus autem per cuncta quinquennia id , quod hodie deputavimus. Post hoc ipse puerulus Diadumenus Antoninus Imperator dixit : Gratias ago vobis , commilitones , quod me imperio donastis & nomine , siquidem dignos & me & patrem meum duxistis , quos Imperatores Romanos diceretis , & quibus committeretis rempublicam. Et pater quidem meus curabit , ne desit imperio : ego autem elaborabo , ne desim nomini Antoninorum. Scio enim , me Pii , me Marci , me Veri suscepisse nomen , quibus satisfacere perdifficile est. Interim tamen causa imperii , causa nominis , id omne , quod pater , & tantundem promitto , honoribus , ut venerandus Macrinus pater præsens promisit , duplicatis. Herodianus

Græcus scriptor hæc præteriens, Diadumenum tantum Cæsarem dicit puerum a militibus nuncupatum, & cum patre occisum. Hac habita concione, statim apud Antiochiam moneta Antonini Diadumeni nomine percussa est: Macrini, usque ad iussum Senatus dilata est. Missæ etiam ad Senatum literæ, quibus nomen Antonini indicatum est. Quare etiam Senatus imperium id libenter dicitur recepisse: quamvis alii Antonini Caracalli odio id factum putent. Paraverat sane pænulas populo coloris rosei dare Macrinus Imperator in honorem Antonini filii sui, quæ vocarentur *Antoninianæ*, ut *caracallæ* Bassiani dictæ sunt, asserens, melius filium suum *Panuleum*, vel *Panularium* dicendum, quam *Caracallus* esset dictus Bassianus. Congiarium etiam per edictum Antoninianum promisit, ut ipsum edictum poterit indicare. Verba edicti: *Vellem, Quirites, jam præsentem essemus: Antoninus vestris vobis congiarium sui nominis daret. daret præterea & pueros Antoninianos, & puellas Antoninianas, quæ tam grati nominis gloriam propagarent. & reliqua.*

III. His ita gestis, signa in castris & vexilla fieri Antoniniana iussit. Fecitque Bassiani simulacra ex auro atque argento, atque dies septem supplicatio pro Antonini nomine celebrata est. Puer fuit omnium speciosissimus, statura longiutcula, crine flavo, nigris oculis, naso deducto, ad omnem decorem mento composito, ore ad oscula parato, fortis naturaliter, exercitio delicatior. Hic ubi primum indumenta coccea & purpurea, ceteraque castrensia imperii insignia accepit, quasi sidereus &

cœlestis emicuit, ut amaretur ab omnibus gratia venustatis. Hæc sunt, quæ de imperio pueri dicenda putavi. Nunc veniamus ad omina imperii, quæ cum in aliis, tum in hoc præcipue sunt stupenda.

IV. Die, qua natus est, pater ejus purpuras, tum forte procurator jam ærarii majoris, inspexit, & quas claras probavit, in id conclave redigi præcepit, in quo post duas horas Diadumenus natus est. Solent deinde pueri pileo insigniri naturali, quod obstetrices rapiunt, & advocatis credulis vendunt, siquidem causidici hoc juvari dicuntur: at iste puer pileum non habuit, sed diadema tenue, sed ita forte, ut rumpi non potuerit, venis intercedentibus specie nervi sagittarii. Ferunt denique, *Diadematum* puerum appellatum, sed ubi adolevit, avi sui nomine materni, *Diadumenum* vocatum; quamvis non multum abhorruerit ab illo signo diadematis nomen Diadumeni. In agro patris ejus oves purpureas duodecim ferunt natas, quarum una tantum varia fuerit. Eadem die, qua hic natus est, aquilam ei constat sensim palumbum regium parvulum attulisse, & posuisse in cunis dormienti, ac recessisse sine noxa. Panthagati in domo patris ejus nidum posuerunt.

V. His diebus, quibus ille natus est, mathematici, accepta genitura ejus, exclamaverunt, & ipsum filium Imperatoris esse, & ipsum Imperatorem: quasi mater ejus adulterata esset, quod fama retinebat. Huic eidem aquila pileum in agro ambulanti tulit: & cum comitum infantis clamor esset factus, in monumento regio, quod juxta villam esset, in qua

tunc pater agebat, supra statuum regis posuit, ita ut capiti ejus aptaret; quod multi ominosum putarunt, & morti accommodum. clarum autem eventus ostendit: Natus est præterea natali Antonini, & ea horâ, & signis prope concinentibus, quibus & Antoninus Pius: quare dixerunt mathematici, & Imperatoris illum filium futurum, & Imperatorem, sed non diu. Die, qua natus est (quod Antonini esset natalis) mulier quædam propinqua dicitur exclamasse, *Antoninus vocetur*; sed Macrinum timuisse, quod nullus ex ejus genere hoc nomine censeretur, abstinuisseque nomine imperatorio, simul quod jam rumor de vi genituræ illius emanasset. Hæc atque alia omnia fuisse multi in literas retulerunt: sed illud præcipue, quod cum in cunis esset Diadumenus, & leo, ruptis vinculis, & quidem ferus, effugisset, atque ad incunabula ejus venisset, puerum delinxit, & inviolatum reliquit; cum nutrix se in leonem misisset, atque ejus mortu affecta periisset, quæ sola forte in areola inventa erat, in qua infans jacebat.

VI. Hæc sunt, quæ digna memoratu in Antonino Diadumeno esse videantur: cujus vitam junxissem patris gestis, nisi Antoninorum nomen me ad edendam puerilis specialem expositionem vitæ coegisset. Et fuit quidem tam amabile illis temporibus nomen Antoninorum, ut, qui eo nomine non niteretur, mereri non videretur imperium. Unde etiam quidam & Severum, & Pertinacem, & Julianum, Antoninorum prænominibus honorandos putant: unde postea duos Gordianos, patrem & fi-

lium, Antoninos cognominatos putant. Sed aliud est, cum prænomen adsciscitur; aliud, cum ipsum nomen imponitur. Nam Pius verum nomen Antonini habuit, cognomen Pii: Marcus verum nomen Verissimi habuit; sed hoc sublato atque abolito, non prænomen Antonini, sed nomen accepit. Verus autem Commodi nomen habuit: quo abolito, Antonini non prænomen, sed nomen accepit. Commodum autem Marcus Antoninum appellavit, atque ita in publicas edidit diem natalis sui. Jam Caracallum Bassianum satis constat vel somnii causa, quod Severus viderat, cum sibi Antoninum successorem prædictum sensisset, anno demum decimotertio Antoninum dixisse, quando ei etiam imperatoriam addidisse dicitur potestatem. Getam vero, quem multi Antoninum negant dictum, eadem ratione, qua Bassianum, appellatum, satis constat, ut patri Severo succederet, quod minime factum est. Post hoc ipse Diadumenus ut commendaretur exercitui, Senatui, populoque Romano, cum esset ingens desiderium Bassiani Caracallæ, Antoninum appellatum, satis constat.

VII. Exstat epistola Opilii Macrini, patris Diadumeni, qua gloriatur non tam se ad imperium pervenisse, qui esset secundus imperii, quam quod Antoniniani nominis esset pater factus, quo clarius illis temporibus non fuerat vel Deorum. Quam epistolam priusquam intexam, libet versus inserere in Commodum dictos, qui se Herculem appellaverat, ut intelligant omnes, tam clarum fuisse Antoninorum nomen, ut illi nec Deorum nomen commo-

Script. H. A.

P

de videretur adjungi. Versus in Commodum Antoninum dicti:

*Commodus Herculeum nomen habere cupit,
Antoninorum non putat esse bonum:
Expers humani juris & imperii,
Sperans quin etiam clarius esse Deum,
Quam si sit Princeps nominis egregii:
Non erit iste Deus, nec tamen ullus homo.*

Hi versus, a Græco nescio quo compositi, a malo poeta in Latinum translati sunt: quos ego idcirco inferendos putavi, ut scirent omnes, Antoninos pluris fuisse, quam Deos, ac trium Principum amorem, quo sapientia, bonitas, pietas consecrata sit; in Anotonino pietas, in Vero bonitas, in Marco sapientia. Redeo nunc ad epistolam Opilii Macrini. *Opilius Macrinus Noniæ Celsæ conjugii. Quid boni adepti sumus, mea uxor, caret æstimatione. & fortassis de imperio me putes dicere: non magnum istud, quod etiam indignis fortuna concessit. Antonini pater factus sum. Antonini mater es facta. O nos beatos, o fortunatam domum, præclaram laudem nunc demum felicitis imperii. Dii faxint, & bona Juno, quam colis, ut & ille Antonini meritum effingat; & ego, qui sum pater Antonini, dignus omnibus videar.*

VIII. Hæc epistola indicat, quantum gloriæ adeptus sibi videretur, quod vocatus est filius Antoninus. Hic tamen quartodecimo mense imperii ob incivilem patris atque asperum principatum interfectus est cum patre, non suo nomine. Quamvis etiam istum ultra ætatem sævisse in plerisque reperiam, ut docent literæ ab hoc eodem ad patrem missæ.

nam cum quidam defectionis suspicionem incurris-
sent, & eos Macrinus sævissime punisset, filio for-
te absente, atque hic audisset, auctores quidem de-
fectionis occisos, quorum tamen unus dux Arme-
niæ erat, & item legatos Asiæ atque Arabiæ ob
antiquam familiaritatem dimissos, his literis con-
venisse patrem dicitur, paribus missis etiam ad ma-
trem, quarum exemplum historiæ causa inferendum
putavi. *Patri Augusto filius Augustus. Non satis,
mi pater, videris in amore nostro tenuisse tuos mores,
qui tyrannidis affectatæ conscios reservasti, sperans, eos
vel amiciores tibi futuros, si iis parceres, vel ob anti-
quam familiaritatem dimittendos: quod nec debuit fie-
ri, nec potuit. Nam primum omnium jam te exulce-
rati suspicionibus amare non possunt. denique crude-
liores inimici sunt, qui obliti veteris familiaritatis se
inimicissimis tuis junxerunt. Adde, quod exercitus ad-
huc habent.*

Si te nulla movet tantarum gloria rerum,

Ascanium surgentem, & spes heredis Iuli

Respice, cui regnum Italiæ Romanaque tellus

Debetur. *Ferendi sunt isti, si vis esse securus. Nam
vitio generis humani alii non sunt defuturi, cum isti
servantur. Hanc epistolam quidam ipsius, quidam
magistri ejus Cæliani ferunt, Afri quondam rheto-
ris: ex qua apparet, quam asper futurus juvenis,
si vixisset.*

¶ IX. Exstat alia epistola ad matrem ab eodem de-
stinata talis: *Dominus noster & Augustus nec te amat,
nec ipsum se, qui inimicos suos servat. Age igitur, ut
Arabianus, & Tuscus, & Gellius, ad patrem deligen-*

ur: ne, si occasio fuerit, nos interimant. Et, quantum Lollius Urbicus in historia sui temporis dicit, istæ literæ per notarium proditæ, illi puero multum apud milites obsuisse dicuntur. Nam, cum patrem occidissent, quidam hunc servare voluerunt: sed exstitit cubicularius, qui has epistolas concioni militum legit. Interfectis igitur ambobus, & capitibus pilo circumlatis, in Marcum Aurelium Antoninum, caritate nominis, inclinavit exercitus. Is filius Bassiani Caracalli ferebatur. Erat autem templi Heliogabali sacerdos, homo omnium impurissimus, & qui fato quodam Romanum deformaverit imperium. De quo quidem, quia multa sunt dicenda, loco suo differam.

ÆLII LAMPRIDII
 ANTONINUS
 HELIOGABALUS

A D

CONSTANTINUM AUG.

I. **V**ITAM Heliogabali Antonini, qui *Varius* etiam dictus est, nunquam in literas misissem, ne quis fuisse Romanorum Principem sciret, nisi ante Caligulas, & Neronas, & Vitellios, hoc idem habuisset imperium. Sed cum eadem terra & venena ferat & frumentum, atque alia salutaria, alia contraria, eadem serpentes & ciconias, compensationem sibi lector diligens faciet, cum legerit Augustum, Vespasianum, Titum, Trajanum, Hadrianum, Pium, Marcum, contra hos prodigiosos tyrannos : simul intelliget Romanorum judicia, quod illi & diu imperarunt, & exitu naturali functi sunt; hi vero interfecti, tracti, tyranni etiam appellati, quorum nec nomina libet dicere. Igitur occiso Macrino, ejusque filio Diadumeno, qui, pari pote-

state imperii, Antonini etiam nomen acceperat, in Varium Heliogabalum imperium collatum est, idcirco quod Bassiani filius diceretur. Fuit autem Heliogabalus, vel Jovis, vel Solis sacerdos, atque Antonini sibi nomen adsciverat, vel in argumentum generis, vel quod id nomen usque adeo carum esse cognoverat gentibus, ut etiam parricida Bassianus causa nominis amaretur. Et hic quidem prius dictus est *Varius*, post *Heliogabalus* a sacerdotio Dei Heliogabali, cui templum Romæ in eo loco constituit, in quo prius ædes Orci fuit, quem e Syria secum advexit. postremo cum accepit imperium, *Antoninus* appellatus est: atque ipse in Romano imperio ultimus Antoninorum fuit.

II. Hic tantum Semiamiræ matri deditus fuit, ut sine illius voluntate nihil in republica faceret, cum ipsa meretricio more vivens, in aula omnia turpia exerceret; Antonino autem Caracallo stupro cognita, ita ut hinc vel Varius vel Heliogabalus vulgo conceptus putaretur. Et ajunt quidam, Varii etiam nomen idcirco eidem inditum a condiscipulis, quod vario semine, de meretrice utpote, conceptus videretur. Hic fertur, occiso Macrini factione patre, ut dicebatur, Antonino, in templum Dei Heliogabali confugisse, velut in asylum, ne interficeretur a Macrino, qui sævissime cum filio luxurioso & crudeli exercuit imperium. Sed de nomine hætenus, quamvis sanctum illud Antoninorum nomen polluerit: quod tu, Constantine sacratissime, ita veneraris, ut Marcum & Pium inter Constantios Claudiosque, velut majores tuos, au-

reos formaveris , adoptans virtutes veterum , tuis moribus congruentes , & tibi amicas caraque.

III. Sed ut ad Antoninum Varium revertamur , nactus imperium Romam nuntios misit : excitatisque omnibus ordinibus , omni etiam populo ad nomen Antoninum , quod non solum titulo , ut in Diadumeno fuerat , sed etiam in sanguine redditum videbatur , cum se Antoninum Bassiani filium scripsisset , ingens ejus desiderium factum est. Erat præterea etiam rumor , qui novis post tyrannos solet donari Principibus : qui nisi ex summis virtutibus non permanet , & quem multi mediocres Principes amiserunt. Denique ubi in Senatu lectæ sunt literæ Heliogabali , statim fausta in Antoninum , & dira in Macrinum ejusque filium dicta sunt , appellatusque Antoninus Princeps , volentibus cunctis , & studiose credentibus , ut sese habent vota hominum ad credulitatem festinantium , cum , quod optant , verum esse desiderant. Sed ubi primum ingressus est Urbem , omisis iis , quæ in provincia gerebantur , Heliogabalum in Palatino monte juxta ædes imperatorias consecravit , eique templum fecit , studens & Matris typum , & Vestæ ignem , & Palladium , & ancilia , & omnia Romanis veneranda in illud transferre templum , & id agens , ne quis Romæ Deus , nisi Heliogabalus , coleretur. Dicebat præterea , Judæorum & Samaritanorum religiones , & Christianam devotionem illuc transferendam , ut omnium culturarum secretum Heliogabali sacerdotium teneret.

IV. Deinde ubi primum diem Senatus habuit , matrem suam in Senatum rogari jussit. Quæ cum

venisset vocata ad Consulum subsellia, scribendo affuit, id est, senatusconsulti conficiendi testis: solusque omnium Imperatorum fuit, sub quo mulier quasi clarissima, loco viri Senatum ingressa est. Fecit & in colle Quirinali senaculum, id est, mulierum Senatum, in quo ante fuerat conventus matronalis, solemnibus dumtaxat diebus, & si unquam aliqua matrona Consularis conjugii esset ornamentis donata: quod veteres Imperatores affinibus detulerunt, & his maxime, quæ nobilitates maritos non habuerant, ne innobilitatæ remanerent. Sed Semiamirica facta sunt senatusconsulta ridicula de legibus matronalibus: quæ quo vestitu incederet, quæ cui cederet, quæ ad ejus osculum veniret; quæ pilento, quæ equo sagmario, quæ asino veheretur; quæ carpento mulari, quæ boum; quæ sella veheretur, & utrum pellicea, an ossea, an eborata, an argentata; & quæ aurum vel gemmas in calciamentis haberent.

V. Ergo cum hibernasset Nicomediæ, atque omnia fordide ageret, inireturque a viris & subaret, statim milites facti sui pœnituit, quod in Macrinum conspiraverant, ut hunc Principem facerent: atque in consobrinum ejusdem Heliogabali Alexandrum, quem Cæsarem Senatus, Macrino interemto, appellaverat, inclinavere animos. Quis enim ferre posset Principem, per cuncta cava corporis libidinem recipientem, cum ne belluam quidem talem quisquam ferat? Romæ denique nihil egit aliud, nisi ut emissarios haberet, qui ei bene vasatos perquirerent, eosque ad aulam perduce-

rent, ut eorum conditionibus frui posset. Agebat præterea domi fabulam Paridis, ipse Veneris personam subiens, ita ut subito vestes ad pedes defluerent, nudusque, una manu ad mammam, altera pudendis adhibita, ingenicularet, posterioribus eminentibus in subactorem rejectis & oppositis. Vultum præterea eodem, quo Venus pingitur, schemate figurabat, corpore toto expolitus: eum fructum vitæ præcipuum existimans, si dignus atque aptus libidini plurimorum videretur.

VI. Vendidit & honores, & dignitates, & potestatem, tam per se, quam per omnes servos ac libidinum ministros. In Senatum legit sine discrimine ætatis, census, generis, pecuniæ merito: militariibus etiam præposituris, & tribunatibus, & legationibus, & ducatibus venditis; etiam procurationibus & Palatinis officiis. Aurigas Protogenem & Gordium, primo in certamine curuli socios, post in omni vitâ & actu participes habuit. Multos, quorum corpora placuerant, de scena, & circo, & arena in aulam traduxit. Hieroclem vero sic amavit, ut eidem inguina oscularetur, quod dictu etiam verecundum est, Floralia sacra se asserens celebrare. In virginem Vestalem incestum admisit. Sacra populi Romani sublatis penetralibus profanavit. Ignem perpetuum extinguere voluit. Nec Romanas tantum extinguere voluit religiones, sed per orbem terræ unum studens, ut Heliogabalus Deus unus ubique coleretur: & in penum Vestæ, quod solæ virgines solique pontifices adeunt, irrupit pollutus ipse omni contagione morum, cum iis, qui

se polluerant. Et penetrale sacrum est auferre conatus : cumque seriam , quasi veram rapuisset , (quamvis Virgo maxima falsam monstraverat) atque in ea nihil reperisset , applosam fregit : nec tamen quidquam religioni demisit , quia plures similes factæ dicuntur esse , ne quis veram unquam possit auferre. Hæc cum ita essent , signum tamen , quod Palladium esse credebat , abstulit , & auro fictum , in sui Dei templo locavit.

VII. Matris etiam Deum sacra accepit & tauroboliatus est , ut typum eriperet , & alia sacra , quæ penitus habentur condita. Jactavit autem caput inter præcisos fanaticos , & genitalia sibi devinxit , & omnia fecit , quæ Galli facere solent : ablatumque sanctum in penetrale Dei sui transtulit. Salam-bonem etiam omni planctu & jactatione Syriaci cultus exhibuit , omen sibi faciens imminentis exitii. Omnes sane Deos sui Dei ministros esse ajebat , cum alios ejus cubicularios appellaret , alios servos , alios diversarum rerum ministros. Lapidem , qui Divi dicuntur , ex proprio templo Dianæ Laodiceæ , ex adyto suo , in quo id Orestes posuerat , afferre voluit. Et Orestem quidem serunt non unum simulacrum Dianæ , nec uno in loco posuisse , sed multa in multis. Posteaquam se apud Tria flumina circa Hebrum ex responso purificavit , etiam Orestam condidit civitatem , quam sæpe cruentari hominum sanguine necesse est. Et Orestam quidem urbem Hadrianus suo nomine vindicari jussit , eo tempore , quo furore coeperat laborare , ut ex responso , cum ei dictum esset , ut in furiosi alicujus

domum vel nomen irreperet. nam ex eo emollitam infaniam ferunt, per quam multos Senatores occidi jusserat: quibus servatis, Antoninus Pii nomen meruit, quod eos post ad Senatum adduxit, quos omnes jussu Principis interfectos credebant.

VIII. Cædit & humanas hostias, lectis ad hoc pueris nobilibus & decbris per omnem Italiam patrimis & matrimis, credo, ut major esset utrique parenti dolor. Omne denique magorum genus aderat illi, operabaturque quotidie, hortante illo, & gratias Diis agente, quod amicos eorum invenisset; cum inspiceret exta puerilia, & exciteret hostias ad ritum gentilem suum. Cum consulatum inisset, in populum, non nummos vel argenteos vel aureos, vel bellaria, vel minuta animalia, sed boves opimos, & camelos, & asinos, & servos populo diripiendos objecit, imperatorium id esse dictitans. Insectatus est famam Macrini crudeliter; sed multo magis Diadumeni, quod Antoninus dictus est, *Pseudoantoninum* & *Pseudophilippum* eum appellans, simul quod, cum luxuriosissimus existisset, vir fortissimus, optimus, gravissimus, severissimus diceretur. Coegit denique scriptores nonnullos nefanda, immo potius non ferenda ejus dicta de luxuria disputare, in vita ejus. Lavacrum publicum in ædibus aulicis fecit; simul & Plaurini populo exhibuit, ut ex eo conditiones bene vasatorum hominum colligeret. Idque diligenter curatum est, ut ex tota penitus urbe arque ex nauticis monobelos quærerent: sic eos appellabant, qui viriliores videbantur.

IX. Cum Marcomannis bellum inferre vellet, quod Antoninus pulcherrime prosligaverat, dictum est a quibusdam, per Chaldæos & magos Antoninum Marcum id egisse, ut Marcomanni populo Romano semper devoti essent atque amici, idque factis carminibus: & consecrationem cum quæreret, quæ illa esset, vel ubi esset, suppressum est. constabat enim, illum ob hoc consecrationem quærere, ut eam dissiparet spe belli concitandi: & idcirco maxime, quod audierat responsum fuisse, ab Antonino bellum Marcomannicum finiendum; cum hic Varius, & Heliogabalus, & ludibrium publicum diceretur; nomen autem Antonini pollueret, in quod invaserat. Prodebatur autem per eos maxime, qui dolebant, sibi homines ad exercendas libidines bene vasatos & majoris peculii opponi. Unde etiam de nece-ejus cogitari cœpit. Et hæc quidem domi.

X. Sed milites, pestem illam velari Imperatoris nomine, pati nequiverunt, ac primum inter sese, deinde per coronas jecere sermones, in Alexandrum omnes inclinantes, qui jam Cæsar erat a Senatu dictus eo tempore, quo Macrinus, consobrinus hujus Antonini; nam Varia una his erat avia: unde Heliogabalus Varius dicebatur. Zoticus sub eo tantum valuit, ut ab omnibus officiorum principibus sic haberetur, quasi domini maritus esset. Erat præterea idem Zoticus, qui hoc familiaritatis nomine abutens, omnia Heliogabali dicta & facta venderet fumis, quam maxime divitias enormes sperans; cum aliis minaretur, aliis polliceretur, omnes falleret, egrediensque ab illo singulos adiret, dicens, *De te*

hoc locutus sum : de te hoc audiui : de te hoc futurum est : ut sunt homines hujusmodi , qui , si admissi fuerint ad nimiam familiaritatem Principum , famam non solum malorum , sed & bonorum Principum vendunt , & qui , stultitia vel innocentia Imperatorum , qui hoc non perspiciunt , infami rumigatione pascuntur . Nupsit & coit , ut & pronubum haberet , clamaretque , Concide Magire , & eo quidem tempore , quo Zoticus ægrotabat . Quærebat deinde a philosophis & gravissimis viris , an & ipsi in adolescentia perpeffi essent , quæ ipse pateretur , & quidem impudentissime : neque enim unquam verbis pepercit infamibus , cum & digitis impudicitiam ostentaret , nec ullus in conventu & audiente populo esset pudor .

XI. Fecit libertos Præfides , Legatos , Consules , Duces , omnesque dignitates polluit ignobilitate hominum perditorum . Cum ad vindemias vocasset amicos nobiles , & ad corbes sedisset , gravissimum quemque percontari cœpit , an promptus esset in Venerem , erubescensque senibus exclamabat , *Erubuit , salva res est , silentium ac ruborem pro consensu ducens .* Addidit præterea , ipse quæ faceret , sine ullius pudoris velamento . Posteaquam senes vidit erubescere ac tacere , vel quia ætas , vel quia dignitas talia refutabat ; contulit se ad juvenes , & ab his cœpit omnia exquirere . a quibus cum audiret ætati congrua , gaudere cœpit & dicere , vere liberam vindemiam esse , quam sic celebrarent . Ferunt multi , ab ipso primum repertum , ut in vindemiarum festivo multa in dominos jo-

cularia & audientibus dominis dicerentur, quæ ipse composuerat, & Græca maxime. Horum pleraque Marius Maximus dicit in vita ipsius Helio-gabali. Erant amici improbi, & senes quidam, & specie philosophi, qui caput reticulo componerent, qui improba quædam pati se dicerent, qui maritos se habere jactarent: quos quidam finxisse dicunt, ut illi fierent vitiorum imitatione cariores.

XII. Ad Præfecturam prætorii saltatorem, qui histrionicam Romæ fecerat, adscivit: Præfectum vigillum Gordium aurigam fecit: Præfectum annonæ Claudium Cenforem. ad honores reliquos promovit, commendatos sibi pudibulum enormitate membrorum: ad vicesimam hereditatum mulionem curare jussit, & cursorem, jussit & cocum & claustrarium artificem. Cum ingressus est vel castra vel curiam, aviam suam Variam nomine, de qua superius dictum est, secum induxit, ut ejus auctoritate honestior fieret, quia per se non poterat: nec ante eum (quod jam diximus) Senatum mulier ingressa est ita, ut ad scribendum rogaretur & sententiam diceret. In conviviis exoletos maxime juxta se ponebat, eorumque attrectatione & tactu præcipue gaudebat: nec quisquam ei magis poculum, cum bibisset, dabat.

XIII. Inter hæc mala vitæ impudicissimæ, Alexandrum, quem sibi adoptaverat, a se amoveri jussit, dicens, se poenitere adoptionis: mandavitque ad Senatum, ut Cæsaris ei nomen abrogaretur. sed in Senatu, hoc prodito, ingens silentium fuit. siquidem erat optimus juvenis Alexander, postea

comprobatus genere imperii ejus, cum ideo displiceret patri, quod impudicus non esset. Erat autem idem consobrinus, & ut quidam dicunt, a militibus etiam amabatur, & Senatui acceptus erat, & equestri ordini. Nec defuit tamen furor usque ad exitum voti pessimi. nam ei percussores immisit. Et hoc quidem modo ipse secessit ad hortos spei veteris, quasi contra novum juvenem vota concipiens, relicta in Palatio matre, & avia, & consobрино suo: jussitque, ut trucidaretur juvenis optimus & reipublicæ necessarius. Misit & ad milites literas, quibus jussit, ut abrogaretur nomen Cæsaris Alexandro. Misit, qui in castris statuarum ejus titulos luto tegerent, ut fieri solet de tyrannis. Misit & ad nutritores ejus, quibus imperavit sub præmiorum spe atque honorum, ut eum occiderent, quo vellent modo, vel in balneis, vel veneno, vel ferro.

XIV. Sed nihil agunt improbi contra innocentes. nam nulla vi quis adduci potuit, ut tantum facinus impleret, cum in ipsum magis conversa sint tela, quæ parabat aliis, ab iisque sit interfectus, quibus alios appetebat. Sed ubi primum lutati sunt tituli statuarum, milites omnes exarserunt: & pars in Palatium, pars in hortos, in quibus erat Varius, ire tendunt, ut Alexandrum vindicarent, hominemque impurum, eundemque parricidialis animi, tandem a republica depellerent. Et cum in Palatium venissent, Alexandrum cum matre atque avia custoditum diligentissime postea in castra duxerunt. Secuta autem erat illos Semiamira mater

Heliogabali pedibus, sollicita filio. Inde itum est in hortos: ubi Varius invenitur certamen aurigandi parans, exspectans tamen intentissime, quando eidem nuntiaretur consobrinus occisus. Qui subito militum strepitu exterritus in angulum se condidit, objectuque veli cubicularis, quod in introitu erat cubiculi, se textit. Misit ex Præfectis, alios ad compescendos milites in castra, alios vero ad eos placandos, qui jam in hortos venissent. Antiochianus igitur ex Præfectis unus, milites, qui in hortos venerant, & sacramenti admonitione exoravit, ne illum occiderent, quia nec multi venerant, & plerique cum vexillo, quod Aristomachus tribunus retinuerat, remanserant. hæc in hortis.

XV. In castris vero milites precanti Præfecto dixerunt, se parafuros esse Heliogabalo, si & impuros homines, & aurigas, & histriones a se dimoveret, atque ad bonam frugem rediret; his maxime submotis, qui cum omnium dolore apud eum plurimum poterant, & qui omnia ejus vendebant, vel vanitate, vel fumis. Remoti sunt denique ab eo Hierocles, Gordius, & Murissimus, & duo improbi familiares, qui eum ex stulto stultiore faciebant. Mandatum præterea a militibus Præfectis, ne paterentur illum ita diutius vivere, & ut Alexander custodiretur, ne vel illi aliqua vis afferretur; simul ne Cæsar quempiam amicum Augusti videret, ne ulla fieret imitatio turpitudinis. Sed Heliogabalus & ingenti prece Hieroclem reposcebat impudicissimum hominem, & insidias in dies Cæsari propagabat. Denique Kalendis Januariis, cum simul

tum designati essent Consules, noluit cum consobrinis procedere. Ad extremum cum ei avia & mater dicerent, imminere milites ad ejus exitium, nisi concordiam viderent inter se consobrinorum, sumpta prætexta, hora diei sexta processit ad Senatum, avia sua ad Senatum vocata, & ad sellam producta. Deinde in Capitolium ad vota concipienda & perficienda solemniter ire noluit: omnia per Præfectum urbanum facta sunt, quasi Consules illic non essent.

XVI. Nec distulit cædem consobrini: sed timens, ne Senatus ad aliquem se inclinaret, si ille consobrinum occidisset, jussit subito Senatum Urbe decedere: omnesque etiam, quibus aut vehicula, aut servi deerant, subito proficisci jussi sunt; cum alii per bajulos, alii per fortuita animalia & mercede conducta veherentur. Sabinum Consularem virum, ad quem libros Ulpianus scripsit, quod in Urbe remansisset, vocato centurione, mollioribus verbis jussit occidi. Sed centurio, aure surdior, imperari sibi credidit, ut Urbe pelleretur; itaque fecit. sic vitium centurionis Sabino salutis fuit. Removit & Ulpianum jurisconsultum, ut bonum virum: & Silvinum rhetorem, quem magistrum Cæsaris fecerat. Et Silvinus quidem occisus est, Ulpianus vero reservatus. Sed milites, & maxime prætoriani, vel scientes, quæ mala in Heliogabalum paraverant, vel quod sibi viderent invidiam, facta conspiratione ad liberandam rempublicam, primum in consocios vario genere mortis, cum alios vitalibus

Scriptt. H. A.

Q

exemtis necarent, alios ab ima parte perfoderent, ut mors esset vitæ consentiens.

XVII. Post hoc in eum impetus factus est, atque in latrina, ad quam confugerat, occisus. Tractus deinde per publicum, additaque injuria cadaveri est, ut id in cloaculam milites mitterent. sed cum non cepisset cloacula fortuito, per pontem Æmilium, annexo pondere, ne fluitaret, in Tiberim abjectum est, ne unquam sepeliri posset. Tractum est cadaver ejus etiam per Circi spatia, priusquam in Tiberim præcipitaretur. Nomen ejus, id est Antonini, erasum est, Senatu jubente, remansitque Varii Heliogabali: siquidem illud affectato retinuerat, cum vult videri filius Antonini. Appellatus est post mortem *Tiberinus*, & *Traditius*, & *Impurus*, & multa, si quando ea erant designanda, quæ sub eo facta videbantur: solusque omnium Principum tractus est, & in cloacam missus, & in Tiberim præcipitatus: quod odio communi omnium contigit, a quo speciatim cavere debent imperatores; siquidem nec sepulcra mereantur, qui amorem Senatus, populi, ac militum non merentur. Opera publica ipsius præter ædem Heliogabali Dei, quem Solem alii, alii Jovem dicunt, & amphitheatri instauratio post exustionem, & lavacrum in vico Sulpicio, quod Antoninus Severi filius cœperat, nulla exstant. Et lavacrum quidem Antonini Caracallus dedicaverat, & lavando, & populum admittendo: sed porticus defuerant, quæ postea ab hoc subditio Antonino exstructæ sunt, & ab Alexandro perfectæ.

XVIII. Hic ultimus Antoninorum fuit, quamvis cognomine postea Gordianos multi Antoninos putent, qui Antonii dicti sunt, non Antonini. Vita, moribus, improbitate ita odibilis, ut ejus nomen Senatus eraserit: quem nec ego Antoninum vocassem, nisi causa cognitionis, quæ cogit plerumque dici ea etiam nomina, quæ sunt abolita. Occisa est cum eo & mater Semiamira probrosissima mulier & digna filio. cautumque ante omnia post Antoninum Heliogabalum, ne unquam mulier Senatum ingrederetur, utque inferis ejus caput dicaretur devovereturque, per quem id esset factum. De hujus vita multa in literas missa sunt obscœna: quæ quia digna memoratu non sunt, ea solum prodenda censui, quæ ad luxuriam pertinebant; quorum aliqua privatus, aliqua jam Imperator, fecisse perhibetur, cum ipse privatus diceret, se Apicium, Imperator vero, Neronem, Othonem, & Vitellium imitari.

XIX. Nam primus omnium privatorum, toros aureis toralibus texit, quia tunc ex Antonini Marci auctoritate id fieri licebat, qui omnem apparatus imperatorum publice vendiderat. Deinde æstiva convivia coloribus exhibuit, ut hodie prasinum, vitreum, alia die venetum, & sic deinceps exhiberet, semper varie, per dies omnes æstivos. Primus deinde mensas & capsas argenteas habuit: primus etiam cacabos. Vasa deinde centenaria argentea sculpta, & nonnulla schematibus libidinosis inquinata. Et mastichatum, & pulejatam, & omnia hæc, quæ nunc luxuria retinet, primus invenit. Nam rosatum ab aliis acceptum, pinearum etiam attritione odo-

ratius reddidit. Denique hæc genera poculorum ante Heliogabalum non leguntur. nec erat ei ulla vita, nisi exquirere voluptates. Primus fecit de piscibus istia, primus de ostreis, & leiofreis, & aliis huiusmodi marinis conchis, & locustis, & cammaris, & scillis. Stravit & triclinia de rosa, & lectos & porticus, ac sic per ea deambulavit, idque omni florum genere, liliis, violis, hyacinthis & narcissis. Hic non nisi unguento nobili aut croco piscinis infectis natavit. Nec cubuit in accubitis facile, nisi iis, quæ pilum leporinum haberent, aut plumas perdicum subalares, sæpe culcitas mutans.

XX. Senatum nonnunquam ita contempsit, ut mancipia togata appellaret: populum vero Romanum unius fundi cultorem: equestrem ordinem in nullo loco habens. Præfectum urbicum sæpe post cœnam ad potandum vocabat, adhibitis & Præfectis prætorio, ita ut, si recusarent, magistri horum eos cogerent. Voluit & per singulas urbes lenones Præfectos urbi facere, & ut essent in urbe quatuordecim. & fecisset, si vixisset; promoturus omnes turpissimos & ultimæ professionis homines. Hic solido argento factos habuit lectos, & tricliniaries, & cubiculares. Comedit sæpius, ad imitationem Apicii, calcanea camelorum, & cristas vivis gallinaceis demtas, linguas pavonum & lusciniarum: quia dote tali pestilentia tutus diceretur. Exhibuit & Palatinis ingentes dapes extis mullorum refertas, & cerebellis phœnicopterum, & perdicum ovis, & cerebellis turdorum, & capitibus psittacorum, & fasianorum, & pavonum. Barbas sane mullorum tan-

tas jubebat exhiberi, ut pro nasturtiis, apiastris, & facelaribus, & fœnogræco exhiberet plenis fabata-riis & discis: quod præcipue stupendum est.

XXI. Canes jecinoribus anserum pavit. Habuit leones & leopardos exarmatos in deliciis: quos edoctos per mansuetarios, subito ad secundam & tertiam mensam jubebat accumbere, ignorantibus cunctis, quod exarmati essent, ad pavorem & ridiculum excitandum. Misit & uvas Apamenas in præsepia equis suis: & psittacis atque fasianis leones pavit, & alia animalia: exhibuit & sumina aprugna per dies decem tricena quotidie cum suis bulbis; pisum cum aureis, lentem cum cerauniis, fabam cum electris, & orizam cum albis exhibens. Albas præterea in vicem piperis piscibus & tuberibus conspersit. Oppressit in tricliniis versatilibus parasitos suos violis & floribus, sic ut animam aliqui efflaverint, cui erepere ad summum non possent. condito piscinas & solia temperavit, & rosato atque absinthiato. Vulgus ad bibendum invitavit: & ipse cum populo tantum bibit, ut in piscina eum bibisse intelligeretur, viso quod unus bibisset. Eunuchos pro apophoretis dedit: dedit quadrigas, equos, stratos, mulos, basternas & rhedas: dedit & aureos millenos, & centena pondo argenti.

XXII. Sortes sane convivales scriptas in cochlearibus habuit tales, ut alius exhiberet decem camelos, alius decem muscas, alius decem libras auri, alius decem plumbi, alius decem struthiones, alius decem ova pullina, ut vere sortes essent, & fata tentarentur: quod quidem & ludis suis exhi-

buit, cum & urfos decem, & decem grillos, & decem lactucas, & decem auri libras in sorte habuit. primusque hunc morem fortis instituit, quem nunc videmus. Sed vere ad fortem scenicos vocavit, cum & canes mortuos, & libram bubulæ carnis haberet in sorte: & item centum aureos, & mille argenteos, & centum folles æris, & alia talia; quæ populus tam libenter accepit, ut eum postea imperare gratularentur.

XXIII. Fertur in euripis vino plenis navales Circenses exhibuisse, pallia de cœnanthio fudisse, & elephantorum quatuor quadrigas in Vaticano agitare, dirutis sepulcris, quæ obfistebant: junxisse etiam camelos quaternos ad currus in Circo, privato spectaculo. Serpentes per Marficæ gentis sacerdotes collegisse fertur, eosque subito ante lucem, ut solet populus ad ludos celebres convenire, effudisse, multosque afflictos morbo & fuga. Usus est aurea omni tunica, usus & purpurea, usus & de gemmis Persica, cum gravari se diceret onere voluptatis. Habuit & in calciamentis gemmas, & quidem sculptas; quod risum omnibus movit: quasi possent sculpturæ nobilium artificum videri in gemmis, quæ pedibus adhærebant. Voluit uti & diademate gemmato, quo pulchrior fieret, & magis ad feminarum vultum aptus: quo & usus est domi. Fertur & promisisse phœnicem convivis, vel pro ea libras auri mille, ut in prætorio eas dimitteret. Marinæ aquæ colymbos exhibuit, in mediterraneis locis maxime, eosdem & singulis amicis natantibus dimisit, & iterum piscibus implevit.

Montem nivium in viridario domus æstate fecit, ad-
 vectis nivibus. Ad mare piscem nunquam comedit:
 in longissimis a mari locis omnia marina semper
 exhibuit: murænarum lactibus & luporum in locis
 mediterraneis rusticos pavit.

XXIV. Pisces semper quasi in marina aqua cum
 colore suo costos conditura veneta comedit: mo-
 mentarias de rosato, & rosis piscinas exhibuit: &
 bibit cum omnibus suis, caldaria de narda exhi-
 bens. Idem in lucernis balsamum exhibuit. Idem
 mulieres nunquam iteravit, præter uxorem. Lu-
 panaria domi amicis, clientibus & servis exhibuit:
 Idem nunquam minus centum sestertium cœnavit,
 hoc est argenti libris triginta. Aliquando autem tri-
 bus millibus sestertium cœnavit, omnibus supputa-
 tis, quæ impendit. Cœnas vero & Vitellii & Api-
 cii vicit. Pisces ex vivariis suis bubus traxit: per
 macellum transiens mendicitatem publicam flevit.
 Parasitos ad rotam aquariam ligabat, & cum verti-
 gine sub aquas mittebat, rursusque in summum re-
 solvebat: eosque *Ixionios amicos* vocavit. Stravit
 & saxis Lacedæmoniis ac Porphyreticis plateas in
 Palatio, quas *Antoninianas* vocavit: quæ saxa us-
 que ad nostram memoriam manserunt, sed nuper
 eruta & exsecta sunt. Constituerat & columnam
 unam dare ingentem, ad quam ascenderetur in-
 trinsecus, ita ut in summo Heliogabalum Deum
 collocaret: sed tantum saxum non invenit, cum
 id de Thebaide afferre cogitaret.

XXV. Ebrios amicos plerumque clauderat, &
 subito nocte leones, & leopardos, & ursos exar-

matos immittebat, ita ut expergefacti in cubiculo eodem, leones, urfos, pardos, cum luce, vel quod est gravius, nocte invenirent, ex quo plerique examinati sunt. Multis vilioribus amicis folles pro acubitis sternebat, eosque reflabat prandentibus illis, ita ut plerumque subito sub mensis invenirentur prandentes. Primus denique invenit sigma in terra sternere, non in lectulis, ut a pedibus utres per pueros ad reflandum spiritum solverentur. Mimicis adulteris ea, quæ solent simulato fieri, effici ad verum iussit. Meretrices a lenonibus cunctis redemit sæpe, & manumisit. Cum inter fabulas privatas sermo esset ortus, quanti herniosi esse possent in Urbe Roma, iussit omnes notari, eosque ad balneas suas exhibere, & cum iisdem lavit, nonnullis etiam honestis. Gladiatores ante convivium pugnantes & pyctas sibi frequenter exhibuit. Stravit sibi triclinium in summo lusorio. Et dum pranderet, noxios & venationes sibi exhibuit. Parasitis in secunda mensa sæpe ceream coenam, sæpe ligneam, sæpe eburneam, aliquando fictilem, nonnunquam vel inarmoream, vel lapideam exhibuit: ita ut omnia illis exhiberentur videnda de diversa materia, quæ ipse coenabat, cum tantum biberent per singula fercula, & manus, quasi comedissent, lavarent.

XXVI. Primus Romanorum holoserica veste usus fertur, cum jam subserica in usu essent. Linteamen lotum nunquam attigit, mendicos dicens, qui lintheis lotis uterentur. Dalmaticatus in publico post coenam sæpe visus est, *Gurgitem Fabium* & *Scipionem* se appellans, quod cum ea veste esset, cum

qua Fabius & Cornelius a parentibus, ad corrigendos mores, adolescentes in publicum essent producti. Omnes de circo, de theatro, de stadio, & omnibus locis, & balneis, meretrices collegit in ædes publicas, & apud eas concionem habuit quasi militarem, dicens eas *commilitones*: disputavitque de generibus schematum & voluptatum. Adhibuit in tali concione postea lenones exoletos undique collectos, & luxuriosissimos puerulos & juvenes. Et, cum ad meretrices muliebri ornatu processisset, papilla ejecta, exoletos habitu puerorum, qui prostituntur, post concionem pronuntiavit his, quasi militibus, ternos aureos donativum: petiitque ab his, ut a Diis peterent, ut alios haberet ipsis commendandos. Jocabatur sane ita cum servis, ut eos juberet millena pondo sibi araneorum deferre, proposito præmio; collegisque dicitur decem millia pondo araneorum, dicens, & hinc intelligendum, quam magna esset Roma. Mittebat parasitis per cellarios salaria annua, vasa cum ranis & scorpiis, & cum serpentibus, & hujusmodi monstris. Claudebatur in ejuscemodi vasis infinitum muscarum, apes mansuetas eas appellans.

XXVII. Quadrigas Circensium in tricliniis & in porticibus sibi semper exhibuit pransitans & cœnitans, convivas senes agitare cogens, nonnullos honoratos jam Imperatori. jubebat sibi & decem millia murium exhiberi, mille mustelas, mille forices. Dulciarios & lactarios tales habuit, ut, quæcunque coqui de diversis edulibus exhibuissent, vel structores, vel pomarii, illi modo de dulciis, mo-

do de lactariis exhiberent. Exhibuit parasitis cœnas & de vitreis, & nonnunquam tot picta mantilia in mensam mittebat, his edulibus picta, quæ apponerentur, quot missus esset habiturus; ita ut de acu aut de textili pictura exhiberentur. Nonnunquam tamen & tabulæ illis pictæ exhibebantur, ita ut quasi omnia illis exhiberentur, & tamen fame macerarentur. Miscuit gemmas pomis ac floribus. jecit & per fenestram cibos totidem, quot exhibuit amicis. Jusserat & canonem populi Romani unius anni meretricibus, lenonibus, exoletis intramuranis dari; extramuranis alio promisso: cum eo tempore juxta provisionem Severi & Trajani septem annorum canon frumentarius Romæ esset.

XXVIII. Canes quaternos ingentes junxit ad currum, & sic est vectatus intra domum regiam: idque privatus in agris suis fecit. Processit in publicum & quatuor cervis junctis ingentibus. Junxit sibi & leones, Matrem magnam se appellans. Junxit & tigres, Liberum sese vocans, eodemque habitu agens, quo Dii pinguntur, quos imitabatur. Ægyptios dracunculos Romæ habuit, quos illi agathodæmonas vocant. Habuit & hippopotamos, & crocodilum, & rhinocerotem, & omnia Ægyptia, quæ per naturam sui exhiberi poterant. Struthocamelos exhibuit in cœnis aliquoties, dicens, præceptum Judæis, ut ederent. Illud sane mirum videtur, quod dicitur ab eo factum, ut de croco stigma straverit, cum summos viros rogasset ad prandium, pro eorum dignitate dicens se fœnum exhibere. Trajecit & dierum actus noctibus, & nocturnos die-

bus, æstimans hoc inter instrumenta luxuriæ; ita ut sero de somno surgeret & salutari inciperet, mane autem dormire inceptaret. Amicis quotidie nec quemquam facile indonatum relinquebat, nisi quem frugi, quasi perditum reperisset.

XXIX. Habuit gemmata vehicula & aurata, contentis argentatis, & eboratis, & æratis. Junxit & quaternas mulieres pulcherrimas, & binas ad papillam, vel ternas & amplius, & sic vestatus est: sed plerumque nudus, cum illum nudæ traherent. Habuit & hanc consuetudinem, ut octo calvos rogaret ad cœnam, item octo luscus, & item octo podagrosos, octo surdos, octo nigros, octo longos, & octo pingues, cum capi non possent uno sigmate, ut de his omnibus risus citaret. Donavit & argentum omne convivis, quod habuit in convivio, & omnem apparatus poculorum, idque sæpius. Hydrogarum Romanorum ducum primus publice exhibuit, cum antea militaris mensa esset; quam postea statim Alexander reddidit. Proponebat præterea his quasi themata, ut jura nova dapi- bus condiendis invenirent: cujus placuisset commentum, ei dabat maximum præmium, ita ut sericam vestem donaret, quæ tunc & in raritate videbatur, & in honore. Si aliquis autem displicuisset, jubebat, ut semper id comesset, quamdiu tamen melius invenisset. Semper sane aut inter flores sedit, aut inter odores pretiosos. Amabat sibi pretia majora dici earum rerum, quæ mensæ parabantur, orexin convivio hanc esse asserens.

XXX. Pinxit se, ut cupediarium, ut seplasia-

rium, ut popinarium, ut tabernarium, ut lenonem; idque totum domi semper exercuit. Sexcentorum struthionum capita una cœna multis mœn-
sis exhibuit ad edenda cerebella. Exhibuit aliquando & tale convivium, ut haberet viginti & duo fercula ingentium epularum, sed per singula lavarent, & mulieribus uterentur & ipse & amici, cum jurejurando, quod efficerent voluptatem. Celebravit item tale convivium, ut apud amicos singulos singuli missus apparerentur, & cum alter maneret in Capitolio, alter in Palatio, alter super Aggerem, alter in Cœlio, alter trans Tiberim, & ut quisque mansisset, tamen per ordinem in eorum domibus singula fercula ederentur, ireturque ad omnium domos: sic unum convivium vix toto die finitum est, cum & lavarent per singula fercula, & mulieribus uterentur. Sybariticum missum semper exhibuit ex oleo & garo: quem quo anno Sybaritæ repperunt, perierunt. Dicitur & balneas fecisse multis locis, ac semel lavisse, atque statim destruxisse, ne ex usu balneas haberet. Hoc idem de domibus, de prætoriis, de zetis fecisse dicitur. Sed & hæc nonnulla fidem transeuntia, credo esse ficta ab iis, qui in gratiam Alexandri Heliogabalum deformare voluerunt.

XXXI. Fertur & meretricem notissimam & pulcherrimam redemisse centum sestertium, eamque intactam, velut virginem coluisse. Huic eidem privato cum quidam diceret, *Non times pauper fieri?* dixisse dicitur, *Quid melius, quam ut ipse mihi heres sim & uxori meæ?* Habuerat præterea faculta-

tes, a multis dimissas gratia patris. Idem filios se nolle dicebat, ne quis ei frugi contingeret. Odores Indicos sine carbonibus ad vaporandas zetas iubebat incendi. Iter privatus nunquam minus sexaginta vehiculis fecit, avia sua Varia reclamante, quod omnia perditurus esset. Imperator vero etiam sexcenta vehicula dicitur duxisse, afferens, decem millibus camelorum Persarum regem iter facere, & Neronem quingentis carrucis iter iniisse. Causa vehiculorum erat lenonum, lenarum, meretricum, exoletorum, subactorum etiam bene vasatorum multitudo. In balneis semper cum mulieribus fuit, ita ut eas ipse psilothro curaret: ipse quoque barbam psilothro accurans: quodque pudendum dictum est, eodem, quo mulieres accurabantur, & eadem hora: rasit & virilia subactoribus suis, novacula manu sua, qua postea barbam fecit. Scobe auri porticum stravit & argenti, dolens, quod non posset & electri: idque frequenter, quacunque fecit iter pedibus usque ad equum vel carpentum, ut sit hodie de aurosa arena.

XXXII. Calciamentum nunquam iteravit, anulos etiam negatur iterasse. Pretiosas vestes sæpe conscidit, vel lanam cepit & appendit, atque ad ejus æstimationem ponderis, pisces amicis exhibuit. Naves onustas merisit in portu, magnanimitatis hoc esse dicens. Onus ventris auro excepit: in myrrhinis & onychinis minxit. Idem dixisse fertur, *Si habuero heredem, dabo illi tutorem, qui illum hac facere cogat, quæ ipse feci, facturusque sum.* Habuit etiam istam consuetudinem, ut coenas sibi

exhiberet tales: una die nonnisi de fasianis tantum ederet, omnesque missus sola fasianorum carne strueret: item alia die de pullis, alia de pisce illo, & item illo, alia de porcis, alia de struthionibus, alia de holeribus, alia de pomis, alia de dulciis, alia de opère lactario. Sæpe amicos suos cum Æthiopibus aniculis inclusit nocturnis mansionibus, & usque ad lucem detinuit, cum pulcherrimas his diceret apparatus. Fecit hoc idem etiam de pueris: & tunc, utpote ante Philippum, licebat. Ridebat autem sic nonnunquam, ut publice in theatro solus audiretur: ipse cantavit, saltavit, ad tibias dixit, tuba cecinit, pandurizavit, organo modulatus est. Fertur & una die ad omnes circi, & theatri, & amphitheatri, & omnium Urbis locorum meretrices, testus cuculione mulionico, ne agnosceretur, ingressus; cum tamen omnibus meretricibus sine effectu libidinis aureos donaret, addens, *Nemo sciat, Antoninus hæc donat.*

XXXIII. Libidinum genera quædam invenit, ut spinthrias veterum malorum vinceret: & omnes apparatus Tiberii, & Caligulæ, & Neronis norat. Et prædictum eidem erat a sacerdotibus Syris, biathanatum se futurum. Paraverat igitur funes, blatta & serico & cocco intortos, quibus, si necesse esset, laqueo vitam finiret. Paraverat & gladios aureos, quibus se occideret, si aliqua vis urgeret. Paraverat & in cerauneis & hyacinthis & in smaragdīs venena, quibus se interimeret, si quid gravius immineret. Fecerat & altissimam turrim, substratis aureis gemmarisque ante tabulis, ex qua se

præcipitaret, dicens, etiam mortem suam pretiosam esse debere, & ad speciem luxuriæ, ut diceretur nemo sic perisse. Sed nihil ista valuerunt. nam, ut diximus, & occisus est per scurras, & per plateas tractus sordidissime, per cloacas ductus, & in Tiberim submissus est. Hic finis Antoninorum nomini in republica fuit, scientibus cunctis, istum Antoninum tam vita falsum fuisse, quam nomine.

XXXIV. Mirum fortasse cuiquam videatur, Constantine venerabilis, quod hæc clades, quam retuli, loco Principum fuerit, & quidem prope triennio, ita ut nemo inventus fuerit, qui istum a gubernaculis Romanæ majestatis abduceret, cum Neroni, Vitellio, Caligulæ, ceterisque hujusmodi nunquam tyrannicida defuerit. Sed primum omnium ipse veniam peto, quod hæc, quæ apud diversos reperi, literis tradidi; cum multa improba reticuerim, & quæ ne dici quidem sine maximo pudore possunt. Ea vero, quæ dixi, prætextu verborum adhibito, quantum potui, texi. Deinde illud, quod clementia tua solet dicere, credidisse reficiendum, *Imperatorem esse, fortunæ est.* nam & minus boni reges fuerunt, & pessimi. Agendum vero, quod pietas tua solet dicere, *Ut sint imperio digni, quos ad regendi necessitatem vis fatalis adduxerit.* Et quoniam hic ultimus Antoninorum fuit, neque postea hoc nomen in republica loco Principum frequentatum est, etiam illud addendum est, ne quis error oriatur, cum duos Gordianos narrare cœpero, patrem ac filium, qui se de Antoninorum genere dici volebant, non nomen in illis primum fuit, sed prænomen. dein-

de, ut plerisque in libris invenio, Antonii dicti sunt, non Antonini.

XXXV. Hæc sunt de Heliogabalo, cujus vitam me invitum & reluctantem, ex Græcis Latinisque collectam, scribere ac tibi offerre voluisti, cum jam aliorum ante tulerimus. Scribere autem ordiar, qui post sequentur: quorum Alexander optimus, & cum vera dicendus assertione, & annorum tredecim Princeps: semestres alii, & vix annui & bimi. Aurelianus præcipuus: & horum omnium decus, auctor tui generis Claudius: de quo vereor ad clementiam tuam scribens vera dicere, ne malevolis adulatus videar esse: sed absolvar contra livorem improborum, cum & apud alios clarum esse perspexerim. His jungendi sunt Diocletianus, aurei parens seculi, & Maximianus, ut vulgo dicitur, ferrei, ceterique ad pietatem tuam. Te vero, Auguste venerabilis, multis paginis, iisdemque disertioribus, illi prosequuntur, quibus id felicior natura detulerit. His addendi sunt Licinius, Severus Alexander, atque Maxentius, quorum omnium jus in ditionem tuam devenit: sed ita, ut nihil eorum virtuti derogetur. Non enim ego id faciam, quod plerique scriptores solent, ut de his detrahā, qui victi sunt: cum intelligam, gloriæ tuæ accedere, si omnia de illis, quæ bona in se habuerunt, vera prædicarō.

ÆLII LAMPRIDII
ALEXANDER SEVERUS

A D

CONSTANTINUM AUG.

I. INTERFECTO Vario Heliogabalo (sic enim malimus dicere, quam Antoninum: quia & nihil Antoninorum pestis illa ostendit, & hoc nomen ex annalibus, Senatus auctoritate, erasum est) ad remedium generis humani Aurelius Alexander, urbe Arcena genitus, Varii filius, Variæ nepos, & consobrinus ipsius Heliogabali, accepit imperium; cum ante Cæsar a Senatu esset appellatus, mortuo scilicet Macrino: Augustumque nomen idem recepit, addito eo, ut & Patris patriæ nomen, & jus proconsulare, & tribuniciam potestatem, & jus quintæ relationis, deferente Senatu, uno die assumeret. Et ne præceps ista honorum continuatio videatur, exponam causas, quibus id & Senatus coactus est facere, & ille perpeti. non enim aut gravitati Se-

Script. H. A. R

natus congruebat omnia simul deferre, aut bono Principi raptum ire tot simul dignitates. Milites jam insueverant sibi Imperatores & tumultuario iudicio facere, & item facile mutare, afferentes nonnunquam ad defensionem, se idcirco fecisse, quod nescissent Senatum Principem appellasse: nam & Pescennium Nigrum, & Clodium Albinum, & Avidium Cassium, & antea Lucium Vindicem, & Lucium Antonium, & ipsum Severum, cum Senatus jam Julianum dixisset Principem, Imperatores fecerant: atque ista res bella civilia severat, quibus necesse fuit militem, contra hostem paratum, parricidaliter perire.

II. Hac igitur causa festinatum est, ut omnia simul Alexander, quasi verus jam Imperator, acciperet. Huc accessit nimia & Senatus & populi inclinatio post illam cladem, quæ non solum Antoninorum nomen decoloravit, sed etiam Romanum dehonestavit imperium. Certatim denique omnia decreta sunt & nominum genera, & potestatum. Primus denique omnium cuncta insignia & honorificentiae genera simul recepit, suffragante sibi met Cæsaris nomine, quod jam ante aliquot annos mernerat: & magis suffragante vita & moribus, cum illi magnum conciliasset favorem, quod eum Heliogabalus occidere conatus est, nec potuit, & militibus repugnantibus, & Senatu refragante. Atque hæc parva, nisi quod dignum se exhibuit, quem Senatus servaret, quem salvum milites cuperent, quem omnium bonorum sententia Principem diceret.

III. Alexander igitur, cui Mammæa mater fuit, (nam & ita dicitur a plerisque) a prima pueritia artibus bonis imbutus, tam civilibus, quam militaribus, ne unum quidem diem sponte sua transire passus est, quo se non & ad literas, & ad militiam exerceret. Nam in prima pueritia literatores habuit Valerium Cordum, & Titum Veturium, & Aurelium Philippum libertum patris, qui vitam ejus postea in literas misit. Grammaticum in patria Græcum Nebonem, rhetorem Serapionem, philosophum Stilionem: Romæ grammaticos, Scaurinum Scaurini filium, doctorem celeberrimum: rhetores, Julium Frontinum, & Bæbium Macrinum, & Julium Granianum, cujus hodieque orationes declamatæ feruntur. Sed in Latinis non multum profecit, ut ex ejusdem orationibus apparet, quas in Senatu habuit, vel in concionibus, quas apud milites, vel apud populum: nec valde amavit Latinam facundiam, sed amavit literatos homines, vehementer eos etiam reformidans, ne quid de se asperum scriberent. Denique eos dignos adesse jubebat: singula quæque, quæ publice privatimque agebat, se ipso docente, volebat addiscere, si forte ipsi non affuissent, eaque petebat, ut, si vera essent, in literas mitterent.

IV. Dominum se appellari vetuit. Epistolas ad se quasi ad privatum scribi jussit, servato tantum nomine Imperatoris. Gemmas de calciamenti & vestibus tulit, quibus usus fuerat Heliogabalus: veste, ut & pingitur, alba usus est, nec aurata; pænulis togisque communibus. Cum amicis tam familiari-

ter vixit, ut communis esset ei sæpe confessus, iret & ad convivia eorum; aliquos autem haberet quotidianos etiam non vocatos; salutaretur vero quasi unus de Senatoribus, patente velo, admissionalibus remotis, aut solis iis, qui ministri ad fores fuerant: cum antea salutare Principem non liceret, quod eos videre non poterat. Et erat corporis venustate decorus, ut hodieque in picturis & in statuis videmus. Fuit & staturæ militaris: robur militis, valetudo ejus, qui vim sui corporis sciret, ac semper curaret. Erat præterea cunctis hominibus amabilis: & ab aliis pius appellabatur, ab omnibus certe sanctus, & utilis reipublicæ. Huic fors in templo Prænestinæ talis exstitit, cum illi Heliogabalus insidiaretur:

— — *Si qua fata aspera rumpas,*

Tu Marcellus eris.

V. Alexandri nomen accepit, quod in templo dicato, apud Arcenam urbem, Alexandro Magno, natus esset; cum casu illuc, die festo Alexandri, pater cum uxore patriæ solemnitatis implendæ causa venisset, cui rei argumentum est, quod eadem die natalem habet hic Mammææ Alexander, qua ille Magnus excessit e vita. Delatum sibi *Antonini* nomen a Senatu recusavit, cum hic magis affinitate Caracalli jungeretur, quam ille subditivus. Siquidem (ut Marius Maximus dixit in vita Severi) nobilem Orientis mulierem Severus, cujus hanc generaturam esse compererat, ut uxor Imperatoris esset, adhuc privatus & non magni satis loci, duxit uxorem: ex qua affinitate hic Alexander fuit, cui ve-

re per matrem suam consobrinus Varius Heliogabalus fuit. Recusavit & Magni nomen, quod ei, quasi Alexandro, est oblatum Senatus judicio.

VI. Interest retexere orationem, qua nomen Antonini & Magni, delatum sibi a Senatu, recusavit: quam priusquam referam, addam acclamationes Senatus, quibus id decretum est. Ex actis Urbis ante diem pridie Nonas Martias. Cum Senatus frequens in curiam, hoc est, in ædem Concordiæ, templumque inauguratum, convenisset, rogatusque esset Aurelius Alexander Cæsar Augustus, ut concineret, ac primo recusasset, quod sciret de honoribus suis agendum, deinde postea venisset, acclamatum: *Auguste innocens, Dii te servant. Alexander Imperator, Dii te servant. Dii te nobis dederunt, Dii conservent. Dii te ex manibus impuri eripuerunt, Dii perpetuent. Impurum tyrannum & tu perpeffus es: impurum & obfcœnum & tu vivere doluisti. Dii illum eradicaverunt: Dii te servant. Infamis Imperator rite damnatus. Felices nos imperio tuo, felicem rempublicam. Infamis unco tractus est, ad exemplum timoris: luxuriosus Imperator jure punitus est. Contaminator honorum jure punitus est. Dii immortales Alexandro vitam: judicia Deorum hinc apparent.*

VII. Et cum egisset gratias Alexander, acclamatum est: *Antonine Alexander, Dii te servant. Antonine Aureli, Dii te servant. Antonine Pie, Dii te servant. Antonini nomen suscipias rogamus. Præsta bonis Imperatoribus, ut Antoninus dicaris. Nomen Antoninorum tu purifica. Quod ille infamavit, tu purifica. Redde in integrum nomen Antoninorum. Sanguis*

Antoninorum se cognoscat. Injuriam Marci tu vindica. Injuriam Veri tu vindica. Injuriam Bassiani tu vindica. Pejor Commodus solus Heliogabalus; nec Imperator, nec Antoninus, nec civis, nec senator, nec nobilis, nec Romanus. In te salus, in te vita, ut vivere delectet. Antoninorum Alexandro vitam, ut vivere delectet, & Antoninus vocetur, Antoninorum templa Antoninus dediket. Parthos & Persas Antoninus vincat. Sacrum nomen sacratus accipiat. Sacrum nomen castus accipiat. Antonini nomen, Antoninorum nomen, Dii conservent. In te omnia, per te omnia, Antonine, habemus.

VIII. Et post acclamationes Aurelius Alexander Cæsar Augustus: *Gratias vobis, Patres conscripti, non nunc primum, sed & de Cæsareo nomine, & de vita servata, & Augusti nomine addito, & de Pontificatu maximo, & de tribunicia potestate & proconsulari imperio: quæ omnia novo exemplo uno die in me contulistis. Et cum diceret, acclamatum: Hæc suscepisti, Antonini nomen tu suscipe: mereatur Senatus, mereantur Antonini. Antonine Auguste, Dii te servent, Dii te Antoninum conservent. Moneta nomen Antonini reddatur. Templa Antoninorum Antoninus consecret.* Aurelius Alexander Augustus: *Ne quæso, Patres conscripti, ne me ad hanc certaminis necessitatem vocetis, ut ego cogar tanto nomini satisfacere; cum etiam hoc ipsum nomen, licet peregrinum, tamen gravare videatur. Hæc enim nomina insignia onerosa sunt. Quis enim Ciceronem diceret mutum? quis indoctum Varronem? quis impium Metellum? Et (ut hoc Dii avertant) quis non æquantem nomina, ferat digerentem*

tem in clarissima specie dignitatum? Item acclamata, quæ supra.

IX Item Imperator dixit: *Antoninorum nomen; vel jam numen potius, quale fuerit, meminit vestra clementia: si pietatem, quid Pio sanctius? si doctrinam, quid Marco prudentius? si innocentiam, quid Vero simplicius? si fortitudinem, quid Bassiano-fortius? Nam nunc Commodi meminisse nolo, qui hoc ipso deterior fuit, quod cum illis moribus Antonini nomen obtinuit. Diadumenus autem nec tempus habuit, nec ætatem, & arte hoc patris nomen incurrit.* Item acclamatum, ut supra. Item Imperator dixit: *Nuper certe, Patres conscripti, meministis, cum ille omnium non solum bipedum, sed etiam quadrupedum spurcissimus, Antonini nomen præferret, & in turpitudine atque luxuria Neronis, Vitellios, & Commodos vinceret, qui gemitus omnium fuerint, cum per populi & honestorum coronas una vox esset, hunc non rite Antoninum dici, & per hanc pestem tantum violari nomen. Et cum diceret, acclamatum est: Dii mala prohibeant! hæc te imperante non timeamus: de his, te duce, securi sumus. Vicisti vitia, vicisti crimina, vicisti dedecora. Antonini nomen ornavisti. certi sumus, bene præsumimus, nos te & a pueritia probavimus, & nunc probamus.* Item Imperator: *Neque ego, Patres conscripti, idcirco timeo istud venerabile omnibus nomen accipere. quod verear, ne in hæc vitia delabatur vita, aut quod nominis pudeat: sed primum displicet alienæ familiæ nomen assumere; deinde quod gravari, me credo.*

X. Et cum hæc diceret, acclamatum est, ut su-

pra. Item dixit: Si enim Antonini nomen accipio; possum & Trajani, possum & Titi, possum & Vespasiani. Et cum diceret, acclamatum est: Quomodo Augustus, sic & Antoninus. Tunc Imperator: Video, Patres conscripti, quid vos moveat ad hoc nobis addendum. Augustus primus, primus est auctor imperii, & in ejus nomen omnes, velut quadam adoptione, aut jure hereditario, succedimus: Antonini ipsi Augusti dicti sunt. Antoninus idem Pius Marcum & item Verum jure adoptionis vocavit; Commodum autem hereditarium fuit: susceptum Diadumeno, affectatum in Bassiano, ridiculum in Aurelio. Et cum diceret, acclamatum est: Alexander Auguste, Dii te servant. verecundiæ tuæ, prudentiæ tuæ, innocentia tuæ, castitati tuæ. hinc intelligimus, qualis futurus sis: hinc probamus. Tu facies, ut Senatus bene Principes eligat, tu facies, optimum esse judicium Senatus. Alexander Auguste, Dii te servant. Templâ Antoninorum Alexander Augustus dedicet. Cæsar noster, Augustus noster, Imperator noster, Dii te servant. Vincas, valeas, multis annis imperes.

XI. Alexander Imperator dixit: Intelligo, Patres conscripti, me obtinuisse, quod volui, & id acceptum refero, plurimas gratias & agens & habens; enisurus, ut & hoc nomen, quod in imperium detulimus, tale sit, ut & ab aliis desideretur, & bonis, vestræ pietatis judiciis offeratur. Post hæc acclamatum est: Magne Alexander, Dii te servant. Si Antonini nomen repudiasti, Magni prænomen suscipe. Magne Alexander, Dii te servant. Et cum sæpius dicerent, Alexander Augustus ait: Facilius fuit, Patres conscripti,

ut Antoninorum nomen acciperem: aliquid enim vel affinitati deferrem, vel consortio nominis imperialis. Magni vero nomen cur accipitur? quid enim jam magnum feci? cum id Alexander post magna gesta, Pompejus vero post magnos triumphos, acceperit. Quiescite igitur, venerandi Patres, & vos ipsi magnifici unum me de vobis esse censete potius, quam Magni nomen ingerite.

XII. Post hæc acclamatum est: *Aureli Alexander Auguste, Dii te servant.* & reliqua ex more. Dimisso Senatu, cum & alia multa eo die essent acta, quasi triumphans domum se recepit. multo clarior visus est alienis nominibus non receptis, quam si recepisset. atque ex eo constantiæ ac plenæ gravitatis famam obtinuit. siquidem uni adolescenti Senatus totus persuadere non potuit. Sed quamvis Senatus rogante non potuerit persuaderi, ut vel Antonini vel Magni nomina susciperet; tamen ob ingentem vigorem animi & mirandam singularemque constantiam contra militum insolentiam, *Severi* nomen a militibus eidem inditum est: quod illi ingentem in præsentia reverentiam, magnam apud posteros gloriam peperit; cum eo accessisset, ut de animi virtute nomen acceperit: siquidem solus inventus sit, qui tumultuantes legiones exaudiverit, ut suo loco ostendetur; in milites autem gravissime animadverterit, qui forte incurrerunt aliquid, quod videretur injustum; ut & ipsum locis suis declarabimus.

XIII. Omina imperii hæc habuit: primum, quod ea die natus est, qua defunctus vita Magnus Alex-

ander dicitur: deinde, quod in templo ejus mater enixa est: tertio, quod ipsius nomen accepit: tum præterea, quod ovum purpurei coloris, eadem die natum, qua ille natus est, palumbinum, anicula quædam matri ejus obtulit: ex quo quidem haruspices dixerunt, Imperatorem quidem illum, sed non diu futurum, & cito ad imperium perventurum. tum præterea, quod tabula Trajani Imperatoris, quæ geniali lecto patris imminebat, dum mater eum in templo pareret, in lectum ejus decedit. His accessit, quod nutrix ei O'lympias data est, quo nomine mater Alexandri appellata est. Nutritor Philippus provenit casu unus ex rusticis, quod nomen patri Alexandri Magni fuit. Fertur die prima natalis ejus toto die apud Arcam Cæsaream stella primæ magnitudinis visa, & sol circa domum patris ejus fulgido ambitu coronatus. Cum ejus natalem haruspices commendarent, dixerunt, eum summam rerum tenturum, idcirco quod hostiæ de ea villa, quæ esset Severi Imperatoris, adductæ essent, & quas in illius honorem coloni parassent. Nata in domo laurus juxta perfici arborem, intra unum annum perfici arborem vicit. unde etiam conjectores dixerunt, Persas ab eo esse vincendos.

XIV. Mater ejus pridie, quam pareret, somniavit, se purpureum dracunculum parere. Pater eadem nocte in somniis vidit, alis se Romanæ Victoriz, quæ in Senatu, ad coelum vehi. Ipse, cum vatem consularet de futuris, hos accepisse dicitur versus adhuc parvulus; & primis quidem fortibus;

Te manet imperium cæli terræque marisque :
intellectum est, quod inter Divos etiam referretur:

Te manet imperium, quod tenet imperium.
ex quo intellectum est, Romani illum imperii Principem futurum. nam ubi est imperium, nisi apud Romanos, quod tenet imperium? Et hæc quidem de Græcis versibus sunt prodita. Ipse autem, cum, parentis hortatu, animum a philosophia & musica ad alias artes traduceret, Virgilii fortibus hujusmodi illustratus est:

*Excudent alii spirantia mollius ara,
Credo equidem, vivos ducent de marmore vultus,
Orabunt causas melius, cœlique meatus
Describent radio, & surgentia sidera ducent:
Tu regere imperio populos, Romane, memento:
Hæ tibi erunt artes, pacique imponere morem,
Parcere subjectis & debellare superbos.*

Fuerunt multa alia signa, quibus Principem humani generis esse constaret. nimius ardor oculorum, & diutius intuentibus gravis: & divinatio mentis frequentissima: rerum memoria singularis, quam nemo nisi Acholius ferebat adjutam. Et cum puer ad imperium pervenisset, fecit cuncta cum matre, ut & illa videretur pariter imperare, mulier sancta, sed avara, & auri atque argenti cupida.

XV. Ubi ergo Augustus agere cœpit imperium, primum removit judices omnes a republica, & a ministeriis, atque muneribus, quos impurus ille Heliogabalus ex genere hominum turpissimo provexerat: deinde Senatum & equestrem ordinem purgavit. Ipsas deinde tribus, & eos, qui militaribus

nituntur prærogativis, purgavit, & Palatium suum comitatumque omnem, abjectis ex aulico ministerio cunctis obscœnis & infamibus: nec quemquam passus est esse in Palatinis, nisi necessarium hominem. Jurejurando deinde se constrinxit, ne quem adscriptum, id est vacantium, haberet, ne annonis rempublicam gravaret; dicens, malum pupillum esse Imperatorem, qui ex visceribus provincialium homines non necessarios, nec reipublicæ utiles pasceret. Fures judicare jussit in civitatibus illis nunquam videri: & si essent visi, jussit deportari per rectores provinciarum. Annonam militum diligenter inspexit. Tribunos, qui per stellaturas militibus aliquid tulissent, capitali poena affecit. Negotia & causas prius a scriniorum Principibus, & doctissimis jurisperitis & sibi fidelibus, quorum primus tunc Ulpianus fuit, tractari ordinarique, atque ita referri ad se præcepit.

XVI. Leges de jure populi & fisci moderatas & infinitas sanxit: neque ullam constitutionem sacra- vit sine viginti jurisperitis, & doctissimis ac sapientibus viris, iisdemque disertissimis, non minus quinquaginta: ut non minus in consilio essent sententiæ, quam senatusconsultum conficerent: & id quidem ita, ut iretur per sententias singulorum, ac scriberetur, quid quisque dixisset, dato tamen spatio ad disquirendum cogitandumque, priusquam dicerent, ne incogitati dicere cogerentur de rebus ingentibus. Fuit præterea illi consuetudo, ut si de jure, aut de negotiis tractaret, solos doctos & ditos adhiberet; si vero de re militari, milites vete-

res & senes, ac bene meritos, & locorum peritos, ac bellorum, & castrorum, & omnes literatos; & maxime eos, qui historiam norant: requirens, quid in talibus causis, quales in disceptatione versabantur, veteres Imperatores vel Romani, vel exterarum gentium fecissent.

XVII. Referebat Encolpius, quo ille familiarissimo usus est, illum, si unquam furem judicem vidisset, paratum habuisse digitum, ut illi oculum erueret: tantum odium eum tenebat eorum, de quibus apud se probatum, quod fures fuissent. Addit Septimius, qui vitam ejus non mediocriter exsecutus est, tanti stomachi fuisse Alexandrum in eos judices, qui furtorum fama laborassent, etiamsi damnati non essent, ut, si eos casu aliquo videret, commotione animi, stomachi choleram evomeret, toto vultu inardescente, ita ut nihil posset loqui. Nam cum quidam Septimius Arabinus, famosus crimine furtorum, & sub Heliogabalo jam liberatus, inter Senatores Principem salutatum venisset, exclamavit, *O numina, O Juppiter, O Dii immortales, Arabinus non solum vivit, verum etiam in Senatum venit? fortassis etiam de me sperat? tam fatuum, tam stultum esse me judicat?* Salutabatur autem nomine, hoc est, *Ave, Alexander.*

XVIII. Si quis caput flexisset, aut blandius aliquid dixisset, uti adulator vel abjiciebatur, si loci ejus qualitas pateretur, vel ridebatur ingenti cachinno, si ejus dignitas graviori subjacere non posset injuriæ. Salutatus confessum obtulit omnibus Senatoribus: atque adeo nisi honestos & bonæ famæ ho-

mines ad salutationem non admisit: iussitque (quemadmodum in Eleusiniis sacris dicitur, *ut nemo ingrediatur, nisi qui se innocentem novit*) per præconem edici, *ut nemo saluaret Principem, qui se furem esse nosset, ne aliquando detectus, capitali supplicio subderetur.* Ipse adorari se vetuit, cum jam cœpisset Heliogabalus adorari regum more Persarum. Erat præterea hæc illius sententia, *Solos fures de paupertate conqueri, dum volunt scelera vitæ suæ tegere.* Idem addebat sententiam de furibus notam, & Græce quidem, quæ Latine hoc significat, *Qui multa rapuerit, pauca suffragatoribus dederit, salvus erit:* quæ Græce talis est:

Ὁ πολλὰ κλέψας, ὀλίγα δοῦς, ἐκφεύξεται.

XIX. Præfectum prætorii sibi ex Senatus auctoritate constituit. Præfectum Urbis a Senatu accepit. alterum Præfectum prætorii fecit, qui, ne fieret, etiam fugerat, dicens, *Invitos, non ambientes in rempublicam collocandos.* Senatorem nunquam sine omnium Senatorum, qui aderant, consilio fecit, ita ut per sententias omnium crearetur, testimonia dicerent summi viri; ac si fefellissent vel testes, vel ii, qui sententias dicebant, postea in ultimum rejicerentur locum civium, condemnatione adhibita, quasi falsi rei approbati, sine ullius indulgentiæ proposito. Idem Senatores nonnisi ad summorum in Palatio virorum suffragium fecit, dicens, *magnum virum esse oportere, qui faceret Senatorem.* Idem libertinos nunquam in equestrem locum redegit, asserens, *seminarium Senatorum equestrem locum esse.*

XX. Moderationis tantæ fuit, ut nemo unquam

ab ejus latere submoveretur, ut omnibus se blandum affabilemque præberet, ut amicos non solum primi ac secundi loci, sed etiam inferiores, ægrotantes viferet, ut sibi ab omnibus libere, quæ sentiebant, dici cuperet, & cum dictum esset, audiret, & cum audisset, ita, ut res poscebat, emendaret atque corrigeret; si minus bene factum esset aliquid, etiam ipse convinceret, idque sine fastu & sine amaritudine animi; confessum omnibus semper offerret, præter eos, quos furtorum densior fama perstrinxerat, de absentibus semper requirens. Denique cum ei objiceret nimiam civilitatem & Mammæa mater, & uxor Memmia, Sulpicii consularis viri filia, Catuli neptis, & sæpe dicerent, *Molliorem tibi potestatem & contemibiliorem imperiū fecisti*: ille respondit, *Sed securiorem, atque diuturniorem*. Dies denique nunquam transiit, quin aliquid mansuetum, civile, pium faceret; sed ita, ut ærarium non everteret.

XXI. Condemnationes & raras esse jussit, & quæ factæ fuerant, non indulgit. Vestigalia civitatibus ad proprias fabricas deputavit. Fœnus publicum trientarium exercuit, ita ut pauperibus plerisque sine usuris pecunias dederit ad agros emendos, reddendas de fructibus. Præfectis prætorio suis senatoriam addidit dignitatem, ut viri clarissimi & essent, & dicerentur: quod antea vel raro fuerat, vel omnino non fuerat, eousque, ut si quis Imperatorum successorem Præfecto prætorii dare veller, laticlaviam eidem per libertum submitteret, ut in multorum vita Marius Maximus dixit. Alexander

autem idcirco Senatores esse voluit Præfectos prætorii, ne quis non Senator de Romano Senatore judicaret. Milites suos sic ubique scivit, ut in cubiculo haberet breves, & numerum, & tempora militantium, semperque, cum solus esset, & rationes eorum, & numerum, & dignitates, & stipendia recenseret, ut esset ad omnia instructissimus. Denique cum inter militares aliquid ageretur, multorum dicebat & nomina. de promovendis etiam sibi annotabat, & perlegebat cuncta pittacia, & sic faciebat, diebus etiam pariter annotatis, & quis, & qualis esset, & quo insinuante promotus. Commeatum populi Romani sic adjuvit, ut, cum frumenta Heliogabalus evertisset, vicem de propria pecunia loco suo reponeret.

XXII. Negotiatoribus, ut Romam volentes concurrerent, maximam immunitatem dedit. Oleum, quod Severus populo dederat, quodque Heliogabalus imminuerat, turpissimis hominibus Præfecturam annonæ tribuendo, integrum restituit. Jus conferendi rationes, quod impurus ille sustulerat, hic omnibus reddidit. Mechanica opera Romæ plurima instituit. Judæis privilegia reservavit. Christianos esse passus est. Pontificibus tantum detulit, & Quindecimviris atque Auguribus, ut quasdam causas sacrorum, a se finitas, iterari, & aliter distingui pateretur. Præsides provinciarum, quos vere, non factionibus, laudari comperit, & in itineribus secum semper in vehiculo habuit, & muneribus adjuvit, dicens, & fures a republica pellendos, ac pauperandos, & integros esse redimendos, atque ditan-

dos. Cum vilitatem populus Romanus ab eo peteret, interrogavit per Curionem, quam speciem carum putarent. illi continuo exclamaverunt, carnem bubulam, atque porcinam. tunc ille non quidem vilitatem proposuit, sed iussit, ne quis suminatam occideret, ne quis lactantem, ne quis vaccam, ne quis damalionem: tantumque intra biennium, vel prope annum, porcinæ carnis fuit & bubulæ, ut, cum fuisset octominutalis libra, ad duos unumque utriusque carnis libra redigeretur.

XXIII. Causas militum contra Tribunos sic dividit, ut, si aliquem reperisset tribunorum in crimine, pro facti qualitate sine indulgentiæ proposito puniret. De omnibus hominibus per fideles homines suos semper quæsit: & per eos, quos nemo nosset hoc agere; cum diceret, omnes præda corrumpi posse. Servos suos semper cum servili veste habuit, liberos cum ingenuorum. Eunuchos de ministerio suo abiecit, & uxori ut servos servire iussit. & cum Heliogabalus mancipium eunuchorum fuisset, ad certum numerum eos redegit, nec quidquam in Palatio curare voluit, nisi balneas feminarum: cum plerosque eunuchos rationibus & procurationibus præposuisset Heliogabalus, hic illis & veteres sustulit dignitates. Idem tertium genus hominum eunuchos esse dicebat, nec videndum, nec in usu habendum a viris, sed vix a feminis nobilibus. Qui de eo sumum vendiderat, & a quodam militari centum aureos acceperat, in crucem tolli iussit per eam viam, qua esset servis suis ad suburbana imperatoria iter frequentissimum.

XXIV. Provincias prætorias, præsidiales plurimas fecit: proconsulares ex Senatus voluntate ordinavit. Balnea mixta Rômæ exhiberi prohibuit; quod quidem jam ante prohibitum; Heliogabalus fieri permiserat. Lenonum vectigal, & meretricum, & exoletorum, in sacrum ærarium inferri vetuit, sed sumtibus publicis ad instaurationem theatri, circi, amphitheatri, & ærarii, deputavit. Habuit in animo, ut exoletos vetaret, quod postea Philippus fecit: sed veritus est, ne prohibens, publicum dedecus in privatas cupiditates converteret, cum homines illicita magis poscant, prohibitaque furore persequantur. Braccariorum, linteonum, vitreariorum, pellionum, plaustrariorum, argentariorum, aurificum, & ceterarum artium, vectigal pulcherrimum instituit: ex eoque jussit thermas, & quas ipse fundaverat, & superiores, populi usibus exhiberi: silvas etiam thermis publicis deputavit. Addidit & oleum luminibus thermarum, cum antea non ante auroram paterent, & ante solis occasum clauderentur.

XXV. Hujus imperium incruentum quidam literis tradiderunt: quod contra est. nam & *Severus* est appellatus a militibus ob austeritatem, & in animadversionibus asperior in quibusdam fuit. Opera veterum Principum instauravit: ipse nova multa constituit: in his thermas nominis sui, juxta eas, quæ *Neronianæ* fuerunt, aqua inducta, quæ *Alexandrina* nunc dicitur. Nemus thermis suis, de privatis ædibus suis, quas emerat, dirutis ædificiis, fecit. *Oceani solium* primus inter Principes appella-

vit, cum Trajanus id non fecisset, sed diebus folia deputasset. Antonini Caracalli thermas additis for-
tionibus perfecit, & ornavit. Alexandrinum opus
marmoris, de duobus marmoribus, hoc est, Por-
phyretico & Lacedæmonio, primus instituit, Pa-
latio exornato hoc genere marmorandi. Statuas
colossas in Urbe multas locavit, artificibus undique
conquisitis. Alexandri habitu nummos plurimos fi-
guravit; & quidem electreos aliquantos, sed pluri-
mos tamen aureos. A mulieribus famosis matrem
& uxorem suam saluari vetuit. Conciones in Urbe
multas habuit more veterum Tribunorum & Con-
sulum.

XXVI. Congiarium populo ter dedit, donari-
um militibus ter: carnem populo addidit. Usuras
foeneratorum contraxit ad trientes pensiones, etiam
pauperibus consulens. Senatores si foenerarentur,
usuras accipere primo vetuit, nisi aliquid muneris
causa acciperent: postea tamen iussit in semisses
acciperent donum, munus tamen sustulit. Statuas
summorum virorum in foro Trajani collocavit un-
dique translatas. Paulum & Ulpianum in magno
honore habuit: quos Præfectos ab Heliogabalo alii
dicunt factos, alii ab ipso. nam & consiliarius Alex-
andri, & magister scrinii Ulpianus fuisse perhibe-
tur: qui tamen ambo assessores Papiniani fuisse di-
cuntur. Basilicam Alexandrinam instituerat inter
campum Martium, & septa Agrippiana, in latum
pedum centum, in longum pedum mille, ita ut
tota columnis penderet: quam efficere non potuit,
morte præventus. Iñum & Serapium decenter or-

navit, additis signis, & deliacis, & omnibus mysticis. In matrem Mammæam unice pius fuit, ita ut Romæ in Palatio faceret diætæ nominis Mammææ, quas imperitum vulgus hodie *ad Mammam* vocant. Et in Bajano palatium cum stagno, quod Mammææ nomine hodieque censetur. Fecit & alia in Bajano opera magnifica in honorem affinium suorum, & stagna stupenda, admissio mari. Pontes, quos Trajanus fecerat, instauravit pæne in omnibus locis: aliquos etiam novos fecit: sed instauratis nomen Trajani reservavit.

XXVII. In animo habuit, omnibus officiis genus vestium proprium dare, & omnibus dignitatibus, ut a vestitu dignoscerentur: & omnibus servis, ut in populo possent agnosci, ne quis seditiosus esset, simul ne servi ingenuis miscerentur. Sed hoc Ulpiano Pauloque displicuit, dicentibus, plurimum rixarum fore, si faciles essent homines ad injurias. Tum satis esse constituit, ut Equites Romani a Senatoribus clavi qualitate discernerentur. Pænulis intra Urbem frigoris causa ut senes uterentur permisit, cum id vestimenti genus semper itinerarium aut pluvie fuisset. Matronas tamen intra Urbem pænulis uti vetuit, in itinere permisit. Facundie fuit Græcæ magis, quam Latinæ, nec versu invenustus, & ad musicam pronus, matheseos peritus: & ita quidem, ut ex ejus jussu mathematici publice proposuerint Romæ, ac sint professi, ut docerent. Haruspicinæ quoque peritissimus fuit. ἀρρεσκά-πας magnus, ut & Valcones Hispanorum, & Pan- noniorum augures vicerit. Geometriam fecit. pin-

xit mire, cantavit nobiliter: sed nunquam alio conficio, nisi pueris suis testibus. Vitas Principum bonorum versibus scripsit. Lyra, tibia, organo cecinit: tuba etiam, quod quidem Imperator nunquam ostendit. Palæstes primus fuit, in armis magnus, adeo ut multa bella, & gloriose gesserit.

XXVIII. Consulatum ter iniit tantum ordinarium, ac primo nundino sibi alios semper suffecit. Severissimus iudex contra fures, appellans eosdem quotidianorum scelerum reos, & damnans acerrime, ac solos hostes, inimicosque reipublicæ vocans. Eum notarium, qui falsum causæ brevem in consilio imperatorio retulisset, incisis digitorum nervis, ita ut nunquam posset scribere, deportavit. Cum quidam ex honoratis, vitæ sordidæ & aliquando furtorum reus, per ambitionem nimiam ad militiam aspirasset, idcirco quod per reges amicos ambierat, admissus, statim in furto, præsentibus patronis, detectus est, iussusque a regibus audiri, damnatus est, re probata. Et cum quæreretur a regibus, quid apud eos paterentur fures, illi responderunt, *Crucem*: ad eorum responsum, in crucem sublatus est, ita & patronis auctoribus damnatus ambitor est, & Alexandri, quam præcipue tuebatur, servata clementia est. Statuas colossas, vel pedestres nudas, vel equestres, divis Imperatoribus in foro divi Nervæ, quod *Transitorium* dicitur, locavit, omnibus cum titulis, & columnis æreis, quæ gestorum ordinem continerent, exemplo Augusti, qui summorum virorum statuas in foro suo e marmore collocavit, additis gestis. Volebat videri originem de

Romanorum gente trahere, quia eum pudebat Syrum dici: maxime, quod quodam tempore festo, ut solent, Antiochenſes, Ægyptii, Alexandrini, laceſſiverant eum conviciolis, *Syrum Archiſynagogum* eum vocantes, & *Archierea*.

XXIX. Antequam de bellis ejus, & expeditionibus, & victoriis loquar, de viſa quotidiana & domeſtica pauca diſſeram. Uſus vivendi, eidem hic fuit: primum ut, ſi facultas eſſet, id eſt, ſi non cum uxore cubuiſſet, matutinis horis in larario ſuo, in quo & divos Principes, ſed optimos, electos, & animas ſanctiores, in queis & Apollonium, & quantum ſcriptor ſuorum temporum dicit, Chriſtum, Abraham, & Orpheum, & huiusmodi ceteros habebat, ac majorum effigies, rem divinam faciebat. Si id non poterat, pro loci qualitate vel veſtabatur, vel piſcabatur, vel deambulabat, vel venabatur. Dehinc ſi hora permitteret, actibus publicis poſt multam horam operam dabat, idcirco quod & res bellicæ, & res civiles, ut ſuperius dictum eſt, per amicos tractabantur, ſed ſanctos & fideles, & nunquam venales: & tractatæ firmabantur, niſi quid novi ipſi etiam placeret. Sane ſi neceſſitas cogeret, ante lucem actibus operam dabat, & in longam horam producebat, neque unquam rædiavit, aut moroſus, aut iratus reſedit, fronte ſemper pari, & lætus ad omnia. erat enim ingentis prudentiæ, & cui nemo poſſet imponere, & quem ſi aliquis urbane tentare voluit, intellectus tulit poenas.

XXX. Poſt actus publicos, ſeu bellicos, ſeu civi-

les, lectioni Græcæ operam majorem dabat, *De re publica* libros Platonis legens. Latina cum legeret, non alia magis legebat, quam *De officiis* Ciceronis & *De re publica*: nonnunquam & oratores, & poetas, in quibus Serenum Sammonicum, quem ipse noverat & dilexerat, & Horatium. Legit & vitam Alexandri, quem præcipue imitatus est: etsi in eo condemnabat ebrietatem, & crudelitatem in amicos; quamvis utrumque defendatur a bonis scriptoribus, quibus sæpius ille credebatur. Post lectionem, operam palæstræ, aut sphæristerio, aut cursum, aut luctaminibus mollioribus, dabat, atque inde unctus lavabatur, ita ut caldariis vel nunquam, vel raro, piscina semper uteretur, in eaque una hora prope maneret, biberet etiam frigidam Claudiam jejunos, ad unum prope sextarium. Egressus balneas multum lactis & panis sumebat, ova, deinde mulsum: atque his relictis aliquando prandium inibat, aliquando cibum usque ad coenam discebatur, prandit tamen sæpius. Ususque est Hadriani tetrapharmaco frequenter, de quo in libris suis Marius Maximus loquitur, cum Hadriani discessit vitam.

XXXI. Post meridianas horas, subscriptioni & lectioni epistolarum semper dedit operam, ita ut ab epistolis, & libellis, & a memoria, semper assisterent: nonnunquam etiam, si stare per valetudinem non possent, sederent, relegentibus cuncta librariis, & iis, qui scrinium gerebant, ita ut Alexander sua manu adderet, si quid esset addendum; sed ex ejus sententia qui disertior habebatur. Post

epistolas, omnes amicos simul admisit, cum omnibus pariter est locutus: neque unquam solum quemquam, nisi Præfectum suum, vidit, & quidem Ulpianum, ex assessore semper suo, causa justitiæ singularis. Cum autem alterum adhibuit, & Ulpianum rogari iussit. Virgilium autem *Platonem poetarum* vocabat, ejusque imaginem cum Ciceronis simulacro, in secundo larario habuit, ubi & Achillis & magnorum virorum. Alexandrum vero Magnum inter Divos & optimos in larario majore consecravit.

XXXII. Injuriam nulli unquam amicorum committumve fecit, nec magistris quidem, aut principibus officiorum. Præfectis autem semper detulit, *asserens, cum, qui mereatur injuriam pati, ab Imperatore damnandum esse, non dimittendum.* Si unquam alicui præsentium successorem dedit, semper illud addidit, *Gratias tibi agit respublica:* eumque muneratus est, ita ut privatus pro loco suo posset honeste vivere: his quidem muneribus, agris, bovis, equis, frumento, ferro, impendiis ad faciendam domum, marmoribus ad ornandum, & operis, quas ratio fabricæ requirebat. Aurum & argentum raro cuiquam, nisi militi divisit, *nefas esse dicens, ut dispensator publicus in delectationes suas & suorum converteret id, quod provinciales dedissent.* Aurum negotiatorium & coronarium Romæ remisit.

XXXIII. Fecit Romæ curatores Urbis quatuordecim, sed ex consularibus: quos audire negotia urbana cum Præfecto Urbis iussit, ita ut omnes, aut magna pars adesset, cum acta fierent. Corpora omnium constituit, vinariorum, lupinariorum,

caligatiorum, & omnino omnium artium: hisque ex sese defensores dedit, & jussit, quid ad quos judices pertineret. Scenicis nunquam aurum, nunquam argentum, vix pecuniam donavit: pretiosas vestes, quas Heliogabalus dederat, etiam sustulit. Milites, quos *offensionales* vocant, non pretiosis, sed speciosis, clarisque vestibus ornabat: nec multum in signa, aut ad apparatus regium, auri & ferici deputabat, dicens, *Imperium in virtute esse, non in decore*. Chlamydes hirtas Severi, & tunicas asemas, vel macrocheras, ex purpura non magna, ad usum revocavit suum.

XXXIV. In convivio aurum nesciit: pocula mediocria, sed nitida semper habuit. Ducentarum librarum argenti pondus ministerium ejus nunquam transiit. Nanos, & nanas, & moriones, & vocales exoletos, & omnia acroamata, & pantomimos, populo donavit: qui autem usui non erant, singulis civitatibus deputavit alendos singulos, ne gravarentur specie mendicorum. Eunuchos, quos Heliogabalus & in consiliis turpibus habebat, & promovebat, donavit amicis, addito elogio, ut, si non rediissent ad bonos mores, eosdem liceret occidi sine auctoritate judicii. Mulieres infames, quarum infinitum numerum deprehenderat, publicari jussit, exoletis omnibus deportatis, aliquibus etiam naufragio meris, cum quibus illa clades consuetudinem habuerat funestissimam. Auratam vestem ministrorum vel in publico convivio nullus habuit. Cum inter suos convivaretur, aut Ulpianum, aut doctos homines adhibebat, ut haberet fabulas

literatas, quibus se recreari dicebat & pasci. Habebat, cum privatim convivaretur, & librum in mensa, & legebat, sed Græca magis. Latinos autem poetas læsitabat. Publico convivio ea simplicitate egit, qua privato; nisi quod numerus accubantium crescebat, & multitudo convivarum, qua ille offendebar, dicens, se in theatro & circo manducare.

XXXV. Oratores & poetas, non sibi panegyricos dicentes, (quod exemplo Nigri Pescennii stultum dicebat) sed aut orationes recitantes, aut facta veterum, quos ante retuli, libenter audivit: libentius tamen, si quis ei recitavit Alexandri Magni laudes, aut meliorum retro Principum, aut magnorum urbis Romæ virorum. Ad Athenæum, audiendorum & Græcorum & Latinorum rhetorum vel poetarum causa, frequenter processit. Audivit autem etiam forenses oratores causas recitantes, quas vel apud ipsum, vel apud Præfectos Urbis egerant. Agoni præfedit, & maxime Herculeo, in honorem Magni Alexandri. Solus post meridiem, vel matutinis horis idcirco nunquam aliquos videbat, quod ementitos de se multa cognoverat: speciatim Vetronium Turinum: quem cum familiarem habuisset, ille omnia vel fingendo sic vendiderat, ut Alexandri, quasi stulti hominis, & quem ille in potestate haberet, & cui multa persuaderet, infamaret imperium: sicque omnibus persuaserat, quod ad nutum suum omnia faceret.

XXXVI. Denique hac illum arte deprehendit, ut quendam immitteret, qui a se quiddam publice

peteret, ab illo autem occulte quasi præsidium postularet, ut pro eo Alexandro secreto suggereret. Quod cum factum esset, & Turinus suffragium promississet, dixissetque, se quædam Imperatori dixisse, cum nihil dixisset, sed in eo pendere, ut adhuc impetraret, eventum vendens: cumque iterum iussisset Alexander interpellari, & Turinus, quasi aliud agens, nutibus annuisset, neque tamen interim quidquam dixisset, impetratum autem esset, quod petebatur, Turinusque ab illo, qui meruerat, fumi venditor, ingentia præmia percepisset; accusari eum Alexander iussit, probansque per testes omnibus, & quibus præsentibus quid accepisset, & quibus audientibus quid promississet, in foro Transitorio ad stipitem illum ligari præcepit, & fumo apposito, quem ex stipulis atque humidis lignis fieri iusserat, necavit, præcone dicente, *Fumo punitur, qui vendidit fumum.* Ac ne una tantum causa videretur crudelior fuisse, quæsiuit diligentissime, antequam eum damnaret: & invenit, Turinum sæpe & in causis ab utraque parte accepisse, cum eventus venderet, & ab omnibus, qui aut præposituras, aut provincias acceperant.

XXXVII. Spectacula frequentavit cum summa donandi parsimonia, dicens, & venatores, & scenicos, & aurigas sic alendos, quasi servos nostros, aut venatores, aut muliones, aut voluptarios. Convivium neque opimum, neque nimis parcum, sed nitoris summi fuit: ita tamen, ut pura mantilia mitterentur, sæpius cocco clavata, aurata vero nunquam; cum hæc Heliogabalus jam recepisset, & ante,

ut quidam prædicant, Hadrianus habuisset. Usus convivii diurnus hic fuit: vini ad totum diem sextarii triginta, panis mundi pondo triginta, panis sequentis ad donandum pondo quinquaginta. Nam semper de manu sua ministris convivii & panem, & partes aut olerum, aut carnis, aut leguminum dabat, senili prorsus maturitate patremfamilias agens. Erant decreta & carnis diversæ pondo triginta, erant & gallinacei duo. Adhibebatur & anser diebus festis: Kalendis autem Januariis, & hilariis Matris Deum, & Iudis Apollinaribus, & Jovis epulo, & Saturnalibus, & hujusmodi festis diebus, fastianus: ita ut aliquando & duo ponerentur, additis gallinaceis duobus. leporem quotidie habuit, venationem frequentem: sed eam cum amicis dividebat, & his maxime, quos sciebat per se non habere. nec divitibus quidquam talium munerum misit, sed ab his semper accepit. Habuit quotidie milii sine pipere sextarios quatuor, cum pipere duo: &, ne sit longum omnia inferere, quæ Gargilius Martialis ejus temporis scriptor singulatim persecutus est, omnia & ad modum & rationem illi sunt præbita. Pomis vehementer indulgit, ita ut secunda mensa illius sæpius ponerentur: unde etiam jocus exstitit, *Non secundam mensam Alexandrum habere, sed secundum.* Ipse cibo plurimo reficiebatur; vino neque parce, neque copiose, assatim tamen. Frigida semper pura usus, æstate vino cum rosa condito: quod quidem solum ex diverso genere Heliogabali tenuerat.

XXXVIII. Et quoniam de lepusculis facta est

mentio, quod ille leporem quotidie haberet, jocus poeticus emerfit, idcirco quod multi septem diebus pulehros esse dicunt eos, qui leporem comederint, ut Martialis etiam epigramma significat, quod contra quandam Gelliam scripsit hujusmodi:

Cum leporem mittis, semper mihi, Gellia, mandas,

Septem formosus, Marce, diebus eris.

Si verum dicis, si verum, Gellia, mandas,

Edisti nunquam, Gellia, tu leporem.

Sed hos versus Martialis in eam, quæ deformis esset, composuit: poeta vero temporum Alexandri hæc in eum dixit:

Pulchrum quod vides esse nostrum regem,

Quem Syrum sua detulit propago,

Venatus facit, & lepus comesus,

Ex quo continuum capit leporem.

Hos versus cum ad eum quidam ex amicis detulisset, respondisse ille dicitur Græcis versibus, in hanc sententiam:

Pulchrum quod putas esse vestrum regem,

Vulgari, miserande, de fabella:

Si verum putas esse, non irascor.

Tantum tu comedas velim lepusculos,

Ut fias, animi malis repulsis,

Pulcher, ne inideas livore mentis.

XXXIX. Cum amicos militares habuisset, ut usum Trajani, quem ille post secundam mensam, potandi usque ad quinque pocula instituerat, reservaret, unum tantum poculum amicis exhibebat, in honorem Alexandri Magni: id autem brevius, nisi si quis, quod licebat, majus habere po-

stulasset. Ufus Veneris in eo moderatus fuit, exoletorum ita expers, ut (quemadmodum supra diximus) legem de his auferendis ferre voluerit. Horrea in omnibus regionibus publica fecit, ad quæ conferrent bona si, qui privatas custodias non haberent. Balnea omnibus regionibus addidit, quæ forte non habebant, nam hodieque multa dicuntur Alexandri. Fecit & domos pulcherrimas, easdemque amicis suis maxime integris viris donavit. Vestigalia publica in id contraxit, ut, qui decem aureos sub Heliogabalo præstiterant, tertiam partem aurei præstarent, hoc est, tricesimam partem. tuncque primum semisses aureorum formati sunt: tunc etiam, cum ad tertiam aurei partem vestigal dedidisset, tremisses; dicente Alexandro, etiam quartarios futuros, quod minus non posset: quos quidem jam formatos in moneta detinuit, expectans, ut, si vestigal contrahere potuisset, & eosdem ederet: sed cum non potuisset per publicas necessitates, conflare eos iussit, & tremisses tantum solidosque formari. Formas binarias, ternarias, & quaternarias, & denarias etiam, atque amplius, usque ad bilibres quoque & centenarias, quas Heliogabalus invenerat, resolveri præcepit, neque in usu cuiusquam versari, atque ex eo his materiæ nomen inditum est, cum diceret, plus largiendi hanc esse Imperatori causam, si, cum multos solidos minores dare possit, dans decem vel amplius una forma, triginta & quinquaginta & centum dare cogeretur.

XL. Vestes sericas ipse raras habuit: holosericas

nunquam induit, subsericam nunquam donavit. Divitiis nullius invidit. pauperes juvit. honoratos, quos pauperes vere, non per luxuriam, aut simulationem vidit, semper multis commodis auxit, agris, servis, animalibus, gregibus, ferramentis rusticis. In thesauris vestem nunquam nisi annum esse passus est, eamque statim expendi iussit. Omnem vestem, quam donavit, ipse perspexit: omne aurum, omne argentum, idque frequenter, appendit. Donavit & ocreas, & braccas, & calceamenta inter vestimenta militaria. Purpuræ clarissimæ non ad usum suum, sed ad matronarum, si quæ aut possent, aut vellent, certe ad vendendum, gravissimus exactor fuit: ita ut *Alexandrina purpura* hodieque dicatur, quæ vulgo *Probianæ* dicitur, idcirco quod Aurelius Probus baphiis præpositus, id genus muricis reperisset. Usus est ipse chlamyde coccinea sæpe. In urbe tamen semper togatus fuit, & in Italiæ urbibus. Prætextam & pictam togam nunquam nisi Consul accepit: & eam quidem, quam de Jovis templo suntam alii quoque accipiebant, aut Prætores, aut Consules. Accepit prætextam etiam cum sacra faceret, sed loco Pontificis maximi, non Imperatoris. Boni lintheaminis appetitor fuit, & quidem puri, dicens, *Si linea idcirco sunt, ut nihil asperum habeant, quid opus est purpura?* in linea autem aurum mitti, etiam dementiam judicabat, cum asperitati adderetur rigor. Fasciis semper usus est. Braccas albas habuit, non coccineas, ut prius solebant.

XLI. Gemmarum quod fuit, vendidit, & aurum

in ærarium contulit, dicens, gemmas viris usui non esse: matronas autem regias contentas esse debere uno reticulo, atque inauribus, & baccato monili, & corona, cum qua sacrificium facerent, & unico pallio auro sparso, & cyclade, quæ sex uncias auri plus non haberet. Prorsus censuram suis temporibus de propriis moribus gessit. Imitati sunt eum magni viri, & uxorem ejus matronæ pernobiles. Aulicum ministerium in id contraxit, ut essent tot homines in singulis officiis, quot necessitas postulare: ita ut annonas, non dignitatem, acciperent fullones, & vestitores, & pictores, & pincernæ, omnes castrenses ministri, quemadmodum pestis illa instituerat; sed annonas singulas, vix binas. Et cum argentum in ministerio plus ducentis libris non haberet, nec plures ministros, argentum & ministros ante quando poscebat, accipiebat ab amicis: quod hodieque fit, si præstatur a Præfectis absente Imperatore. Voluptates scenicas in convivio nunquam habuit, sed summa illa oblectatio fuit, ut catuli cum porcellis luderent, aut perdices inter se pugnarent, aut aves parvulæ sursum & deorsum volitarent. Habuit sane in Palatio unum genus voluptatis, quo maxime delectatus est, & quo sollicitudines publicas sublevaret. nam avia-ria instituerat pavonum, fasianorum, gallinaceorum, anatum, perdicum etiam: hisque vehementer oblectabatur, maxime palumborum, quos habuisse ad viginti millia dicitur: & ne eorum pastus gravaret annonam, servos habuit vestigales, qui eos ex ovis, ac pullicenis, ac pipionibus alerent.

XLII. Thermis & suis & veterum frequenter cum populo usus est, & æstate maxime, balneari veste ad Palatium revertens; hoc solum imperatorium habens, quod lacernam coccineam accipiebat. Cursorem nunquam nisi servum suum, dicens, ingenuum currere, nisi in sacro certamine, non debere: cocos, piscatores, fullones, & balneatores, nonnisi servos suos habuit: ita ut, si quis deesset, emeret. Medicus sub eo unus palatinus salarium accepit: ceteri omnes, qui usque ad sex fuerunt, annonas binas aut ternas accipiebant, ita ut munda singulas consequerentur, alias aliter. Iudices cum promoveret, exemplo veterum, ut & Cicero docet, & argento & necessariis instruebat; ita ut præfides provinciarum acciperent argenti pondus vicena, phialas senas, mulos binos, equos binos, vestes forenses binas, domesticas singulas, balneares singulas, aureos centenos, cocos singulos, muliones singulos; & si uxores non haberent, singulas concubinas, quod sine his esse non possent: reddituri, deposita administratione, mulas, mulos, equos, muliones, & cocos: cetera sibi habituri, si bene egissent; in quadruplum reddituri, si male, præter condemnationem, aut peculatus, aut repetundarum.

XLIII. Leges innumeras sanxit. Carrucas Romæ & rhedas Senatoribus omnibus ut argentatas haberent, permisit: interesse Romanæ dignitatis putans, ut his tantæ urbis Senatores vestirentur. Consules quoscunque vel ordinarios, vel suffectos creavit, ex Senatus sententia nominavit, sumtum

Scriptt. H. A.

T

eorum contrahens: & nundina vetera ex ordine instituit, vel dies, vel tempora. Quæstores candidatos ex sua pecunia iussit munera populo dare, sed ut post quæsturam præturas acciperent, & inde provincias regerent: arcarios vero instituit, qui de arca fisci ederent munera, eademque parciora. Habuit in animo, ut munera per totum annum dispergeret, ut per triginta dies munus populo daretur: sed cur id non fecerit, in occulto habetur. Capitolium septimo die, cum in Urbe esset, ascendit, templa frequentavit. Christo templum facere voluit, eumque inter Deos recipere, quod & Hadrianus cogitasse fertur, qui templa in omnibus civitatibus sine simulacris iusserat fieri: quæ hodie idcirco, quia non habent numina, dicuntur *Hadriani*, quæ ille ad hoc parasse dicebatur: sed prohibitus est ab iis, qui, consulentes sacra, repperant omnes Christianos futuros, si id optato evenisset, & templa reliqua deferenda.

XLIV. In jocis Alexander dulcissimus fuit, in fabulis amabilis, in conviviis comis, ita ut quisque posceret, quod vellet. Ad aurum colligendum attentus, ad servandum cautus, ad inveniendum sollicitus, sed sine cuiusquam excidio. Syrum se dici noluit, sed a maioribus Romanum. Et stemma generis depinxerat, quo ostendebatur, genus ejus a Metellis descendere. Rhetoribus, grammaticis, medicis, haruspicibus, mathematicis, mechanicis, architectis salaria instituit, & auditoria decrevit; & discipulos cum annonis pauperum filios, modo ingenuos, dari iussit. Etiam in provinciis orato-

ribus forensibus multum detulit, plerisque etiam annonas dedit, quos constitisset gratis agere. Leges in annos firmavit, easque etiam ipse diligentissime servavit. Theatralia spectacula sæpe obiit. Theatrum Marcelli reficere voluit. Multis civitatibus, quæ post terræ motus deformes erant, ad instaurationem operum, & publicorum, & privatorum, pecuniam ex vestigialibus dedit. In templis sane nunquam, præter quatuor aut quinque argenti libras, auri ne guttulam quidem aut bracteolam posuit, susurrans versum Persii,

— — *in sanctis quid facit aurum?*

XLV. Expeditiones bellicas habuit, de quibus ordine suo edisseram. Primum tamen ejus consuetudinem dicam de rebus vel tacendis, vel prodendis. Tacebantur secreta bellorum: itinerum autem dies publice proponebantur, ita ut edictum penderet ante menses duos, in quo scriptum esset, *Illæ die, illa hora ab Urbe sum exiturus, & si Dii voluerint, in prima mansione mansurus*: deinde per ordinem mansiones, deinde stativæ, deinde ubi annona esset accipienda: & id quidem eo usque, quamdiu ad fines barbaricos veniretur. jam enim inde tacebatur, & omnes ambulabant ita, ne dispositionem Romanam barbari scirent. Certum est autem, eum nunquam id, quod proposuerat, fefellisse, cum diceret, *nolle ab aulicis suas vendi dispositiones*: quod factum fuerat sub Heliogabalo, cum ab eunuchis omnia venderentur. quod genus hominum idcirco secreta omnia in aula nosse cupiunt, ut soli aliquid scire videantur, & habeant, unde vel gratiam

vel pecuniam requirant. Et quia de publicandis dispositionibus mentio contigit: ubi aliquos voluisset vel rectores provinciis dare, vel præpositos facere, vel procuratores, id est, rationales ordinare, nomina eorum proponebat, hortans populum, ut, si quis quid haberet criminis, probaret manifestis rebus; si non probasset, subiret poenam capitis: dicebarque, *grave esse, cum id Christiani & Judæi facerent in prædicandis sacerdotibus, qui ordinandi sunt, non fieri in provinciarum rectoribus, quibus & fortuna hominum committerentur & capita.*

XLVI. Assessoribus salaria instituit: quamvis sæpe dixerit, eos esse promovendos, qui per se rempublicam gerere possent, non per assessores; addens, militares habere suas administrationes, habere literatos: & ideo unumquemque hoc agere debere, quod nosset. Thesauros repertos iis, qui repererant, donavit: & si multi essent, addidit his eos, quos in suis habebat officiis. Cogitabat secum, & descriptum habebat, cui quid præstitisset: & si quos sciret vel nihil petiisse, vel non multum, unde sumtus suos augerent, vocabat eos, & dicebat: *Quid est, cur nihil petis? an me tibi vis fieri debitorem? pete, ne privatus de me queraris.* Dabat autem hæc in beneficiis, quæ famam ejus non læderent: bona punitorum, sed nunquam cum auro, argento, vel gemmis; nam id omne in ærarium reponebat: dabat præposituras locorum civilium, non militum: dabat eas administrationes, quæ ad procuraciones pertinerent. Rationales cito mutabat, ita ut nemo nisi annum compleret; eosque, si boni essent, oderat, *malum necessarium* vocans.

Præfides vero, Proconsules & Legatos, nunquam fecit ad beneficium, sed ad iudicium vel suum, vel Senatus.

XLVII. Milites expeditionis tempore sic disposuit, ut in mansionibus annonas acciperent, nec portarent cibaria decem & septem, ut solent, dierum, nisi in barbarico: quamvis & illic mulis eisdem atque camelis adjuverit, dicens, *milites se magis servare, quam se ipsum, quod salus publica in his esset.* Ægrotantes ipse visitavit per tentoria milites, etiam ultimos, & carpentis vexit, & omnibus necessariis adjuvit. Et si forte gravius laborassent, per civitates & agros patribus familias hominibus, & sanctioribus matronis eos distribuebat; reddens impendia, quæ fecissent, sive convaluissent illi, seu perissent.

XLVIII. Cum quidam Ovinus Camillus Senator antiquæ familiæ delicatissimus rebellare voluisset, tyrannidem affectans, eique nuntiatum esset, ac statim probatum; ad Palatium eum rogavit, eique gratias egit, quod curam reipublicæ, quæ recusantibus bonis imponeretur, sponte reciperet: deinde ad Senatum processit, & timentem, ac tantæ conscientiae tabe confectum, participem imperii appellavit, in Palatium recepit, convivio adhibuit, ornamentis imperialibus, & melioribus, quam ipse utebatur, affecit. Et cum expeditio barbarica esset nuntiata, vel ipsum, si vellet, ire, vel ut secum proficisceretur, hortatus est. & cum ipse pedes iter faceret, illum invitavit ad laborem: quem, post quinque millia cunctantem, equo sedere iussit. cumque

post duas mansiones equo etiam fatigatus esset; carpento imposuit. hoc quoque, seu timore, seu vere respuentem, abdicantem quin etiam imperium, & mori paratum, dimisit: commendatumque militibus, a quibus Alexander unice amabatur, tutum ad villas suas ire præcepit, in quibus diu vixit. sed post jussu Imperatoris occisus est, quod ille militaris esset, & a militibus amatus. Scio, vulgum hanc rem, quam contexui, Trajani putare: sed neque in vita ejus id Marius Maximus ita exposuit, neque Fabius Marcellinus, neque Aurelius Verus, neque Statius Valens, qui omnem ejus vitam in literas miserunt. Contra autem & Septimius, & Acholius, & Encolpius, vitæ scriptores, ceterique, de hoc talia prædicaverunt: quod ideo addidi, ne quis vulgi magis famam sequeretur, quam historiam, quæ rumore utique vulgi verior reperitur.

XLIX. Honores juris gladii nunquam vendi passus est, dicens, *Neceffe est, ut qui emit, vendat. Ego non patiar mercatores potestatum: quos si patiar, damnare non possim. Erubesco enim punire illum hominem, qui emit, & vendit.* Pontificatus & quindecimviratus, & auguratus, codicillares fecit, ita ut in Senatu allegerentur. Dexippus dixit, uxorem eum cujusdam Martiani filiam duxisse, eundemque ab eo Cæsarem nuncupatum. Verum cum vellet insidiis occidere Alexandrum Martianus, detecta factione, & ipsum interemtum, & uxorem abjectam. Idem dicit, fuisse patrum Antoninum Heliogabalum Alexandri, non uxoris sororis ejusdem filium. Cum Christiani quendam locum, qui publicus fue-

rat, occupassent, contra popinarii dicerent, sibi eum deberi, rescriptit, *melius esse, ut quomodocunque illic Deus colatur, quam popinariis dedatur.*

L. Cum igitur tantus ac talis Imperator domi ac foris esset, iniit Parthicam expeditionem: quam tanta disciplina, tanta reverentia sui egit, ut non milites, sed Senatores transire dicerentur. Quacunque iter legiones faciebant, Tribuni accincti, Centuriones verecundi, milites amabiles erant: ipsum vero ob hæc tot & tanta bona provinciales ut Deum suspiciebant. Jam vero ipsi milites juvenem Imperatorem sic amabant, ut fratrem, ut filium; ut parentem: vestiti honeste, calciati etiam ad decorem, armati nobiliter, equis etiam instructi, & ephippiis ac frenis decentibus: prorsus, ut Romanam rempublicam intelligeret, quicumque Alexandri vidisset exercitum. Elaborabat denique, ut dignus illo nomine videretur, immo, ut Macedonem illum vinceret: dicebatque, inter Romanum Alexandrum & Macedonem multum interesse debere. Fecerat denique sibi argyroaspidas & chrysoaspidas: fecerat & phalangem triginta millium hominum, quos *phalangarios* vocari jusserat, & cum quibus multum fecit in Perside: quæ quidem erat ex sex legionibus similium armorum, stipendiorum vero post Persicum bellum majorum.

LI. Dona regia in templis posuit: gemmas sibi oblatas vendidit, muliebres esse existimans, gemmas possidere, quæ neque militi dari possint, neque a viro haberi. Cum quidam legatus uniones duos uxori ejus per ipsum obtulisset magni ponderis &

inufitatæ menfuræ, vendi eos juffit: qui cum pretium non invenirent, ne exemplum in alium a regina nafceretur, fi eo uteretur, quod emi non poffet, in auribus Veneris eos dicavit, Ulpianum protutore habuit, primum repugnante matre, deinde gratias agente, quem fæpe a militum ira objectu purpuræ summæ defendit: atque ideo summus Imperator fuit, quod ejus confiliis præcipue rempublicam rexit. In procinctu atque in expeditionibus apertis papilionibus prandit atque cœnavit, cum militarem cibum, cunctis videntibus atque gaudentibus, fumeret; circumiret prope tota tentoria, a fignis abefle neminem pateretur. Si quis de via in alicujus poffeffionem deflexiffet, pro qualitate loci, aut fuffibus fubjiciebatur in confpectu ejus, aut virgis, aut condemnationi; aut, fi hæc omnia transfiret dignitas hominis, graviffimis contumeliis: cum diceret, *visne hoc in agro tuo fieri, quod alteri facis?* Clamabatque fæpius, quod a quibusdam, five Judæis, five Christianis audierat, & tenebat; idque per præconem, cum aliquem emendaret, dici jubebat, *Quod tibi fieri non vis, alteri ne feceris*: quam fententiam ufque adeo dilexit, ut & in Palatio & in publicis operibus præfcribi juheret.

LII. Idem cum quandam aniculam affectam injuriis a milite audiffet, exauctoratum eum militia, fervum ei dedit, quod artifex carpentarius efflet, ut eam pafceret: & cum dolerent hoc milites factum, perfuafit omnibus, ut modeste ferrent, & eos terruit. *Αυαλματρυ* imperium ejus, cum fuerit durus & tetricus, idcirco vocatum eft, quod Se-

natorem nullum occiderit, ut Herodianus Græcus scriptor refert in libris temporum suorum. Severitatis autem tantæ fuit in milites, ut sæpe legiones integras exauctoraverit, ex militibus *Quirites* appellans; nec exercitum unquam timuerit, idcirco quod in vitam suam dici nihil posset, quod unquam tribuni vel duces de stipendiis militum quidquam accepissent: dicens, *Miles non timet, nisi vestitus, armatus, calceatus, & satur, & habens aliquid in zonula*: idcirco quod mendicitas militaris ad omnem desperationem vocaret armatum. Apparitores denique nullos esse passus est: tribunis aut ducibus, nisi milites anteire voluit; iussitque, ut ante tribunum quatuor milites ambulant, ante ducem, sex, ante legatum, decem; hique ad domos suas reciperentur.

LIII. Et ut severitas ejus agnosci posset, unam concionem militarem indendam putavi, quæ illius in rem militarem mores ostenderet. Nam cum Antiochiam venisset, ac milites lavacris muliebribus & deliciis vacarent, eique nuntiatum esset, omnes eos comprehendi iussit, & in vincula conjici: quod ubi compertum est, mota seditio est a legione, cujus socii erant in vincula coniecti. Tum ille tribunal ascendit, vinctisque omnibus ad tribunal adductis, circumstantibus etiam militibus, & quidem armatis, ita coepit: *Commilitones, si tamen ista vobis, quæ a vestris facta sunt, displicent, disciplina majorum rempublicam tenet: quæ si dilabatur, & nomen Romanum & imperium amittamus. Neque enim sub nobis ista facienda sunt, quæ sub impura illa bestia*

nuper facta sunt. Milites Romani, vestri socii, mei contubernales & commilitones, amant, potant, lavant, Græcorum more etiam quidam se insitiunt: hoc ego diutius feram? & non eos capituli dedam supplicio? Tumultus post hoc ortus est. Atque iterum: Quin continetis vocem, in bello contra hostem, non contra Imperatorem vestrum necessariam? certe campiductores vestri hanc vos docuerunt contra Sarmatas, & Germanos, ac Persas emittere; non contra eum, qui acceptam a provincialibus annonam, qui vestem, qui stipendia vobis attribuit. Continete igitur vocem truculentam, campo ac bellis necessariam, ne vos hodie omnes uno ore atque una voce, Quirites, dimittam: & incertum, an Quirites, non enim digni estis, qui vel Romanæ plebis sitis, si jus Romanum non agnoscitis.

LIV. Et cum vehementius fremerent, ac ferro quoque minarentur, *Deponite* (inquit) *dexteras, contra hostem erigendas, si fortes estis: me enim ista non terrent. Si enim unum hominem occideritis, non nobis deerit respublica, non Senatus, non populus Romanus, qui me de vobis vindicet. Cum nihilominus post ista fremerent, exclamavit, Quirites, discedite, atque arma deponite. Mirando exemplo depositis armis, depositis etiam sagulis militaribus, omnes non ad castra, sed ad diversoria varia recesserunt. Tuncque primum intellectum est, quantum ejus severitas posset. Denique etiam signa stipatores, & ii, qui Imperatorem circumdederant, in castra retulerunt: arma collecta populus ad Palatium tulit: eam tamen legionem, quam exauctoravit, rogatus, post dies triginta, priusquam ad expeditionem Persicam*

proficisceretur, loco suo restituit, eaque pugnan-
te maxime vicit: cum tamen tribunos ejus capita-
li affecerit supplicio, quod per negligentiam illo-
rum milites apud Daphnen luxuriati essent, vel per
conniventiam seditionem fecissent exercitus.

LV. Magno igitur apparatu inde in Persas pro-
fectus, Artaxerxen regem potentissimum vicit; cum
ipse Alexander cornua adiret, milites admoneret,
sub ictu teli versaretur, manu plurimum faceret,
singulos quoque milites ad laudem verbis adduce-
ret. Fuso denique fugatoque tanto rege, qui cum
septingentis elephantis, falcatisque mille & octin-
gentis curribus ad bellum venerat, equitum mul-
tis millibus, statim Antiochiam rediit, & de præ-
da, quam Persis diripuit, suum ditavit exercitum:
cum & tribunos ea, quæ per vicos diripuerant,
& duces, & ipsos milites habere iussisset. Tumque
primum Persæ servi apud Romanos fuerunt: quos
quidem, quia indigne ferunt Persarum reges, quem-
piam suorum alicui servire, acceptis pretiis red-
didit; pretiumque vel iis, qui manu ceperant ser-
vos, dedit, vel in ærarium contulit.

LVI. Post hoc Romam venit, triumphoque pul-
cherrimo acto, apud Senatum primum hæc verba
habuit. Ex actis Senatus die septimo Kalendas Octo-
bres. *Persas, Patres conscripti, vicimus, longa elo-
quentia opus non est: tantum scire debetis, quæ illo-
rum arma fuerint, quæ apparatus. Jam primum ele-
phanti septingenti, iidemque turrati cum sagittariis. &
onere sagittarum, ex his trecentos cepimus, ducenti in-
terfæci jacente, decem & octo perduximus. Falcati cur-*

rus mille, & adducere interfectorum animalium currus ducentos potuimus: sed id, quia & fingi poterat, facere superedimus. Centum & viginti millia equitum sudimus: cataphractarios, quos illi clibanarios vocant, decem millia in bello interemimus: eorum armis nostros armavimus. Multos Persarum cepimus, eosdemque vendidimus. Terras Interamnanas, Mesopotamiæ scilicet, neglectas ab impura illa bellua, recepimus. Artaxerxen, potentissimum regem, tam re, quam nomine, fusum fugavimus, ita ut eum terra Persarum fugientem videret, & qua ducta fuerant quondam signa nostrorum, ea rex ipse signis effugerit relictis. Hæc sunt, Patres conscripti, gesta. Eloquentia opus non est: milites divites redeunt: laborem in victoria nemo sensit. Vestrum est, supplicationem decernere, ne Diis videamur ingrati. Acclamatio Senatus: Alexander Auguste, Dii te servant. Perfice maxime, Dii te servant. Vere Parthicus, vere Persicus. Trophæa tua & nos videmus, victorias & nos videmus. Juveni Imperatori, Patri patriæ, Pontifici maximo: per te victoriam de Germanis speramus: per te victoriam undique præsuminumus. ille vincit, qui milites regit. dives Senatus, dives miles, dives populus Romanus.

LVII. Dimisso Senatu, Capitolium ascendit, atque inde re divina facta, & tunicis Persicis in templo locatis, concionem hujusmodi habuit: Quirites, vicimus Persas. milites divites reduximus. vobis congiarium pollicemur, cras ludos Circenses Persicos dabimus. Hæc nos & in annalibus, & apud multos reperimus. Sed quidam dicunt, a servo suo eum proditum non vicisse regem, sed, ne vinceretur, fu-

gisse. quod contra multorum opinionem dici, non dubium est iis, qui plurimos legerint. nam & amis-
sisse illum exercitum dicunt fame, frigore, ac morbo,
ut Herodianus auctor est contra multorum opinionem.
Post hoc cum ingenti gloria, & comitante Senatu,
equestri ordine, atque omni populo, circumfususque
undique mulieribus & infantibus, maxime militum
conjugibus, pedes Palarium conscendit, cum retro
carrus triumphalis a quatuor elephantis traheretur.
Levabatur manibus hominum Alexander, vixque illi
per horas quatuor ambulare permixtum est, undique
omnibus clamantibus, *Salva Roma, quia salvus est Alexander.* Alia
die actis Circensibus, & item ludis scenicis, deinceps
congiarium populo Romano dedit. Puellas & pueros,
quemadmodum Antoninus Faustianas instituerat,
Mammæanas & Mammæanos instituit.

LVIII. Actæ sunt res feliciter & in Mauritania
Tingitana per Furium Celsum, & in Illyrico per
Varium Macrinum affinem ejus, & in Armenia per
Junium Palmatum; atque ex omnibus locis ei tabellæ
laureatæ sunt delatæ, quibus in Senatu & apud
populum lectis, omnibus nominibus est adornatus.
His vero, qui rempublicam bene gesserant, Consularia
ornamenta decreta sunt, additis etiam sacerdotiis
& agrorum possessionibus iis, qui erant pauperes,
& ævo jam graves: Captivos diversarum nationum
amicis donavit, si ætas puerilis aut juvenilis
permisit. Si qui tamen regii aut nobiliores fuerunt,
eos militiæ, non tamen magnæ, deputavit. Sola, quæ
de hostibus capta sunt, limitaneis

ducibus & militibus donavit, ita ut eorum ita essent, si heredes illorum militarent, nec unquam ad privatos pertinerent: dicens, *attentius eos militaturos, si etiam sua rura defenderent.* Addidit sane his & animalia & servos, ut possent colere, quod acceperant; ne per inopiam hominum, vel per senectutem possidentium defererentur rura vicina barbariæ, quod turpissimum ille ducebat.

LIX. Post hæc cum ingenti amore apud populum & Senatum viveret, & sperantibus victoriam cunctis, & invitis eum dimittentibus, ad Germanicum bellum profectus est, deducentibus cunctis per centum & quinquaginta millia. Erat autem gravissimum reipublicæ, atque ipsi, quod Germanorum vastationibus Gallia diripiebatur. pudoremque augebat, quod, victis jam Parthis, ea natio imminabat reipublicæ cervicibus. quæ semper etiam minusculis Imperatoribus subiecta videbatur. magnis igitur itineribus, lætis militibus, contendit. Sed cum ibi quoque seditiosas legiones comperisset, abjici eas præcepit. Verum Gallicanæ mentes, ut sese habent, duræ ac retrogradæ, & sæpe Imperatoribus graves, severitatem hominis nimiam, & longe majorem post Heliogabalum, non tulerunt. Denique agentem eum cum paucis in Britannia, ut alii volunt, in Gallia in vico, cui Sicila nomen est, non ex omnium sententia, sed latrocinantium modo quidam milites, & hi præcipue, qui Heliogabali præmiis effloruerant, cum severum Principem pati non possent, occiderunt. Multi dicunt, a Maximino immisos tirones, qui ei ad exer-

cendum dati fuerant, eum occidisse: multi aliter: a militibus tamen, constat, cum injuriose quasi in puerum eundem, & matrem ejus avaram & cupidam, multa dixissent.

LX. Imperavit annis tredecim, diebus novem. Vixit annis viginti novem, mensibus tribus, diebus septem. Egit omnia ex consilio matris, cum qua occisus est. Omina mortis hæc fuerunt. Cum nataleni diem commendaret, hostia cruenta effugit, &, ut se civiliter gerebat, ac permixtus populo erat, albam ejus vestem, cum qua consliterat, cruentavit. Laurus in Palatio cujusdam civitatis, a qua proficiscebatur ad bellum, ingens & antiqua, tota subito decidit. Arbores fici tres, quæ ficus eas ferrent, quibus *Alexandrinarum* nomen est, subito ante illius tentorium deciderunt, cum tentoria imperatoria his annexa essent. Mulier Druas eunti exclamavit Gallico sermone, *Vadas, nec victoriam speres, nec te militi tuo credas.* Tribunal ascendit, ut concionaretur, & faustum aliquid diceret: ita cœpit, *Occiso Imperatore Heliogabalo.* hoc tamen omni fuit, quod iturus ad bellum, milites alloqui minus fausta oratione cœptaverat.

LXI. Sed hæc omnia vehementissime contempsit: profectusque ad bellum, in loco supra dicto ita occisus est. Pranderat forte publico, ut solebat, convivio, id est, apertis papilionibus, cibo militari accepto, (neque enim aliud a discutientibus militibus in tentoriis est repertum) & cum quiesceret post convivium, hora diei fere septima, unus ex Germanis, qui scurrarum officium susti-

nebat, ingressus, dormientibus cunctis, solo tantum Imperatore intervigilante visus est: cui Alexander, *Quid est*, inquit, *contubernalis?* Num aliquid de hostibus nuntias? At ille metu perterritus, & sperans, non posse evadere, quod in tentorium Principis irruisset, ad contubernales suos venit, eosque ad durum Principem interimendum exhortatus est: qui subito plures armatique ingressi, inermes & obsistentes contruncaverunt, ipsumque pluribus ictibus confoderunt. Aliqui dicunt, omnino nihil dictum, sed tantum a militibus clamatum, *Exi, recede*: atque ita obtruncatum juvenem optimum. * Sed omnis apparatus militaris, qui postea est ductus in Germaniam a Maximino, Alexandri fuit, & potissimus quidem per Armenios, & Osdroenos, & Parthos, & omnis generis hominum.

LXII. Contempsisse Alexandrum mortem, cum ferocitas mentis, qua militem semper attrivit, tum etiam illa declarant. Thrasylbulus mathematicus illi amicissimus fuit: qui cum ei dixisset, necessitatem esse, ut gladio barbarico periret, primo lætatus est, quod sibi mortem bellicam & imperatoriam crederet imminere: deinde disputavit, ostenditque, optimos quosque violenta morte consumptos; cum diceret, ipsum Alexandrum, cujus nomen teneret, Pompejum, Cæsarem, Demosthenem, Tullium, & ceteros insignes viros, non quæta morte oppetisse; tantumque animi habuit, ut putaret se Diis comparandum, si in bello periret: sed res eum fefellit. Nam & gladio barbarico, & scurræ barbari manu, verum non in bello, sed belli tempore, periit.

LXIII. Mortem ejus milites, & qui exauctorati ab eo quondam fuerant, gravissime tulerunt, atque auctores cædis trucidarunt. Populus vero Romanus, Senatusque omnis cum provincialibus cunctis, neque tristius unquam neque asperius acceperunt; simul quod successoris asperitas atque rusticitas Maximini, utpote hominis militaris, cui cum filio post eum imperium delatum est, graviorem fati necessitatem videbatur ostendere. Senatus eum in Deos retulit. Cenotaphium in Gallia, Romæ sepulcrum amplissimum meruit. Dati sunt & sodales, qui *Alexandrini* appellati sunt: addita & festivitas matris nomine, atque ipsius, quæ hodieque Romæ religiosissime celebratur, natali ejus die. Causa occidendi ejus ab aliis hæc fuisse perhibetur, quod mater ejus, relicto bello Germanico, Orientem ad jactantiam sui vellet redire, atque ob hoc esset iratus exercitus. Sed hæc ab amatoribus Maximini ficta sunt, qui videri noluerunt, Imperatorem optimum ab amico suo interfectum, contra jura humana atque divina.

LXIV. Hactenus imperium populi Romani eum Principem habuit, qui diutius imperaret; post eum certatim irruentibus, & aliis semestribus, aliis annuis, plerisque per biennium, ad summum per triennium imperantibus, usque ad eos Principes, qui latius imperium tetenderunt, Aurelianum dico, & deinceps. de quibus, si vita suppeditaverit, ea, quæ comperta fuerint, publicabimus. Reprehensa sunt in Alexandro hæc, quod Syrus esse nolebat, quod aurum amabat, quod suspiciosissimus erat, quod vestigalia multa inveniebat, quod se Magnum Alex-

Scriptu. H. A.

V.

andrum videri volebat, quod nimis severus in milites erat, quod curas privatas agebat : quæ omnia in republica instituerat. Scio sane plerosque negare, hunc a Senatu Cæsarem appellatum esse, sed a militibus : qui verum prorsus ignorant : dicere præterea, non hunc fuisse consobrinum Heliogabali : qui, ut nos sequantur, historicos ejus temporis legant, & maxime Acholium, qui & itinera hujus Principis scripsit.

LXV. Soles quærere, Constantine maxime, quid sit, quod hominem Syrum & alienigenam, talem Principem fecerit, cum tot Romani generis, tot aliarum provinciarum reperiantur improbi, impuri, crudeles, abjecti, injusti, libidinosi. Jam primum possum de bonorum virorum respondere sententia, potuisse natura, quæ ubique una mater est, bonum Principem nasci : deinde timore, quod pessimus esset occisus, hunc optimum factum. Sed quia verum est suggerendum, clementiæ ac pietati tuæ lecta referabo. notum est illud pietati tuæ, quod in Mario Maximo legisti, *meliolem esse rempublicam & prope tutiorem, in qua Princeps malus est, ea, in qua sunt amici Principis mali : siquidem unus malus potest a plurimis bonis corrigi ; multi autem mali non possunt ab uno, quamvis bono, ulla ratione superari.* Et id quidem ab Homulo ipsi Trajano dictum est, cum ille diceret, Domitianum pessimum fuisse, amicos autem bonos habuisse, atque adeo illum magis odio fuisse, qui rempublicam pejoris vitæ hominibus commendaverat, quia melius est unum malum pati, quam multos.

LXVI. Et ut ad rem redeam, Alexander quidem &

ipse optimus fuit; nam hoc nemo vult, nisi bonus: & optimæ matris consiliis usus est. ac tamen amicos sanctos & venerabiles habuit, non malitiosos, non furaces, non factiosos, non callidos, non ad malum consentientes, non honorum inimicos, non libidinosos, non crudeles, non circumventores sui, non irrisores, non qui illum quasi fatuum circumducerent; sed sanctos, venerabiles, continentes, religiosos, amantes Principis sui, & qui de illo nec ipsi riderent, nec risui esse vellent, qui nihil venderent, nihil mentirentur, nihil fingerent, nunquam deciperent existimationem Principis sui, sed amarent. Huc accedit, quod eunuchos nec in consiliis, nec in ministeriis habuit, qui soli Principes perdunt, dum eos more gentium, aut regum Persarum volunt vivere: qui a populo & amicis Principem submovent: qui internuntii sunt, aliud, quam respondetur, sæpe referentes, claudentes Principem suum, & agentes ante omnia, ne quid sciat, qui cum emti sint, & pravi fuerint, quid tandem possunt boni sapere? Erat denique ejus ipsius sententia: *Ego de Præfectorum, & Consulum, & Senatorum capitibus, mancipia ære emta judicare non patiâr.*

LXVII. Scio, Imperator Constantine, quo periculo ista dicantur apud Imperatorem, qui talibus serviit, sed salva republica, posteaquam intellexisti, quid mali clades istæ habeant, & quemadmodum Principes circumveniant, & tu eos eo loci habes, ut nec chlamyde uti jusseris, sed necessitatibus domesticis delegaris. Jam illud insigne, quod solum intra Palatium, præter Præfectum, & Ulpianum quidem, neminem vidit: nec dedit alicui facultatem

vel fumorum vendendorum de se, vel sibi de aliis male loquendi, maxime occiso Turino, qui illum quasi fatuum & væcordem sæpe vendiderat. His accessit, quod amicos & parentes Alexander si malos reperit, aut punivit, aut, si vetus vel amicitia, vel necessitudo non sivit puniri, dimisit a se, dicens, *His carior est mihi tota respublica.*

LXVIII. Et ut scias, qui viri in ejus consilio fuerint: Fabius Sabinus, Sabini insignis viri filius, Cato temporis sui; Domitius Ulpianus, juris peritissimus; Ælius Gordianus, Gordiani Imperatoris pater, & ipse revera vir insignis; Julius Paulus, juris peritissimus; Claudius Venatus, orator amplissimus; Pomponius, legum peritissimus; Alphenus, Aphricanus, Florentinus, Martianus, Callistratus, Hermogenes, Venulejus, Triphonius, Metianus, Celsus, Proculus, Modestinus; hi omnes juris professores discipuli fuere splendidissimi Papiniani, & Alexandri Imperatoris familiares & socii, ut scribit Acholius & Marius Maximus; Catilius Severus, cognatus ejus, vir omnium doctissimus; Ælius Serenianus, omnium vir sanctissimus; Quintilius Marcellus, quo meliorem ne historiæ quidem continent. His tot atque aliis talibus viris, quid mali potuit cogitari vel fieri, cum ad bonum consentirent? Et eos quidem malorum cohors depulerat, qui circumvenérant Alexandrum primis diebus: sed prudentia juvenis, his malis occisis atque depulsis, amicitia ista sancta convaluit. Hi sunt, qui bonum Principem suum fecerunt: & item amici mali, qui Romanos pessimos etiam posteris tradiderunt, suis vitiiis laborantes.



